

國學基本叢書  
湖海詩傳  
二

上海五洲書局  
館藏

上海图书馆藏书



A541 212 0006 1671B

書叢本基學國

傳 詩 海 湖

(二)

輯 利 王



行發館書印務商

# 湖海詩傳卷十四

## 劉壩

字崇如。號石菴。諸城人。乾隆十六年進士。今官體仁閣大學士。

蒲褐山房詩話。予以乾隆戊寅爲中書舍人。時先生已觀察山西。後四年召直武英殿校書。初至京師。見文正公。公方閱予所題李龍眠畫十八羅漢贊。公問曰。曾識王某否。對曰。未也。公因指冊中一應真像曰。王某似此。故先生嘗謂曰。我兩人定交于圖畫中。也。文正公清得重望。雅不欲以詞章自見。先生如之。先生督學江浙。及予在陝西。江右念及輒手書近詩見示。清心超悟。有香山東坡風格。十餘年所得甚夥。而漸次遺佚。門人陳子韶因合梁侍講同書。鐫于西湖上名劉梁合璧。今所採者皆合璧中詩。全集則未之見也。

### 題阿少司空迪斯尋河源小像

二萬輿圖驛使通。遠探星宿被恩隆。一源迢遞來天上。九曲分明到眼中。密勿陳情歸聖鑒。飛騰絕域嗣家風。斯人宛在無今昔。鯨背游仙問海東。

### 述庵司寇惠及水仙木瓜賦此以謝

秀啓珠胎蘊妙香。不離色界住仙鄉。晴雲窈窕生虛白。新月嬋娟上晚涼。幽夢乍回天半曉。伊人宛在水中央。朝來解佩留餘馥。應爲凌波託意長。

拜賜曾霑貢篚臨。香清色正果中琛。何人投報偏酬玉。幾處園林競鑄金。風露滿盤生遠思。芝蘭入室有



同心。便因雅贖成新咏。一種清芬愜素襟。

大士巖

蒼巖近接舊山房。藥竈茶鑪入草堂。黃葉滿林多老樹。綠陰一徑有垂楊。新參大士心源寂。屢夢前塵水月涼。他日宦成歸小隱。繞檐雲海看茫茫。

贈日者

小黠從來是大癡。紛紛六合又三奇。人間富貴誰偏有。天上星辰爾遽知。何事一身還作客。更憐八口亦長飢。鴉鳴鵲噪原無過。載好其音且聽伊。用石霜語

贈相者

把鏡回看便了然。底須骨相問流年。祇應鬢雪將人老。那得心光伴月圓。媿我支離形似鶴。笑渠落拓酒無錢。春風楊柳長河路。認取誰儂待喚船。

題曹麟書學士天下名山圖

不知雲夢芥吾胸。蓬島方壺有路通。曾倚鼉身看日出。又凌鵬背試培風。尙平婚嫁何嘗累。顧陸丹青未足同。他日窺窗誇曼倩。真形五嶽在囊中。

題大學士英勇阿公雲巖小照

坐斷空花不計年。心光常照意珠圓。却參枯木龍吟句。八陣風雲玉帳前。  
萬里歸來鬢雪新。桓圭袞繡畫麒麟。白雲無盡閑舒卷。依舊青山似故人。  
石室松風滿意聽。濤翻雪落語泠泠。不須更覓無生話。此是新傳了義經。  
彷彿拈花笑口開。等閑蔬笋味鹽梅。從容幾刻爐烟裏。佛語親承拜賜回。

題徐樹峰問僧圖

有何不了更求僧。聾啞兼盲那解譬。聽取兩松常說法。居然北秀對南能。  
渾忘官職外形骸。小憩還招釋子偕。未必有疑須問答。愛渠磨衲共芒屨。

譚尙忠

字會文。號古愚。南豐人。乾隆十六年進士。官至吏部侍郎。有紉芳齋詩集。

遊馬鞍山

石磴欹斜上翠微。黎川風景到臆扉。雲橫遠岫衣千摺。水落平橋帶一圍。仙客何年乘鶴去。山僧向夕掃  
松歸。聞鐘幾動烟霞癖。檻外寒枝挂落暉。

無題

東風無力耐春殘。倦體輕盈怯小寒。獨坐孤帷難自遣。細研松露寫秋蘭。

### 周於禮

字綏遠。號立崖。嶧峨人。乾隆十六年進士。官至大理寺少卿。有聽雨樓詩草。

蒲謁山房詩評。少卿生在要荒。性耽吟詠。又嗜書法。為侍御時。稍暇輒行琉璃廠書肆。中見有佳者。隨時售之。宋元石刻既多。真蹟尤不少。故取褚顏蔡蘇黃米六家。先勒于石。蓋非全璧也。旋以疾終。所居聽雨樓。在京師神匠胡同。為明嚴介溪別墅。國初徐健菴尚書居之。繼歸于溧陽史文靖公。其後分為數處。畢君秋帆得之。為燕會觴詠之地。及秋帆出為觀察。遂歸少卿。迄今三十年。是樓不知誰屬。石刻亦無可攷。

### 曉發

亂山迷向背。一徑忽東西。曉日明征路。清風送馬蹄。仰瞻天宇闊。乍覺嶺雲低。遙憶金華叟。尋羊遍幾谿。  
襄城寄田玉年同年

雞幘關前路。遙遙捲旆旌。迴峯失雲棧。一徑入襄城。地邇房陵舊。人懷漢水清。使星何處覓。珍重故人情。

### 武侯祠石琴

澹月低祠樹。疎星帶遠林。言尋沔陽路。尙想武侯琴。片石真存漢。無絃亦賞音。挑燈讀古碣。恍見出師心。

### 出陳倉

黃紙除書媿我名。三秋風雨捲歸旌。飽經棧閣千重險。還對秦川一掌平。陳寶祠荒迷故跡。礪溪石在有

餘清。關心最是隴城北。古水長流日夜聲。

穆丹

字荔帷。烏雅氏。滿洲正黃旗人。乾隆十六年進士。官至嘉定府知府。

同芷堂同年登松岡喇嘛寺。

巖巖番寨高。崢嶸佛寺壯。探奇偕勝友。歷覽懷抱暢。初緣鳥道行。漸陟羊腸上。碉房幽似墨。拾級頗冗長。土官偃僕迎。劍佩光泯漾。樓塔矗雲表。欄楯環相向。登閣敷座具。錦繡四壁障。僧徒雜沓趨。鐘鼓演梵放。諸天佛菩薩。幻詭窮變相。蛟龍互攫拏。鬼物逞撈掠。罽毘揭中天。貝葉森三藏。披衣極冥搜。拓窗肆高望。青蒼山遠近。蜿蜒水激宕。民稠雜市廛。高下紛難量。悠然清景舒。豁爾心目廣。須臾駿奔走。樽俎執饋餉。入口駭腥羶。下箸窘鹽醬。番童能大嚼。薄劣慚壯浪。番民貌睢盱。番女態輕颺。匍匐延道左。相送何恭讓。愧非國工手。莫繪新奇狀。徐君富文筆。詔鈞奏清唱。瓊瑤如我報。嘉惠永不忘。

惠棟

字定宇。號松崖。元和人。諸生。乾隆十六年以經學徵。

蒲褐山房詩話。惠氏四世傳經。至學士而大。至徵君而精。論經術必宗漢魏。六朝次之。其于史子諸書。亦必取自唐以前。六書從說文。輔以玉篇廣韻。所著書凡十餘種。先是東南文士。疎于經誼。百有餘年。及徵君出。而古學大昌。丁卯戊辰後。予與鳳嗜曉徵。企晉從而羽翼之。繼盧雅。兩舉秋帆。又為盡粹所作。行世。而四庫全書館開。紀曉嵐陸健男。悉取其書。作為提要。發明大指。然後古經師大儒流傳之緒。猶可窺其涯略。皆徵君力也。徵君祖父兼精吟詠。蓋辨香漁洋故徵君少撰精華錄。訓纂亦以箋疏之學。行之極為該博。其後經術日深。不復為詩。然其序吳企晉詩。謂詩之道有根柢。有興

會根抵原于學問與會發于性情二者兼之始足稱一大家即其所言亦談藝者當所奉為質的者  
 已時休寧戴東原震均以經學稱且長于九章三角之術但所宗在江氏慎修多採宋元之說與微  
 君鑽研漢學者不同詩亦無聞因與注善故附記于此徵鄭君及神虞翻納甲荀爽升降京房飛伏  
 復采之羣經注疏及史記兩漢書諸注以發明孟喜卦氣鄭君及神虞翻納甲荀爽升降京房飛伏  
 共五家惟京房即火珠林氏所釋者僅有西晉得朋東北喪朋及月幾望數條其餘亦無從推究已與經  
 傳往來上下多不通虞氏之術推之各爻皆難取象其卦氣即六日七分自後漢書至五代史  
 神本與卦氣相通而所云上直某星推之各爻皆難取象其卦氣即六日七分自後漢書至五代史  
 歷官皆用以驗中節六候而不可以釋經文且東漢時太初四分三統諸歷皆存鄭君又嘗注乾象  
 歷于大餘小餘盈縮強弱不知用何聖法以為推步此諸家之說難合亦難通故周易述亦以鄭義  
 虞義為言而不能因端竟委上符先聖微言也若孔安國古文尚書歷代大儒疑之徵君鈞深至遠  
 抉所從來雖毛氏寃詞無以解免其明堂大道錄及禘說具見三才之奧而于建置在郊在國與九  
 室十二室太廟太室亦無定義故其子若孫述臨歿言以所著未成為嘆正須後來同志疏通證明  
 以蕪復古乃近時英俊一知半解甚非徵君  
 守先待後之意而背聖人一貫會通之旨矣

題高司寇其韋畫鍾馗

老馗生在東南方。周行天下窮要荒。生不逢世死作殤。誓為明主殲游光。頭帶雞父身朱裳。居傍石室鄰  
 銅墻。庶疫剛瘴莫我當。以鬼為飯霧為漿。阿誰出出嘯于梁。擅吹玉笛偷香囊。老馗見之心怒張。赫軀拉  
 幹抽肝腸。一朝疴疾除膏肓。神靈衛德感上皇。畫師屬意追豪芒。肖成馗體真軒昂。千載絕筆遠擅場。誰  
 其繼者高遼陽。指頭蘸墨何披猖。能與吳生相頡頏。周官設氏歐方良。老馗遺像非荒唐。開元粉本難評  
 量。此圖應出千金裝。詩成徒倚行風廊。寒星欲墮天蒼浪。

陳鴻寶

字衛叔。號寶所。仁和人。乾隆十六年召試舉人。官至給事中。

蒲謁山房詩話。寶所風神蕭散。舉止頗似晉魏間人。與予同在內閣者五六年。及余遷副都御史。寶所爲給事中。同在鑿省。故相知最深。又好書畫。時金壽門、農工、墨梅、重自、珍惜、獨贈余十六幅。寶所見之。借去賞玩。累月既而索之。笑曰。我以為是爲性命矣。其可還乎。蓋性情幽僻。如此詩。瀟灑出俗。如見其人。弟鴻賓字用儀。亦工畫。附見於後。

### 胡敬銘招同杭堇浦諸人消暑分得帶字

我性既畏炎。矧方病求艾。閉門謝熱客。一榻掃埃盞。恢台氣何驕。坐臥歎無奈。忽枉故人書。招我西郊外。茶瓜足清供。吳榜初擊汰。四山曉翠分。十里水風大。長林半翳蟬。亂荷自搖蓋。佳處指南屏。一徑破深靄。寒泉沁詩脾。陰洞寂羣籟。拾級憩孤亭。密影交松檜。相對禮數寬。儘容弛巾帶。清言暑不知。如脫酷吏害。磨崖何年書。字畫辨茫昧。流連至斜曛。茲游應數最。擬作追涼圖。妙手倩誰繪。載酒儻重來。記取此高會。

### 和梁山舟移竹用漁洋山人韻

平生山澤癯。骨相寒少肉。世味百不宜。破夏來看竹。好句如琅玕。主人迴絕俗。十丈東華塵。得此始刮目。颯然聲已秋。幽夢落崖谷。坐待月影篩。勿假一星燭。

### 過汪二玉岑湖上別業奉贈

十年阻面惜心朋。歸計菟裘歎未能。近水誅茆輸爾早。款門看竹記吾曾。生涯漫指營巢燕。氣味何如退院僧。乘興自今來往熟。春波一櫂入西陵。



六月十七晚赴西苑雨後宿雲公精舍

城西積水護田廬。巖岫歸雲解駁徐。柳影沙堤聞馬語。豆花籬落見蟲書。多情涼月如看待。可畏炎光且破除。又復打包烟寺宿。一聲清磬萬緣疎。

雨夜懷可儀弟

欲買湖莊費百金。白頭行坐自沉吟。少游有語哀新息。老圃何年學漢陰。廊野尙餘三樂在。具茨奚事五悲深。西風又響庭前樹。枵觸平生聽雨心。

湖上卽目

斷岸枯楊不繫船。一雙白鳥破寒烟。願尋好手繫東絹。爲寫重湖水墨天。

遊慈雲寺井序

寺建于周顯德二年。在杭之城東隅。舊有白雲居。甘露泉。鸚鵡院。娑羅閣。紫芝堂。翠竹林。赤松亭。梧桐塔。諸勝盡廢。今所存者寒泉一泓。苦竹滿徑。及寺前之萬生池。千衆井耳。明蕭山魏驥爲寺記。趙古書記後載東坡慈雲四景絕句石刻。在寺。今蘇集失載。壬午夏日與汪五隨丁二傳道。暑過此。感歎之久。輒形于詩。

一牛鳴地意行遲。吟遍眉山五字詩。偶與殘僧話陳跡。弄泉看月立多時。

佛像纔教毀作錢。誰知初地占幽偏。赤松老盡梧桐死。石碣猶存顯德年。顯德二年詔毀天下佛像鑄錢正寺建時

### 七夕寄內

瓜果紛陳乞巧盤。孤懷今夕不成歡。人間亦有經年別。可作盈盈一水看。

### 吳煊

字荀叔。號杉亭。全椒人。乾隆十六年召試舉人。官山西同知。

蒲褐山房詩話。荀叔爲玉隨編修從孫。疏節闕目。眉宇軒然。在京師如梁山舟。陳寶所。王穀原。諸君皆親愛之。工勾股旁要之學。直綸閣者數年。出爲郡司馬。又數年而歿。兼工詞。予刻入琴畫樓詞鈔中。

### 冬日寄王德甫

孟冬風日淒。庭樹脫殘葉。攬衣步前楹。霜華覆地濕。冉冉歲將暮。鬱鬱憂懷疊。所思天一方。道遠關梁隔。矯首望飛鴻。徘徊空竚立。

鳳凰集阿閣。梧桐生朝陽。造化鍾靈異。蔚爲家國祥。明珠薦玉敦。太廟陳五英。遇合會有時。乃卜熙景昌。之子榘楠材。細理敷文章。班匠顧不用。弃擲委路傍。已矣復何道。嘆息摧中腸。

朔風激塵鞅。九陌弛軒車。朝謁金張館。暮讌許史廬。新知若膠漆。灼灼春華敷。昔時同盟友。窮賤趨路隅。高言諱姓氏。目笑何其迂。所以楊子雲。守元惟著書。

我愛榮啓期。帶索朝歌琴。悠然得三樂。舉世無知心。高風一以邈。至今傳濟陰。吾友遠行客。永慕梁父吟。金函與玉牒。宵窵勤追尋。嗤彼於陵子。毋乃避人深。因風託情愫。惠我瑤華音。

效香奩體

最憐曲榭近東墻。長夏風微院宇涼。綵線閑拋貪鬪草。繡簾不捲爲熏香。牕中避暑揮團扇。花下窺人佩錦囊。眉語目成都省記。何時夢雨到高唐。

寄德甫

征衫拂拭塵猶在。風雪重呼江上舟。辛苦可堪聞塞雁。飄零只合伴沙鷗。敝廬種竹成虛想。古埭看花負勝游。騎省年來雙鬢改。莫將青鏡照煩憂。

長江東望雪廉纖。料得推篷朔吹嚴。舊業凋殘嗟道路。壯心磨滅爲齏鹽。人如失侶投林鳥。事比沿流上竹鮎。又挂一帆京口去。西津潮落晚峰尖。

客路茫茫仗友生。王郎書尺訂鷗盟。性因愛嬾難言學。詩爲多愁易不平。三泖湖波春草綠。九峯山色晚霞晴。何當與爾乘船去。手把漁竿變姓名。

褚寅亮

字搢升。號鶴侶。長洲人。乾隆十六年召試舉人。官刑部員外郎。

蒲褐山房詩話。鶴侶少以制義名。中年覃精經術。宗惠氏之學。一以註疏爲歸。三禮折衷。賈孔尤通。喪服時公羊何氏學。久無循習者。所謂五始三科九旨七等六輔二類之義。不傳於世。惟武進莊侍。郎存與默會其解。而鶴侶能闡發之。世稱爲絕業。以病假歸。主常州龍城書院八年。羣經咸有論撰。其書尙存於家。惜未登削。嗣後學無由津逮耳。

### 題王德甫三泖漁莊圖

王郎著論同潛夫。長身鵠立山澤癯。十載相於道不孤。譬飲醇酒嘗醍醐。忍饑朝誦至日晡。汲深綆短陋俗儒。嗜好酸鹹與世殊。弗趨榮利耽菰蘆。圓泖之濱宅一區。蒼茫震澤來委輸。芰荷荇藻紛縈紆。水禽拍拍游鵝隅。橫雲秀出俯衆雛。空翠無定難名摹。高人獨坐倚槁梧。素琴一張酒一壺。置身彷彿在畫圖。秋風忽起雲滿湖。無數浴鷺兼飛鳥。筆牀茶竈煙艇俱。短棹微茫入有無。但聽款乃聲于喁。網來魚婢擱蟹奴。一笑頭銜署釣徒。草堂佳趣致足娛。浮雲富貴誠須臾。愧我長安塵俗軀。如馬戀棧鳥在笱。韭畦蘗圃日就蕪。便擬歸畊返故都。卜鄰君側相歌呼。檝頭繫柳池栽蒲。風流來往無牽拘。吾將終老於是夫。息壤在彼盟弗渝。

### 懷王德甫

春風生夕館。之子意何如。靜對滄浪水。閑鈔笠澤書。禽聲鳴復止。雲態卷還舒。想爾長吟罷。憐予未定居。

### 邵嗣宗

字鴻箴。號蔚田。太倉人。乾隆十七年會試第一。官至翰林院侍讀。

鐵畫蕪湖鐵工湯鵬能揉鐵作畫凡花竹蟲鳥曲盡生致又能作山水屏障其大幅積歲月始成故不可得所傳惟尺幅小景耳好事者以木範之懸之虛壁亦復四合而成一燈其爐錘之巧前此未有也鵬沒後無得其傳者間仿爲之即工拙不侔甚矣山舟紀之以詩并囑予同賦

劑鋼起頑礦百鍊轉靈秀歛從烈燄中飛精入文囿何年神鬼工絕藝似指奏赤手操鑪錘突與筆妙鬪萬象宛轉成意匠孰指授布散紛細碎層疊逞刻鏤有時規嶽勢生拗蟲數岫上聳蒨螺髻下搶俯鵬味忽翦半江水挾勁作波皺潏洄如有情石竇隱搜漱或狀花與竹葩葉互煦茂亦懸鳥與蟲意態足飛走倣詭不可名一一畫心就本色留吾真衆形虛與構異哉工倅指剛耿乃受揉奪胎無遁藏肖物中理腴創此質而巧物理安可究得非龍護儔爐前默提佑不然古畫師降靈弗待咒洩此造化奇神物敢呵詬流傳少益珍好事那輕購粉墨有時消此畫與世壽

從軍行贈別徐生淦

給六品服隨侍讀索爾遜賈定邊將軍印赴巴里坤軍營

徐生昂然來短後曼胡纓問生何爲者持符走從征自言平生志談笑無丁零男兒輕萬里安能跼欄楹沙場枕戈臥仰看天漢橫馬上飲蒲萄焉知兒女情況今天子聖西賊破膽驚疾霆走尺一萬里暗無聲將軍大威武金印如斗形龍謙蟠十丈呵護趨羣靈風雲赫欲動白日低行營會鈐一紙書揮彼十萬兵蹴踏無空闊突殪狂奔鯨生也壁上觀腰劍亦爲鳴右顧天山服左盼交河清崔嵬玉門關杳與暮雲平歸來笳鼓競一笑投青萍我請爲生歌去矣無留行少年重意氣大荒亦門庭迂儒昧遠識坐令老此生

長揖跨雕鞍。結束何鮮明。脚下豪豬鞞。頭上烏鴉翎。疾出橫門道。回首春城晴。

### 梁同書

字元穎。號山舟。錢唐人。乾隆十七年進士。官至侍講。

蒲褐山房詩話。元穎爲我師。文莊公長子。少入詞館。戊寅大考。翰詹仰荷恩綸。升擢侍講。旋充講官。以丁嗣父憂歸。嬰疾遂不復出。而老師宿儒。文人詞客。踵門來見。必倒屣迎之。其浙閩貴人。軒車過訪。報以一刺。之外未嘗往也。能詩。尤工書。東南士大夫碑版及琳宮梵宇題額。有求輒應。而節鎮屬書。則歷年不報。海內益以此推重之。年踰八袞。明燈矮紙。猶能運筆。人謂唐歐陽信本。明文衡山之也。比也。

### 秋圃雜咏同述庵作

白花何淡淡。紫花何離離。晚花角上總。早花眉下垂。一番涼露泫。幾點疎雨肥。生香傍籬落。風味野老知。我來棚底坐。散髮斜陽時。似聞絡緯語。爲我寫鄉思。豆花

秋星曉未收。光景淨於洗。小草澹衆芳。延緣青竹尾。圓摺皺欲舒。一碧翦天水。惜哉抱弱質。開落朝槿似。爲語牽蘿人。莫採此花蕊。采遲色不如。采早露如許。叶牽牛花

昔人疏草木。或云卽蒲蘆。底傍青豆架。高綴碧玉壺。犀老腹則墜。斷取霜寒初。小可供几案。大可浮江湖。所以王元禮。愛玩常區區。詩成在一擲。我愧非其徒。蘆葫

吾弟讀書處。青乳顏其屋。宿土埋深根。蟠屈纔一束。方春引龍須。怒走漲天綠。漸看纓絡垂。却喜珠露沃。



顛綻不容排。色淨似可漉。遠人憶此無。悔不涼州牧。

桃浦

沙壟寬作畦。香苗自成畝。年年秋社前。磊落分子母。黃割朶朶雲。紅茁纖纖手。是時飽霜螯。到處鳴螿口。

園官吾故人。分致意則厚。藉糟儲瓶罌。歸而謀諸婦。

薑

蔬中有菜服。是處種不乏。尤宜入沙壤。脆玉不勝搢。北人麥爲飯。炎毒苦難戢。生啄勝梨頭。涼冷沁肺葉。園丁資地利。街市肩擔壓。不見王爽兒。千緡易宦業。

蘿蔔

題翟晴江書巢圖

先生吾故人。相知逾卅載。生平無一嗜。枕藉書史內。晝盡繼之夜。燈檠鎮長對。丹黃雜研摩。筆未事鋤刈。編書動等身。咿嚶欲枯肺。前生定書魚。字字百雜碎。所居城東鄉。鍵戶謝俗態。茅堂開三間。以書作襟背。左旋而右抽。上睽或旁睨。縱之復橫之。亂疊棊几碍。嶷嶷兩孫雛。毛羽非凡輩。攤書解滿牀。有若盤弄碎。先生巢中居。暇或示勤誨。居然南面擁。寫貽羸金穢。吾生眼如月。惰學淪幽晦。豈無卷五千。閣束同捆載。少年倏又過。炳燭光不逮。對茲巢中人。能無生感悔。

題陳九儀畫冊

述庵先生吾畏友。一代詞場斲輪手。風雅端能被後生。揄揚輒向誇誰某。絳帷弟子穎川陳。詩名耳熟殊凡倫。尤工繪事逞餘技。有才不偶徒風塵。風塵漫說卑棲穩。落拓官身稱吏隱。一檄來從青浦濱。家江恰

與錢湖近。湖山藹藹波澄。銜齋几淨鋪溪藤。折腰敢笑種秫令。署尾胡礙砮松丞。官閒大可供瀟灑。況有丹青足陶寫。昨來示我幾幅圖。幅幅林泉總清雅。神明古法師古意。眼前誰復如君者。我昔聞陽城主簿陳仲仁。畫格直與吳興隣。又聞待詔陳子久。渲染徐熙得八九。君家家法本天機。一官可惜轅下驥。却將墨瀋了公事。等是江南胡不歸。卅年我愧林間住。爲欠平生濟勝具。讀君之畫贈君詩。胸中觸撥雲烟趣。安得煩君徧寫湖上山。坐臥空堂長不去。

題溫忠烈公遺像卷內附家信二通

名璜烏程人

釋褐官司李。時危髮已皤。四郊爭舉燧。一掌獨堙河。劍得知心友。書留正氣歌。還憐妻與女。相伴國殤多。已墜虞淵日。揮戈孰魯陽。力難醫國活。身遂與城亡。小影蒼顏見。孤忠碧血藏。易名褒聖主。千載發幽光。

同弟敦書過江上舊廬集社

小徑升堂舊不斜。夜來吹折數枝花。已知出郭少塵事。且盡芳尊戀物華。雲白山青萬餘里。江深竹靜兩三家。百年地僻柴門迴。弟勸兄酬何怨嗟。

答友人作二首

卅年蒲柳早衰蕪。壯不如人況老乎。苦筭硬差良有願。葫蘆依樣已難摹。休言報國文章在。只合投閒草木俱。物不答施天地大。始終慙負是頑軀。

北望君恩首重回。一門三世盡栽培。臣心不是菴施草。天意須憐擁腫材。絮到泥沾飛不起。豆和灰冷爆難開。它生願作銜環雀。再上觚稜高處來。

題百菊溪廉使雲樹歸舟圖即送之黔藩任

辱公車騎數經過。忽漫相逢欲別何。天下青山行處半。孟郊詩。舊說天下山半在黔中。坐中白髮去思多。蠻童獠婦歸懷畏。峒草江花入嘯歌。莫道帝城雲樹遠。它年旄節返鳴珂。

錢載

字坤一號蘅石秀水人乾隆十七年進士官至禮部侍郎有蘅石齋詩集。

蒲褐山房詩話蘅石襟情蕭曠真率自如乾隆甲戌初夏從金檜門總憲一經齋與余訂交遂成雅契性豪飲常借朱竹君學士金輔之殿撰陳伯恭王念孫兩編修過余冬夜消寒卷波浮白必至街鼓三四下時竹君推戴東原經術而蘅石獨有遠言論至學問可否得失處蘅石顛發赤聚訟紛拏及罷酒出門斷斷不已上車復下者數四月苦霜濃風沙蓬勃餘客佇立以俟無不掩口而笑者善鑒別法書名畫望之審其真偽故尤工繪事晚年致仕歸藉以給朝夕乾隆庚戌年八十三上元日猶爲予做黃鶴山樵長林修竹極雨葉風枝之妙詩率然而作信手便成不復深加研鍊殆其鄉李日華姚綬一輩人也。

蒼塢城丙舍塢至元嘉禾志作于

嗚呼先侍御青衿劾大璫。明思陵初先公以貢生首劾魏忠賢思陵旨有青衿書生云。國亡身亦隨。萬古斯邱藏。一子兩孫祔。鬱鬱松柏行。瓦屋得五楹。歲久今無牆。嗟予幼失母。靈柩安西廂。陰寒風雨夜。起立痛我腸。人生豈不貧。所貴有

扶將。我身非草木。天其忍枯僵。支傾懼見壓。邪許多驚惶。塗泥塞孔漏。敢曰禦冰霜。悠悠歲既宴。父母待於堂。去府百里近。拭淚歸村惶。

### 湖山神廟

金沙灘外雨。亂濕垂楊絲。荷深欲無路。遂入金碧祠。亭臺出秀樾。下匯泉成池。池中雙文禽。飛上魚梁窺。日斜游女散。天迴涼飈吹。兩峯青忽斷。濃淡雲歸時。

### 涵白齋

虛窗夜氣流。素壁天光聚。獨坐夏成秋。頻來客亦主。明燈二十年。幾宿溪邊雨。

### 游華山

飛瀑見晴雪。千尺雪石上刻句云。飛瀑晴迴萬仞峯。旋螺聞妙香。僧言華山處。華擁支公堂。秋田石路遠。晚樹雲陰涼。高高穿鐵壁。磴道造巔處刻鐵壁關三字。寂寂轉蠶房。腳踏菡萏瓣。動搖天風長。飄然不染心。不在菩提坊。

### 題顧孝廉鎮毛詩劄記後

子夏不序詩。昌黎語初揭。夾漈攻已厲。雪山廢何決。斷斷紫陽翁。序既頗采列。淫奔二十四。自作得無媿。遂令後賢心。於此未能折。沈重與范煜。源流各疏別。要之毛公學。近古少頡頏。康成收三家。尙欲補其闕。逆志不以辭。亦惟援據切。孝廉家補溪。箋傳獨穿穴。其先宋遺民。作歌見風烈。孝廉之先細二翁。上虞人。元初程文海奉詔訪求人。

材以名。被徵乃避地常熟。芙蓉之荒莊。紅豆春可搗。莊有紅豆一本。細二翁手植。後屬于錢。名紅。君也。其詩有云。吾貞所志在西山。老著書。樂歲飽糠粃。劄記毛鄭朱。而旁及羣哲。相逢在京師。同舍同晝閉。寒燈時解頤。五十頭未雪。明年入太學。將爲諸生說。孝廉以學正薦蒙記名。

九日竹西亭登高

閏年秋已寒。茲日氣殊爽。復蹟倚勝情。攜壺發遐賞。亭爲諸吟社重構。寺隣北郭迴。阜較平山敞。上江渺數聲。風檣天晶卓。吟杖崑臺老。鮮積葑圃涼。烟上籬短菊未黃。林疎葉時響。醉深不厭百。會偶應難兩。歌吹定何如。清言屬吾黨。

集行庵題王西室水仙梅花卷

斑竹低窗秋影折。案頭橫卷披香雪。數叢綽約姑射姿。羅浮仙來參入之。葉葉銖衣支玉骨。照渠只少光明月。涼颺拂鬢不可簪。合將供養近佛龕。知故愛墨亦愛紙。子固元章兩居士。

毘陵曉望

戚墅平平岸。橫林遠遠村。水清秋更碧。烟澹曉無痕。魚菜將船賣。雞豚並舍蕃。九龍山不老。窈窕麗初暾。

七月十五夜祁陽對月

湘水露華滿。祁陽雲翠流。今年無閏夏。此夕卽中秋。高館深留客。疎簾半上鉤。舉家京邸話。應憶到南州。

飲望湖亭

落景延高賞。歸韁託暫閒。蕭蕭聞木葉。渺渺見君山。估客帆檣去。漁舟浦溆還。洞庭今夜月。醉我鬢雙斑。

法源寺看牡丹歸飲王秋曹昶齋

看過棠花乍歷旬。微雲暖日又催人。萬無九十屏風品。一洗三千世界春。退院僧猶譚往事。提壺鳥已喚比隣。歡場得步諸公後。且鬪明燈現在身。

杏花

杏花村落不勝情。二月風光出趙城。楊柳插簷人上塚。江南明日作清明。

秦 巒

字序唐江都人。乾隆十七年進士。官至岳常澧道。有石研齋詩鈔。

冬日田居漫興

寂莫村墟杖策過。寒林落盡水微波。打頭屋只三間少。負郭田無二頃多。陸氏荒莊成一笑。陶家蕪徑較如何。此中且住爲佳耳。收拾心情付懶窩。

虛白窗生暖暖烟。更無車馬漫喧闐。冷官且免書驢券。孤帳還疑伴鶴眠。庾信小園原有賦。蘇公淨几豈無緣。挑鐙午夜回頭憶。一別柴荆已廿年。



# 周天度

字心羅。號讓谷。仁和人。乾隆十七年進士。官至許州知州。有十誦齋集。

蒲褐山房詩話。讓谷學問淵奧。先以經學薦舉。及為詩。以雄博見才。而絕句中。如與吳南欄說丁山湖之勝云。春波瑟瑟。瑟瑟小橋橫。十里沿河似掌平。記得年時輕舸別。杏花疎雨近清明。曲水銀塘宛轉通。千絲楊柳盡垂風。結隣合伴東家住。畫閣遙臨一畝宮。望九華山浮空。夜色澄好似露涼。風吹後徑。眇冥欲向懸橋問。雙瀑斜陽猶隔數峯青。閣遙臨一畝宮。望九華山浮空。夜色澄好似露涼。風吹後秋湖遙挂九枝燈。題張墨岑畫云。蒼崖華潤碧苔滋。春入林臯尚未知。幾日小亭人不到。東風吹過綠濃時。風迴雁激碧粼粼。漁具管竿趁晚晴。見說鯊魚初上水。斜陽一抹待潮生。歸途云。一栝浮渡大江東。游戲真教初祖同。下界卻談金地藏。年年秋夜佛燈紅。翠微仙掌茁槎枒。東閣時烘閩地茶。開落岩前玉瓔珞。吹香再訪鉢囊花。五溪雪後響潺湲。溪席帽篋與一日還。更上玩華亭。上望隔簾黃對夕陽山。諸作尤為時人傳誦。

## 金聞石將之京師訪余淮浦維舟信宿出天山攬轡圖屬題漫賦五言五十韻兼以錄別

丈夫貴壯游。託意務開濟。闔門詎事宜。紆籌當遠譏。與君同鄉友。結交始燕薊。片言金石固。情好逾兄弟。尤軫用世心。六合一平睇。余本凡庸質。因君日靡厲。困頓走塞垣。君遠更數遞。雄疆綏遠城。皇輿職方紫。是地漢甌脫。元封首除薶。旋踵遺育蕃。烏桓錯白題。石槐關王庭。猗苞大饗帝。歡仇水深黑。盛樂宮崇麗。一從六鎮設。懷朔屹屏蔽。人民樂清宴。毛物競般裔。正光水德衰。沈淪入荒翳。倔強斃牟族。狂忍恣剗劓。穹蒼厭昏德。五日照妖沴。豪椎鐵山碎。力奪金人祭。單于設都護。受降奉盟誓。巨憝起幽陵。荒服咸反噬。自此外聲教。隔絕終唐世。阻于部族昌。遙輦霸圖繼。鳴騶室韋逐。橫戈屬珊銳。稽古制郡縣。南面華風泣。

豐州及淨州。表裏山河勢。金元代更易。沿革事無替。紮軍繇招討。羣牧準前例。維昔勝國中。義輪靄霧曠。板升一以築。宣雲重顛瘳。所幸殺運終。女戎生燕嬖。表餌糜金繒。塘言貯婉孌。軀馱四十秋。疆場日睥睨。桓桓我文祖。西略六師逮。宏基恢漠南。毳服走徒隸。經今又百年。山高水清厲。書生挾策至。幕府富雄製。寒泉九十九。弔古足流滯。繫絹寫作圖。紀勝擬書契。別來三改歲。相逢河淮滙。維舟一夕共。去住兩迢遞。三亭慎遲留。行矣吾繼逝。

夏夜集古榆別墅以月上風徐爲韻得上字

空館無繁聲。庭戶延虛敞。幽人暫息鞅。俗客謝來往。過從皆素心。約履及三兩。清談愜我願。雜坐忘少長。夕風來舒舒。琴樽薦餘爽。古榆濃翠深。暝色勿復上。歡情託遐眇。矯首賦河廣。小住亦云佳。吾意屬菰蔣。

題霽堂三十三峯草堂圖

研險塵浴春星。翦鷺溪絹揮蚺蛤。阿誰寫此三十三。朶芙蓉青。傍崑架築白版屋。日未向午門常扃。雲溶溶兮樹冥冥。石細路古盤盤嶺。暨陽先生卜居處。畫手慘澹供模型。先生異材振羣雅。天錫難老歸長齡。平生作客不作宦。弓衣好句遐方聆。談經容冑異馬鄭。擣詞豈願儕溫邢。學成名立五十載。冠蓋絡繹交前廷。故山往往坐拋擲。空令歲月搖千莫。尋常捫腹且讀畫。餘年準擬餐芝苓。太平天子重儒術。要使者宿班頭廳。浴堂之西拜詔入。烟霞未許長居停。先生此卷慎藏弄。歸田後約煩丁寧。猿驚鶴怨幸勿爾。夙

懷但遣盟山靈。他時載酒隨弟子。好事借欲書幃屏。漢西筠溪莫浪語。役驅花鳥真勞形。舊聞看續吳地記。再向某邱某壑一一徵圖經。

楓香驛題壁

江驛近江城。陰陰夏木清。四山渾雨氣。一路足溪聲。攤飯安長簞。微吟對短檠。勞人最多感。飄泊若爲情。

送陳桂汀表兄楚游卽用齊次風太史原韻

晴川春樹楚天波。風物於今問若何。漢水西來環赤壁。巫雲東下接黃坡。歌徵子夜纏綿切。賦入申椒感慨多。無限江山助文藻。壯游真不羨鳴珂。

烟水迢迢鬻子城。郎當風鐸送君行。莫偕宋玉窺隣里。偶借蕭公作騎兵。官閣攤書清晝夢。閒宵聽雨對牀聲。來朝我亦揚鞭去。紫塞前頭一鴈橫。時予有宣府之行。

過土木驛

一簣荒蕪統幕城。土木本稱統幕。今蓋語訛也。戰田犁盡綠郊平。老成當日誰謀國。中貴何人竟盜兵。忍使蛟龍愁失水。幸無金帛與尋盟。傷心瀚海銘功日。絕漠空煩三駕行。永樂三出塞勒銘曰。瀚海爲鏗。天山鏗云云。

冬宵獨坐漫賦示蘭浦任齋

嚴風槭槭小牕寒。爐雪初銷絳樹殘。此夜月華空似水。更無人起捲簾看。

升降依人澹一燈。栽詩輕琢硯池冰。茶烟塵榻清無寐。氣味真如退院僧。  
故人別我挂征驂。滿目離情酒不酣。空羨隨陽一繩鴈。年年冬盡到江南。

北郭聯吟

邵墳豆莢翠眉尖。塔下蓴絲雉尾纖。得似唐南梅醲好。紅玫瑰糝水晶鹽。  
邵皇親墳出蠶豆最肥實。三塔蓴菜最芳鮮。塘南出梅。土人醲

以供客色香迴絕。

梅花勝日數西溪。永福山門路總迷。試上獨山山頂望。村村香雪壓簷齊。  
四溪梅事最著。近日橫里獨山村人以種梅爲業。花開彌覆十

里餘。

高柳風蟬噪夕陽。蒔秧歸去酒瓶香。方池縵滴紅菱雨。曲牖疎牕過晚涼。

荒塍古塹暗栖鴉。環珮魂歸識帝家。春雨野棠開自落。無人知是玉鉤斜。  
六墓村距塘西七里。宋宮人埋玉地。今墓漸堙矣。

董元度

字寄廬。號曲江。平原人。乾隆十七年進士。由庶吉士改官東昌府教授。有舊雨堂詩集。

蒲褐山房詩話。曲江寄興。蕭疎不爲繩約。改庶常後。乞假南游。來往蘇揚間。寓盧雅雨署中。最久。與余同舍。每把瓊論詩。斷斷不倦。於其鄉先生王貽上。趙伸符。兩公咸所宗仰。未嘗有軒輊也。乾隆丙午冬。余以入覲過保定。曲江適主蓮池書院。往訪之。則已頽然老矣。仕途偃蹇。連蜷以歿。故其詩清婉中多感慨之作。

冬杪太史王丈西園先生暨之岩侍御紹衣翼子兩同年邀同李雲卜先生虞典孝廉游陶然亭

澹日冷平臯。寒林倚荒圃。招邀上孤亭。不記春前路。憶昨早春游。晞陽媚烟樹。冰開新水融。蘆長才如筍。隔林紅杏花。啼鶯不知處。日月曾幾何。蒼涼失其故。一年京雒中。十丈迷塵霧。何期心眼開。噩夢如初寤。高坐敞虛窗。廓然成野趣。庾公興不淺。少長愜情懷。逝景豈可追。茲游良非誤。

夜雨讀朱太史次筠李上舍蟠木聯句見示詩慨然感賦得六十四句

屋漏夜淙淙。新舊雨相續。短檠伴深更。嗒然同槁木。何來石鼎詩。忽忽動心目。掩卷幾沉吟。愁腸轉車轂。束髮入名場。章句恥碌碌。希登作者堂。大雅繼芳躅。麻中能直蓬。他山可攻玉。山谷鳥嚶鳴。友聲應林麓。車笠訂鷗盟。上下雲龍逐。琴臺有朱君。矯矯雲中鶴。隴西佳公子。溫溫荆山璞。先後結同心。氣味芝蘭郁。吾鄉名士多。山川倍清淑。佛慧數峯青。明湖半城綠。俯檻聽鳴泉。蠟屐訪修竹。互蒼以行歌。夜闌更秉燭。白雪罷吟壇。慷慨思重築。聚散十年閒。萍飄不相屬。強踏京華塵。抗顏還走俗。蒙頭雪千絲。堆胸愁百斛。依然一故吾。天高漸踟促。翳我同袍友。華藻振新沐。或登瀛洲侶。然藜校天祿。或鼓成均篋。槐市扇芬馥。聯牀感離羣。古道交相勗。示我索和章。百感互相觸。回首憶同游。落落碁布局。雲散而風流。勝會詎可復。況我本散人。底事自羈足。風雨攪中宵。舊夢縈心曲。漁洋曾有言。成句吾能讀。冷落鵲山湖。幾人爲令僕。

偕沈學子陪雅雨丈渡江宿金山

生長齊趙閒。未涉江湖水。欣附元禮舟。談笑渡揚子。張帆出瓜步。豁然心目啓。天水接空濛。浩浩去胡底。

隔岸數點青。突兀三山峙。艤艫若輕鳧。東下疾於駛。風利忽思泊。繫纜金山趾。舍舟快登臨。逍遙陪杖履。迴望廣陵城。烟樹真如薺。

渡江

平明漠漠霧全消。遙指邗溝廿四橋。渡口微風催短棹。海門殘雪咽寒潮。驚心歲月愁方劇。放眼江山興尙饒。自笑孤蹤似蓬轉。一年三度過金焦。

送別鞠未峯前輩

十載南樓折柳枝。驪歌重唱鬢成絲。客逢異地忘飄泊。人過中年重別離。海內同心惟舊侶。天涯屈指幾新知。那堪先後邗江棹。正是秋風乍起時。

題雅雨盧丈平山高會圖

好憑高處豁雙眸。載酒頻來作勝游。地脉遠從全蜀至。山光坐向大江收。銜恩轉運重持節。遲客登臨獨倚樓。一自洽春文讌後。代興畢竟屬齊州。天涯倦客病維摩。仙侶聯舟一再過。饒有烟霞隨杖履。不妨山水當笙歌。梅分官閣寒香早。月傍揚州夜色多。好事屏風傳嬰鑠。使君鬢髮未全皤。

移居



一肩襆被便移家。藥裹書囊不滿車。薄宦乍叨方朔米。故人昨寄玉川茶。窗前殘雪初堆砌。夢裏寒梅已著花。爲憶鄉園小兒女。圍爐相對話京華。

舟行雜詩

漁莊蟹舍接菱蒲。浩淼烟波夜月孤。一棧檣燈數聲鷓。輕舟已過獨山湖。河流瀲灩柳毵毵。綠酒銀鱗盡日酣。回首嶧山青不見。長年捩柁入淮南。

紀復亭

字心齋。歸安人。乾隆十七年進士。官至鴻臚寺少卿。

爲徐友竹先生題夏山圖卷

眼前何突兀。睹此夏山圖。匠心出北苑。畫手今東吳。連山起何處。駿馬爭馳驅。竹樹忽蘆蔽。村落相縈紆。石蒸雲氣熱。澗繞林風蘇。高人靜無暑。長日狎鷗鳧。幽境造鄧尉。烟波廓具區。懷鄉轉綿邈。撫跡空踟蹰。昨與髯翁約。謂程魚門卜築同吳趨。毋與城市近。但爲山水娛。寒梅結茅屋。乳竇通齋廚。客漫計寒餓。天或憐疎迂。圖今爲息壤。鑒此盟不渝。他日接几席。翰墨隣不孤。

沈清任

字萊友。號莘田。仁和人。乾隆十七年進士。官至川東道。

十一月三日重過娘子嶺

木葉脫將盡。殘秋又早冬。三年思遠戍。匹馬立危峯。老衲清茶供。征夫玉粒春。明春兵事息。民氣定從容。

爲王秋汀作畫每幅系以絕句

蹀躞同霑馬足泥。蕭蕭吟篋落巴西。蠶叢烟雨連天碧。寫作儂家罨畫溪。  
連卷老樹秋風健。寂寞寒烟古道斜。和淚寫來都不似。同岑萬里各天涯。  
斷港平沙葦葉秋。天南極目碧雲愁。不堪孤影空江老。一道哀鴻月滿洲。

雪壓馱峯毳幕張。五更刁斗斷人腸。短衣匹馬南山頂。風雨瀟瀟相對牀。壬辰夏秋之交予與述庵銀臺秋漁員外及浣花刺史並在卡

丁軍營述庵秋汀同幕相洽及今臨此情味宛然

三尺枯筇走浣溪。天涯吟客一時齊。梅花十斛春如海。老我曾經索笑題。前歲春初集晴沙觀察榕樾查丈吳白華庶子王審淵太守楊

笠湖刺史及曹秋漁秋汀主人朝夕尋題於此

門前垂柳嘶斑馬。牆外新醪過綠醅。落落晨星何處覓。故人真个畫中來。

松花落盡松根老。半顆茶煙石乳香。我欲東山尋屐齒。那堪零落謝家郎。謝軒鑄孝廉東墅同年長君秋汀壻也年未三十卒于家秋汀

愛其松聲茶小熟花影蝶雙飛句屬寫此以寄恨

四圍流水清風徑。兩鬢烏絲玉疊山。桐帽棕鞵收拾去。與君比屋話烏蠻。

張鵬

字紀常。號楚門。吳縣人。乾隆十七年舉人。有楚門詩文稿。讀史別情吟。橘膜編。

鷓燕

燕生八九子。知傍誰家屋。羣飛入簷牙。高下翠可掬。翩翩不禁風。喃喃競相續。豈忘朱樓好。而念幽人獨。愛茲毛羽新。愧我華顛禿。

移寓

重來銷夏處。境僻足清幽。不傍梁鴻竈。常登王粲樓。書聲風捲出。花氣月勾留。但望中郎到。青衫典酒籌。舟過匠門志感

滑滑泥妨步。舟從曲折移。水枯橋影沒。沙漲櫓聲遲。一塔撐雲出。千簾護雨垂。干將門畔過。良冶想鎚。聞鴈

一夕清霜落葉紛。北窗夜靜鴈聲聞。淒迷冷咽三更月。斷續寒衝萬里雲。茅店夢回驚驛路。玉樓人起瘦羅裙。年年不負愁中約。待得鶯花又送君。

秦淮水閣

虹影落晴波。羅衫颺棹歌。似含淒怨意。楊柳六朝多。

# 湖海詩傳卷十五

## 翁方綱

字正三。號覃溪。大興人。乾隆十七年進士。官內閣學士。左遷鴻臚寺卿。有栖霞諸藁。

潘褐山房詩話。覃溪年甫及冠。已入詞垣。而精心績學。宏覽多聞。所著兩漢金石記。剖析毫芒。參以說文正義。幾欲駕洪文惠而上之。近年研精經術。嘉慶己未。予入京師。見其方考禹貢。顧命兩篇。諸儒同異。相與辨難。斷斷竟日。詩宗江西。派出入山谷。誠齋。問雖嘗仿趙秋谷聲調譜。取唐宋大家古詩。審其音節。刊示學者。然自作亦不能盡合也。書法初學顏平原。繼學歐陽率更。隸法史晨。韓勅。諸碑。生平雙鉤摹勒。舊帖數十本。是以北方求書碑版者。畢歸之。

## 陶然亭雅集分賦呈述菴先生

旗亭畫壁詩。偶出騷人託。英靈間氣集。又非一時作。公錄湖海什。聊仿真率約。筵雖萃簪紳。體不拘臺閣。秋聲入蒲褐。拈出當郊郭。城陰葭菼間。山翠衣襟落。夕陽烟濛濛。飛鳥去寥廓。觴忽望遠停。牕爲懷人拓。同聲感于喬。在陰和爾鶴。日佩湘皋蘭。誰喻檀園擇。琴理了無因。畫稿從何著。試續西園記。還訂重陽酌。

早發德安七月十日

聲確高下中。蒙龍若無路。前輿跨灣環。後騎披草樹。蛇騰與猿挂。鼻窕知幾度。建昌達星子。一逕取斜注。直避鄱湖險。繚繞屢穿互。與人肩左擔。僕夫泥沒屨。我亦衣袂上。飽裊山葉露。晃蕩日出高。曲折隘口赴。

香爐生紫煙。句隨今始悟。

靈秀泉

雍正十一年癸丑季冬董文偉記云。試院落成日。有泉出堂階下。因立石名之。

院居山麓間。泉出堂階下。傳聞始庀材。泓然映新瓦。實爲人文兆。豈比聲聞假。我來試手齎。測量遞杯罍。恍乎於水監。以告飲泉者。學務源委尋。功敢晝夜舍。千峰蒸靈液。一眼始輸瀉。蔭樾交桂枝。泉上即雙桂樹。聰明比蓮社。東林寺秀峯寺皆有聰明泉。勿務發脈長。深愧瀦蓄寡。側望玉簾飛。忽送山風灑。

出南康府城西門望廬山雲氣

門開星灣北。郡抱沙洲面。旬日風四霾。晨容豁一變。融融霽氣中。野曠山葱蒨。我與匡廬君。始以真相見。兜羅冑半腰。玉簾垂一線。濛濛噓淡白。吞吐青瑤片。大哉膚寸澤。端可六合遍。顧以晴翠光。洗我連宵倦。衡雲禱無私。海市祈敢炫。半日竹輿上。冷風有餘善。

玉淵潭

步出長松門。猶聽松濤響。路滑不容立。俯測潭深廣。奇哉玉淵字。其氣雄千丈。建瓴東北來。直瀉勢莽莽。到此一洞漩。小作圓折養。然後萬珠璣。滾滾橫摩盪。劃翻水晶宮。神龍掣蛟蟒。精靈來會合。虛無出惚恍。誰識中粹溫。玉烟浮盎盎。拈破鯢桓機。何如求象罔。

五老峯歌

五老峯如五老人。拔地千丈青嶙峋。廬山諸峯出其下。前後遶鄰皆兒孫。我從七峯溯三峽。湖瀟疊翠蒸曉暎。全湖之勢西北拱。到此始見峯雄尊。衆峯西來擁屏障。一峯屹立蒼烟屯。一峯纔住二峯起。肩差相讓顏相溫。三峯中峙最雄厚。背負龍象駕鵬鯤。四峯與三牒相亞。其五離立仍孤蹲。五緯之精降南極。榮光河雒騰天文。衡霍中間控翼軫。斗牛紫氣三垣分。聚來匡廬奇秀處。千里誅蕩開天門。面南炎離炳正位。香爐獻壽精氤氳。日月光華雲霧窟。霞裙星珮清淨身。妙鬢曾鋪大雲海。今晨萬里無纖雲。我與老人來對面。豈借點綴空繽紛。維岳極天作屏翰。政要會合眞精神。山靈知我意有在。積翳一洗人文醇。乾坤清氣在神骨。必鍾靈淑於秀民。湖光圓碧鋪玉鏡。山容紫翠澄秋旻。仰見蒼顛顧我笑。試叩眞宰堪共論。晚來雲意仍四合。讓我游過徐吐吞。我詩不要海綿語。請問初白誰識眞。查初白有五老峯海綿歌。

### 雲片石

德雲菴過白雲菴。遙見蓬蓬雲滿院。度橋小憩橋西亭。我與白雲初對面。一西一東從何來。滾滾濛濛翳深殿。忽然結作萬戶戶。羅列撐空諸恠變。縱橫掀舞掉尾脊。觀者循廊目爲眩。我從峰頂得脈來。雲葉雲根初一線。瓔珞華交妙鬢旋。芙蓉葉接兜羅胃。泊來中央四合抱。飄如衣袂飛如練。茫乎浩乎大雲海。蛟鼉鼉屨來酣戰。麝者下垂圍上升。墮掣流星圓劃電。攝之靜坐凜仍逼。氣欲蒸空青可鍊。道人莫漫拈幻形。但執天花石巖片。

天開巖

西嶺不識朝暎升。地險石巨排層層。中開一逕豁石壁。危梯如削不可登。何年巨靈以手劈。巖谷呼舞相  
然。譬尙餘石縫作開合。右脅一掩千峻嶒。石花噴綠苔蘚漬。半巖松氣青相承。始知初日罩巖際。萬峰直  
下皆欄凭。赤文綠字儻可迹。架厂鑿戶初誰勝。傳聞岌業三大字。開巖近自釋惠能。又聞南唐二徐筆。螺  
篆遺法光金繩。捫蘿四顧渺何在。千佛題字迷荒苒。巖深去急覓未遍。禹碑摹本空嗟稱。俗儒信耳不信  
目。此習亦到巖間僧。二楊釋文太堵拄。嗟此何足相蟲冰。巖前謾謾風掠耳。露襟側帽寒凌兢。

受翠樓

紫閣峰轉太古堂。曲房直檻交迴廊。樓背有峰峰背樹。十步五步皆礪岡。宋齊以來垂黛綠。真色不受秋  
空霜。修眉嫋顏與列髻。凸凹濃淡排青蒼。今晨雲霞昨烟雨。石竇炯炯穿初陽。中峰左右屹兩股。萬松萬  
壑森相當。迴環到此大結束。臨高臺以層軒張。拍肩挹袖絢掩映。遠深近淺收丹黃。漸空漸俯忽無際。奇  
哉疊複不可詳。江東諸山出檻外。緣遶京口兼維揚。陰晴明滅極萬變。嵐烟江靄同一光。千里面規半掩  
勢。六扇窗甫寸目償。造化增損巧結構。嗟此位置誰料量。更有亭乃遜此。其視平碧惟松篁。乘除可悟  
消納法。頓挫起伏皆文章。盪胷之雲一抒瀉。迴輦忽又攘滿囊。翠從何來不可記。旭照雲海仍茫茫。

九曜石歌

九曜亭邊九曜石。南漢劉龔故苑之遺跡。愛蓮種蓮事俱往。千載仙湖水猶碧。前秋訪石因登亭。周遭顧盼疑列星。五日輒乘使車去。未得剜苔剔蘚恣畱停。古色摩挲入夢寐。巾箱髣髴圖真形。一石圓頂如建瓴。危根下削漱清泠。一石四達如疏櫺。旁有直幹撐玲嶻。樹與石抱石轉青。往往樹皆過百齡。不獨昔日太湖靈壁浮海至。影沙激浪增瓏玲。崩雲散雪那遽一一數。但覺嵌窟硤兀勢欲凌滄溟。昨歸經冬水初退。坐看家僮洗萍塊。雨溜磨崖字尙存。泥淤仙掌痕還在。盧程許刻次第尋。陳九仙書竟晦昧。不知米家詩句刻何處。想在老榕巨根內。文藻同時有傳否。亭沼何心嘆興廢。九曜石。今日誰能識。音爲九。一石獨合三石成。此語聞又百年後。藥洲兩字亦是元章題。斜日蒼烟但翹首。

### 漢石經殘字歌

熹平初作皇義篇。石渠故事追孝宣。通經釋義事優大。文武之道非丹鉛。雕蟲篆鳥那比數。鴻都未立前三年。議郎意不在工畫。蓋以正誤代傳箋。蘭臺漆書敢私易。煌煌日月當中天。四十六石堂十丈。聚觀車兩爭駢闐。楊家遞著洛陽記。宋初尙有斷石傳。東觀論出御史府。論語跋記董廣川。成都會稽各撥篋。洪相八石精摹鑄。因依破缺非貌古。太璞粹氣逾于全。吾鄉孫氏研山笈。南原摹本殊不然。隸原隸辨槃與籀。毛槧黃槧烏非焉。鄒平復聞張氏本。研山又落吳淞船。義門每用譏退谷。弄藏鑒別相後先。盍毛包周證魯義。歐陽夏侯訂孔編。越州閣圮海水綠。柯亭桐爨朱絲絃。玉邸半圭虹貫斗。龍領百寶珠騰淵。崑山



顧亭野 四明萬季各有記。我欲彙續無由緣。便當摹勒自此始。涓濡潛且尺研穿。乞名蓬來扁小閣。賀梁語驚來翩翩。

漢建昭鴈足鐙款拓本爲述菴先生賦并序

述菴先生以所得漢銅鴈足鐙款拓本見寄。其文曰。建昭三年。考工工輔爲內者造。銅鴈足鐙。重三斤八兩。護建佐博嗇夫福掾光主右丞宮令相省中宮內者弟五故家。又云。後大廚。又云。今陽平家。畫一至三。陽朔元年。賜。愚按此鐙與揚州馬半槎所藏形式相埒。而逕圍稍弱。半槎所藏者。予嘗見其拓本。中間云。重三斤十二兩。以今所見此文云。三斤八兩。正足驗漢代權量相去不遠。而厲樊榭詩注乃云。四斤十二兩。則太懸絕矣。末云。護工卒史不禁省。此七字爲句。其下又云。某宮內者第廿五。正與此鐙中宮內者第五之文相應。而樊榭誤以某宮句與前一行連讀。遂訛省爲首。又誤牽薛尚功鍾鼎款識所載蒲阪首山宮鐙之文。不知彼自在永始四年。與此無涉也。蓋半槎所藏者。銅質半蝕。其文難辨。遂致省訛爲首。卒訛爲衣耳。考漢孝成鼎云。守令史永省。又大官壺云。主太僕監掾蒼省。又綏和壺云。主守右丞同守令寶省。蓋省乃稽察之義。猶漢碑云。察書也。今是鐙字字完好。且造於建昭。賜於陽朔。一器中有西漢字二段。尤可寶也。爰作歌系於後。

厲徵君詩內者銘。我見拓文未見鐙。君今爲拓鐙款寄。使我砭誤心忤忤。甘泉秦時修故事。河東后土屢

薦馨。初元以後開歲舉。不獨涓選更注經。誰歟傳會首山祀。荆山之鼎朝萬靈。賈慶造鐙在永始。不合牽引來竟寧。昔屢疑之未敢質。得此款記尤可憑。其槃規旋徑稍弱。漢權漢尺原相乘。底曰建昭側陽朔。故家畫一於陽平。前鐫後識歲一紀。八分小篆絲迴縈。歐公恨少西漢字。今乃一器雙妙并。陽朔之題更圓勁。元尚急就篇初增。半槎所藏字半蝕。幾被亥豕紛訛承。孰如此鐙底瑩澤。燦若列宿捫生稜。劉敞裴煜不可作。林華蓮勺誰能評。我詩不憚諍樊榭。君藏庶可追廬陵。

述菴先生見示新詩并惠周公道州拙賦八分石刻賦謝

披圖聚米當登臨。握槩懷鉛盡好音。岸柳春風前度影。江船夜雨故人心。口窩賦古波痕在。挂月巖高草逕深。判共城南亭子上。晚涼斜日試追尋。

栖霞道中示謝蘊山

尚記城東並轡歸。詩情先逐曉雲飛。重陽細雨遲黃菊。六代精藍冷翠微。遠眺合教青眼共。深談喜未素心違。洞天且莫題名姓。苔蘚濛濛恐溼衣。峯巔一宿記吾曾。已覺塵勞句可憎。禪畫只添雲半幅。幽居豈在屋多層。儘饒泉響來供客。如許松陰可少僧。尚恨不逢新雨後。栖霞三峽恐難勝。

顧光旭

字華陽。號晴沙。金匱人。乾隆十七年進士。官至甘涼道。署四川按察使。有響泉集。

蒲褐山房詩話。晴沙。歟。歷中外。雅著循聲。早遂初衣。杜門養母。人尤以風節高之。生平詩文而外。尤精書法。今世以工書名者。北則劉相國。崇如孔主事。東山南則梁侍講。山舟王太守。夢樓而嘉興。周觀察。雅圭及晴沙。頴頴其間。殆無媿色。由甘涼道。從制府籌運。西川軍務。所過蠶叢。鳥道。多作詩紀之。丹徒陸炳錄入蜀徵詩鈔。

豐陵月

癸巳閏三月之望。宿豐都官廨。月上酒酣。兀然而睡。夜過半。起行庭中。清光爛然。憑闌坐翫。援筆得長句。

放舟不到巫峽雲。拄杖不到峩峩雪。仙都清氣盪胸來。欲捉銀蟾入蟾窟。軒然已掛庭樹枝。對影持盃醉兀兀。隱几未覺青山橫。擁衾詎識華燈滅。神清夢冷沁肌骨。斜逗一痕窗紙裂。攬衣啓戶思欲絕。銀漢迢迢玉壺澈。萬里而遙江影長。四更以後天容闊。假令斫却惡木陰。定放清光到牆缺。人生對月坐飄忽。看我星霜點毛髮。小時笑指白玉盤。壯歲常依青瑣闥。瓊樓玉宇幾度看。蜀棧隴雲行未歇。巴舟十日浪拍天。嶺色千重雨如潑。信知春月令人悅。驅烟掃霧春雲活。一春明月今宵發。五魚名山躍出江波凸。月上如環復如玦。月落啼鵲更啼鳩。籌筆無能謬持節。聽雞爲賦豐陵月。

弓插

隔水斷漁樵。橫斜壞木橋。燒痕空樹腹。雲氣束山腰。已信人蹤絕。猶看鳥道遙。巉巖餘舊壘。半壁見堅礮。

送人還江南

細雨華陽國。嘉陵江水生。綠波與春草。萬里蕩舟行。山木啼鶉路。汀花過客情。鄉心渺何許。直到海潮平。

冬杪沈莘田招集張氏園亭分韻得支字

小築城隅路。殘鐘歲暮時。樹容臨水淨。鳥影度雲遲。欹石孤藤絡。平橋獨木支。誰將巖壑意。折簡爲催詩。

渠江絕句

軟輿輕夢宕渠邊。林鳥頻呼上渡船。綠到鴨頭春水足。嫩晴風色薄雲天。

天妙閣

濯錦江空還似練。大峩山遠只如眉。天邊風露無聲處。獨立西南月上時。

蔣宗海

字星巖。號春農。丹徒人。乾隆十七年進士。官內閣中書。

送人靈隱出家

百年身世等浮槎。脫却儒衣壞色加。聞道授書還有女。可堪彈鋏已無家。靜參南嶽千篇偈。飽看西湖十里花。他日相逢惟一笑。雲天瓶水是生涯。

周大樞

字元木。山陰人。乾隆元年薦舉博學鴻詞。十七年舉人。官平湖教諭。有存吾春軒詩鈔。

蒲褐山房詩話。元木在京師。寓虎坊橋小衙門。有大井。老屋三間。盡鹽終日。予贈以句云。小住常依元亮井。出游誰問孝廉船。蓋紀實也。學博而才長。酒酒莽莽。動以數百言。蓋其時。浙中詩人如胡稚威。桑敬甫。皆門奇。騁異。故元木亦如之。然文從字順。自較兩家爲優。

丙申九日同趙虞咸文熙韞山文照兄弟登高柯山燕飲終日

好山如名人。秀極照心目。雖無千仞高。磅礴意自足。峯轉路更幽。雲開嶺還複。霜氣變疎林。晚紅間危綠。芳質鬱嶙峋。斧鑿轉繚曲。柯山石夙供探伐。深入山底。遂成石蕩十餘。窅然得大穴。有僧倚茅屋。清泉十餘泓。寬者極百斛。蛟龍深或藏。魚蝦多可漉。東南入古刹。石佛涌丈六。經始記赤烏。彷彿字可讀。西行愛小菴。千竿戛翠玉。絕頂望鏡湖。冰紈曳長幅。烟洲錯其間。瑣碎供麗矚。方者侔削觚。員或類輪殼。長嘯逗林杪。驚鳴下鸞鵠。萬籟號天風。清音競絲竹。二子俱拍手。呼僮酌醴醑。半醉脫帽舞。滿頭插黃菊。日莫不肯歸。更深秉明燭。

病眼數月不愈。客勸靜坐。省思慮以養之。乃復作詩自勸。可一笑也。

眼爲見色根。天燭含內景。晶然蒲萄朶。流逸奔萬境。愧非杜又姿。點漆瞳雙炯。春風惡作劇。吹火變微眚。初如刺錐末。巖電爛俄頃。紅碧炫狂花。舉目礙游騁。生平阮嗣宗。途窮悵莫逞。多白殊少青。不見靚女靚。厥罰更何爲。數月類朦冥。酒卮久不親。書帙亦復屏。刮膜無金篋。盧醫日煩請。欲速翳轉深。徒然怒生癭。有客張淇流。古方傳示做。曰此大火聚。弗熄勢將猛。絕慮去其媒。治躁厥惟靜。譬如水沸甑。爨止則清冷。

低徊聽客言。豁若咽去鯁。顧視小窗虛。天光自罔罔。

都下食冬筍和稚威

論心思故人。適口思鄉味。鄉味不蘄珍。故人不蘄貴。平生酸鹹意。往往殊俗嗜。盤殮足葵蓼。紅碧自相媚。雨翦春韭肥。霜摘秋菘膩。佳品劇三冬。箭萌深斲地。攫攫凌雲心。包含見鋒銳。莛以芥菹綠。風味兩成契。翠篠團東軒。故人曾此對。騎馬向長安。旅食隨所寄。獻賦廁班揚。天廚拜珍賜。一飲勺藥和。頓洗藜藿胃。遇合會有時。蕭條奈垂翅。安得漢陽錢。衝寒買歸騎。忽此鄉味新。如與故人至。把酒對故人。歡言不辭醉。何用羅葷羶。一箸萬錢費。遠夢促歸心。揚糲及春季。園林迸籜龍。穿籬萬頭出。有買不論斤。玉管愁破碎。桃花煮斗米。千畝吞清翠。

東牟怪松歌小引

松在寧海州治之城隍祠。長六尺耳。而大合抱。枝柯盤鬱。團陰數畝。真怪物也。

怪松昔夢天台圖。怪魁作讚生嗟吁。巖囚穴械可笑貌。何異文采彰崎嶇。竭來海國見此樹。意態宛與前圖符。孤根拔地甫肩及。螭拏鳳攫橫鋪舒。低頭再拜起卻立。爲君徑前捋髭鬚。君懷落落勢萬丈。崛強自與常人殊。天風怒起作濤響。潮汐澎湃還交輸。張蒼九尺自佳耳。臣朔一囊將何如。豈無淳于及平仲。壓倒十萬長身夫。凌雲特起縱斤斧。拔擢杞梓連枯株。大宗細桷各有用。裏以朱綠銜以珠。或駕國馬馳交

衢亦有貫月三秋桴。不然假蹇空山隅。餐英彷彿來仙姝。胡爲潦倒混城市。坐令拍手羣擲榆。蟲穿蟻剝古社側。臃腫十圍同散樗。柳州作記竄逐後。虞卿著書窮愁餘。爲君嘆息復起舞。仰視亭亭白月孤。

長安燈夕篇

東風吹徧鳳城春。晴旭暉暉麗色新。雲舒三素環璇極。鵠立千官侍紫宸。芙蓉雙闕峩嶢起。王侯夾道羅朱邱。十二交衢練影浮。東西翠幟流波駛。去去流波歲復年。晝雞貼燕鬪芳妍。纔過翦綵來人日。又見傳柑話上元。上元綺節春無價。華燈處處懸朱榭。由來繡陌隘行人。況是金吾罷呵夜。夜影迢遙瀉月華。吹笙伐鼓競紛奢。漸晃星毬留白晝。全開火樹煖千家。千家萬騎喧喧出。紅榮皓魄交光射。別開鏡市向壺天。爭舞文絳連太液。鳳腦虬膏雜豹脂。繇花倒暈笑枝枝。明綃薄似瓊雲護。寶絡紛如珠露垂。游螭戲殺來無數。涎涎玉燕亭亭鷺。裁成新樣值千金。費盡妍心邀一顧。別有仙人列似麻。絳幡緋纛擁雲車。一羣日戶飛炎鳳。十丈天台建晚霞。杏梁錯落明珠迴。披敷厭勝垂蓮井。銅琶錦瑟鬪新聲。畫燭金鸞叢豔影。豔影新聲劇可憐。脂開北地靨痕鮮。盡圍獸炭茱萸幔。未散鯖盤瑇瑁筵。魚龍百戲紛相逐。膈膊春聲催爆竹。榮光深照玉河明。香霧遙連西嶺複。百年秉燭幾歡娛。此夕繇華不可無。人間燦燦飄朱燼。天上離離見白榆。厯闔爭路飛埃裏。貴游意氣凌霄紫。橫陳方褥凭絲囊。爭看文衫結珠履。紅驄驕影響瓊珂。相逢趙李夜經過。換將寶玦千樽醉。擊碎珊瑚一曲歌。銀旛花勝春人聚。鈿車相喚看燈去。慢水層層燄裏

迴行雲片片烟中度。譙鼓遙過漏轉深。蛭膏猶自耀芳林。燈光似月明君意。月色如燈照妾心。妾心君意交相向。流蘇香煖青牛帳。但使春燈夜夜懸。長教碧月團團漾。曲街長街去復來。管絃轟續幾樓臺。生憎唧唧雞聲早。不奈曛曛曙色催。年年行樂昇平日。浩蕩堯衢忘帝力。禮樂調爲玉燭光。圖書煥作卿雲色。西北還聞罷舉烽。征人迴馬戍樓空。春風併度羌中笛。明月長彎塞上弓。翩翩枚馬承恩遇。拔擢榷棹連箇簾。已看燭影送金蓮。更使窗痕畱玉署。寂寞東來獻賦人。藜釭獨對客愁新。夢迴憶得江南岸。索笑垂垂一樹春。

隆福寺觀市一百韻

天街古刹東北隅。我峩丹碧暉琳玕。長廊千步直且紆。吹螺擊鼓棲縑徒。一月三集作市區。問胡爲此貪其租。紛紛日出誰見驅。車牛擔負來蔽途。隧分貨別期速沽。由來方物集帝都。冠袍靴袴裙與襦。羅綺綺縠充曳婁。別其黑白亂紫朱。虎豹狼貙貉鱓鼯。千羊之皮千腋狐。別有金雀繆以珠。珮環簪珥飾彼姝。食味適口萬品腴。豚肩雞臠何足懷。橙拘鮐鱧羹鴈臠。醯醢千甕酒百甌。秋菘春韭筍及蒲。檀梨棗栗落萬株。厥包橘柚來荆吳。糗粢餅餌雜粉麩。餠餠糗粒滑比酥。松風茗薺烹玉壺。近者尤尙淡巴菰。入口烟裊一縷孤。屬有白疾葯物扶。或進苓豕訾葛莢。其器松栢兼檀榆。彫文彤漆黃金塗。北人燔土作釜杆。亦雜定汝堆盤觚。刻藤三萬葉。几鋪麝煤鳩眼及鼠鬢。赤脚之婢長髯奴。有畜在圈禽在籠。爲君擊筑歌烏烏。



琵琶箏笛簫笙竽。就中青幕紅氍毹。鐔彝舊物誇璉瑚。大者鼎鼐小者爐。一刀一鏡一甌盂。歷歷似閱宣和圖。或參外貨工詭殊。中庭卷帙良可吁。苟錯諸地藉以芻。坐令盆垢紛相污。故知世俗多輕儒。雜沓寺外臨交衢。千蹄馬市混驥駑。驟驪驪駱魚駒駟。涓人已死伯樂徂。有脚千里何爲乎。珊瑚玉勒金僕姑。壯士來買五石弧。吞刀吐火緣都盧。蒲人雜婦百戲俱。黃衣道士賣佩符。或矜祿命推榮枯。歲除正見書鬱茶。駢闐萬足唯利趨。顛倒輕重欺精粗。子母出入心計劬。僮僮鼓舌爭錙銖。古者爲市法噬膚。負販救敗思有虞。我行其地適有須。慳囊撲破羞青蚨。廊陰漸轉日欲晡。偶逢列砌坐販夫。自言八十非故吾。當年交易轉轆轤。大賈不滯小不使。得錢易粟資妻孥。卽今來去空目盱。餘貨壓擔無人呼。我聞此語行踟躕。利以劑義貴灌輸。貧不學嗇富自敷。古稱節儉誠遠謨。不度其勢議或迂。升平生齒較昔逾。生產益分得不痛。固知淫巧不中模。饒買乏賣困始蘇。人失人得言豈誣。盡吟蟋蟀歌山樞。富者益肥貧益癯。空諸所有惟浮屠。染指尙復思樹勳。而況蚩蚩彼氓愚。皇皇求利何足誅。有親欲養子欲娛。往來親戚歡臘臚。不得餓死爭須臾。高賢在職民愉愉。

讀書柯山精舍趙韞山以詩寄贈次韻奉荅

不妨烟月卽超然。曾讀南華第一篇。成佛未甘居謝後。論文那得在盧前。聽鐘堊寺千山裏。打槩蓮塘萬樹邊。肯作連宵風雨話。簷端只許白雲眠。

雪後石帆太史畱宿寓齋賦詩贈蒼用東坡集中韻

應是前身賦雪纖。多公文彩過徐嚴。脩髯繞作離離竹。妙句清於昔昔鹽。颯沓風聲時撼戶。微茫星勢欲垂檐。一樽試話平生事。退盡鋒稜笑筆尖。  
翳棲無定似流鴉。謾說詩書載五車。空谷幾人愁倚竹。長安何處好看花。關山忽漫同爲客。談笑還疑舊在家。此夜漁磯應有夢。板橋紅漾綠溪叉。

陸燿

字朗夫。號青來。吳江人。乾隆十七年舉人。官至湖南巡撫。有切問齋集。

蒲褐山房詩話。朗夫癯然而瘦。清操自勵。閒涉書史。亦多爲樸實有用之學。其文集亦然。著漕運考。若干卷。皆有益於河渠及爲山東布政。以巡撫貪暴。不相能。乞終養歸。再起至湖南巡撫時。總督以閱兵抵長沙。朗夫迎謁。畢還署。總督鈕祜祿君特昇額來候。直入廨中。方午。食見所食皆菽乳菜蔬。訝之。曰。天不雨。十數日矣。地方官戒殺清齋。故所食如此。總督素豪侈。聞語。瞿然。嘗其奴曰。吾此來傳舍。酒肉如山。何不。以祈雨。具告。聞語。畢。寓舍。悉撤。其豐腴。人羨。總督之知過。而益歎君之清德。感于。人者。速也。其後。宰以勞瘁。病瘵。而歿。其友徐貢生。堅入視。含。斂。室中。別無長物。嘆曰。一貧至此。卽不死。亦難度日矣。今入祀鄉賢祠。

太倉道中

百里中吳水。東流近海門。溼烟通蜃氣。淤岸有潮痕。落日孤城迴。陰雲野市昏。伊人住何所。今夜倒芳樽。

時訪王存素於所居西園

除夕

慣作經年客。今宵倍繫思。酒闌辭歲後。人靜獨吟時。雁去關門近。書來石里遲。遙憐雙白髮。明日又添絲。

偶感

喜無側媚干時術。不作媵媵諛墓文。知己未妨當代少。浮名深恐後人聞。研池餘墨臨窗試。初地清香盥手薰。決計疎狂竊微祿。閉門寂寂似揚雲。

寓園同阮唐山同年作

中庭促膝共蘧廬。諸笑云云習未除。苛節刪於相熟後。淡懷長似訂交初。才華須讓連城璧。蹇劣誰持下坂車。夜久不知河轉角。柳梢缺月挂方疏。

袁文康

字作山。保山人。乾隆十七年舉人。官姚州學正。

蒲褐山房詩話袁氏爲永昌世族。弟兄文典文揆咸知讀書鄉學。能悉演中舊事。予先在滇三載。作山率其羣從來受業。尤喜講宋元人理學。而致知格物。以陽明爲宗。涵養醇粹。器識充然。蓋中原人士所少也。

沙陽夜行

飲罷遂扳鞍。不待聞雞舞。游子促鄉心。憾未生飛羽。昏黑巡檢坡。石樹皆豺虎。帶醉下江峰。巖關已閉戶。

夜靜濤愈惡。莫能辨譙鼓。茫昧一痕天。殷雷送密雨。僕夫怨寒甚。羸馬亦生怒。顧我候繻人。屏息倚簷廡。酒醒相慰勞。世事多愁苦。此行雖彳亍。閱歷非小補。不見題柱人。非遽致華廡。底事哭窮途。險夷悉自取。語罷曙光生。款關率江潑。

### 馮廷丞

字均弼。代州人。乾隆十七年舉人。官

按察使。

#### 爲曹慕堂題亂山水圖

山峰滴翠山骨肥。山樹漫綠兼紅菲。背山臨水開荆扉。約略正枕紆迴磯。仙人拄杖衣丹緋。飄飄獨去忘所歸。潑陽極浦含落暉。亦有遠樹如秋腓。布帆兩葉烟中微。傳聞亂筆仙所揮。叩頭炷香固可祈。安用幻藥調蚌璣。空堂沉沉羈布幃。鈴聲一振風雨飛。鷺溪五尺烟霏霏。慕堂學仙癯不飢。獲此何啻身受磯。邀我作詩窮依稀。我言曷不張房闈。數數注意凝長晞。乾端坤倪忽發機。山水動盪雲因依。翻身蹋舟舟橫碕。武陵桃花是耶非。世人撫畫空吁歎。

#### 訪法源寺牡丹因飲王述菴西曹齋中

殘春猶有鼠姑繁。走馬來從古寺看。結夏僧閒都退院。天人惜花人到共憑欄。眼中節物渾相負。醉裏光陰且自寬。不是仙郎能愛客。銜盃那得到更闌。

### 阮葵生

字吾山。山陽人。乾隆十七年舉人。官至刑部侍郎。

#### 梅花書屋圖爲伊雲林題

去年曾作憶梅詩。細數平生看梅處。朝來乍披梅花圖。此景依稀夢中遇。前山後山雲氣滃。少橋遠帶寒塘渡。數椽精舍寄岩坳。竹外窗前逗香霧。小閣工吟何遜詩。擁書戲擬廣平賦。往蹟君應憶武夷。舊遊我亦懷元墓。草堂空紀古淮干。風雪久拋湖上路。余家勺湖草堂在淮城西北隅。癸巳秋黃水灌城。梅樹皆被淹沒。詩成掩卷轉長嘆。卷端愁讀故人句。卷首有朱五竹君題長句。竹君於前月下世。

### 周震榮

字清在。號篋谷。嘉善人。乾隆十七年舉人。官武清縣知縣。

蒲褐山房詩話。清在一行作吏。久淹下邑。而嗜書好古。畱心金石文字之學。又愛禮賢士大夫。如章進士學誠。從薊坡陳以綱。兩明經皆延之賓館。所撰武清縣志。詳核有法。又取鄭氏周禮注刻之。詩不多作。即此可見一斑。

#### 金塗塔拓本詞

鳳皇山前萬松嶺。碧波雲鶴空遺亭。表忠觀但存二石。金塗塔況餘千齡。深宮五夜範金土。如來西城常璽形。白蓮蹟古已難問。白石詩在猶堪聽。家山夢遠桐鄉好。雅事翠墨爭傳靈。坐想臨安千載上。篤生異

人五季丁。弩卻胥濤樓疊雪。排衙石筍山圍青。萬姓依王王佞佛。佛身千億千穹冥。蜀漢同時紛割據。頻年戰伐悲熒螢。錦繡千山恣逐鹿。觸蠻一角終憐甍。翠鈿紫陌春花輦。私第黃金海物瓶。還鄉唱罷王孫去。保叔崔巍月入櫺。烏井荒祠遺老拜。北邙宿草東風醒。君去更尋握髮殿。蒼苔敗瓦或有功臣型。

### 張五典

字叙百。涇陽人。乾隆十七年舉人。官上元知縣。有荷塘集。

### 乞陸二柳畫水竹屋基圖

吾家涇水陽。古原對畢郢。渭川在其南。修竹千畝整。振衣到崇岡。遊目時引領。斷靄浮太乙。殘雪明秦嶺。獨於蒼茫中。愛此蕭蕭影。風雨自刁騷。晴霽得明靚。心並綠天闊。興隨碧雲永。殷勤約此君。共我茅屋冷。中田兩泉眼。渟泓載枯梗。本來無町畦。儘與窮幽屏。風前揖檉柳。波上俯藻荇。請搦瀟湘管。爲寫篔簹境。潤筆吾已辦。溪茶與山茗。

### 將之松江

秋風昨夜到來初。料理扁舟任所如。顧我步兵堪絕倒。宦游還說爲鱸魚。

### 胡溶

字安公。鎮洋人。乾隆十八年鄉試第一。官蕭縣教諭。有吟石先生集。

君子行

君子貴知命。屢空非所憂。身不忘溝壑。心不爲怨尤。飢不飯嗟來。渴不挹濁流。練衫擁冬夏。園蔬薦春秋。行歌時捉襟。出門無所求。立志老飢寒。道義能自修。悠悠富貴子。嗟哉傷蜉蝣。

述志詩

達生觀物理。浮世歎人化。秋鴻足稻梁。春蠶有桑柘。震霆無鳴冬。嚴霜不買夏。百年爲大齊。瞬息亦代謝。君子知自然。好整復以暇。川澤難爲高。岡陵難爲下。奇功難爲賞。虛名難爲借。富貴非可求。神仙或多詐。代食希昔賢。願言請學稼。

都門喜晤王慈齋同年漫賦奉東

慈齋名宗綱字秋登潁上人

七載相思盡。驚心見面初。鬢眉看漸改。蹤跡定何如。花信中春老。天涯舊雨疎。比隣逢作客。不獨慰離居。  
自甲戌出都于今八年而同譜公車者不及五十人矣。慈齋寓與予相去數武。

十二月初二日泊仙女廟

東風吹客過灣頭。幾許離情獨夜舟。岸轉時藏林際火。雪明遙見水邊樓。三年舊雨應成夢。一盞新醅試破愁。不爲知蓬衾似鐵。竹牀常擁五更裘。

甲申立夏次日爲余初度讓山邀集寓齋漫賦

花陰庭院午清和。九十春風似夢過。小酌自消遲日永。故人偏喜異鄉多。隣園櫻筍三年隔。旅次星霜兩鬢磨。檢點南窗學安樂。天涯何處有行窩。

廿二日又雪登樓漫成

寂寞花朝雪尚殘。又逢深雪一樓看。紅燈水榭逡巡酒。白髮青春料峭寒。世事不辭求馬骨。天涯還爲就豬肝。蕭蕭更憶隄邊柳。二月中旬欲放難。

春雨漫成

春雨蕭蕭向晚寒。羈雌情緒好闌珊。畱心世事如書讀。過眼功名比夢看。燕石至今原可寶。隋珠終古不輕彈。紙牕破處來花影。頗識閒中有靜觀。

抵揚州

西風五雨櫂聲柔。斜照分明水上樓。三載天涯千里客。淡烟疎柳又揚州。

吳維鏜

字廉夫。太倉人。乾隆十八年舉人。

集南園作峨眉小松謔贈田在兼呈竹娛

世人不識蛾眉松。是松非松問坡公。坡公騎鯨數百載。請將吾意叩鴻濛。蠶叢以來蜀國古。積雪欲沒峨



眉峰元陰慘澹白日閉窮岩安得蒼髯翁西方羽人多異術帝遣縮取湫中龍雷雨一夜妙變化紛紛鱗甲散作千萬叢烟霏霧結自何代至今青青之色凝纖茸凌雲一寸心故在兒童竊笑蒿與蓬君不見兔絲附長松長松百尺何鬱葱一朝被伐橫道旁兔絲引蔓還春風嗟哉下士悲不逢首陽爲拙柳下工細觀物理未足異達者非達窮非窮願君持示竹娛老驟然一笑將毋同

吳桂

字一尊鎮洋人乾隆十八年舉人官潛山縣教諭有優然堂詩草

丁沽阻風東錢大讓山

誰唱公無渡孤舟客髮凋風欺官道柳月湧海門潮淺渚鷗眠穩寒空鴈陣遙萍蹤愧良友徒賦小山招

梁夢善

字兼士號午樓錢塘人乾隆十八年舉人官蠡縣知縣有木雁齋詩鈔

蒲褐山房詩話兼士爲文莊公幼弟風神簡遠弱不勝衣聊欲弦歌非其好也癸未丙戌計偕北上警寓予蒲褐山房作木雁圖以自況覺魏晉風流去今未遠

小除日偕施茗柯游惠山寺

緩棹梁溪又一時九龍山色互參差竹鑪烟靜茶初熟佛院香銷客到遲是處雲巒皆入畫偶來池館好題詩殘年莫漫嗟行役游屐今朝得自隨

秋草

捲簾人自對西風。回首天涯悵望同。金谷園中行跡斷。碧雞坊畔舊游空。梧桐影落斜陽外。蟋蟀聲寒小院東。記否踏青時節近。畫船歸去太匆匆。秋風嫋嫋倍堪憐。舊日曾來拾翠鈿。謝客詩成聞暮雨。晉公莊廢賸寒烟。羅裙捉蝶經三月。紈扇流螢又一年。太息紅心憔悴盡。輸贏誰與鬪嬋娟。

九月十二日出都自廣渠門抵張家灣登舟有感

通路亭邊聽雁聲。暮雲無際且南征。西風禾黍臨官道。落日牛羊近古城。生意漸如衰柳盡。浮生只共片帆輕。勞勞蹤跡年年是。淒絕天涯此夜情。

病中偶述

飛騰意氣復何時。病裏形骸百不宜。薄宦竟同爲客苦。長貧方悔治生遲。癡僮誰奉王褒約。老嫗空吟白傅詩。蒲柳望秋憔悴甚。朱顏已是鬢成絲。

朱休度

字介裘。秀水人。乾隆十八年舉人。官廣靈知縣。有壺山吟稿。

蒲桃峪

昨尋易水源。在廣昌縣城外。今亂易水流。糾結成隘口。天險扼咽喉。是名蒲桃峪。高低列戍樓。客行愁詰屈。下上窮冥搜。撥石蹠硜硜。涉波車浮浮。羊腸霜滑道。雁陣風驚秋。身如緣竿掛。心若懸旌游。歇鞍入村店。喘息類吳牛。餽飭聊充腸。欲憇不自由。山盤水更複。日仄前途修。

集杜題巽妙軒壁

蕭蕭古塞冷。忽已歲時遷。未負幽棲志。添予別興牽。喜無多屋宇。自有一山川。置酒高林下。溪風爲颯然。翠屏宜晚對。碧色動柴門。豈異神仙宅。不知城市喧。衰顏聊自哂。世事與誰論。到此應常宿。讀書秋樹根。

春日歸舟集唐

曉風芳草竟芊綿。畫出清明二月天。行盡江南數千里。一村桑拓一邨烟。

朱休承

字伯承。秀水人。稻孫之孫。乾隆十八年舉人。官城固縣知縣。

題鄞縣邱氏學敏古樹

仲孚東臬舊草堂。中有松柏參天長。龍蟠攫網出牙爪。風至浙瀝吹笙簧。高梅漫誇杜陵宅。古木應笑平泉莊。麻姑未來方朔去。人間誰與論滄桑。

盧鎬

字配京鄞縣人乾隆十八年舉人官平陽教諭有月船居士集

蒲褐山房詩話配京聞黃太冲萬充宗之學故爲浙東人士所推董君秉純稱其詩高處直逼柴桑險韻長歌亦得眉山一體蔣君學鏞稱其學凡三變卒底于成惜爲詩不自收拾後人僅存四卷未足以盡其長也

初夏與張潛也顧清芳清濟清標徐鳳來管余諸生游蓀湖集護法寺以茂林修竹清流激湍分

### 韻得茂字

香草生幽湖。世外匿深秀。曲曲尋湖源。冀以覲柔茂。時當夏景交。衆山紛綵縟。遠遠水中姿。蘋香襲懷襲。因造松竹林。歡焉酌醇酎。村濃深綠浮。座寂絳絃奏。沉吟各支頤。散策羣引脰。檻泉弄珠珮。石屋蔭華構。日永任游衍。源遠失窮究。欲尋新龍潭上清隱菴不果好月送歸舟。餘霞橫翠岫。回首白雲深。幾時重邂逅。

### 冬日南村偶書

暮色從何至。蒼蒼一片平。烟生山欲去。人遠月空明。天入風霜老。詩成夢寐清。何須問衡霍。世外亦兼名。

### 施養浩

字靜波。號茗柯。錢唐人。乾隆十八年舉人。官榮經知縣。有出塞入塞詩。

### 邊碑

雪封烟鎖迴難攀。卓立貞珉鎮此山。集古欲增金石錄。搜奇端自漢唐還。銀鈎勢作迴戈勁。紫蘚紋疑戰

血殷。堪笑閒僧能好事。強將頑礦擬斑斕。

巴里坤有漢永平二年敦煌太守雲中裴岑將郡卒五千人誅呼衍王壽建祠以祀今在西門外雍正九年大將軍查郎阿開

山道又得唐姜行本紀功碑字亦殘缺

進嘉峪關

幽詩風景見窮邊。寒谷生春藉力田。勝國僅聞呼瓦剌。天家已見囿祁連。氈裘君長今安在。戎馬書生事

偶然。出塞等閑歌入塞。皇恩軫恤俟三年。

到坤之次年即奉恩旨俟滿三年再奏

王日杏

字丹宸。無錫人。乾隆十八年舉人。官刑部主事。殉金川之難。贈光祿寺少卿。

陶然亭題壁

西山晚翠上孤筇。斜照神州殿閣重。蘆葦蕭蕭渾似雨。寒聲併入隔城鐘。  
僧舍茶烟滿竹扉。繩牀整憩亦忘機。莫香菊淡人無語。聽到哀蟬落葉稀。

賈虞龍

字煥若。大興人。乾隆十八年舉人。早卒。

暑夜檢亡友龔予鮮遺詩愴然感懷作

閱世不一人。萬古共明月。浸我庭除間。浩浩如可掇。無人共幽賞。獨對亦清絕。長天寄塵海。生命輕一葉。

低心避訕謗。纓纓變元髮。此意訴何人。茫茫隔存沒。  
存歿何足惜。念此身後名。之子美文藻。早歲蜚英聲。詩成千萬言。筆力戈矛橫。譬彼江海濤。適與天風迎。  
斯人今不見。太上難忘情。剩有手種竹。夜夜搖空明。

題伏生授經圖

晨光入牕睡未起。誰扣我門朝夢驚。授經之圖署素壁。畫師十日經營成。在昔西周初播亂。岐豐王氣歸。  
秦嬴。惠文武昭養賓客。連衡合從諸侯爭。二周贅疣日奔命。祖龍仗劍王綱傾。千年禹鼎入泗水。海若走。  
避蛟龍迎。先王法物自寶貴。不受秦辱潛其形。矧乃列聖著謨誥。煌煌大訓垂遺經。天奪其心盡焚燬。不。  
使巨典畱秦庭。挾書有禁著在律。豈惜萬古龔兼盲。異哉當時衆博士。四百六十稱諸生。西行入關糜好。  
爵。驪山硎谷遭其坑。發機填土骨撐拄。可憐一死鴻毛輕。爾時伏生在何所。鶴飛鴻漸緣青冥。漢皇龍興。  
奮三尺。赤符手握扶炎精。蕭相圖書習秦陋。叔孫制禮徒硜硜。大文不欲就淪喪。慙遺一老王朝楨。髮白。  
面皺口無齒。徵召不耐蒲車行。詔曰汝錯往授受。聲牙詰屈難爲聽。裾屐胡爲立几席。天然吐秀如調鸚。  
古文篇章四十六。始味噉蔗終建瓴。咄哉智囊不善學。外託經術專刑名。刻薄寡恩導漢帝。宗藩削弱非。  
人情。陳屍東市亦草草。坐令吳楚生妖星。先王作書道政事。當時面命空丁寧。此經之傳歷千載。諸家牋。  
注紛畦町。解經經亡聖道晦。思之終夜心怛怛。我披此圖一惆悵。衣冠肅穆堪儀型。安得鑄金日朝禮。呼。

之欲出來精靈。

故明侍御史沈公殉節詩

公諱履祥起家進士爲福建縣令以養親去官絕意仕進爲父母所迫出爲桂王監察御史爲王借餉福建聞王兵破死於台州

蠻烟蒙霧蠻山青。猿啼鬼嘯秋冥冥。壞鏃斑斑土花蝕。游燐黯黯戰場腥。西風吹處殘魂哭。天命潛移難再復。南渡猶聽漢苑鷓。中原早失秦庭鹿。父母生余何不辰。四郊飛檄走烟塵。聊爲郭外勸瓜客。試學柴桑種柳人。頗聞越地開軍壘。故國遺臣投袂起。石城羞說褚淵生。匡山欲殉祥興死。驕兵悍將索軍租。憔悴朝侯少敝襦。宮中不見金錢賜。壁外空聞庚癸呼。奉詞告糴風帆疾。遺庶何人倉府實。捐助惟聞卜式賢。窮搜豈用宏羊術。家亡國破竟何歸。行殿蒼涼秋草肥。夢度重關依故主。淚和碧血點朝衣。聖朝寬大恩波廣。繹縛憐忠寬法網。齊桓不記射鈎仇。漢祖將行雍齒賞。耿耿孤忠矢不移。全拋馬革付荆茨。至今越水流嗚咽。來往行人哭薜碑。

陳文錦

字綱齋。楚雄人。乾隆十八年舉人。官騰越教諭。

雜感

我本將家子。從軍有歲年。烽亭賓四守。坐老南山邊。日仰官廩食。走狗射飛鳶。羽書一夜馳。心膽飛賊前。韓盧喜短草。騏驥鳴秋天。篆養終惠愛。微軀寧惜捐。鋒指無完敵。蛇豕安足患。誓清南海波。以奠蛟龍淵。年少使俠氣。鄉里頗見苦。樗蒲擲百萬。甌石不足數。羽檄徼外飛。壯志隨風舉。朝占壯丁籍。蓐食辭門戶。行行踰九陸。望望抵白古。元籙大如瓠。封豕羣嘯聚。狂象結陣來。詎論豺與虎。旌干揮毒霧。巨礮衝瘴雨。汲飲雷淵旋。麤散熏腥腐。鬼子雕題頰。嵌金漆兩股。黑齒嗜人肉。嘔骨詎肯吐。塵戰動十日。晝夜不安處。將軍按劍馳。丞相日循拊。微勞安足程。一命輕如羽。生當勒燕然。彤墀列珪組。死當爲鬼雄。訣絕故鄉土。將之騰越畱別倪雲洲先生

孤生園中蓬。紛飛越長道。詎有青雲姿。東西跡如掃。芳草萋路隅。春禽變昏曉。君子崇高義。世德敦夙好。軫念無衣客。不自快朝飽。浮雲忽異色。羽聲傷懷抱。賤子亦何言。愁心蔓如草。征車首前路。西極漫浩浩。會合當何時。千秋期共保。

蛩

小閣渾無夢。寒蛩獨有聲。似憐風雨夕。勉慰索居情。響近窗間切。聽來竹畔清。涼秋知又近。月落見參橫。

除夕

雞聲人語漫蕭然。酒醒殘燈尙未眠。三十六旬都浪過。偏將一刻惜流年。



此  
页  
空  
白

湖海詩傳卷十六

王鳴盛

字鳳喈。號禮堂。嘉定人。乾隆十九年殿試第二人。及第。官光祿寺卿。有耕養齋集。

蒲褐山房詩話。禮堂以大考翰林第一。由編修擢內閣學士。典試閩中。以多用驛馬。降光祿寺卿。丁憂後不復出山。移居吳下。先時與惠松崖交。深究羣經古義。著尚書後案。及軍賦考。皆闡發鄭君之說。又為十七史商榷。據各史紀傳志表考其同異。而折衷之。更著蛾術編。列說十門。以見其學無所不該。古文宗導。岩震川詩兼綜三唐。初為沈文愨公入室弟子。既而旁涉宋人歸田。後復守前說。於空峒大復。鳳洲臥子及國朝漁洋竹垞。咸服膺無間。改雖轉益多師。終歸大雅。茲所錄者。皆其手自審定。寫以貽予者也。

矯志篇

墻上難趨。貧賤難工。昨日健少。今老成翁。長繩繫日。晚莫從。壯盛智慧。殊不再逢。俯仰天地。悲來填胸。  
解一 驩駟捕鼠。乃不如狸。鳳凰司晨。乃不如雞。秋蘭雖芬。鮑肆間之。明珠在泥。皦皦何為。拔劍起舞。拂衣旋歸。  
解二 左控夏服。右操黃間。趨趨狡兔。掩以修竿。命儔嘯侶。促坐為歡。投壺六博。飛爵闌干。清歌激楚。妙舞娑盤。  
解三 思慕王喬。研精軌道。乘躋遠遊。經歷深杳。僊人授藥。還精補腦。棗實如瓜。桂實如棗。排棄火粒。後天而老。  
解四 典冊法書。藏在蘭臺。雖遭亂潰。獨不遇災。志媿羣雅。菀其鴻裁。藏山入林。蹈海鑿坏。百世有知。以俟方來。  
解五

山遊鈇志

習靜歸巖阿。身世永相棄。眷言陶嘉辰。棲尋信遐寄。萋英綠野秀。蘭芳紫莖媚。綠源極演漾。曠渚渺空翠。水上風行徐。山下出泉細。屯雲正滿眼。孤煙杳無際。曾崖隱天維。登頓歷蒙翳。出窈入冥間。忽復造幽異。峭崿松磴陰。滴瀝乳竇秘。境往情已遷。言忘理成契。養真誰爲同。齊物自無累。傾暉不戀人。晷晚映衣袂。逝將遊太元。逍遙辨深意。

東崦西崦

溪行忽無路。回首暮煙合。過橋湖水寬。隔岸亂雲接。圍繞玉鏡潭。寒影衆峰集。空色不可攬。彩翠似堪拾。東西崦幾重。蕩漾舟一葉。迢迢擅勝亭。隱隱光福塔。何處聞菱歌。清唱自相答。

入鄧尉山暮宿聖恩寺

蒼烟滿秋山。落日生暮靄。弭棹歷嶠嶽。理策尋靄靄。溪橋風泠泠。寒流激空籟。捫蘿長林迷。跼步崖石礙。微月墮幽澗。俯見清光碎。寺開知徑盡。客至自雲外。空堂響法鼓。羣動息香界。虛澹不用遣。深夜無夢寐。欲謝區中緣。攝生遠塵壒。

江行

沙岸明月陽。楚江歌微雨。時聞野寺鐘。不辨烟村樹。白鷺背人飛。銜魚自來去。

渡河瀝谿過寧國縣行亂山中

急湍橫我前。欲行忽無路。商人負茶蕪。喧喧此爭渡。編筏資利涉。十百排鴈鷺。吾亦隨若曹。絕流從所務。山城殊僻陋。暫憩不暇顧。合沓羣峰來。登頓眩欲仆。危岑造天關。仄徑礙微步。深谷多修篁。曷景難久駐。躋攀眼一豁。始與平地遇。林轉硤角回。前嶺又餘怒。畏塗迫頽齡。顛倒作計誤。坐石望歸雲。故鄉良可慕。

石鳧山

舒鳧本水禽。場翼同斥鴳。忽作高舉形。軒翥在雲漢。我行入山深。險艱飽所憚。茲峰尤卓詭。鼻蠟挂天半。鐵壁斷攀登。線路曲縈轉。巖傾巨石出。磈礫墮絕澗。懸溜裂崖來。千丈觸石戰。殷地疑霆驚。飛空類珠濺。出谷見曦輪。造頂識山面。決吻復顧脰。非鵝亦非鶴。流傳竇子明。大藥于此鍊。蘊真遂遺塵。白日生羽翰。學仙苦未成。愁辛旅顏變。鴻駕空紫烟。翹迹徒仰羨。

家德甫三泖漁莊圖歌

吾家令弟非常儔。蕭然窮巷百不憂。忍饑誦經銷歲月。閉門覓句工雕鏤。草堂前對谷水流。紅泉碧樹蒼山浮。有時散髮扣舷去。狂歌一曲凌滄洲。竭來金閨數相見。平生知我甘窮賤。吹簫擊筑多故人。十千沽酒同歡宴。酒酣起舞首自搔。當杯心共孤雲高。丈夫生世不諧俗。便當溷跡安蓬蒿。故園況復堪吟眺。鏡裏晴嵐滿雲嶠。扁舟已息漢陰機。短笠將隨任公釣。偶然遣畫垂綸圖。撈鰕射鴨皆可娛。嗟我落魄胡爲

乎。北燕南楚空馳驅。蒼茫葭葦平波外。何日相從陸瑁湖。

雨泊江岸登天門絕頂

我從南楚浮歸舫。中流浩蕩乘長風。布帆高挂似飛鳥。飄翻直指天門東。插江翠壁相對出。遙見突兀青濛濛。削成疑自巨靈掌。移置定出夸娥功。須臾雲起飛雨集。白頭怒浪掀孤篷。舟師相呼入浦溆。繫纜急傍孤蘆叢。興來便攜九節杖。思縱遠目開心胸。潺潺絕澗蹋亂石。層層仄磴攀枯松。振衣千仞發長嘯。驚起鷓鴣盤高空。峻嶒兩岸勢忽斷。岷濤萬里流當中。始知楚關此天險。屹立一鎖洪波衝。是時陰霞散晚霧。江光隱見磨青銅。欲從牛渚呼謫僊。更向青山懷謝公。東望石頭互虧蔽。迢迢天闕排巖崿。興亡六代付逝水。人寰刺促悲安窮。終當挹取玉漿飲。上吸倒景騎飛龍。

梁元帝廟行

青絲白馬圍臺城。湘東萬騎歸江陵。枕戈嘗膽徒虛語。行師代景紛相乘。長沙旣破同氣盡。才子併命殊堪矜。夏口已聞肆魚肉。荊門復見除股肱。胡豆洲前狂虜死。登壇慷慨稱中興。羣僚累表頌符瑞。爭誇紫氣交環絕。當時文軌僅千里。郢都蕞爾良難憑。如何建業不復顧。欲取荆楚當殺漚。殿中輟講寇已至。枇杷門外愁雲凝。龍文玉軸一朝毀。拔劍擊柱空摧崩。何年廟食尙遺迹。三楹茅棟連溝塍。殘碑蒼蘚巫覡斷。無復社鼓來鑿鑿。嗟哉章華亦漫滅。況乃此地荒榛莽。行人下馬一憑弔。興亡過眼如風燈。

夢遊岱嶽歌

我志窮十嶽。身佩真形圖。汶陽道上縱遠目。突兀岱頂青模糊。魯酒若琥珀。絲繩提玉壺。解鞍卽醉倒。偃臥胡姬墟。天風飄飄浮絕磴。導我忽轉松蘿徑。蘿徑逼高寒。蒼蒼十八盤。漢策闕古字。秦松瀉哀湍。振衣便覺凌紫極。倚劍直欲生飛翰。穹崖濺瀑多殊狀。決皆已在層霄上。碧霞四氣拱星辰。青帝五雲開崑嶂。崑嶂疊疊烟青青。封中雲氣縷縷生。安期一笑相逢迎。如瓜之棗出啗我。驂駕白鹿空中行。天門詖蕩日。觀龍從。河流挂樹。海色搖空。蒼煙九點望不極。合沓下見扶桑紅。銀臺倒影火輪出。驚回清夢仍相失。風馬雲車乍有無。丹梯翠壁看明滅。應劭記李斯碑。平生懷抱空好奇。餐霞鍊藥不早決。坐待蓬萊清淺始。悔朱顏衰。風塵回首驅征鐸。惟聽霜鐘殷巖壑。萬里終當汗漫遊。十年肯負煙霞約。

范上舍塞北省親圖

一人紫綺青羔裘。雕鞍側坐玉腕騶。導以僂從連輕輶。一人袴褶捲臂鞬。蓬頭突鬢佩吳鉤。停驂左顧欲進仍遲留。主人戴笠披赤鬪。意氣凌厲凝雙眸。問誰粉墨開金碧。咫尺煙嵐浮几席。軍中一范方專城。公子思親事于役。何甥謝舅亦肯從。徑自江南趨塞北。初出居庸關。黃羊白草蒼崖間。再度彈琴峽。霜林岔道風蕭颯。土木宣府都經過。柳屯枳嶺征塵多。迴瞻來處莽無際。漸覺所歷高嵯峨。羊腸一線穿雲去。亂石驚湍灑寒雨。疊嶂摩天落日低。崩榛匝地荒煙暮。鳴鞭遙見飛狐口。代郡孤城隱雲樹。烽樓危旌凍欲

折指點先朝備邊處。六郡防秋有戰場。三關設險空殘戍。解裝一笑循南陔。綵衣舞罷欣徘徊。遠慰頻年望雲志。壯遊還上李陵臺。郊原洩漭平沙走。堠火關榆回首堆。龍堆定有控弦兒。雁磧應思射鵬手。嗚呼男兒出門萬里輕。樂事況復當趨庭。功名會見繼老子。自有胸中十萬兵。

石鼓歌

太學戟門有石鼓。長廊大廈深藏緘。手摩妙墨剔苔蘚。細讀古調同雲咸。岐陽一蒐誇盛事。遮羅雉兔兼響震。作歌紀績用傳後。萬夫鑿石來巖巖。魯叟編詩偶不錄。此豈有意相夷芟。陳蒼野外棄置久。剝落缺畫成纖纖。其一作白。幸復出。氈包席裹封瑤函。宣和之年保和殿。森陰鬱鬱飄松杉。此鼓歸然珍襲好。香廚册府光芒銜。自汴入燕竟無恙。守護秘怪神所監。置諸兩塾始皇慶。近光作賦辭誦誦。于今又閱四百載。文中斷填空嵌。蛟龍攫綯怒鱗凸。鸞鳳軒翥長毛。滄桑久歷彌可貴。至寶豈特逾球城。昌黎宛陵遞歌嘆。雄章秀句窮鐫劂。宇文以下那辦此。子卿妄語空譏議。我生金石有奇癖。嗜好頗覺殊酸醜。章樵潘迪施宿王之厚吾衍薛尚鄭樵箋訓差能舉大凡。竭來京國睹此鼓。不負萬里穿征衫。試觀字體異蚪蚪。乃知梅蹟言多僂。我方欲辨壁書僞。傳鈔秃筆勞秋蠹。

秋日集岡齡弟小停雲同顧景嶽諸君遲劉企三徐蒼林不至

黃金可成百不憂。霜鬢欲挽嗟無由。但願春秋多佳日。勝侶共賦逍遙遊。服除尙餘風木慟。臯魚淚點不

得收京華路。遠柅車轍。誓暮且復依林邱。小謝西堂多藻思。拍肩把袂偕虎頭。意行看竹不問主。長歌短  
咏聊相酬。憶昔少年托廡下。平江背口恒淹留。今來徑署寓公號。賃居竊擬營菟裘。官名自喜樂圃繼。寄  
跡定許怡菴儔。八門盤門最僻左。雅稱簦笠來探幽。高齋況仿紅欄里。恰宜坐雨兼尋秋。比來詞賦作者  
盛。體格漸恐趨俳優。春華競工秋實少。更傅鉛粉窮雕鏤。讀書自是我輩事。流光可惜同蜉蝣。肯徒酒食  
事徵逐。要須高步追前修。當筵意氣互期許。我歌子和商聲謳。忽憶劉郎方示疾。丈室宴坐多窮愁。心情  
縱令木石似。談笑尙卻熊羆不。城北徐公別亦久。不見離畔維輕舟。何時眼中得二士。比鄰來往成風流。

### 遊道場山

吳興城南天下稀。自波翠巘相因依。道場一峰更巉絕。梵宮高下開林扉。我舟斜穿夾山漾。霜冬澹日寒  
熹微。到山谿盡山滿眼。盤空細路衝烟霏。羊腸龜背互詰屈。石稜松鬣紛成圍。山腰亭子敞北戶。具區萬  
頃環灣碕。清池一方浮湛湛。傑閣百仞凌巍巍。訥公開山此駐錫。香嚴水觀甘忘機。階前不啻啞虎善。簷  
際共命仙禽飛。稗官謬悠那可信。共詫神異先知幾。更將卓筆誇秀鎮。浮榮似令出增輝。豈知道人外生  
死。俗物祇足供嘲唏。吾生漫浪百無用。風塵回首辭籠鞿。寡聞惟持茗帶偈。壞色欲服掃塔衣。天花一室  
道場在。把茅作計終無違。下山瞥見翠微遠。樹杪白雲蒼欲歸。

### 題吳興城南水閣



清暉當戶生。終日對虛明。曉漲雲浮岸。春山翠壓城。捲簾雙燕入。隱几一琴橫。會得閑中趣。臨流更濯纓。

夜歸

犬吠竹籬外。燈明草屋中。夜潮隨月上。孤棹隔溪通。稚子候門久。家人酌酒同。夜闌如夢寐。相對慰飄蓬。

天門

白浪天門斷。千崖杳莫攀。登艫一長嘯。遙見謝公山。我欲浮湘去。行吟楚澤間。今宵對明月。把酒慰離顏。

歸次蕪城懷錢曉徵

遠客辭巫峽。孤帆一葉輕。春江花月夜。獨宿廣陵城。念爾燕臺去。迢迢匹馬行。差池不相見。惆悵若爲情。

懷鄧尉

峰嵐淡靄映湖光。回首清遊興未忘。一徑松陰秋入畫。三層水閣夢生涼。風帘雲碓宜晴日。澗草巖花出異香。惆悵軟紅欺客袂。幾時洞口結書堂。

登黃鶴樓

萬里江天煙霧開。上頭棟宇鬱崔嵬。荆門曉色當窗盡。滙浦春濤繞座來。終古白雲餘斷靄。數聲玉笛落殘梅。茫茫人代銷沉去。拍檻狂歌思轉哀。

鄂渚雜詩

迢迢郢路古今情。夏首西浮更遠征。三戶遺墟春草碧。六朝舊事暮江平。米船誰遣迎溫嶠。羽扇還須藉顧榮。幾許興亡猶在眼。漢南雲樹感愁生。

大別山前落照頻。南樓清景迥無倫。蘆中問渡真窮士。漢上題襟少故人。渺渺晴川千里客。匆匆歸雁一年春。誰知庾信哀無限。每到登臨易愴神。

歸次金陵憇燕子磯清江院感賦

虎牙銅柱倦登攀。無恙孤帆此日還。遠夢尙驚三楚浪。舊遊重看六朝山。蕭條行李誰知己。灑落風塵損壯顏。愁絕白門楊柳色。應同庾信賦江關。

蘆溝橋

臥虹終古枕桑乾。泆漭渾河走急湍。馬邑風煙通一線。太行紫翠壓千盤。喚人喔喔荒雞早。照影蒼蒼曉月寒。沙際閑鷗應笑我。又聽鈴鐸送征鞍。

春盡日送同年平太史聖歸浙東

周南滯迹久同稽。把酒津亭忽唱驪。醉裏人將春並去。望中雲與水相齊。禹陵洞穴仙官守。越國山川謝客迷。鑑曲敢言煩特賜。鄉園隨處得攀躋。

題畫

披圖長自愛煙嵐。笳笠筠竿我舊諳。風葉滿山秋水闊。孤篷殘夢到江南。

九江舟中

渺渺潯陽烟樹齊。蕭蕭溢浦雁行低。長江九派東流去。何事孤舟獨向西。

雪中聯句

作客欣得朋。喑鳳畏人但枯坐。忽焉鱗鬣集。甫德乍疑微雨墮。淪淪愁雲凝。微曉稜稜寒意作。樹訝乖龍蟠。殷來

軫凍雀餓。六花舞欄楹。喑鳳四野洗堀堞。灑松密復疎。甫德碾玉揚更簸。疎篁折有聲。微曉老屋壓欲破。頗畏酸

風尖。殷來差喜酒戶大。韭芽出吳羹。喑鳳蜜餌本楚些。食單列無多。甫德詩卷正可和。醉吟馬耳埋。微曉狂擬驢背

馱。我儕苦羈孤。殷來生計每摧挫。今秋聞倉箱。喑鳳連村收秬稷。歲晏緩租庸。甫德時平謝勞瘁。矧見宿麥抽。微曉

益資春種播。對景良足懼。殷來稱瑞行當賀。蜚螭土已殲。喑鳳樵枯冰猶裹。白戰勿致師。甫德閉門任僵臥。微曉

同錢曉徵曹來殷家德甫用昌黎會合韻送王次山先生歸常熟

眩目雪花高。瘁肌朔氣重。喑鳳忽興故園思。遂見歸計勇。甫德裝成一羽輕。寒壓兩肩聳。微曉竅振風尚號。帆開

浪猶涌。殷來養痾公志便。問字我忱壅。喑鳳結添卜商衣。履曳原憲踵。甫德叩莛駭洪鐘。挾卷悝荒壟。微曉游常兒

與從。境嘆望羊恐。殷來徑伉嗟俗師。流傳多繆種。喑鳳勃窣鮮囊該。踳駁徒雜冗。甫德逝矣味火珠。誰歟搜汲塚。

微曉衰衰逐頹瀾。紛紛博世寵。殷來先生管道樞。末學作梁拱。喑鳳砭俗論必嚴。匹古意未恂。甫德覃思幹幽元。鉅

製冠應奉微曉幽鍵啟奧窈銛斤斲拳腫來十道九域探微三篋百城擁微開昔烏臺遷微羣驚白簡捧微志欲

懲訓狐沸豈耐羣蝥微曉正色排娟嬰直筆刺微鱸來然犀燭罔象強弩射闕鞏微倭倭厲丰規稜稜振傷

罽微乃知一士謬直令百夫悚微曉旋解紫綬還閒薙碧草茸來酒陣整鞦韆騷壇集球琪微遂初欣還山

耽榮啜得隴甫吾谷峯嶙嶙尙湖波溶溶微曉閒身付蓑笠塵鞅脫桎羣來竭來主講席多士資發冢微教

比時術蛾文喻吐絲蛹甫問事愧長頭解疑快曲踊微曉茲聆驪駒歌正值鳥獸羣來往矣冰堅腹微思花

拆甬微佇立望河干霜林浩呼洵甫

### 紀昀

字曉嵐獻縣人乾隆十九年進士官禮部尙書

蒲褐山房詩話君閱覽博聞才情華瞻少日已為史文靖公劉文正公激賞及再入詞垣適以詞臣  
奏請將永樂大典內人間罕觀之書鈔錄流布既而詔求天下遺書開四庫館令君與陸君錫熊總  
司其事攷異同辨真偽撮著作之大凡審傳本之得失撰為提要進呈御覽上皆閱而善之其未鈔  
錄者則為存目以識之分繕七部貯于文淵閣圓明園熱河盛京及揚州金山杭州諸處嘉惠來學  
又加以提要二百卷使讀者展閱了然蓋自列史藝文經籍志及七略七錄崇文總目諸書以來未  
有閱博精審若此者蓋文治之極隆而儒生之榮遇也速為禮官之長恭遇高宗皇帝御宇六十年  
行內禪之儀進冊授寶宏規盛事皆千古禮儀之所未備禮臣參稽經訓綜以會典斟酌進呈均蒙  
俞允次第舉行普天同慶亦君所擬定者為多君既黼黻昇平甄綜羣籍故其應制之作雖為詞苑  
所宗而于尋常所著不復珍惜成編茲于館課偶存中錄存梗概已無愧于燕許楊  
劉而試帖體乃國家所以取士大小試無不用之故所錄特多俾為士林準則也

### 西域入朝大閱禮成恭紀

一掃檣槍大漠空。陽關萬里使車通。全收月窟歸封內。原有星弧在掌中。天馬來時行就日。靈夔吼處響生風。懷柔控制相兼用。應識君王睿畧雄。

花門作隊遠潛蹤。積石流沙路萬重。絕域何年迷漢壘。王師當日問崇墉。幾回砮箭驅妖鳥。一旦軒轅召應龍。數曲金笳歌出塞。西戎早已避旗鋒。

趁趨羽騎走如雷。三部降蕃次第來。伴使經時攜勃律。仙莊早日覲蓬萊。秋深驛路人初到。雲捧旌門影正開。便遣平臯陪大纛。且看七萃躍龍媒。

曲宴芳園酒乍醺。將軍飛遞羽書聞。窮荒更遣蟠桃使。降表連收貝葉文。兩國名王馳贊普。同時別部走奚斤。殷勤攜得昭華琯。計日中朝覲聖君。

日行三百入長安。別苑層城畫裏看。宿衛舊聞唐頡利。衣冠今賜漢呼韓。多時逋寇擒狼種。幾隊高蹄付馬官。好續周書王會解。千秋勝地記田盤。

東郊南苑路回環。蕃使行隨十二閑。九奏聲中瞻御幄。萬年觴側侍天顏。燭龍珠躍雲霄外。火樹花開指顧間。真是滄溟觀日出。六鼉頂上駕三山。

朔風獵獵乍盤雕。上將持麾下紫霄。天上星辰張玉弩。軍中鼓吹應金鐃。珠旂搖曳旗初展。銅埒回旋馬更調。十萬貔貅齊入伍。分明氣象認天朝。

環抱中權兩翼交。森嚴後勁接前茅。連營畫鼓聲相答。八陣雕旗隊不淆。燦燦星文浮劍氣。彎彎月影上弓梢。六軍控馬齊翹首。尺五城南望翠旄。

五色明霞護綵旄。至尊韎鞞演龍韜。由來六職分司馬。況值諸戎貢旅獒。黃道平馳雕玉勒。烏孫遙識鬱金袍。爭看聖德兼文武。九合天弓手自操。

羽衛交馳玉腕驅。陪遊仍遣召渠搜。重看犀手三千弩。爭拜龍旗十二旒。見說須臾禽母寡。果然容易戮蚩尤。願將聖主天威重。傳到西荒海盡頭。

恭和御製九日侍皇太后宴並賜內外王公諸臣食卽席得句元韻

帳殿崔嵬曉氣澄。重陽不數宴孫陵。花開松漠圍黃纈。香佩萸囊製綵綾。五色安輿雲對捧。萬年仙酒露新承。題糕勝事龍沙北。自古登高到未曾。

賦得山梁悅孔性

會心原不遠。樂意總相關。達者能觀化。仁人本愛山。天機同浩浩。物態共閒閒。偶爾逢心賞。悠然息轍環。坐看雲自出。忽見鳥知還。童冠如偕點。行藏欲語顏。鳳翔千仞上。龍德六爻間。鄉黨終篇意。長吟雉子斑。

雉子斑樂府題名。

賦得風絃漢殿箏

何處夜琮琤。冰絃帶月清。涼颼來玉署。秋殿動銀箏。乍聽風從律。真同響應聲。何須銀甲撥。已繞畫梁鳴。呼吸機相感。噶于調自成。爽如聞籟發。高欲遏雲行。斷續隨宮漏。悠揚散禁城。早朝天樂奏。一曲和韶箴。

賦得殘月如新月

缺月照庭除。纖纖畫不如。雖非三日後。却似半規初。祇道弦將上。誰言魄漸虛。依然千里共。還是一鉤餘。光但分增減。形難辨斂舒。誰能分顧免。定亦誤驚魚。老桂花常在。仙萸葉漸疎。餘輝如可借。爲照案頭書。

賦得夏雲多奇峰

嵐氣初蒸鬱。雲容俄嶄岳。卷舒形屢變。重疊勢相攙。峭立峰成筆。高張石作帆。雄應爭岱華。險欲類崑函。拔地風頻鼓。摩天日乍銜。雷疑泉響澗。雨訝瀑飛巖。縹緲真難卽。嶽嵒自不凡。願陳紕縵頌。流韻入韶咸。

賦得秋月如圭

月色淨玻璃。秋宵畫閣西。無瑕原似璧。有角便成圭。仙桂開方滿。新桐剪乍齊。修來原是斧。切處定如泥。象以斜長肖。形從朒朏稽。涼天懸玉片。深夜照金閨。冷露中庭濕。明河右界低。方輝吟入戶。更憶隱侯題。

賦得水始冰

霜自何時降。寒從昨夜增。深灘多露石。淺瀨半含冰。細溜微微聚。流澌漸漸凝。經風纔欲合。遇暖尙難勝。瑣屑銀千縷。玲瓏玉幾層。一痕初界畫。數片乍觚稜。舒斂機相待。剛柔氣互乘。應知墜腹後。陽律又潛蒸。

# 錢大昕

字曉徵。號竹汀。嘉定人。乾隆十六年召試。賜內閣中書。十九年成進士。官至少詹事。有潛研堂集。

蒲褐山房詩話。君聰穎非常。髫髻時。卽有神童之譽。以召試入內閣。再入詞垣。覃研經史。根柢精深。詩賦之外。究心數理。精蘊歷象。考成能通。中西之學。秦文恭公修五禮通考。屬以相助。自廣東學政。銜恤歸家。有終焉之志。歷主書院。輒以小學爾雅授生徒。所撰二十一史考異。又撰金石跋尾四集。蓋鄭夾深。王深寧之流亞也。詩清而能醇。質而有法。古體文亦以震川爲歸。年七十五。追溯爲諸生。已六十年。有司循例請重游泮宮。因有句云。三不朽間當立脚。四先生往執差肩。其寔唐婁諸公。斷不逮其百一也。

## 擬古

亭亭孤生松。結根山之阿。于霄聳直幹。蔽日交繁柯。下有芝與苓。上有萹與蘿。年歲倏已暮。霜露亦以多。幽人卜居此。松下常高歌。願爲歲寒期。相對鬱嵯峨。青青河畔草。灼灼池中荷。顏色豈不好。秋深當奈何。龍門百尺桐。輪囷盈十圍。斲爲綠綺琴。絙以白玉徽。水流何洋洋。山高亦巍巍。鍾期顧我笑。一彈情以移。奈何舍我去。破絃不復揮。不惜絃斷絕。所悲知音稀。郢人泣匠石。蒙莊感惠施。愁來不能語。千古同歎歎。

## 游天平山歷龍門白雲泉蓮華洞諸勝

夙昔慕臺尙。散髮事登陟。名山志遠游。攜屐探九域。天平況在邇。葱翠望不極。屯雲生層岡。蒙泉注巖隙。壁立石骨露。峻絕苔逕仄。梯空疑無路。攀蘿若可卽。行險心惟亨。仰止道自得。理以湛寂超。境與幽邃適。卽此澹塵慮。奚事逃藪澤。歲宴期重游。眷茲山中客。



讀漢書

黃綺避秦漢。采芝汗漫游。不與豎儒伍。而況辨士流。吾冠幸無恙。欲溺將奚由。姓名落人間。失計逢留侯。鴻鵠羽翼成。徒爲娥姁謀。假館建成所。安呂非安劉。區區具金幣。毋乃溷公不。

茂陵慕不死。意與仙人期。豈知巫蠱禍。乃自方士貽。黃老尙清淨。文景所以治。變而談神仙。所見一何卑。我欲見鉅公。岡上如嬰兒。服藥可少病。勿爲妖妄欺。

在漢中葉後。政柄歸尙書。置相不選賢。竄取容嘿徒。流汗婦參語。僂背吏夾扶。扶陽與防鄉。醞藉稱通儒。恩澤列徹侯。媿媿保位俱。威福自臣作。履霜慎厥初。居攝頌功德。後來奚足誅。

厚味實腊毒。高位易觸罪。五鼎食幾何。失意便菹醢。不見葛繹侯。刻印拜上宰。涕泣不肯受。自云從是殆。才果濟蒼生。溘死亦何悔。淺哉曲學夫。持祿不知止。

秦坑灰未寒。士節日以貶。造請公卿間。見笑徒自點。膝席避田蚡。長揖無汲黯。將軍肯臨況。治具吾敢儉。乃公戒牀下。大要教兒調。偉哉平陵朱。願請尙方劍。

持平三尺法。人主與民共。云何武健吏。內深次骨痛。操下束溼薪。一時重足恐。殺人計自安。古法置匣用。天道有神明。好還神所恫。賢哉萬石嫗。斯言可警衆。

寄述庵用東坡除夕倡和韻

少小好讀書。未有袁豹半。中年精銷亡。炳燭吁可歎。狗馬子弟習。珠玉兒女玩。樂極恐生悲。聚多終或散。元牝以爲門。法喜可作伴。自從悟如何。何暇伐旦旦。惟餘文字癖。欲療醫無案。語辨宋魯訛。文證豕亥亂。吟詩鼻長擁。撲易手先盥。鄉人憎怪迂。古調啾唧緩。賞音獨吾子。嗜好同一貫。深入賈君勇。助登激子慳。如何久別離。夜雪誰送炭。當年劇談地。蒲褐闕空館。萍開必終合。井冷行復暖。懷哉曷月歸。願言見此粲。

題黃小松看碑圖

判牘有餘功。訪碑無寧晷。尙友到古人。翠墨雲烟委。歐曾趙洪後。立幟江夏子。古物聚所好。不踉走千里。金薤垂琳琅。收拾斗室裏。憶昨造高齋。清闕爲我啟。香廚一縱觀。如入五都市。畫手數顧陸。絹素那足恃。何期東京刻。眞面壁可指。法服儼冠劍。禮器陳匡杙。銀鑿壁流離。甘露木連理。靈秘不能藏。一朝列棗几。奇怪驟難讀。過眼聊復喜。合井知何年。癖嗜略相似。披圖宛晤對。慚我聞厖咫。想見手摩挲。比鄰招短李。片石如能言。風塵感知已。謂李鐵橋。

宋徽宗畫龍歌

畫龍古今誰妙手。前有僧繇後所翁。宣和道君亦能事。游戲落筆侔神工。空齋欻忽風雨晦。粉墨黠黠發光怪。陰雲合沓迷高穹。震電崩騰驚下界。一龍夭矯胡髯垂。遙空隱現鱗之而。神物變化意飛動。豐隆刈缺相追隨。左方題識更瀟灑。瘦金小字兼行楷。興雲吐霧豈有心。欲吸長江濟四海。題云興天上雲吸長江水濟四海民落天

下兩凡一我聞沛都全盛初。太清樓閣收圖書。關仝董羽妙蹟在。見宣和畫譜至尊清暇時臨摹。良嶽山成却

灰速興廢一朝如轉轂。五國城頭塞馬嘶。真龍終受泥沙辱。吁嗟乎尺幅丹青千載傳。烏號去杳竟誰攀。

一從曲洧南歸後。寂寞龍顏想像間。朱弁使金得二帝御容以歸。

題述庵三泖漁莊圖

昔遊三泖秋正暮。涼波十里浮吳艘。中流塔影插天半。突兀如建蓮花幢。蒼茫葭亂望不極。半篙淨綠流淙淙。漁人此時齊結網。蜻蛉一葉張棹雙。編筲挾罔繫答答。扣舷遠近歌無腔。斜風細雨波不起。時聽野寺疎鐘撞。前塵十載寄夢寐。此意耿耿誰能降。王郎本是湖海客。潛夫作論驚愚忝。清詞雅材追百五。勁筆直擬龍文扛。風塵倥傯不得意。便欲采藥隨老龐。故園況在長泖上。三間老屋開虛窗。維摩十笏塵容膝。却喜面面當晴江。漁兄漁弟還往熟。籬根那復驚花龍。有時一棹乘興去。繫纜竟到枯楊椿。背篷圓笠自攜取。得雋往往窺魚缸。銀絲鱸鱠味不惡。痛飲直倒頗黎缸。但見青芙蓉九朵。遙岑出沒連空篔。一聲欸乃交倡和。有似竽瑟壘簾控。人生所貴在適志。年華晼晚同奔馳。京華留滯幾寒暑。登樓信美非吾邦。披圖舊遊宛在眼。浮家有約無虛咙。拂衣我亦徑歸去。潞河南下挈輕舂。葑中澗上好相待。可許主客圖成雙。

王彙英家藏古錢歌

錢府上士受姓始。我今逃債無從逃。九章綴術亦曾學。不解子母營羊羔。平生最嗜金石刻。鐘鼎欸識窮爬搔。貨布雜品儲一二。如捉贏蛤遺鯢鼈。王生好古今都穆。卜居恰近吳南濠。十年藏弄肯出示。古色班駁爛錦條。湖初尊盧首作幣。三品後出泉布刀。外園函方法九府。扣囊底智自六韜。金刀錯出布么幼。黃新代漢先塗高。真人白水識已驗。造物終厭蛙聲囂。五銖之廢開通鑄。椒房指爪痕深牢。紀元各各吉金勒。三司呈樣頒神臬。所嗚僞盜正朔寸。泔妄欲驕海濤。世間兒女尙厭勝。吉語宛轉銘周遭。幕文奇詭難殫述。星官北斗下采旄。雙魚三雀隱龜背。蒼龍糾屈鸞翔翱。或言撒帳取善頌。貴主釐降夸富豪。或云佩之辟五兵。却鬼可當度索桃。顧譜洪志人所讀。愛而不見空鬱陶。多君聚之在掌握。區別年代分牛毛。臨川之愚和嶠癖。同牀異夢嗤若曹。阿堵中物如此良不惡。傾身障簾誰訾訾。孔方絕交吾已久。畫餅差勝啖白菘。白菘草食之不飢。乞君拓文遠相贈。瓊瑤欲報心忉忉。

同王鳳喈過昭慶寺訪學公不遇

五宗誰嗣響。清絕有祇林。水月觀空悟。風幡荅法音。我來虎溪下。佛火一龕深。不見維摩詰。悠悠訪道心。

破山寺

竹逕不知遠。四山皆白雲。漸看蕭寺近。杳杳暮鐘聞。聞昔盱眙尉。清時鸞鶴羣。禪房花木在。吟坐憶夫君。

荆軻里

匕首懷中出。諸郎殿下看。燕丹心未死。趙政膽先寒。成敗論人易。從容舍命難。千秋猶灑淚。易水共洑瀾。

壽王述庵司寇八十疊用虎邱酬唱原韻共成八首

八十樂全翁。精神潞國同。西京兩司馬。東海一非熊。玉尺量才正。金鍼度世工。漁庄近三泖。消受快哉風。此叟非常叟。忘年得大年。籌邊雙鬢換。草檄百蠻傳。夜踏金川月。晨炊雪嶺泉。亥章曾未到。都入紀行編。恥作囁嚅翁。寒松雪榦同。南臺冠戴豸。西省掌批熊。霖雨霑濡渥。絲綸潤色工。踐躅三十載。人識曲江風。事業雲霄上。詞章漢魏年。行藏真不媿。福慧兩堪傳。力挽千鈞鼎。思探萬斛泉。分陰晚猶惜。樂府續新編。今古幾多翁。酸鹹嗜不同。道能融孔釋。味欲盡魚熊。許鄭淵原遠。歐蘇著述工。新排詩卷富。肆好穆如風。曹憲張蒼侶。孳經壽百年。千秋斯道重。四海大名傳。共仰星環斗。誰闕綆汲泉。羣英陪杖履。語錄及時編。當代董思翁。聲名壽樂同。三車參象馬。五戲卻猿熊。老學心逾細。詩傳選最工。懸弧冬日暖。入室坐春風。北郭隨肩日。南宮擢第年。青氈慚我倦。黃絹羨公傳。卓立靈光殿。紆餘難老泉。鶴南飛一曲。欲附五羊編。

秋柳和曹來殷韻

極目長條更短條。永豐西角最魂銷。渭城舊恨歌三疊。白下新愁送六朝。零落夜烏啼轉急。蕭疎客髻話無聊。春來縱說輕離別。尚有濃烟拂畫橋。

贈翁朗夫徵君

緯蕭抱犢自家風。薦牘仍看達紫宮。東國人倫推郭泰。西京儒術數申公。江湖載酒風流在。耆舊論交意氣同。擬向君山來問字。相從踏遍碧玲瓏。

懷述庵

井梧撼撼下閒庭。悵望同心隔遠坰。舊雨祇令勞夢寐。殘春曾此共飄零。白沙夜月潮聲急。紅葉秋山屐齒停。遙憶五茸雲正遠。折麻何處寄芳馨。

邵伯埭

澤國微茫長綠蕪。薄遊蹤跡感羈孤。疎鐘夜火秦郵驛。官柳長隄邵伯湖。往日漂流悲雁戶。祇今村落足魚租。明朝又下清淮路。媿爾沙鷗宿水蒲。

毛萇里

申培轅固各專門。誰似毛公詰訓尊。北海作箋傳古學。西河製序啓真源。四詩未墜斯人出。千載云遙故里存。太息後賢矜鑿空。欲將部婁廢崑崙。

董子故里

蒼莽長河古木疎。流傳董子下帷居。天人不媿賢良詔。道誼羞稱功利書。曲學公孫方貴幸。助邊卜式早遷除。空談災異真何用。絕倒從游呂步舒。

岳忠武墓

唾手燕雲願力堅。長城何忍一朝捐。小朝誓表和親日。大將圓扉絕命年。雪窖生還虛壯志。金陀論定剩遺編。君王自戀餘杭樂。不獨文臣解受錢。

秋晚訪述庵司寇三泖漁莊。因同訪圓津禪院。慧照上人卽放舟游佘山。適雲間汪西村張坤厚金治昆仲亦至。偕入王氏園。登皆山閣。久之復至天馬山。登周氏山舟堂。還抵萬壽道院。歸途得詩四首。

石湖乍報范公歸。容得溪翁晝欵扉。菊爲秋深香更厚。蟹當霜後味偏肥。文章真到歐曾壘。經術還傳鄭服衣。一榻高齋留小住。翦燈話雨重依依。

滄江共載米家船。只尺東柁一宿緣。莧泝椒園粗結構。櫻糝竹杖小留連。銀鈎猶勝尙書字。秘笈誰探處士編。頗喜參寥偕入座。聞香且證木犀禪。

客來不速恰三人。天馬峰前共泛輪。杜老酒徒招白旭。蘇門文士得黃陳。山如秋意含冲澹。詩有天機到朴淳。重過山舟舊池館。雪鴻指爪話前因。

行窩隨處足徘徊。鳥語鈴聲次第催。丈室靜繙經貝葉。羽庭留酌酒螺杯。誰能榮世兼名世。公是仙才又佛才。涑水縱題園獨樂。不妨真率故人陪。

尙湖夜泊

微茫雲水自萋述。平遠山光入望低。唱遍竹枝帆盡落。孤篷殘夢尙湖西。

紅橋

竹西十里路迢迢。檻外江南翠黛遙。翦翦綠楊風絮晚。半帆春水過紅橋。

王又曾

字受銘。號穀原。秀水人。乾隆十六年召試。賜內閣中書。十九年成進士。官刑部主事。有丁辛老屋集。

蒲褐山房詩話。穀原在都下。極爲陳文勤公汪文端公稱許。釋褐後。皆以爲當得上第。既入三甲。人猶以秀水朱檢討爲比。後用爲主事。觀政禮部。又以王儀曹稱之。至補刑部主事。穀原以律例向非素習。且病。遂乞假歸。性善飲。談笑風生。神情瀟灑。雖泊江湖。而東南長吏晉接者多。賦詩鬥酒。凡十餘年。卒。憔悴偃蹇。而沒作詩專仿宋人。信手拈來。自多生趣。休寧曹農部自鑿選刻其詩。子復再刻之。皆不及十之四五。而審擇未當。其全集六百餘番。予曾點定。今尙存其家。

度盤山嶺望雁蕩諸峰雨止大荆旅店

此邦南戒盡山勢。驅入海峒強屹元氣。雕劖出真宰。寫下嶺刺天。接眼益嶮巖。攢攢百青蓮。朵朵吐蓓蕾。春空媚雲物。醞藉固有在。應知太古前。猶未混沌改。卒見無急驚。山靈詎相給。詰朝果此游。須鼓腳力倍。姑去夢烟村。稍伺雨聲息。

曉度馬鞍嶺。曲折行澗道。中從剪刀峰。下入觀大龍湫。還憩龍湫菴。



一啜道場羹。鏘佩披鶴氅。穿徑雲共飛。躋險鳥同上。東西並谷幽。高下一泉響。泉響方愈寂。谷幽漸生朗。濕烟信黏履。穹翠歛盈掌。微聆鸞鳳嘯。遠窺壺嶠廣。折人最深處。高挂五百丈。近遠無定姿。變幻非一象。直下陂注馬。散迸谿劃漿。勻圓鮫人珠。熨貼織女紡。蜿蜒蛟龍纏。空濛霧露放。或爲風所遏。欲俯旋還仰。或爲石所觸。始直中酒枉。或疾若雷轟。或細若鳥吭。絲瑄洞庭張。鼓鐘太廟饗。日濃霞綺蒸。壁古虹彩長。頭寒不敢逼。目暈難屢仿。兌說萬派歸。坎習一潭養。虧盈河漢準。消息混沌想。廬山亮斯遜。天台詎能兩。凌流餌碧花。跋石攬宿莽。恂悅匡邱招。踴躍猱猿黨。任運獲貞觀。洗心韞靈賞。移情將所終。瞥眼遽成曩。聊茲李白遊。未可詎那往。愴彼留衣人。置身猶土壤。葦有嘉靖間薛方山碑記。漫漶不可讀。後有七律一首。頸聯云。有悟不須相對面。無緣猶自願留衣。蓋徐階詩也。

出能仁寺踰四十九盤晚入芙蓉村

亭午露未晞。琳宇花尙茲。廣墀舞天鷄。壞檻臥仙犬。登頓悉奧區。首塗仍峻峴。延睇草逕微。媿媿寫蟲豸。馨折始漸高。冉旋復屢轉。盤盤升嶺脊。惕惕凌劍棧。趣苦賞難留。蹟危情莫展。回眺二靈雲。模糊夢成舛。日仄猿嘯哀。春深鳥歌善。藥草含綠夷。瀟魁洩情筭。澹漫墟煙青。陂陀春路衍。雖惜任景暎。暫止僕夫喘。解裝曬宿雨。脫屣剔荒蘚。稍待芙蓉開。秋風約重拳。

茲晨風日美。散髮啟南軒。浮光蕩烟翠。衆草萋以蕃。水流花復開。陋巷如空山。朝菌發其姿。鸞鳩鳴相驩。物情澹來往。感此娛目前。聚糧適千里。消搖且窮年。會心無可說。緬與莊生言。

言有無何鄉。亦在廣莫野。大樹榮冬春。寂寞世所捨。與之兩無爲。消搖臥其下。不愁斤斧傷。寧戚顧盼寡。無用吾與汝。撫琴心獨寫。

半夜夢方覺。寥寥天籟入。嗒焉見真君。授我環中法。百年同大夢。彭殤一呼吸。蚺蚺與蝮翼。微形焉可執。曼衍和天倪。逸興溟滓合。夢亦遽遽周。覺亦栩栩蝶。夢覺本強分。幻影安得捨。今者吾喪我。寤言誰與答。元君將畫圖。衆史羅右左。紛然受揖立。筆墨事碎瑣。一史獨後至。忘人亦忘我。僮僮走就舍。解衣槃礴羸。萬事不入心。擺脫衆史夥。是真得畫神。元君果日可。

泠泠七條絃。響澈霖雨中。霖雨有時歇。歌哭安所終。嗟嗟子桑戶。十日斷朝饔。良友暫裹飯。聊充俄頃供。命也知奈何。誰令丁我躬。勸君無廢詩。廢詩亦終窮。

和循初用韋蘇州自蒲塘驛迴駕經歷山水韻

深更坐寒雨。雨歇風亦轉。沉緜話粵遊。紛我離思衍。推戶星稍出。輝輝帶階蘚。葉脫辨疎林。雲歸想遙巘。如何遘良會。盃行較深淺。含愁良易盈。卽事況成緬。暄淒意每餘。去住情各展。何處曙鐘撞。殘燈耿難遣。

趙仲穆雙松水榭

霜氣日已厲。林中辨鴉舅。高軒面蒼塞。曲檻俯清瀏。左右飛雪雲。雙龍盤蚴蟉。落葉掃鹿砦。涼烟濕魚笱。颼颼蘆葉戰。忽復響窗牖。水深易秋陰。不覺風雨吼。黽勉歲寒節。誰是同心友。不有短笱橫。微徑焉可取。

偕乳巢孳石汎飲西湖晚登南屏至壑莽憩山亭觀磨厓家人卦

箬篷迷於鳧。拍拍出烟汐。一鏡動演漾。千螺堆姪姪。是時殘暑斂。霽景豁臺榭。芙蓉色已弄。菡萏衣半卸。頻來熟壚女。濁酒餅滿貫。剝芡數囊遊。頭顱互嗟呀。沙脣白鷺翹。寺角斜曛射。碕岸散筇屐。荒塗導槩柘。曠如歷平疇。涼風逗穰穰。無田可歸耕。長鑱我安藉。袖寒空翠澆。履濕鳴泉瀉。曲磴升窈窕。短壑迫巖罅。屹嶮猛虎張。盱眙老虯架。危杓藤欲墜。飛步不敢跨。失道蕭艾間。尋磬獲僧舍。夔見南山亭。腳力庶言罷。一片石面削。斗起足驚詫。家人卦誰錢。力恐巨靈借。淋漓蛟螭纏。恍惕風雨化。當裁白地錦。覆以十丈把。詰屈愛窺幽。彳亍慮催夜。山響孤豎唱。雲破一樵下。湖濱落雁初。林外昏鐘乍。解纜謝山靈。來朝媿塵駕。

園泥

秧鉞雨纔足。新畦宜糞種。南村借釣航。港汊恣翻搆。雙竿舞燕捎。兩手禮鼠拱。縱遠項背傾。拔深腰腳勇。橫撐沙背閣。側立船舷重。亂牽菰米沉。冷觸鷗羣恐。碾渦蕩呀摩。水草拌傷罽。急須咨薤人。駢赤分上壘。

扳罾

漁具首網罟。罾與罾翼亞。千絲罟影張。四角筠枝架。輓索勇雙臂。擎竿夾前胯。欲起翻鷗蹲。旣縱迺鳧下。

聖音聆舴舩。孤颺出烟波。髣髴綠蓑翁。淋瀝傍漁舍。連江翠雨昏。隔籬紅鐙射。冷笑狂奴廉。荒磯坐長夏。  
貯水

烹茶水功六。天泉占其雨。梅雨醇而白。品爭雪水上。五月簷溜簷。丁統幾句響。貧家無長物。差喜足甕盎。  
翠杓滿傾注。照面恰圓朗。茗葉新未試。石子靜堪養。藏任酒缸聯。立肯醬瓿黨。曷爲老桑苧。但恣山泉賞。  
養水須貯  
石子於甕

合醬

夏至逾三庚。懸空火輪熱。糴豆揀如金。磨麥篩作雪。爛蒸氣方餹。急拌黃不涅。痛按圓箔穩。涼攤曲房閉。  
方結沸投鹽滷澄。汲用井華潔。鑿深杷屢攪。簷午笠齊揭。大歲面須對。黃道歷宜訐。女醢勿言辛。嘉賓儻  
流歎。嘉賓流歎見梁劉  
李儀謝賚蝦醬啟

重五日獨遊道場山卻簡徐穀函

曉榜夾山澗。蒲岸深吠蛤。未傳林際磬。早涌船頭塔。螺髻翳輕沙。雲日遞吐納。泥巷耕犂臥。秧扉蠶婦闔。  
升麓苔磴紆。到寺風泉雜。山門盡勝槩。曷用衆峰踏。苦茗僧自供。清言竹爲蒼。榴朶豔道場。蕭然悅塵榻。  
意行愜靜便。惜不吾友拉。惟吟坡老詩。罄我三升榼。

易松滋招集抱山堂偶話龍湫舊遊同人輒爲題龍湫宴坐小景余亦繼作

平生邱壑緣。頗笑謝康樂。經行屐齒雙。徧爲佳處着。雁山峙東南。海氣所噴薄。千峰骨瘦聳。寸土必湔削。二靈尤瓌富。外視若郭郭。自非窮幽險。面目罔約畧。龍湫吾耳熟。凌晨勇腰腳。盤迴嵐翠交。迤邐苔逕拓。一登忘歸亭。坐恠巨靈鑿。飛流五千尺。劈面向我落。其上星月柄。其下蛟龍躍。支派析銀河。宮商諧廣樂。於時春向深。雲暖舞雙鶴。漫山繡芳草。踏處皆靈藥。暫容腸胃洗。還就塵盆縛。彈指條十霜。髣髴異今昨。殘春展舊圖。卻顧成錯愕。舉因非戀嫪。觸物逾淡泊。滿座聞琤淙。並荷清風作。爲言諾尊者。終踐還山約。

曉過石鐘山不得泊

空江不聞鐘。清曉續涼夢。黃帽不解事。靈境警焉送。金石首八音。次第若伯仲。茲山胡爲兼。虛牝妙相控。拳然凸水次。形質類覆鑿。竅穴中玲瓏。微風颺其空。水石暗擊撞。元音發一中。此理本坡老。少見恠者衆。我言亦耳食。歸尋水樂洞。

穀日迴谿草堂銷寒第六集訂雨霽郊外探梅分韻得象字

元日到人日。一雨斷來往。今日又穀日。深巷履齒響。招我擘春甕。磊落間少長。握手出吉語。但飲屏餘想。古藝茶藥明。芳艸蕙叢養。雪壓色轉深。風恬氣已盎。春早舊年立。梅先一月賞。便恐雨妬花。零落忽一餉。花信遲亦佳。北枝尙倔強。留取作上元。繁花耀晴朗。整頓雙絲瓶。郊遊陪履杖。也勝不出門。癡坐等犧象。蒼苔上下崦。春水東西瀼。梅花如美人。畫之須周昉。時將乞瓜田寫梅花小幅

上元縣齋上元夜雪同用東坡聚星堂詩韻并效其體

沉沉院落調銀葉。卻取春燈換春雪。天公試手聊作戲。誰家擁髻正愁絕。牀頭抱絮薄更撻。閣裏琴絃凍欲折。分曹擘柑春自盞。密座燒蠟風不滅。細啖菜甲耿多憶。牢捧玉船愁被掣。江邊新柳又青眼。墻角短梅幾紅纈。鼓聲十棒想縹緲。茗汁一甌太騷屑。阿香驚筍掀欲穿。素女窺檐笑成瞥。白戰偏教上元續。夜宴不讓南唐說。君勿價臥頽玉山。海月一輪催老鐵。雪後月甚佳

祝豫堂歸自馬蘭峪同香樹先生礬石偶圃賦

至後大雪厚一尺。城西報我有歸艇。莊窩小別歛五年。倒屣相尋濕塗澤。骯髒握手昔顏在。但有新霜欲垂領。示我新詩代口述。篇篇豁朗絕畦町。憶昨癸丑之冬日。在斗提鞭北走氣何猛。袖中賦草三大禮。蒲牢一吼百獸屏。正逢天子新踐阼。柄用儒術恭摺斑。內外大官共薦剡。明光起草爭馳聘。用而爲虎退爲鼠。抗之則雲抑則井。娉婷不嫁子心惻。俳優而試吾齒冷。銜淚卻跨蘆溝橋。陟險遠上盤山嶺。長城之下饑驅來。夜夜關門虎蹶打。風沙颯颯坐懷古。塞草陵花寫莊靚。歸心一縱箭破縞。暫解塵鞵息蓬梗。屋房隙地任鉏菜。架上破書堪汲綆。雖處貧賤聖所恥。獲遭太平生卽幸。何妨韓愈怯柳劉。未見華歆勝管邴。舊雨矧逢南郭合。長驅誰許中原並。臭味差憐投漆膠。英雄終必酬牲鼎。尙嘲鵬鷄恐未然。但逐雲龍定獲請。軟紅十丈急湍祓。臘釀方醲須酪酏。

張穆畫馬行

垂楊過雨吹郊牧。洗刷權奇出天育。鐵橋畫馬蓋有神。纖離紫燕下筆親。一匹連錢五色白。一匹拳毛深鐵色。硃砂紛攢白象躡。蜿蜒迴露神龍脊。春寒宛頸鳴不驕。仰視閭闔方騰驍。良材本合天仗獻。可惜昂藏走荒甸。方今四海盛太平。白首不睹烟塵驚。鐵橋畫此蓋有以。華山之陽在卷裏。我聞此老好劍兼好詩。更於畫馬神工施。乾坤漂泊丹青賤。死後聲名徒爾徧。嗚呼男兒學藝漫絕倫。君不見韋少府曹將軍。冰壑訂遊天台余不果。同行畧述前遊以爲導。

扁舟夜弄鑑湖月。一霎飛帆臨剡溪。詰朝衝炎謁天姥。森森綠樹青猿嘯。雲房澗戶歷百所。石梁未到陰淒淒。呀然一潭吼地底。毒暑凜欲披羔麕。曇華亭上剛一宿。方法丹師教餐玉。醴泉瑤草黯然別。雙闕瓊臺空跂足。天台陳君有仙骨。飽飲赤城霞萬斛。蕭然坐我谿閣頭。盡日千峰環破屋。炎風趣我還渡江。越山點點趨船窗。枯筇惜未支華頂。遠夢迢迢今莫降。故人相約穿芒屨。我被塵牽俗難藥。九峰次第挈陳君。第一先登摘星閣。

題林良九鷺圖

瑟瑟空江烟霧滅。風漪百頃鋪纖葛。漁父不響欸乃空。忽下前灘幾堆雪。畫工之畫真化工。水禽不與陸禽同。直從第一數至九。一一變相無一偶。寫秋更得秋性情。色是秋色聲秋聲。插頭或作陂塘夢。引吭或

效鴉軋鳴戲水或孤颺。啣魚或雙行。或狀孤高類野鶴。或矜娟秀如春鶯。疏雨欲來蓮葉暗。小洲初落蘆花明。良乎良乎爾從何處得此態。髣髴金沙港口停船對。竹篙撐動忽驚回。飛上青天與人背。又記富春江上挽舟時。一行遙下嚴光祠。漁梁無人曬還浴。斜日微風吹釣絲。眼前好景畫不得。脈脈篷窗空歎息。今朝見畫憶前塵。惆悵雨簑與烟笠。絹素漠漠開湖瀧。驀然幽夢飛吳艤。醒來卻臥空堂裏。涼月一庭秋滿江。

次菱道居

一水縈官道。數峰環小村。趁墟人裹飯。畏虎客關門。殘照依林滅。寒鐙背雨昏。平生幾緹屐。欲共阮孚論。

涼夜

暗葉兼風響。陰蟲得露唳。秋生羣暑澹。月出衆星低。紅藕飄江院。清砧動夜閨。鄉心併涼緒。任醉不成泥。

簡玉李

雀航南畔酒壚旁。小別忽忽醉暫忘。豈謂春風孤見面。翻令江水等迴腸。鶯花不屬張三影。煙月多銷脫十娘。莫管秦淮簫鼓動。燈船讓與別人狂。

酬桐石

寒影蕭然簇一鐙。雨峰應怪客來仍。稍緣病退秋情健。不爲涼多酒力勝。小技文章那制命。中年須鬢欲



飯僧與君且話通宵雨。如此溪山捨未能。

春雨次陶篁村上舍韻

如絲風外颺纖纖。早晚丁紉響畫檐。芸餅衾裯春夢擾。杏花樓閣曉寒嚴。時窺吹沫魚浮沼。不放銜泥燕入簾。除卻縑袍無可典。尋常酒債任頻添。

冒雨汎西湖小飲琴鶴棲

不見跳珠又四年。衝寒仍放總宜船。暫閑塵海鞭驢手。重數旗亭買酒錢。野鴨避人歸岸嘴。官梅迎臘出墻肩。東風幾日還晴色。來看雙峰翠插天。

# 湖海詩傳卷十七

倪承寬

字餘疆。號敬堂。仁和人。乾隆十九年殿試第三人及第。官太僕寺卿。

盱眙縣懷古用杜工部九成宮韻

盱眙南山湄。泗城浸如白。雉堞低迴環。流波蕩缺口。城心矗浮屠。晃朗存戶牖。想當水未瀦。山城大於斗。洪濤傾天吳。巫支祁駭走。遂使婦子居。竟作蛟蠃藪。導川順水性。神禹功不朽。水由地中行。妙用傳希有。後乃違厥度。湮水水失守。宣防英喆能。法鑿千載後。長空松風迴。憑軒惆悵久。掘地伊何人。注海重搔首。

胡紹鼎

字雨方。孝感人。乾隆十九年會試第一。官至監察御史。有所存集。

靖果園先生輓詩

大用窮經得。高言實事餘。哲人今已沒。論者復何如。若祭當於社。將傳信此書。顧瞻思往路。霜葉曉風初。

同陳雨齋劉秋巖小集

輸君健筆大如椽。意氣稜稜逼四筵。譚興可能通乙夜。詩豪不減似丁年。更邀明月當三五。卻買春醪足

十千。此景憑誰收拾去。一船書畫米家顛。

長途車馬自紛馳。比歲相依借一枝。又見春風吹碧草。偶傳流水上朱絲。他年相望仍勳業。往事追歡易別離。幾度停杯還更酌。人生同此識襟期。

### 朱筠

字美叔。號竹君。大興人。乾隆十九年進士。官至侍講學士。左遷編修。有笥河文集。

蒲褐山房詩話。竹君昆仲。早登高第。並著才名。而君為白眉。兼綜經史。精求古義。家積書數萬卷。金石碑版亦數千通。尤喜汲引人才。輜軒所至。必拔諸生之雋異。授業門下。家居問字者。滿堂滿室。君豐頤秀目。伉儷鏗學。政時。奏請將永樂大典中。人閒罕觀之書。悉為鈔錄。且求天下遺書。四庫館之。招之弗往。為安徽學政。時。奏請將永樂大典中。人閒罕觀之書。悉為鈔錄。且求天下遺書。四庫館之。未嘗有所討論也。其後于文襄公。選用翰詹科道及中書部曹諸臣。先後至數百人。君雖列名其閒。固未嘗有所討論也。其後于文襄公。選用翰詹科道及中書部曹諸臣。先後至數百人。君雖列名其閒。固故取其明晰者。刻成四卷。餘皆藏於家。

### 平定準噶爾恭紀

四言詩百韻 謹序

臣伏見皇帝陛下。六龍時乘。德與天一。四表兩閒。無不周漑。御極以來。奉皇太后。再巡盛京。謁三陵。展孝思。東升泰山。幸闕里。以祀孔子。南巡江浙。躬省民事。皇哉大禮。備物未嘗有也。金川小蠹。即殄即平。乃者準噶爾部。僻處西荒。世其凶德。皇祖皇考。張申撻伐。不訖于誅。天厭厥類。其孽子喇嘛達爾札。暨亂臣達瓦齊。更相篡竊。虺蜴荼蓼。厥部離心。時則台吉車楞伍巴什等。暨阿睦爾

撤納等數十萬戶。叩關乞降。天子爲幸熱河。莅而享。其人伏沃謹呼。同請效命。皇帝神謀天斷。乘時發機。乃命將軍出師討之。卽用其人道師前行。西北兩路。同日迅發。千軍萬騎。馳越乎翰海。若噉沸雪。若風剌草。自克烏梁海。至于阿爾泰山。梁更數十部落。台吉宰桑。厥角恐後。我師入于伊犁。降青海叛人羅卜藏丹津及其二子。又獲逋酋巴朗孟可等。悉俘以來。師涉伊犁河而西。標山趾川。掃閭蹈壘。用夜入其鄂立土營。賊兵負山面澗。自相驚蹂。追擒其帑。屬部人達瓦齊。以其子及數十人。走和集斯伯克。盡獲之以獻。捷聞。皇帝躬至太廟。徧告郊社。陵越名山大川。羣臣請上尊號。不許。乃以吉日加上皇太后徽號。爵勳賚功。周布恩澤。與天下大盪。俘至獻于祖社。皇帝御午門以觀。辰旂豹罕。球鏞鐃鼓。飛揚鏗鏘。百秩序進。咸頓首賀。臣伏念易稱高宗殷之盛。天子其伐鬼方。三年而克之。若是難也。小雅詩人欲張大宣王之功。曰薄伐玁狁。至于太原。若爲荒徼絕域之辭。所以震蕩心目。刻畫金石。然或遲之三年之久。近在晉國之地。猶且照曜方冊。其烈燦然。至古所稱王者之師。不戰而屈人萬里之外。蓋有其言而無其事。今準噶爾去京師尙不啻萬里。出師不逾二時。不見一鋒一鏃之遺。而大功克奏。聞師入伊犁之日。椎髻之婦。未鬪之童。望我旗纛。若慈父母。惟皇帝陛下。神聖文武。天之所授。日麗霆發。飈靈雨甘。百神效職。惟所左右。誠非尋常所得擬議萬一者也。臣僅作四言詩一篇。竊欲準古經義。覃思極精。所以導揚天子之光明。式

于世世其詩曰

皇帝聖德。自天受授。風靈在左。雨露在右。惟四十年。蜀徼蠢聚。煽其蠹賊。內訌外媮。皇帝命相。一撻十仆。父子面縛。乞命邊垓。準噶爾部。西極是守。人孰信義。若羣鳥獸。聖祖獵之。朔漠三狩。世宗命將。再彈再轂。策陵有子。非種而穀。不如鳥鼠。相同相鬪。是召亂臣。達瓦齊寇。通名天朝。不自寢陋。甘其下人。以飽鴟噉。諸部瓦解。呼天內附。皇帝曰嗟。汝遠無告。宅汝予所。飲汝予糗。享之熱河。厥長賜綬。咸拜獲命。死曷以報。皇帝曰吁。渠魁可宥。將軍出師。來者爲副。伐罪去疾。往哺而穀。十九年秋。帝謁祖考。以禱出師。惟列聖祐。天策旣發。西北兩道。師行三十。其里萬數。乃賈詔書。壯士馳驟。所過部落。山川巘岫。譯長宣布。咸使聽觀。各逐汝草。各收汝畜。除汝敗羣。安汝老幼。無驚王師。駭鹿激鶩。乃聞乃來。若渴飲酎。跋海踰嶺。集賽是蹂。台吉朝迓。宰桑晏候。奉上玉盤。膜拜獻侑。弋不舍牲。耕不改耨。台背而扶。垂髻而走。草榮木長。雞拊犬吠。俟我王師。踴躍邂逅。旆旆大纛。長途不留。天風吹颺。五采繪繡。沙漠萬里。如行中雷。無警其營。無頓其宿。不戮一人。不遺一鏃。直捩伊犁。諸部盡收。逋餽旣紮。叛藩自首。賊酋顛倒。無所竄伏。小狍大兕。獵取自寶。三捷上聞。告廟用祝。陳設圭瓚。奉冊進讀。皇帝躬入。潔齊盥漱。曰自我祖。萬邦是揉。太甲長弓。垂法嗣後。惟茲大勳。尙率由舊。用牲于社。上帝類造。神靈盼饗。福應來湊。山陵峨峨。遣皇子赴。登降執禮。觀于堂構。羣上尊號。謙讓至又。聿以吉日。奉皇太后。崇號純禧。金冊玉鏤。乃坐正殿。受羣臣朝。詔告天下。自海不冒。

五公四侯。望秩燎禋。高爵厚糈。功大必售。晉秩有位。升俊教胄。存問瑩獨。讞嶽平復。葺廢決滯。剗瑕剔疾。恩澤三十。莫不周究。爰以俘來。牽頸袒肉。左命于祖。右社告奏。帝登午門。日出當晝。饒轟蕞伐。金石撞扣。凱樂大作。曰俘是受。司馬司寇。百職咸具。頓首上賀。拜舞衣袖。雷電軒豁。乾坤明秀。皇帝大德。上與天茂。長養萬物。日月所透。至誠感通。各得中孚。皇曰念哉。與天下穀。皇帝大法。經緯宇宙。始金終玉。高成深就。配于文命。上刻响嘯。皇曰勗哉。與天下裕。皇帝大武。止戈獻豆。燦燦黃鉞。孰敢叫吼。有不恭順。視厥頸脰。皇曰戒哉。與天下懋。皇帝大功。亘古莫較。東西之廣。南北之袤。帝不能羅。王不能囿。皇曰敬哉。與天下富。皇帝大孝。撫龐浹流。萬國合歡。四靈爲囀。以天下養。極于載覆。皇曰康哉。皇太后壽。小臣頌德。舉一萬漏。取辭不文。竊比史籀。

寄王羽仲

山葵傾當陽。水禽鳴在陰。萬物感同類。況子相知深。平生負奇氣。往往走嶽岑。猶憶戊辰歲。溽暑方淫霖。我擬文通詠。子和尉氏吟。安知後離別。會合常森森。恨無三萍合。思發二鳥音。放蕩爲奇文。真至乃古心。三正一以下。江河日浮沈。勿爲小人歸。庶幾君子林。

哨鹿同江岳南同年作

古塞八月霜嚴威。天風發發妃呼豨。雲荒葉脫木不飛。哨鹿之制傳行圍。木蘭以北山崔巍。野鹿乳字交

匹妃。杈枒環角頭。則頤圓花遍體。毛鬣鬣。銜草相食。鳴相依。歲歲游牝羣。無違。此時帳殿漏依稀。寒星錯落宵未晞。虞人鹿冠衣。鹿衣。先導天馬驅駢駢。期門左右挽玉鞿。矚分壯士密指揮。赤燄照山山夜暉。猛獸惕息逃。嶇崎。嶮嶮大谷人迹稀。哨聲肖鹿窮幽微。鹿聞相慕如歔歔。什伍來即疑乍非。須臾躑躅不顧歸。處處伏莽窺以睇。百得一失防幾希。壯士前搏若括機。血管生取利刃剗。若咀芝英華之噉。肉中寶玉天然肥。仙人之饌神福祿。陛下永命無疆祈。作詩紀實匪雕幾。奏之樂府陳帝畿。

翟灝

字大川。號晴江。仁和人。乾隆十九年進士。官金華府教授。有無不宜齋稿。

蒲褐山房詩話。晴江詩以清峭刻琢見長。蓋與杭董浦金江聲屬樊榭輩。為南屏詩社。故風格似之。居杭城東北臨江鄉。附近有百年老棠樹。遂取甘棠名其邨。邨民咸以蠶桑為生。不知有習舉子業者。自晴江讀書取科第。子是其弟。涵心淵瀚。元洲謝傅霖皆以能詩稱。臨江淳閱之俗。變而澤於詩。書矣。晴江見聞淹博。又能搜奇引癖。所撰四書考異。爾雅補郭。通俗編。貫串精審。為世所推。又為湖山便覽。亦有資於游者。

題吳東壁梅屋勘經圖

離騷忘却梅。姑第勿深議。皇皇甲庫書。梅花並遺置。焦氏亦有言。折枝及零蒂。易理僅旁參。未足補爻繫。書詩禮春秋。時或見一二。和羹商鼎用。標期召南識。加籩桃並掌。作告李同記。言梅但言實。言花則有未。幽芳詎無取。乃為聖賢棄。先生擁遺經。小屋擅清闕。屋內萬編齊。屋外萬花萃。疎影立亭亭。寒夜伴無寐。

研朱事勘點。草木不遺細。將何作解嘲。令彼聲價貴。吾聞梅與杏。轉變由他氣。梅至北方則變而成杏。故北人無識梅者。門蝨新語。櫛橘不踰淮。斯理乃一致。先王辨九州。荆揚畫南至。庚嶺羅浮山。版籍不曾隸。巒鄉烟雪深。寂寞語生翠。孤花自開落。驛使無從寄。嘉實載羣經。恐亦異族類。爾雅釋梅三。日柎英與槩。一一考名狀。皆非今所謂。總之古聖賢。多在江北地。南枝未經見。遺却直閒事。斯言雖淺近。或可析疑義。

寓齋鄰樹足供朝夕玩賞遂以嘉樹顏所居柯南墀孝廉善之同賦十韻

畸人擇所棲。達士隨其遇。偶比三宿桑。難待十年樹。城南舊客寮。林木饒古趣。高顛出重垣。繚枝遠敷布。不費買鄰錢。我獲東家住。餘翠隔簷分。落影當窻赴。涼風對散髮。靜月愜良晤。乃知假物用。在在理流露。劃然人我分。坐爲欣感誤。不見種樹人。息陰幾朝暮。

曉發滕縣

匆匆旅宿先鴉起。敲鞭直走二十里。數望東光不冝明。殘月殘星墮遙水。馬頭續夢夢思淺。戍壁畫人驚睡眠。槐眉列道見模糊。名蹟愁從暗中遣。有木榜題滕文公行井田處。長風浩浩烟漫漫。平沙遠草征蹄寬。郊圻曠闊有如此。分田畫井夫何難。

禁體詠雪用東坡聚星堂韻

重雲凍合難分葉。細雨隨風暮成雪。霏微數點吹未覺。顛倒滿空來不絕。充哇占壤失低坳。累砌加簷隨



曲折犬聲吠巷狂亦喜。馬蹟翻泥過旋滅。積團漸重忽并墮。斜點欲來仍反掣。紛紛互鬪逞威稜。一一詳看裁細纈。潔身方幸我非孤。擇地誰知爾未屑。關門任打竹聲頻。登樓怪換山形瞥。方圓無定却齊輝。菌溷皆安不虛說。小堂儼臥獨推思。一任夜寒衾似鐵。

曉起雪止再用前韻

夜蟹行沙蠶齧葉。淅淅聲禽駐勻雪。來朝俯仰但一照。扶背平原叫曠絕。寒花逞姣態橫陳。穉竹學恭腰屈折。冷壓廚烟濕不起。淨奪山嵐微欲滅。遠人著屐路新斫。密座垂簾風屢掣。但恐斑痕化愁鬢。卻愛晴光除醉纈。半壁猶然聚完塊。一林忽自散餘屑。冷尋未厭驢背苦。久滯翻憐鴻爪瞥。收藏試遣家童掃。占驗頗聞鄰老說。十斛憑將澡毒塵。歸向春田理耕鐵。

周心羅解元惠赤刀筆

中山老兔中書選。蒙將軍始傳分明。棗心栗尾束縛巧。象牙麟角裝衍精。或青或白或五色。粲論各各隨花生。何來管城倍光價。顏如渥丹魚尾頰。赤心紀事義有取。豈徒文采矜華榮。其尖如錐利如劍。審象直惟文庫兵。諡曰赤刀著深刻。寶國遂與球圖并。我聞彤管職女史。又聞丹筆正祥刑。一雙日並隲麋賜。官儀復載東西京。有明尙方仿古製。元默困敦紀所成。管刻壬子年製小印文。工名未見勒蔡澡。產地不貴來宣城。燕都宏規勝國建。其間五度辛壬更。米脂賊至逢壞劫。九藏珍寶歸軍營。棄此稿竹不掘載。得留故府全清

貞昭回文治親今日。朝宁翔翥名公卿。尙書郎挾紫囊。襄侍御史斂緋袍。擊君有言動鐵筆。紀臣有註誤霜鋒。爭君明臣良庶事。舉拜手稽首颺言廣。赤刀赤刀如此用。庶幾有實非徒名。公今蕊榜先一鳴。脫囊已出頭崢嶸。玉堂薇省咫尺路。合珥此筆趨皇閔。脫手贈我殊不稱。塗雅屈蚓空縱橫。攜歸寓舍窗几窄。瓦池竈墨交惶驚。跛奚喚作赤龍小。家老愛把珊瑚輕。善刀而藏俟時用。緹襲不許人窺窺。答詩仍遣草根筆。神氣正盡疲糖撐。

邨中晚興

所居地幽寂。薄暮客來稀。一徑吠寒犬。數家鳴夕機。廚烟補山翠。林篠暗柴扉。踢葉忽聞響。鄰翁散社歸。

金慎齋比部出關圖

萬歲龍蟠地。山河控勢雄。明駝宵臥雪。健鶴曉呼風。樹斷天關出。沙平地界空。未能乘一障。枉自嘆途窮。

吳江

垂虹亭畔月。暫照木蘭船。秋老蓴鱸國。霜寒橘柚天。鷺飛烟路闊。人靜水花鮮。緬想三高士。披吟笠澤編。

秋草

關心河畔草。極目水邊洲。白露年年節。斜陽處處愁。啼蛄弔幽夜。牧馬散高秋。欲起靈均語。芳蹤何處求。

秋蟬

何人信高潔。徒爾愛孤鳴。秋杪不知歇。夕陽無限情。殘音移樹遠。微思入霜清。我亦蘇門客。臨風嘯一聲。

偶步東園

列隧千重比戶饒。閒身端合避浮囂。桑畦遠隔人家小。菜甲平連雉堞遙。東郭自來堪踏雪。南湖好在復通橋。邑居仍作荒郊看。林下何須杖策招。

丹陽

寒烟渺渺接南徐。形勝猶分故國餘。岸口人家皆種柳。船中客饌每供魚。鷗沙清況愁先遣。萍梗浮蹤計已疎。宛轉回腸忽關聽。羈孤聲在獨輪車。

糊室

十字編稌秭。雙層拓繭箋。輝開屏六摺。塵斷屋三椽。抹粉辭江蜃。連衣效壁蠻。油窻花影密。虛室貝光鮮。目眩樓成玉。宵明窟擬瑤。開爐防雪化。掃榻詫雲眠。敗堵周藏拙。寒風頓失權。潔勝香氎布。煖敵紫茸氈。戶有綿簾設。床還紙帳懸。贅疣除畫障。點污卻春聯。啓竇仍通月。張鐙莫惹烟。憑噓賣餅俗。不怕潤梅天。帙整籤相映。茅疎屋未穿。土風循儉素。吾計得安便。塞向隨狸蟄。攤書共蠹研。詩成防自疥。休逞醉中顛。

湯婆子聯句

湯媪范錫成。

戴廷熇  
綸掌

利用異鼎鑊。質符坤永貞。

汪沆  
西顛

名媿巽初索。皤然腹彭亨。

金文淳  
質夫

宛爾肩戍削。竅上

犀口絨江晴砥下夔足斫旁無獸環垂掌頂有螺髻著混沌失眉蛾西光澤謝面藥居下適陰義夫為燠協

時若外礪金性堅江晴內涵水德弱朔氣戒頑冬掌霜信入重幕獨客寡所依西單柄每不樂悽劇號寒蟲

夫凍憐警露鶴宵長鷺足拳江晴夢短蝶羽却靴豕忽到踵掌盪戾漸如斲朴握煖莫邀西辟邪香易鑠愛

茲廓能容夫呢汝重可託飲以百沸泉江晴裹以千絲囊熨體同衾稠掌橫陳附履屨相傍何蘊隆西相偃

免焦灼微陽欲透繭夫奇温匪隔膜美睡勝蒙頭江晴沉酣抵軟脚婦姑戡勃谿掌法喜伴恬漠客遠昵枕

嫌西兒防踏被惡轉側便醉鄉夫挹注授僮約老忘燕玉需江晴遠任驪泉涸溫柔縱難兼掌貞靜已能略

鉛淚制不流西金銘擬無忤欵傾伏本盈夫缺窳慮在薄紈扇遭棄捐江晴竹奴悲冷落策勳薦牀牀掌怙

寵戒莫莫三沐三熏纔西一詠一觴各墊戶恰合并夫炙硯供笑噓聯吟繼前修江晴涪翁斐然作掌

### 平聖臺

字瑤海號確齋山陰人乾隆十九年進士官廣州府同知

#### 琴城課士圖

盧君吏治天下稱治緣儒術匪空名西江捧檄舊同隊我為臨汝君琴城歲時扁舟詣大府停橈把臂銀  
杯傾我隨鍾潘登啓事君以循卓忻同升江湖旅雁落隻影吉安大郡迎雙旌十年衰墨臥草上敢與八  
駿爭先鳴長沙新隴痛車過潘上海丙舍愁空錄鍾聞君干旄遍郊野坐徵文獻恢庠鬢忽牽吏議呼對

簿。虞羅直欲烹鷓鴣。白門僧舍笑相值。高吟岸幘方嶢嶢。牛腰大軸在行篋。南豐遺愛留諸生。至今歷宦到銀艾。不忘下邑絃歌聲。開圖彷彿見都講。題句磊落鏗華鯨。定爲朱邑起祠廟。已看何武躋公卿。青蠅至竟不可玷。行當特詔膺藩屏。刊江鹺使盛賓館。矧以嫺姬聯簪纓。移家暫借水部屋。選勝屢醉康山航。紅飀白雪不暇顧。更迎坡老尋詩盟。悲秋旅客亦何有。酬知老骨猶孤撐。匠石程林赦山木。鉛刀代割羞青萍。送君更望崇明德。終賈盈朝盡秀英。

自臨川至崇仁道中

林端雨霽散烟鬢。水抱村扉綠一灣。却忍朝飢行十里。笋輿才過米堆山。

蔡書升

字漢翔。德清人。乾隆十九年進士。有聽雨詩稿。

梅花嶺懷古

元戎纔建纛。南望陣雲高。局上爭殘劫。鞞中置佩刀。杜鵑春自哭。江水夜還濤。碧血知何處。荒原滿野蒿。

春夜

花陰黯黯夜漫漫。雙穗銀燈只獨看。金屈戌移明月上。碧琳琅動晚風寒。心懸粉冷香銷後。春向鶯啼燕語闌。猶勝去年寒食雨。五更殘角逐征鞍。

訪王葦園遇雪翼日用壁間韻奉寄

飽經客況難迴首。雪虐風饕我獨知。忽憶去年元夜節。紅泥亭下話分離。壬申上元夜與胡雪巖頤上直大雪  
日暮雲頭熨又開。粉痕明滅點錢苔。小虹橋外溪如黛。三兩漁船打網回。

葉佩蓀

字丹穎。歸安人。乾隆十九年進士。官至湖北布政使。有傳經堂集。

蒲褐山房詩話。丹穎。覃心易理。獨契微言。著易守四十卷。凡昔人所言象數。如卦氣。爻辰。納甲。飛伏。升降。先天。河洛。悉掃去之。惟互卦。間有取者。即陰陽老少七八九六之說。亦所不取。勃窣理窟。多前人所未逮。詩其餘事也。予同年工易者。應山張君鳳鳴。及君二人而已。張深造自得。尤精於筮。筮由邯鄲。令官至兗州府知府。乞歸。今尚主漢陽書院講席。不羈吟事故附志於此。

望瑯琊山欲訪醉翁亭不果

滌陽青不盡。山郭交相鮮。連峯亘西南。空翠紛聯綿。瑯琊隱其內。彷彿浮雲烟。及茲迴俗駕。屐齒阻層巔。遙憶六一翁。高致留林泉。危構架幽壑。飛瀑落門前。苕石旣葱蒨。釀溪流涓涓。閒逐名僧舍。時勞載酒船。松竹一瀟灑。嚶鳴方寂然。西問見梅亭。香雪當春妍。繞亭千菡萏。卷葉小如錢。昔遊久淪沒。仰俯失夤緣。悵望更回首。野風吹帽偏。歸尋醉翁吟。臥遊託冰絃。遠慙太守樂。近愧博士賢。

正陽關

已入江南地。開顏望水關。孤舟清潁尾。疎雨壽春山。行路此身賤。謀生吾道艱。一聲柔櫓外。卻愧白鷗閒。

宿淇河田家

柳陌初歸鳥。松扉暫解鞍。真從田父語。莫使使君看。窻斷聯蛛網。床喧近鴨欄。羽書方夜急。棲息敢求安。

桐柏道中

柏子何年國。蒼荒接楚邱。村纔三戶聚。族少百年留。計畝秧論石。桐邑小田畸零不成頃。畝以種秧之多寡論價。開山樹架樓。尙

憐生聚苦。更忍急徵求。

謁淮瀆廟

漢延熹間遷廟於此。

漢時千年識。故封復陽山。郭覲齋宮。三川波合徐揚父。唐開元祠淮瀆文蕩滌三川。四望壇齊海岱崇。宋元豐立四望

海岱沂並在東郊蓋禹貢海岱及淮惟徐州地也。門對金臺凝積翠。沙沈鐵匱護靈風。禹導淮沈鐵匱以鎮水怪在縣東十里淮河內人有觸之者輒致暴風雨。重憑

盼蠻邀神貺。疵癘全消稌黍豐。

自南陽赴新野查視軍臺午憩林水驛館見庭宇清幽雜蒔花竹秋桂二株

河灣古驛繞雲莊。日午停驂問草堂。甘井延齡徵故事。小山招隱對幽香。農經細共高年語。社酒忻逢樂

歲嘗。愧爾春陵風俗美。迂疎真忝漫爲郎。

自固廟鎮探淮井歷大復山而東峯巒環繞淮流清淺從中至淮河店漸廣境與隨州相錯

楚天秋淨鶴飛回。繚繞行穿翠碧堆。一線波盈江北去。百重山壓漢東來。沙邊虎跡新晴見。樹杪猿聲薄

隕哀更指吳雲話歸路真從陽口片帆開。

贈大梁張道人

隻影飄然淡世緣。赤松子後散神仙。休糧并絕燒丹火。施藥常傾賣卜錢。戶外高軒寧識姓。市中老父不知年。紅塵何處尋雲臥。良岳遺邱小洞天。

襄城

路轉青山楚塞分。孤城臨水碧云分。六王故塚埋荒草。七聖迷蹤指亂雲。園樹陰濃黃鳥隊。汀荷瀾漫白鷗羣。潁陽幽賞真堪隱。愧遣塵纓濯縠紋。

乙未歲除

瞥見桃符覺歲更。官居如水晉陽城。牆根雪自經冬積。髻底霜從幾日盈。嘿數行年周太乙。今所傳洛書乃太乙九宮位也。其數四十有五。漫逢佳節祝長庚。尊前且幸忘先後。獨酌屠蘇對短檠。

題紅心驛

一天梅雨晚蕭蕭。十里蘋香萬柳條。小巷匆匆乞漿去。涼衫渡過赤欄橋。

雨夜宿廣陵

淡雲披拂幾長條。日暮雷塘半落潮。正是行人愁絕處。蕪城細雨近花朝。



白苧春衫雨乍零。隔船燈火幾星星。一聲水調吳娘曲。五度江南未慣聽。

### 沈業富

字方穀。號既堂。高郵人。乾隆十九年進士。官至河東鹽運使。

蒲褐山房詩話。君性情醇厚。篤於友朋。武進黃仲則過河東。留之賓館。病中哀其諸作。抄錄成編。俾無遺佚。又風峪有北齊所刻華嚴經。爲竹垞太史求而未得者。君遣工入山。攀搨得一百二十餘紙。贈予于西安。蓋好事如此。竹西自午橋太史沒。詩壇寥落。君以詞林耆宿。家居望重。士大夫南北往來。必造門請謁。香山洛社之風。賴以不墜。

### 永豐寺有感農事

寺外斜陽郭外村。我來時已近初昏。一林黃葉啼山子。滿地青秧長稻孫。過客情懷逢竹院。閒農風味是柴門。一年辛苦鷄豚社。容易田家老瓦盆。

### 清流關

到來絕頂衆峯齊。百里巖關萬仞梯。牛背遠浮新漲滿。馬蹄平踏亂雲低。干戈宋代空殘壘。文采歐陽感舊題。記得醉翁亭上坐。十年陳跡久淒迷。

### 送秋

尙餘爽氣未輕寒。一日三秋話別難。漫說小春時正好。休將過客冷相看。凋年景急愁偏遠。落木天高路正寬。忍負西來當日意。爲隨新雁送沙灘。

有感

荒深庭院蘚苔斑。到處標題感舊顏。落葉半墮穿砌井。夕陽斜倚對樓山。敦槃當日爭雄長。樵牧于今話等閒。太息梁間飛燕子。年年春盡尙知還。

渡河

霜鬢添來此日多。謾將心事託烟蘿。疎星曙色分嶠嶺。落日西風湧大河。春到傅岩應作雨。津開茅澗自橫波。吳歛忽起鄉關思。彷彿離筵一曲歌。

次對琴韻

一彈指已去來今。十日離憂抱此襟。短杖未憑詩早到。殘蟬初咽樹交陰。青雲久悟浮生事。白髮應無未了心。便合香山共圖畫。笑他淮海漫搜吟。

題蕉陰默坐圖

晚涼深處葛衣輕。獨向蕉林默契尋。滿院綠天回遠夢。半塔新雨澹秋陰。未遑息轍風塵日。肯負平泉草木心。明發有懷更誰共。坐牽題句憶聯吟。

九月六日余禮耕羣玉山房讌集次瑤圃韻

沾來衫袖酒淋浪。乘興還教更舉觴。華髮心情非少日。晚花風味是斜陽。燈前詩卷從新讀。霜後園蔬取

次嘗莫訝深宵飛醉墨。老年行樂更無方。

### 曹學閔

字孝如。號慕堂。汾陽人。乾隆十九年進士。官宗人府府丞。有紫雲山房詩鈔。

蒲褐山房詩話。慕堂性情誠樸。雖由詞垣。臺諫歷任京卿。未嘗榮心華贖。暇輒與二三同志。游潭柘戒壇香界及田盤諸勝。警策蹇從。冰雪中來。往見者謂是神仙中人也。作詩恬澹自然。中議論英特。非依仿格調以爲之者。君歿後。令子御史錫齡。戶部祝齡。表彰不遺餘力。故朱尙書石君爲墓志。錢少詹曉徵爲神道碑。翁鴻臚。覃溪爲傳。其見重於時賢如此。

### 和王述庵同年鄺湛若硯

湛若名露。漁洋山人所謂海雪畸人。死抱琴者也。工各體書。亡命入廣西。尋鬼門舊跡。又爲獠女執兵符者。雲顰娘記室。歸撰赤雅一編。以紀其事。其詩名嶠雅。手自開鑄。甚工。此硯鑄。天風吹夜泉五字。又湛若二字。并朱明洞天小印。今爲述庵所藏。

良硯古所珍。奇士世罕有。二者常相資。米老石爲友。王子真天才。瑰奇少匹耦。文章荷主知。屢試輒居首。所寶一片石。云出鄺生手。曾以草檄文。軍令嚴干振。南入鬼門關。瘴鄉爲祭酒。指顧生風雲。羣獠任犬吠。倚馬得千言。與腹兩無負。寂寂百年餘。落落埋塵垢。君得自何年。寶光騰戶牖。娛客出藏珍。瑩然置燈右。能使筆如錐。能令墨如黝。斑剝有文詞。依稀蚪與蚪。黃琮白琥姿。儼若玉色剖。滑潤如波濤。水接蟾蜍口。由來自海雪。畸才洵非偶。得之重什襲。珍之若佩玖。湛若鑄其旁。不比淮父卣。攜此事從軍。遂成三不朽。

滇海與蠶叢。八年勞奔走。想當決策時。筆勢變蝸蟻。指揮盡如意。掉運儼食拇。賴茲研磨功。執訊獲其醜。上將遂藏勳。禮成勞郊藪。弱質耀戎裝。書生誇赴赴。酬庸晉顯職。卿月崇班九。因君硯益光。寒芒逼星斗。乃知世尤物。能用在能守。昔日佐雲鞞。僅僅免覆瓿。何如逢清時。得與俊乂厚。不願石鄉侯。但願名垂後。坐令金沙江。風恬波瀾瀾。歸來雨雪霏。依依念楊柳。夜窻擁紅爐。意不忘堂阜。同心三五人。賞之樽貳缶。此硯多奇緣。用之更勿苟。願成平蠻頌。鐘鼎同永久。

書王芥子前輩涇渠志後

史志重河渠。經術通治體。須用讀書人。尤貴識時士。我讀涇渠志。歷歷如聚米。鄭白在當年。豈不稱利美。奈何後世人。尋源不究委。古今既異宜。山川亦移徙。但知耀其名。不復問彼此。遂使好事者。披圖費條紀。嗟哉萬夫役。那堪試疑似。百萬口嗷嗷。一人功自喜。纍纍涇渠岸。巍巍豐碑峙。唐宋及元明。利害俱可指。徵引既淹雅。識力尤俊偉。上下數千年。分肌而劈理。洞達古今情。匪侈言導水。不利以爲利。其利斯大矣。我生清晏時。竊自愧愚鄙。歷考利病由。較然著前史。紛更熙豐朝。非不用周禮。清靜載寧一。其言出老子。厚實與名高。效或相倍蓰。乃知聖人言。長府何必改。勿慕匡時才。勿遺他日悔。願言爲治者。涇渠志誠隄。

狄武襄公祠

飛射蠻氍毹。字摧穹碑紀。績尙崔巍。致身有具從行伍。黥面無妨出將材。談笑從容韜略合。儀形颯爽畫

圖開蕭蕭松柏門。堂路猶似崑崙甲騎來。  
故鄉祠貌儼來歆。青史威名世共欽。帳下孫張才孰並。朝端韓富契偏深。大勳屢向巖疆建。浮議休愁末路侵。一種深沈傳智勇。要從慎密識公心。

### 杜玉林

字寶樹。無錫人。乾隆十九年進士。官至刑部侍郎。

#### 登雅州城樓

大渡河西畫角聲。投鞭撫髀若爲情。空慚司馬能傳檄。漫說終軍欲請纓。春盡林香猶作瘴。雨餘山氣未全晴。關心最是從征客。雪沒弓衣夜斫營。

#### 癸巳六月聞木果木之警

羽書一道報嚴更。鶴唳風聲事可驚。萬里不歸都護馬。諸軍空望亞夫營。狼心自是忘威德。虎口憑誰寄死生。衛國籌邊良亦苦。昨來新築受降城。

昔嶺巉巖血戰時。幾人馬革裹還尸。曾揮露布工籌筆。

趙璞庵王綫着戎衣便死綏。吳鑑南以直隸州牧。涑田兩君。

遇猿鶴叫雲。君子怨龍蛇犯歲。故人悲。倘逢遺僕煩頻囑。莫遣深閨少婦知。

### 范家相

字左南。會稽人。乾隆十九年進士。官柳州知府。有環淥軒詩草。

維揚

綠楊城郭水初銷。十里秋雲覆畫橋。何事人間最惆悵。月明風細聽吹簫。

### 薛田玉

字琤叶。無錫人。乾隆十九年進士。官保定府同知。有問澹軒稿。

懷周亦庭太守

治獄如君少。星曹舊有聲。廿年纔出守。六詔尙論兵。菽水高堂夢。風波宦海驚。昨宵書一紙。辛苦念平生。

題朱荅泉讀易遺照

琴書寂寞草堂空。猶認平生戴侍中。早日才名看倚馬。暮年詞賦悔雕蟲。一編寢食梁施學。百里憂思魏

晉風。聞說桐鄉今俎豆。莫將經術笑冬烘。君爲大鎮令卒於官民爲祠祀。

### 于宗瑛

字英玉。號紫亭。漢軍鑲紅旗人。乾隆十九年進士。官至監察御史。有來鶴堂集。

己丑九月與金香泖山中話別有贈

秋姿澹平野。暮氣起蒼山。林表月旣白。山中客欲還。高情慰愁夕。寒霜下松關。揮手復塵跡。心長雲水間。

和慎菴將軍晚景卽事原韻

天末霜風落。虛齋宕晚陰。小山淒石氣。野菊澹秋心。墨續雙鉤帖。聲尋百衲琴。主人不可及。得句太蕭森。

汪永錫

字孝傳。號曉園。錢塘人。乾隆十九年進士。官至內閣學士。

烏兜驛

客館萬山中。山居趣略同。白沙牛渡水。丹嶂鳥吟風。閉戶疑禪侶。開簾問野童。虔州何處是。不辨路西東。

南安

此去通南粵。雄關地脈分。水流皆碧玉。山嶂入青雲。曉日烏排陣。陰天虎嘯羣。休言風土暖。木葉已紛紛。

游飛來寺

禪宮何事此飛來。造物鍾靈亦壯哉。水勢總趨滄海下。山門長對翠屏開。二禺孰辨游仙路。初祖還留說法臺。不覺登臨動鄉思。冷泉亭畔舊徘徊。

李昌昱

字復旦。號渭川。鄞縣人。乾隆十九年進士。官臨江府知府。有畊讀堂詩草。

偕尹松陵九日登陶然亭。遲曹慕堂。不至聞其令子秋闈得捷。述懷柬寄。

一生合得幾重九。但是相逢開口。故人不見踰三霜。佳節依然此杯酒。舍南直去陶然亭。萬頃蘆花千樹柳。高興還期直指曹。風雨城邊空佇入。令子當場喜得盧。賀客到門噴被肘。沈吟轉憶十年前。禪燈共耐三更守。今君喜氣鯉庭增。牆角短檠猶在否。我亦棲遲老作郎。舊話休論芻化狗。生平獨數松陵豪。笑注黃金等瓦缶。浮雲去去莫關心。落葉紛紛惜分手。插花歸到已黃昏。脫帽驚看俱白首。明年此會不須約。有酒仍來問升斗。

韭

春園微雨後。新韭夜來長。青翠眞供剪。辛溫別有香。洗根同白薤。留客間黃梁。儉食君無笑。翻令感故鄉。

劉鑾

字殿傳。號公卿。保山人。乾隆十九年進士。早卒。

蘭江古渡

迢遞滄江渡。飛虹百尺雄。雲梯開鳥道。鐵索鑱蛟宮。花色三春滿。雷聲十里通。天威思漢相。萬古濟川功。

周春

字松靄。海寧人。乾隆十九年進士。官岑溪知縣。

次湘管聯吟韻



無軒之居書連屋。洛如花開傍修竹。倩誰寫此高齋圖。倪王合作聯珠玉。宋芝山爲安邑夫子令嗣。陳我未披圖先展卷。一編寓賞盈尊綠。時以寓賞編見貽當年宋卞兩中丞。棠村江村與退谷。後來鑒古孰最精。交口稱君工品目。聯吟百首壓名流。包萬荆賀胥編錄。想見斯圖景色佳。菊坡瑤鼻洗塵俗。擬之漢上題襟集。揮毫我獨慚巴曲。風雅如君世所推。共窺豹斑嘗樹肉。讀罷新詩仍誦經。牖外不聽三呼穆。

鄭來祚

字永茲。南豐人。乾隆十九年進士。

入華子岡同郡伯徐讓甫夫子作次謝靈運韻

新秋天宇淨。策杖入姑山。林壑鬱道氣。虛空鳴石泉。頗識靜者妙。轉懷太守賢。擷芳兼采秀。越嶺復度阡。紅蘭浸碧沼。青杉生紫煙。真人長已矣。此道空蹄筌。流光相代謝。忽忽如彈丸。不見百年內。詎云千歲前。仙壇雲繚繞。丹竈水潺湲。欲問蔡經宅。臨風徒悵然。

拜李秦伯墓

鳳凰山下路。策杖弔孤墳。地壓雙姑秀。天開兩宋文。水田餘落日。山寺帶歸雲。一瓣平生意。區區證舊聞。

湖海詩傳卷十八

沈大成

字學子。號沃田。金山人。貢生。有學福齋集。

蒲褐山房詩話。學子壯年在潘敏惠公思榘幕府。敏惠喜讀書。學子亦耽心經籍。晚年借惠徵君寓官梅亭。益以學業相砥礪。三禮註疏。杜氏通典。皆手自校勘。丹黃爛然。後館於江鶴亭。春家編次詩文集。共六十八卷。無子。沒後。鶴亭刻以行世。其詩初學黃中允之雋。後出入唐宋。不名一體。墓浦太史謂以學人而兼詩人者。信也。五言如春燈孤照雨。高枕靜聞鐘。亂泉樵徑沒。清磬寺門深。遠水檣帆小。孤村桑柘深。香泥雙履滑。春草一庭寬。夕陽紅在樹。新漲綠平堤。七言如微風竹外流。清籟急雨樽前送。嫩涼秋風一催征雁。暮雨星星點客衣。萬事遡巡成白首。一年容易又黃花。小驛銀燈生。遠夢空江烟絮送。殘春茶筍耐尋。三月暮關河。遠夢一春深。皆耐尋。諷。

登紫陽山

磴道開新逕。萍蹤此乍經。人烟生萬井。石氣上孤亭。天接江湖白。春回草樹青。凭高發長嘯。頓使宿醒醒。

贈陸式如

廿載重相見。仍爲汗漫游。僧房堪結夏。客鬢早驚秋。竹潤嵐光重。荷喧雨氣浮。好尋舊吟伴。載酒弄湖流。

過青浦懷王蘭泉

浮圖倒影臥滄波。斜日荒城客又過。邑小人稀風色緊。江寒天闊雁聲多。披綿味好嘗黃雀。掃黛山遙憶

翠蛾東望澱湖雲。杏渺故人病起近如何。

曉渡春申浦訪喬瓶城留飲草堂作

細雨濛濛潮正平。凌晨風利放船輕。重尋水北誅茆處。轉憶隄西翦燭情。滿逕落花紅未掃。一林新葉綠初成。吳山回首荒前約。醉影婆娑百感生。

題楊柳汀聽鶯圖

柳外鶯聲啞啞圓。芳洲一片綠遮天。禁烟時節晴兼雨。中酒心情醉復年。吟策每從婪尾宴。笛牀閑上櫂頭船。近聞更學無生法。好逐迦陵證二禪。兄與南屏恆公爲方外交。

王蘭泉舍人三泖漁莊圖

茫茫長谷綠浮天。蟹舍魚巒半水田。絕愛江村涼雨過。柳陰初放櫂頭船。七子鴻名海內聞。偶來閑釣一溪雲。樵兄漁弟多相識。渾忘天邊鷓鴣羣。風流陳夏已前塵。吟社壬申斷問津。眼底橫刀誰健者。回瀾端合屬斯人。

七里三塘唱竹枝。流傳不讓冶春詞。從今翻作漁家傲。細雨斜風盡入詩。君有山塘雜詩。

朱方藹

字吉人。號春橋。桐鄉人。貢生。有紅橋載酒吳興紀遊諸集。

蒲褐山房詩話春橋生長燕支之滙居依爰史之山門第清華風神雅令詩賦之餘兼通畫理披麻  
沒骨無所不工是以載酒江湖扁舟來往好事者輒倒屣迎之姜白石孫化翁當日不能尙也又擅  
詩餘故其論詞絕句云酒闌蟋蟀語秋塘信是愁吟伴庾郎賦物却能超物外苦枝綴  
玉寫疎香柳溪竹屋共中仙妙筆終應讓玉田不獨當時喚春水相思孤雁亦流傳

### 曉登靈巖

曉聞靈巖鐘。遂入靈巖路。石磴轉百盤。出花泫春露。白雲與空翠。蒼茫色交互。須臾旭日升。禪關散輕霧。  
凌空一縱目。好景悉奔赴。點點太湖雲。重重吳苑樹。千里欲窮形。更上琴臺去。

### 同王孔堂厲樊榭登南屏山詣壑庵觀磨崖隸書家人卦傍晚泛湖而歸

夙昔抱微尚。溪山嗜幽討。況茲風日佳。招攜得朋好。芒屨蹋白雲。人影亂芳草。夾道籐荆榛。到門蔭松篠。  
略徇自透迤。清泉一泓繞。何年巒翠中。鑿此金魚沼。東坡詩我識南屏山僧出迎賓骨相清且老坐我青  
金鯽魚卽此地也豆腐淨域塵不擾。石鼎煮新茶。齋廚飯香稻。乘輿入巖洞。繚曲景幽窅。須臾緣磴上。如行衆樹杪。快觀磨  
崖碑。筆勢最天矯。云是涑水書。前輩每稽考。歲久苔蘚侵。佛拭勞手爪。悔不響揚歸。裝潢成墨寶。坐久眼  
色來。出谷尋古道。鼓棹向中流。舟輕疾於鳥。烟水何濛濛。雲峰殊杳杳。回首望南屏。殘霞斷林表。

### 游惠山寺

未飲惠山泉。先游惠山寺。蒼蒼九芙蓉。中有琉璃地。香臺聳層雲。金碧亂空翠。松竹散清陰。巖澗饒古意。  
爰尋山下泉。彌得靜中寄。碧乳流石根。清甘具真味。大江無中冷。此豈稱第二。松火明竹爐。汲泉聊一試。

茶取雀舌煎水候蟹眼沸。雪碗洗煩襟。悠然遠塵累。緬彼桑苧翁。清風動遙企。

曉起冒雨出山

天明如未明。禪窗失晨旭。宿霧凝不收。諸峯淡蛾綠。坐嘗石鼎茶。再飽齋廚粥。稽首別瞿曇。循途出巖谷。樹頭吹雨來。絲絲斷還續。杳靄迷陰崖。滴瀝響烟竹。蒼苔滑雙屐。下磴幾停縮。山泉先客行。奔赴前溪澳。回望但寒雲。微露蜂臺蠹。

東方未明之硯歌

有序

硯出端溪水坑。長三寸。廣二寸。石有眼數點如星。池作半月狀。額鐫東方未明之硯六字。背有銘曰。殘月暉暉。明星睽睽。鷄三號更五點。此時拜疏擊大奄。成則策汝功。否則同汝貶。旁署夢白居士題五字。下刻南星二字小印。蓋前明趙忠毅公物也。今爲沈椒園司臬所藏。司臬出示余。乃爲之歌曰。

硯材一握腴不枯。青花隱隱縈肌膚。鸚鵡眼作星數點。池剝半月如彎弧。東方未明景彷彿。纖阿列宿橫天衢。高邑冢宰昔寶用。嘉名肇錫良非誣。維公秉正斥邪佞。筆鋒淬厲成青蒲。論四凶兮疏四害。藉此揮灑辭意敷。茄花委鬼亂綱紀。漫漫長夜光含糊。公上白簡羅罪惡。思動天聽行天誅。滿腔熱血兩行愛。國淚應和墨瀋同。霑濡慷慨有詞銘。厥背三十一字。字字驪龍珠。明知成敗事難料。論功遭貶誓與俱。嗟爾

一片石。不過三寸軀。既不佐三朝。要典陷正士。亦不助搢紳。便覽筆染朱。書爲魏廣徵作。擄取怨家姓名。上怒。待公之側。識公友。日接高楊左李君子儒。雁門關前公遠戍。爾隨薄笨車馳驅。惜公騎鯨不稍待。金

雞有赦空飛符。忠義之氣唯爾寄。精靈呵護留寰區。隱拙齋

司臬

頭久什襲。珍重不啻青珊瑚。主人曾官

繡衣使。霜威凜凜傳燕都。奏毀死奄舊祠宇。碎其像。設陪碑。跌

司臬曾疏請毀王振祠

硯兮硯兮爾何幸。後先得主

初無殊。盛朝光華旦復旦。僉人孔壬今則無。不須磨爾書諫草。唯伴先生著作時。操觚今朝開匣出示我。

屈指已歷百數十載。流光徂濯以清冷泉。拭以紅氍毹。龍尾鳳唼非爾徒。明星殘月形不渝。使我摩撫增嗟吁。憶昔渝麋費幾許。五更奏牘天街趨。妻孥遣譎不遑恤。趙公忠毅真丈夫。嗚呼趙公忠毅真丈夫。

### 送樽崖之吳門

白髮耽游興。扁舟任所之。夕陽江樹遠。春水布帆遲。芳艸真孃墓。梅花短薄祠。吟情應更健。吳會再題詩。

樽崖向著吳會吟一卷

### 理安寺

一路晝陰沉。諸山積翠深。行行山下路。幾折到祇林。竹色侵經閣。松風和梵音。老禪曾伏虎。遺跡試重尋。

### 瓜步舟中懷王德甫

吳下同爲客。江邊獨放舟。鳥隨殘景沒。潮挾斷冰流。旅況添蕭瑟。詩篇少唱酬。思君隔南浦。雲樹迴含愁。

臨安山中曉行

石徑晨霜滑。篋輿去輒停。峯腰橫宿靄。樹杪墮殘星。僧寺鐘初動。山家戶尙扃。衝寒須卯酒。何處問旗亭。

東塢庵

曲磴攀藤上。高臨傍鳥羣。佛旛松頂見。僧磬石間聞。地僻稀遊跡。心清斷俗氛。回看來處路。已隔幾層雲。

客舍與沙斗初夜話有懷吳中諸子

久別欣攜手。他鄉慰寂寥。江湖懷舊雨。燈火話今宵。香水溪邊路。桃花塢口橋。當時觴詠地。回首十年遙。

老禪堂題壁

堂爲高峰禪師開山處。師子正宗寺舊址也。趙松雪曾書碑記。今不存。

碧芙蓉裏得平岡。此是當年選佛場。古殿慈雲猶擁護。豐碑妙蹟久淪亡。六時鐘磬鳴空際。萬疊峰巒拱下方。更欲乘風凌絕頂。龍池灑瀑半天涼。

同閔玉井江雲磻淨香園納涼

纔過紅橋繫槳牙。入門曲折水廊斜。柳陰濃綠全遮暑。荷葉清香卻勝花。隨處迎涼施夏簟。有時消渴點春茶。晚來忽送催詩雨。歸路依然照落霞。

歸雲庵四首和前湖州守白雪吳公六言原韻

明孫太初先生棲隱處

苔磴斜穿山塢。竹陰深護禪家。剛是連朝春雨。一溪流出殘花。

華屋終歸寂寞。隱居常占幽閒。試看挂瓢人去。猶存堂尸三間。

庵有挂瓢堂。鄭少谷爲太初先生書額。

一點軟紅不染。四圍積翠難分。坐久襟衫欲溼。飛歸都是寒雲。  
曾載枯禪瘦鶴。紫衣人仰高風。未必南屏峰下。烟霞勝此山中。

### 吳中雜詠

亞字城西柳萬條。金闈亭下水迢迢。吳娃買得蜻蛉艇。穿過紅闌四百橋。  
香林魚版響初停。慧慶禪房少客經。小閣推牕宜遠眺。夕陽秋水白蓮溼。  
蕙草初香二月天。白公堤畔柳如烟。討春年少攜箏笛。齊上吳孃六柱船。  
十里荷香明鏡間。扁舟來往樂漁蠻。柳陰深處涼風起。獨占吳王消夏灣。

### 過新溪

山泉放處板橋長。夾岸人家薛荔牆。穀雨纔過三五日。溪南溪北焙茶香。

### 明霞墓

墓在峴山之麓。題碣云。石蒲齋侍兒明霞墓。明李可賓字貞卿。官湖州司。李明霞乃其侍兒。石蒲齋其書堂也。



琴書堆畔了生平。埋玉空山代已更。一樹棠梨三尺土。寺留殘碣識芳名。

尺幅生綃寫綠筠。舊圖藏棄未塵湮。從今讀畫明窻裏。兼憶當時捧硯人。余藏有李公畫竹一幅。

吳興歸舟作

一夜城南放棹還。夢中吹過好雲山。何當身似芙蓉塢。常在烟鬢明鏡間。

冬日過遂初園夜集小查山閣聯句

雅尙聯心朋。朱吉輕燒烟際發。蘭沚遵逶迤。庵述蓮峰望嶺翠。古洞呀然闢。張策危崖條而突。宿莽走驚麕。

曹來枯林颺俊鶴。凝霜杉屋寒。吳企澱溜苔岑滑。一徑沿礁磽。吉雙扉豁林樾。眷茲澹宕人。庵述渺爾烟霞窟。

竊棲元敦古歡。策養拙謝天伐。拓地展百弓。來結廬容十笏。綠淨激溪毛。企蒼寒綴石髮。長林鶴柴遮。吉細水魚梁汨。款冬花已闌。庵述破臘煤漸澌。依人憐凍禽。策迎客狎吠獾。蹊幽窺櫛樛。來閣迴俯律矼。巡簷

遠眺舒。企布席豪情勃。雲雷陳漢尊。吉趨趨辨周碣。香焚鵠尾温。庵述宿動蝦鬚揭。鐙紅綻燭華。策盜碧盛

肴核。野供屏羶腥。來山庖具筍蕨。射覆角兩曹。企銜杯甘百罰。衝愁出奇兵。吉却敵誇勁卒。半醺臉微潮。

庵述痛飲頭欲沒。狂思中聖賢。策渴擬吞溟渤。底須舞傴僂。來漸覺醉兀兀。茗烟淪旗槍。企芋火煨榾柮。雄

談侈矜奇。吉清景坐超忽。銀箭咽虬更。庵述冰壺湛蛾月。霧沒山模糊。策風搖樹槎枒。澹澹雲合膚。來稜稜

水生骨。炙硯吟方酣。企攬環興未竭。奇思鬱輪囷。硬語辦倉猝。開軒快披襟。吉接座欣結韞。交應慕荀陳。

情詎分吳越，伊余困塵囂。庵述多君謝朝謁，屏跡依邱樊。帶經事耕垆，採芝商皓歌。時策樹蕙楚騷曰：花鳥供友于琴書，羨詒厥。欣此君履同。來勿使敦盤歌，逸翮借鷺鷗。遊蹤比蛩蟹，盟心保歲寒。企堅貞庶無闕。吉人

無隱庵消寒聯句次皮陸北禪院避暑韻

把袂衝嚴飈。吉人閒尋開士宅，聽鐘駐籃輿。吉人拾磴捨籐策，龍攫輪囷松。庵述虎踞倔強石，崖裂皴霜痕。時策巖

封漬雨跡，徑靜稀樵兄。微朱肅澗枯斷漁伯，邱中誰鳴琴。吉人方外或卓錫，佛座倚雲根。吉人齋廚引泉脉，炷香

禮蓮龕。庵述懸燈照葦席，清言容踞床。時策高臥時踟壁，結跏宗雷儔。微肅豎拂支許敵，安禪訶小乘。吉人妙諦證

大易，偈從黃檗參。吉人旨向青原摘，嗒然身世忘。庵述悠哉襟韻適，觀空度六時。時策斷愛戒三昔，夜悄月盈規。

微肅氣凝雲過尺，撲朔匿毳毛。吉人畢逋翻凍翼，危柯綴股紅。吉人荒坂鋪禿白，冰苔滑侵衣。庵述風竹低壓幘，道

遙企鴻情。時策局促陋螺識，幸窺薈蔔林。微肅快聚菰蘆客，梵筴任冥搜。吉人經幢恣元索，寶筏超津迷。吉人珠林

羅海隨，言依竺國緣。庵述誰羨桐君籍，舀水貯一瓢。時策穿霞藉雙屐，夙願償未能。微肅勝地棄堪惜，溷跡尙塵

鷲。吉人息心終野寂，澹味宜敲茶。吉人幽芳愛翦柏，回瞻薄靄蒼。庵述悵望層嵐碧，亟當證淨因。時策庶可療奇癖。

何時木樨香。微肅訪秋復來覓。吉人

詠柿聯句三十八韻

秋晚摘芳包，殷紅照闌檻。吉人顆勻鶴頂圓，光射虬珠閃。庵述盈筐驗八棱，堆盤燦數點。時策寒逾冰沁脾，色比

酒暈臉吉人精熒日生輝。翕絕火含燄述體疑塗。鹵砂形不藉規範策渾淪觚無稜。磊砢圭少剡吉人甘膏鐘

乳滋。細核瓠犀斂述膚柔滑可捫。梗短愁難搵策絡資細篋裝。漬陋輕鹽鹹吉人懷橘喜同曹。持螯慎分陝。

述喜茲結實佳。緬彼蟠根漸策幹直倚筇。陰濃罨岳广吉人繁花綴金鈿。密跗翦青琰述叢條拂春庭。碎

影移夏簟策香瓢過暑融。靈液逢秋湛吉人營巢絕鴉鷓。細嘷謝蝸范述綻宜晴旭烘。熟恐瘳臄颯策相呼

走且僵。競采大而儼吉人壓擔疊壘壘。盈車響墜墜述豎賈街齊擎。癡兒噉猶歎策數品滿陶盆。徵奇考竹

筩吉人佳名朱果傳。別種烏稗忝述松陽冷濺牙。梁園美充噉策共知龍卵嘉。未許牛心掩吉人饊和楚米蒸。

餅壓吳霜染述灰淋崖蜜凝。風戾雲腴減策搗餘粉色勻。瀝後漆光躡吉人蒂從織錦誇。葉爲臨書檢述致

用咸足珍。分嘗詎能貶策攜來喜囷磬。剔去憎醜黯吉人金刀切紛綸。玉椀鋪掩冉述對物憶家山。誅茅近

晴崦策火傘映移杉。金衣耀桑槩吉人設饌共園橙。登筵伴江芡述鄉味尙依稀。蕭晨忽荏苒策所宜肺病

蘇。豈恨食單儉吉人薄冷君勿嫌。清尊宜澹澹述

集璜川書屋觀伏波銅鼓同企晉述庵張策時凌祖錫聯句一百二十韻

陽曦射高堂述寶氣肆騰躍。古色伴尊彝吉人流芒動簾幙。熊熊詫雲歛策煜煜怪雷爨。巖昏饕餮蹲吉人月

黑蜿蜒。蒼疑木鬢髮述黝類火蒸蕪。髻髻同形模吉人米黍協尺度。彭亨豕腹寬策偏強豹股博。綠碎瓜

皮皴吉人黃披楮葉敲。回文結雕尻述斷跡密齟齬。字缺史頡銘吉人奸遁飛廉魄。蝌蚪周四腔策蝦蟆歛三

脚列象大山均金分位雷風薄腰如已飜周面比辰鑑廓低陋熟馬錚吉人窄哂棲鳳鐸完質無孤離策  
輅光仍渾噩審器知金鎔金辨音異皮鞞揜袖發鏗錡述援枹恣磅礴小鳴星精搖吉人大響雨點落獰颯時  
蕩穹崖策急瀑赴巨壑轟天走之而金般地駭不若雲垂林熊咆述石裂谷虎愕同鏡鐸鐘鏞吉人殊笙箛  
管籥歌風想其鏗策肆雅徵或罟稽典心縈紆金辨物手捫摸剌沙顯晶瑩述剔蘚露瑾錯流傳東都時  
人采拾南夸略瘴海波滔淫策蠻陬山巖岩貪吏失撫綏金獷俗善劫掠伏莽踰颯颯述投林過猿獾荒  
人吉箐蒙幽遐吉強弩逞矯躩獠獠蒼狐羣策鬢髻熾妖虐赤伏方中興金黃圖並虔恪璽書集貍貅述羽檄  
剪鯨鱷健女空跳梁吉人老翁尙矍鑠下瀨陳雄師策伏波拜新爵誓衆發樓船金連屯趨浪泊毒霧看墮  
鳶述盤渦訝浮蚘險披荆榛叢吉人勇淬霜雪鏑營開闢戟明策陣動瑤戈拓塵飛揚旗壓金血模糊刀斫  
孽種揃維將述戽夫竄詩索弢弓震天綱吉人立柱表地絡雕題來粵人策崩角受漢約昇曳呈轅門金焜  
煌照鈴閣蟠猊紫繡蒙述翔鷺流蘇紵寶從爭摩抄吉人徒御互趨踰上將思驩策良工付燬爍駿尾宛  
蕭梢金人驕蹄像遠躑金門獻種種述玉墀羅各各功應冠寇岑吉人威已憚越駱胡然謠詠興策時幾時湯沐  
削訟冤誰慨慷金人藁葬終寂寞奇助貽至今述剩物撫猶昨體非鳧氏攻吉人制想獠奴作音老誇多藏策時  
俚人笑羣搏蘆笙迭參差金人椰酒共斟酌雉翎豎丫叉述人贏殼挂瓔珞六幅拖花裙吉人一輛騰草屨踢臂  
凌長溪策時招手度危窄破屋蔽榕陰金人短牆絡籐格綿李實翁叢述人匾桃華娉嬭賽社巫叮嚀吉人留歡客

酬酢箬裹堆生鹽策時瓦盆貯乾酪羅列兼禽猩企熏炙到鼠鼯企雜飲態宜製述調言笑嗷嗷脫釵扣淵淵

吉人踢歌行躡躡傾耳聆敲鏗策時攘腕任揮綽節促交錚鏦企聲圓屏硯礫聽隱隱麟麟述視索索矍矍僻

陋良足啞吉人駢闐亦云樂譚論考始終策時收藏見矩矱表座映尊壘企宿懸繼鑿鑿置傍青玉案述襲用

紫鬪橐舊玩供掀撤吉人新詩遞咀嚼拂拭耽近好策時蒼茫興遠托今皇恢八紘企覃化遍六漠入侍粉梯

航述獻寶聚河雒陰羽陳麒麟吉人火珠上鵝鵲邊壩消朝烟策時嚴城斷宵櫟方看重譯朝企詎意小醜惡

臯踞前王庭述蟻聚左賢幕聃談蝮蛇張企劉刺蠱蠹蠹聖武赫斯怒策時帝命求其瘼側席思范韓企築

壇遣衛霍攻同吉日誨述撻伐凶門鑿神符甲乙占吉人士鮮癸庚諾虎帳夜椎牛策時龍沙晨表貉殺氣纏

蚩尤企邪氛掃格澤三千驅水犀述百萬潰風鶴喪膽諸部降吉人係頸元兇縛惴惴就斧砮策時欣欣免鼎

鑊饒曲傳數章企戎衣欣一著洗兵魚海陰述振旅狼居罅罷六道挽輸吉人安四郊耕穫酬庸珪瓚璋策時

薦廟臙臙臙敷文舞羽干企視學奏蕭勺靈囂四簋懸述華鯨九乳擗瘖彼百里驚昭茲萬物郭冠帶罔

弗同祖賈琛詎煩却定時伊犁我儕樂淳熙吉人是器足揚摧翠葆靡銅腥策時雲花絕塵埃神夔吼不聞企隱

輪彩尙敷年深建武存述代古貞元怍紺斷非淵淪痕斑想泥黻驃國遜輪囷錫祖象州謝礫硌破硤壓寶

輪吉人礪礪撼綺構授受閱弓裘策時顯晦等龍螭氈包武溪濱錫祖網罩潢川輪高軒辱寵靈健筆起衰弱擊

鉢喧雷鳴企續貂愧螢爝余後至狂揮鮑鮑毫渴把鷓鴣杓子石磨白蕉錫祖哥窑插紅萼擁鑪芋火煨吉人

汲井茶槍淪。禿巾頭鬢鬢。策時解帶步踈蹠。招撫窮冥搜。幕畫資衆諶。劈牋侍史勞。錫秉燭奚童御。壁空風  
颼颼。述庵簷凍冰洛澤。潛鱗蟄蛟蚪。吉人厲翮振雕鷲。角殘烏咿啞。策時漏盡雞臚膊。矯首眎長庚。企晉熒熒燭虛

### 閔華

字廉風江都人監生有澄秋閣詩

#### 重過田隅草堂有感

舊識溪邊路。草堂疎竹籬。樹成人去後。秋老客來時。白鷺一雙影。枯花三兩枝。裴回欲愁絕。隣笛正孤吹。

#### 過環溪

移門當竹逕。插柳護山田。野水明籬外。疎梅落檻前。朝來課春作。客去理殘編。不信歸林下。郎官正少年。

#### 晚春過讓圃

逕曲多幽草。林陰有澹雲。自同南郭隱。不用北山文。野色空樓得。高花兩院分。劇憐春晝晚。蜂蝶尙紛紛。

#### 春霽

匝月始開霽。小園春未闌。好風清宿雨。遲日散朝寒。鳥語交喧樹。花陰半覆欄。遙憐湖上路。塵屢撲雕鞍。

#### 早秋過巨公禪堂

初地秋先到。涼風滿戶間。鶴聲松院靜。僧語竹牕閑。蔬果生禪味。烟霞見道顏。一杯貪坐雨。薄暮欲忘還。

懷南圻在環溪

遙憶環溪上。春寒正掩門。水風垂柳岸。烟雨落花邨。把釣潛鱗得。然松濁酒溫。有人此林下。吟醉送朝昏。

贈盛青樓

落拓風塵兩鬢絲。年年贏得在天涯。秋生蜀道聽猿夜。雪下梁園授簡時。三徑松筠應自好。五湖鷗鷺最相思。先生歸計須料理。莫使烟波欠釣師。

陶元藻

字篁邨。山陰人。貢生。有珠江等集。

蒲褐山房詩話。篁邨五十年前老名士。乾隆丁丑。余在廣陵時。盧運使見曾大會吳越名士于紅橋。凡六十三人。篁村與焉。有詩云。誰識二分明月好。一分應獨照紅橋。為時稱誦。故余贈以詩云。勝游共聽歌三疊。清詠先傳月二分。嗣後遠別。迴不相聞者四十年。迨余乞恩歸老。來謁雲栖。見篁村題詩在壁。詢之山僧。言昨游此。雙鑠尙無恙也。既而篁村聞余在武林來訪。旋寄所刊珠江等集。因甄錄之。如左。

彈子磯

高稜刺青天。根脚拄水府。盤渦潛毒蛟。昏黑神所怒。廻波拒行舟。篙者力如虎。懸崖側欲頽。毛髮時一豎。妖星兆漢年。刃血赭南土。彈射峯巒穿。山靈亦遭侮。茫茫太古雲。流石氣成雨。峭壁羅青紅。妙繪色惟五。

凌濤駕飛梁。欲陟絕步武。松風餞孤舟。交影日卓午。

自大里至羊塘舟中偶書所見

羣岳張脇川。貫胷練光潑。綠偏玲瓏。遙聞澗響在天半。玉龍倒挂前山峯。松根將斷杉影接。蒼翠圍却青芙蓉。鳴禽上下人不見。中有小徑雲常封。沙頭奔石狀醜惡。巖熊噉水行舟逢。懸帆風利不得泊。倏忽數里烟霞重。夕陽欲落猶未落。隔林飛度曼陀鐘。

西洋鏡屏

菱花不產金銅壙。挂壁寒生到衣桁。冰雪聰明老畫師。虛中烘染離奇樣。非綃非縠隔毫芒。爲影爲形乍難狀。秋痕一綫指不容。萬里斜看勢奔放。峩舸大樞天未來。箭激危檣破高浪。小姑扶柁大姑橈。紅頰長眉兩相向。瑤犀插髻耳耀珠。倒影雙花動春漲。門千戶萬城郭開。霧閣雲窻映仙仗。天風磨颭芙蓉旂。黃犬神牽過烟嶂。前村夜市簇華燈。錯落明星海門上。蓬頭番鬼立且趨。蟻逐蜂屯絕依傍。陽烏汨水陰兔升。老魚垂頭瘦蛟仰。偃師狡獪怒君王。地獄圖成駭變相。飛鴻爪印雪泥空。汗汗涸涸入清漾。芥子須彌恍惚逢。大光明界蛟龍藏。

韶州雨霽

推篷山色近。雙眼望眞饒。過雨綠遙樹。夕陽紅半帆。鷓鴣小艇出。蟬竦遠天銜。頓覺春寒減。臨風試袷衫。



大忠祠

松柏青蟠古屋陰。風吹畫壁氣蕭森。勤王莫展回天力。誓死同堅報國心。碧血魂歸巖瘴濕。黃龍旗偃海雲深。寒鴉飛過厓門路。一片斜陽自古今。

登廣州城樓

魚鱗萬井氣如雲。牛女星躔掌上分。諫草文章唐宰相。樓船弓弩漢將軍。羅浮巨蝶傳靈跡。南海明珠紀舊聞。伛伛崇墉鼇背起。幾回憑眺對斜曛。

過蘭溪

白沙翠竹滿汀洲。烟抹蘭溪舊酒樓。一片淒迷夕陽渡。旅人西去水東流。

題一鑑亭

風日籃輿到郭初。草亭清景似吾廬。廻廊行盡芭蕉影。細數堂堂策策魚。薤根芹葉水雲閒。風皺鞞紋浪一灣。尤愛晴峯烟樹末。夕陽粉本大癡山。

六如亭

斷石闌干薜荔垂。夕陽亭外認荒碑。春風吹綠朝雲墓。一路空山叫畫眉。

重陽

風雨重陽獨倚樓。寧辭盃酒對江鷗。南山應笑東籬客。又負黃花一度秋。

月夜憶揚州舊遊

素月如規印碧空。吟壇盟主憶盧仝。藕花香裏燈船酒。回首揚州一夢中。  
扶胥海上露華新。那得笙歌畫舫春。楊柳紅橋今夜月。阿誰重憶舊詩人。

朱櫟

字孔林。長洲人。諸生。

蒲褐山房詩話。孔林少與惠徵君交。故性耽墳典。又與長洲布衣余仲林蕭客校勘注疏。余有經解鈎沉三十卷。而孔林尙未成書。兩人皆不工詩。存此略見一斑。

九日登道山亭有感

孤亭峯崒俯荒城。平遠江山四望清。古堦雲林低晚照。野塘風荻亂秋聲。百年逸興清樽在。一夕相思白髮生。醉把茱萸重惆悵。故人零落不勝情。

華玉淳

字師道。無錫人。監生。

蒲褐山房詩話。無錫華氏自子田。學士以詞翰起家。至數傳而師道與其從子灝峯受業於顧復初。司業講求經義吟詠乃其餘事。故師道有句云。今日凌雲誰健筆。續將初白老人詩。其宗仰如此。然畫莊類稿題其澹園詩稿云。澹園霞峯老孫子。屏除俗學治經史。貽我一編太古音。隻字不寄時人耳。年來歸權自集湖獵獵秋風。尋戰壘。噴薄奇氣本洪鈞。故知此事須根柢。信如所云。則又非初白人。

老人支派也。

同諸弟至後園

重尋芳徑遶花陰。拂水依依柳色深。過眼雲烟今夕淚。對林風雨十年心。

題天際歸舟圖

平林漠漠含秋雨。芳草萋萋映碧潭。一片輕帆雲際出。望中空翠是江南。

華淞

字澱峯。無錫人。諸生。

秦漢印歌示導崑

鈕螭辟邪龜瓦羊。色青紫黑金赤黃。埋土剝蝕生古香。鑄分製各擅場。罽扁倒薤圓不方。細膩熨貼順陰陽。鸞廻鵲顧驚翱翔。兔踈烏立蛟騰驤。雍容冠冕垂衣裳。瑠戈寶戟爭鈇鋕。撫畫化變誰頡頏。何震文彭宗子昂。法趨簡易歸堂皇。庶幾萬一堪梯航。織綺怪僻非康莊。篆籀遺跡今渺茫。秦璽漢印留吉光。

江昱

字賓谷。號松泉。江都人。諸生。有松泉集。

蒲謁山房詩話。小玲瓏山館。嘗集江浙名流。賓谷數爲座客。故詩詞亦得午橋樊榭諸人一體。

陽曲張思孝來江南爲儲太史刻存研樓文集并搜討傳徵君霜紅齋集壽髦我詩彙刻之凡六  
載始竣今將歸里以秋林獨坐圖屬題予高其誼賦此贈之時乾隆丁卯九月

玉堂感秋衾。誰復求遺稿。況彼巖居人。悽吟散烟草。江湖萬古流。後死績非小。江南五見雁。關門度秋早。  
顯晦信有時。斯文動蒼昊。逍遙指舊山。霜林坐清杳。

由古渡橋泛舟紅橋雨過西圃用林壑斂暝色分韻得暝字

淞緣出葦間。秋意滿烟艇。疎雨忽薦涼。輕雲不成暝。水曲隱新亭。竹深得清境。開殘荷菱香。吹上詩句冷。  
花師閱廢興。鷗盟坐消領。斜陽澹遠林。寥寥一蟬警。

王述庵趙璞庵曹來殷嚴東有凌靜軒吳梅里集對琴書屋分得理字

故人天際鴻。清風忽來止。虛室闕市喧。招呼及諸子。風簾暑氣微。冰絃素商起。叢蘭發紫莖。幽意靜如水。  
抗襟暢雅懷。高談送涼晷。卜夜開青尊。烟櫂未須理。

初秋湖上泛舟至月上始歸

城西小艇尋烟語。幾點迎涼豆花雨。沿緣更入深葦間。水態雲光淨空宇。遊船歸盡無笙歌。晚來清景娛  
人多。老蓮吹香酒初醒。白月挂柳魚跳波。寬閑已與繁華隔。魚稅菱租堪卜宅。鑑湖何事乞官家。在處悠  
游同一適。

盱眙

五代干戈地。憑高豁遠眸。山連淮甸夕。水入泗城秋。豚酒神祠社。魚鹽賈客舟。都梁有香草。欲采獨無由。

雨中簡金壽門

短巷人過少。冥冥十日陰。林花雨中澹。秋氣坐來深。蟲語時鳴室。鼃絲半在琴。遙憐寓樓客。隱几對高岑。

舊縣

一句淹水宿。風味此鄉清。斜日明孤塔。寒江遶廢城。樓臺山外出。舟楫畫中行。瑟瑟微風發。沙頭漁笛聲。

黃舟赤壁

高巖落日大江濱。亭榭凌虛結構新。漢水波寬帆下疾。衡陽秋盡雁來頻。戰爭杳渺千年事。風月銷磨絕代人。寂莫淮南獨行客。維舟釀酒一傷神。

諸同人爲苔岑小集分詠故鄉古蹟得禪智寺

迤邐崑岡枕水湄。琳宮金碧憶當時。蟲鳴廢院僧鋤菜。葉滿空廊客看碑。雨氣隔江山淡沲。墓田無主草迷離。幾翻塵劫銷磨後。歌吹偏勞小杜詩。

漢上喜李嘯村聞涿至自潯陽

蕭蕭木脫晚秋天。燈影高樓枕手眠。暮雨獨聽三楚雁。東風忽到九江船。詩篇作計寧長策。行李隨身是

夙緣萍聚他鄉休感慨。題襟贏得綠尊前。

將之京口宿瓜洲敏上人禪林

小憩吳艘第一程。到來心跡喜雙清。樓空燈影籠龕碧。夜靜江光入檻明。鴻雪偶然留指爪。鐘魚聊爾淨襟情。峭帆擬趁雞鳴渡。東掠滄溟看日生。

移居

聚族籠坊不記年。飄零忍賦卜居篇。豈同杜甫橋西宅。差免張融岸上船。微力辛勤營壘燕。殘聲酸苦別枝蟬。清貧家具煩收拾。借得童牛百事全。

西園感舊

逝水年光送盡春。謝家池館暗凝塵。東風歷亂真無賴。滿院楊花不見人。

蟋蟀

蟋蟀偏驚獨夜情。一聲聲近臥牀鳴。金盆棄置秋塵冷。自起鉤簾看月明。

夏夜

夜深清境復誰知。涼露無聲滴小池。寂寞紅薇花上月。照人憑檻立多時。

過九江

晴雪空江沒舊汀。孤舟鎮日晝冥冥。迴颿忽見斜陽出。遠露匡廬半壁青。

愛日堂觀劇

興來留客罄清歡。歷歷珍珠瀉玉盤。紅燭消遲簾幕靜。不知風雪夜深寒。清詞小部擅風流。江漢微波咽暮愁。醉裏渾忘身是客。紅梨亭外月如鉤。

題襄尺畫蘭

葉葉涼陰生硯池。國香零落徧天涯。江南烟水春帆穩。歸夢湘臯月墮時。

江恂

字于九。儀徵人。昱弟貢生。官徽州知府。有蔗畦詩鈔。

蘋風檻

紅蘭帶清波。蘋花亂秋雨。日暮水烟昏。吹香上詩句。

春水步

蒲芽短於髮。花鴨肆游漾。痕沒繫船樁。桃花夜來長。

題畫

朝來空翠滿雲根。幽逕無人破蘚痕。一夜雨聲喧竹外。魚苗水漲石橋渾。

秋日湖上

一枝柔艣認前灘。露柳霜蓮弄影殘。卻是無人領蕭寂。水風吹雨畫生寒。  
鷗外陂塘百畝寬。波光罨盡鏡中看。西風似與蘆花約。妝點秋容上釣竿。

江立

初名炎。字聖言。歙縣人。監生。有小齊雲山館詩鈔。

蒲褐山房詩話。聖言性耽文素。又愛倚聲。與其兄弟名譽略同。遊西湖。慕姜石帚馬陸之勝。卜築數椽。搆細君同居。數年賞盡。家亦落。乃還邗。上余在魚通。適其叔太守恂。權知夔州府。數以書問訊。并寄其詞。蓋氣誼之篤。近時所罕。詩不多作。故無專集行世。

悅枝堂坐雨分得八齊

萬條銀綫綰來齊。檐瀑紛紛看欲迷。乍喜綠添新竹葉。最憐紅濺落花泥。半規池面跳波急。一角窗陰壓座低。漸覺涼生衣袖上。呼鐙且盡玉東西。

王庭魁

字岡齡。吳縣人。監生。有小停雲館集。

蒲褐山房詩話。岡齡受詩法于沈文愨公。所居在楓橋。有小園。花木之勝。能畫。藏弄名跡頗多。最愛文氏翰墨。故以小停雲名其館。風日佳時。恆招諸名士。作文酒之會。後十餘年。岡齡謝世。圖畫悉亡。宅亦歸于袁氏。今又愨漁隱小園。即其故址。



寒夜吳企晉曹來殷趙損之沙斗初朱德基林屋叔蘭泉西莊兄集停雲齋分得月字

凍雀栖簷端。寒宵悵悠悠。良朋欣盍簪。攜手入巖窟。歲暮衆卉凋。嚴風振林樾。何以助綢繆。村醪雜野蕨。人生能幾何。轉瞬嗟華髮。行樂貴及時。深杯不辭罰。情洽語笑親。醉餘歌味發。相送出柴扉。林梢掛殘月。

春草次韻

輕風剪剪漾春原。芳草如茵拂砌繁。謝客裁詩清入夢。江郎作賦暗消魂。遠迷樵客山中路。低襯漁家竹裏門。一望蘼蕪烟景好。翩翩遊騎憶王孫。

爲家蘭泉畫三泖漁莊圖

圓沙曲渚白雲居。九點遙峯畫不如。爲愛菰蒲烟水闊。秋風釣得季鷹魚。泖湖東去碧迢迢。矮屋垂楊舊板橋。何日竹弓同射鴨。瓜皮艇子晚迎潮。

徐薊坡

字薊林。號澤農。青浦人。貢生。南巡獻賦。命入武英殿校書。未赴卒。

蒲褐山房詩話。薊林有聲序。梁文定公爲學政。試以榮羹賦。特見賞拔。中識入京。寓延壽寺街之雲間會館。病瘵。余往視之。殘雪滿地。寒飈襲人。葛幃木榻。燈火青熒。顧余而歎曰。似此已是鬼境。復有何言。因占兩絕云。勞身擾擾役醯雞。勸破蒙莊物理齊。客路殘生等蟬蛻。更無兒女繞床啼。得詩隨改。又隨刪。踴壁冥搜。月夜問。最是生平有餘恨。未留著述在名山。聲情酸楚。真不減鮑家之唱。上峽之謠。余故探掇。獨多以釋其恨。至才情之富。有屬對之名。通詞華之清。瞻當與我邑中陶穎儒。邵植庭。齊驅並駕。非餘子能望肩背也。

夜坐寄趙損之

清風颯然來。涼氣襲羅幌。空堂悄未眠。葉落碧梧響。秋高萬籟虛。獨坐愜幽賞。耿耿銀河明。林梢新月上。緬彼素心人。眷焉發遐想。機山鬱嵒巖。谷水涵滉漾。遠道寄相思。孤鴻自來往。

曲陽有韓魏公蘇文忠公石刻箕谷命工摺之

賈胡愛珍玩。農父勤芸蕘。物常聚所好。好貴與俗超。觥觥周夫子。一官懶折腰。仙鳧偶焉駐。冠蓋驅塵囂。縣古似村舍。遺風近唐堯。聞昔轉戰地。兵革久未銷。韓蘇後先繼。異樹而同條。軍營鎮邊徼。粟米除征徭。只今感遺愛。涕屑髦與髻。當年政成暇。餘事傳歌謠。風流相照耀。伐石窮鑿雕。字字劈窠大。虎臥兼龍跳。閱五六百載。不受劫火燒。臥閣日清宴。寓興破寂寥。時從看山便。言訪谷口樵。我亦嗜奇最。治生幾不聊。浪跡走燕趙。忝佐幕下僚。何緣蘭臭合。結伴常招邀。曲逕穿羃歷。懸崖陟岩嶮。登登聽響搗。膠墨胥勻調。虹光爛四壁。靜對長夏銷。何必河陽縣。種花含春嬌。何必鬱林舫。載石廉名標。一編集古錄。官橐歸已饒。

石湖秋泛

涼風昨夜吹雨過。小軒簷溜聲淙淙。蟻衣上砌屐齒滑。掩關瑟縮同寒虻。忽驚剝啄扣短闔。窈然空谷聞音登。生平雅抱泉石志。酸醜嗜好殊冥舂。石湖烟景入夢寐。涎流更覺心饒饒。朝來層陰況開霽。琉璃一碧涵澄江。蔚藍爽氣望不極。排空陣陣飛鴻鸚。鯉魚風急五兩動。便思振舵移絳艫。越江溪口足幽趣。名

區自昔推南邦。相傳文穆栖隱地。田園息影耽耕耰。蠶桑鰕菜樂素業。至今遺俗猶敦龐。人家村落接沙  
觜。薑塍芋圃兼苔缸。疎林掩映夕陽外。修竹个个攢鷄羣。柴扉三版爨烟起。隱隱籬脚鳴花龍。行春石橋  
跨水面。紅闌迤邐連長杠。幅巾閒眺臨淺渚。青絲紵繫枯陽椿。箏船四面銜尾過。木蘭小槳紅油窻。柳枝  
竹枝迭賡唱。吳儂篴弄傳新腔。嘔啞柔櫓撥萍藻。沙邊驚起鷓鴣雙。楞伽咫尺不得上。遙見巒勢峻崢嶸。  
青螺倒影碧波底。亭亭似建蓮花幢。禪宮晝靄入雲際。縹緲仙梵流空篴。烟嵐明滅碧無數。衆峯矗立疑  
踈躩。拖筇却少濟勝具。預愁登陟疲體腔。溪朋幸逢禽向輩。脫略禮法無噴噴。茶檣酒幔共吟嘯。興劇往  
往挑蘭缸。搖牙握管鬪奇句。掉險數舞都盧幢。滾滾珠璣互噴薄。琅琅金石交錚摐。詩成擊節欲起舞。拍  
浮傾倒玻璃缸。酒酣慷慨忽根觸。懷古耿耿心難降。當年吳越事轉戰。艤舳百道摩矛鏑。英雄成敗只一  
瞬。貽戒足使神魂懣。功高蓋世不受賞。扁舟歸去揚輕篋。滄桑變幻幾塵劫。韶華轉眼隨奔馳。遙遙千載  
動感喟。馨香欲薦辜蘿苙。臨流釀酒一俯仰。遙山烟外昏鐘撞。

京口夜泊

風定帆初卸。寒塘起暮烟。斷雲瓜步樹。殘月秣陵船。山翠來篷底。江濤落枕邊。十年湖海夢。回首一凄然。

登泖塔次韻

中流一搶湧。四面鏡奩分。齒齒沙間石。鱗鱗水底雲。秋風招鶴侶。夜雨嘯龍君。倚檻舒清眺。鐸鈴天際聞。

寄張策時

金昌楊柳記同攀。別後相思客鬢斑。細雨春帆黃歇渡。淡雲秋樹陸機山。關河遠道傳紅鯉。烟水幽情戀白鷗。安得秦淮花月夜。旗亭賭酒一開顏。

牽牛花

牆腰籬角碧茸茸。小艸閒庭點綴工。弱質愛霑秋雨翠。芳心愁對曉霞紅。涼分銀漢迢迢水。香送苔階冉冉風。盼斷鵲橋人去杳。幾枝疎影伴吟蟲。

寄沙白岸

天涯風雪挂征帆。回首昌亭夕照銜。四海論交留短褐。五湖歸隱託長鑱。垣衣薜荔何須補。門掩蓬蒿不用芟。準擬相從赤松子。芒鞋一綉踏巉巖。

別嚴東有鮑雅堂

天涯分手悵離居。衰柳長亭夕照餘。高會三秋傳白下。盛名一代敵黃初。風塵冠蓋交遊壯。雨雪江關旅夢疎。明發孝侯臺畔路。相思千里盼雙魚。

春草

依依新翠上河橋。鷓鴣聲中宿雨消。繡陌衣香來緩緩。銀塘帆影去迢迢。幾多芳訊傳三月。賸有離情送

六朝惆悵青袍憔悴客。年年愁緒長春苗。

古意用錢訥生秋興韻

書卷飄零手勸拏。韶光荏苒客中過。十年旅鬢新霜少。千里鄉關舊雨多。秋水蒹葭聞雁語。曉風楊柳唱驪歌。美人欲折瑤華贈。悵望雲山喚奈何。

訪道何緣問廣成。天涯漂泊可憐生。篝燈夜雨紅蓮幕。蘭漿春波白苧城。三月鶯花愁裏色。五湖鰕菜夢中情。輕塵滾滾人閒路。空憶驂鸞到上清。

題王述庵三泖漁莊圖

晴光瀲灩碧迢迢。淡靄輕陰覆板橋。昨夜孤蒲疎雨過。一溪新水漲魚苗。杉皮矮屋笋皮篷。沙觜沿廻略約通。一帶垂楊低蘸水。綠蓑斜罨釣絲風。桃花淺浪送春帆。蟹斲魚罾夕照銜。坐對涼波吹篴罷。自縫袂訂舊漁衫。蹇驢破帽裊吟鞭。十載江湖舊夢牽。何日從君背笞簪。撈鰕同泛檣頭船。

八月二十六日夜集經訓堂送徐尙之赴鹽山聯句六十四韻

合哉意未厭。青蒲王昶述庵分襟手先抗。高齋劇清虛。青蒲徐蔭坡簷林詞客盡凋萎。谷空懷駒維。常熟吳蔚光竹橋途遠感驪唱。聚散風搏沙。嘉興汪大經秋白去來塵堀堦。契緣耦居殷。秀水王復秋陸情用小別愴。令序際秋高。烏程張雀柴晴曦轉春

叠露華綴金莖無錫楊芬霞彩豁蓬閭武進余書淒淒螿語瑩荷衰香未銷昶蒼折霰徐颺

景物逼蕭森坡河山攬悲壯黃騰潞水坡光碧剷雁門嶂霽久罕塗泥大涼深絕炎炕選勝景彌佳復追

歡神頗王叢談翦韓檠形促坐列歐舫臭合味逾蘭燦言温挾同纒矧予本愚蠢受書入世豈冗長秀是江

東推昶美非城北讓舊家鐵甕隣坡新製玉臺賦慘綠雖少年光中黃等飛將一噴真一醒大十決還十

盪摩霄鵬壁雲復橫海鯨跋浪門庭得真傳形臺閣肯依樣賦臍西都賓燦碑考北海相問宇喜春容受書

說經嘉硜伉文思聿深湛昶志性乃慈諒棲鴿類乾邕坡食暮侶張暢獨行衆所推光浮榮視猶儻會看

彙吉征大寧復軫駁放應起曲江名復遂侍舍元仗今春辭蘭陵形上計過督亢始至賃皋廡燦繼遷依

釋藏時寓永樂禪院崎士偕許渾謂許介山書受經師服戴望謂錢獻之步趨蛩後先昶賡和禽頡頏名流爭攬環坡上客互

投狀論心恨已遲光識面既非妄譚菽抉其精大道古敦所尙相期彼岸登復庶幾我軍張茲違鄴下遊

形聊作剡溪訪詎憂邁靡靡燦終覺思養養咄嗟煩官廚受書葱卒辦祖帳餽童飭招邀昶竈婢竟拊擋瑣

浮雀舌茶坡壘撥松花釀蟹熟莖以薑光豚蒸濡用醬薑菹發宿儲大餅餽詫新剏銜杯笑正酣復投箸

神忽往襟被幸同攜時與錢魯思偕行春糧誰見餉瑯嬛書百函燦殼棘車一兩杳杳雁銜蘆受書勞勞獸走壙游

目乍依依昶回首定悵悵青垂梨半林坡紅綻棗一桁縣僻夷邨虛光邑巖置亭障童山屹有稜大鹵井

寒無漲旅程頓羸驂復甥館卸輕裘哦松訴合離形詠絮寄醺唱時尙之舅為鹽山佩莢席上分燦鈴鞫

籬邊傍時未怨蹉跎。書受趣方適閒曠。鹿鳴芳訊傳。視鯉躍層津上。一舉快先登。坡三捷驚輩行。士拭出龍泉。蔚光葉穿開虎韉。銀榜著聲華。大經月燈展諸鬯。還過白楮坊。復再躡黑窰廠。須傾榼三升。形重着屐幾緡。刻羽停郢謳。芬燦斲輪待齊匠。摳衣復升堂。書受毋畏俗人謗。視

### 林如璋

本姓趙。字宗孟。號秋吟。青浦人。諸生。

#### 春暮有感和韻

滿天風露下西樓。叢桂香消近晚秋。寶帳夜寒鴛鴦夢。一彎明月照離愁。

#### 和村居雜詠

淮南風味總清幽。香霰霏微撲玉鉤。五夜月華涼似水。幾枝分得廣寒秋。黃雪廊  
鼻觀微參色相空。涼生蘋末滿亭風。一雙白鷺衝烟去。花北花南返照紅。妙香亭  
阻風中酒滯關河。廿載星霜一刹那。此夜挑鐙聽烟雨。芭蕉窗外種來多。話雨篷

### 高景光

字自柏。元和人。諸生。有夢草書堂詩鈔。

同顧丈祿百繆學山沈欽伯錢曉徵褚左義曹來殷張策時過滄浪亭

蠟屐穿林楓乍黃。碧雲斜捲遠山蒼。野塘水漾娟娟綠。叢桂風飄細細香。詩比樂天還澹宕。人如杜牧更清狂。何當一棹胥江月。共醉溪南籬菊旁。

重九前一日遲王鳳喈蘭泉不至

細雨斜風冷竹妝。故園蕭颯又重陽。織簾空有登高約。時宗伯師招遊靈巖送酒曾無縮地方。獨對黃華披白帽。漫調紫蟹擣紅薑。不知明月吳山頂。放筆題糕若個狂。

天津雜詠投查蓮坡先生

落華新釀燕泥香。煙樹參差碧水鄉。十里津橋閒騁望。雲颿江店小金閻。  
淡紅細雨桃花寺。嫩綠芳塘楊柳青。髣髴湖天晚景好。夕陽樓閣影亭亭。桃花寺楊柳青俱地名  
枝頭小鳥弄笙簧。油壁香車插野棠。記取蹋青城外路。綠陰如幄巨家莊。巨無霸故里  
玉壺春酒不須賒。月上海棠映碧紗。宴罷客歸剛夜半。雙鬢低按小梅花。



此页空白

# 湖海詩傳卷十九

## 陶璉

字夏重。嘉興人。貢生。有東籬詩鈔。

蒲褐山房詩話。夏重爲同年進士。汪銍之子。天才英異。風發泉湧。而筆之所至。皆合於規矩。常隨予至江西。言詩譚藝。頗有牙曠之知。五言如黃花三徑。雨紅葉一江。風落花驚蝶夢。香遲倦蜂遊。江聲春雨漲。雲氣曉嵐蒸。墨雲千嶂晚。酥雨一帆春。七言如梅花數點春。如許月色三分夜。未央溪雨漸霽。菱葉潤野風。微動稻花香。把酒但將杯送老。工書苦被墨磨人。掃花徑待葉僧過。種柳門容釣伴敲。皆雅令可調。其後客死蕪湖。詩卷零落。卽浙西人亦罕有知者。

## 簡王秋塍

籬門掩柳下。林屋隔竹西。赫日馳角里。火雲升韭溪。誰能觸熱行。襍穢相攀躋。蘊隆旱太甚。桔槔病夏畦。晝夜無停辛。骨瘦面亦黧。吾儕澹無事。草堂耽幽棲。高枕北窗下。涼風和天倪。綠林藹交布。晝靜蟬聲嘶。鄰曲來問字。水亭壺相提。樂飲拚一醉。百事慵如嵇。靜言思村農。相形隔雲泥。逸勞各隨分。物我安可齊。玩時古所戒。深恐遭訶詆。念子勤著述。足不出庭蹊。守冊愆舊約。擘牋寄新題。爛然披雲錦。眼膜開金鑿。何當炎曦收。暘谷來靈霓。頓作雨人雨。爽氣浮花堤。田苗勃然興。豐沃蘇羣黎。穀賤酒更醞。近局還招攜。

## 從姑山

天柱一峯懸。鐵關兩石夾。勝引青竹兜。爽含白羅袷。出郭游伴侶。渡楫吟懷洽。從姑亦仙姿。窈窕開妝匣。畫眉黛自濃。擁髻花猶插。不禁藁夫侵。屢遭酒人狎。古洞白蝠翻。堯峰青鼇壓。葛捫滴翠崖。藤挽留雲峽。拔地萬仞高。窺天一綫狹。玉子空紋楸。石梁架嵒巖。千門縮如蝸。二水清似雪。往昔此幽棲。築室共白業。白業書堂名。明羅公汝芳與諸生講學處。紫雲冒巖阿。綠雪映簾押。縱近無諍居。肯參上乘法。數椽足藏修。歷代幾遭劫。戀枝病蟬吟。遵渚羈鴻喙。米顛興已偏。許掾濟無怯。吾將卜前峰。誅茅荷松鋤。

題王述庵先生三泖漁莊圖二十四韻

湛湛三泖流。歷歷九峯頂。蒼石走檣竿。青水浴塔影。斜岸掠燕乙。圓波躍魚丙。林塘沙灣灣。茆宇牕問問。占此雲水區。何必羨箕穎。公乃澹蕩人。蚤歲登臺省。豈惟文翰雄。又覩勳績炳。通家屬猶子。造謁無路請。昨公居倚廬。杜門塵事屏。所幸鴛水居。近接澱湖境。挈伴攜琴樽。時同種梅奉訪軋觴破萍苻。巨浸納支流。遙岑拱峻嶺。禮優屣倒塔。意重轄投井。深坐盎春和。劇談轉清警。榻來舊雲莊。披圖解煩惱。想倩畫史畫。天末戀鄉景。攜此行萬里。忙中一笑領。及茲三年淹。故園重可整。潮看黃歇回。宅與陸機並。居處村落偏。興趣江湖迴。春理釣鱸綸。秋放采蓴艇。舊夢今許償。暇日試游騁。爲問出岫雲。還山得孤永。漁唱晚風高。迴橈烟月冷。

登宜春臺

選勝在地偏。每從郭外訪。詎意囂塵中。崇臺得幽暢。書館幸爲隣。支筇時眺望。東攢雙箭峰。西疊白鶴嶂。其北袁京山。南有大小仰。連巖抱如城。昏旦非一狀。雜英紅已繁。秀江綠始漲。井閭起炊烟。散作晴雲颺。縹緲盪心胸。如在九霄上。衡黛潑空來。湘色遠相向。妙境畫所無。應接神亦王。題詠凡幾輩。溪山故無恙。如何帝子宮。住錫容梵放。斜陽弔荒祠。上有漢長沙定王祠。臨風獨惆悵。

昌山峽分宜縣西二十里

驅山山不行。截流鎖江面。巨靈劈嶄岳。神瀆肆噴漩。衝波石將崩。晴空雨倒濺。行看七聖迷。鑿待五丁遣。呀如石門闢。轄如鐵輪輾。鏗如舞劍騰。森如奮戟戰。吼如鎮巨鼇。譬如駭奔猿。欸如虎牙張。攫如龍爪罨。入坎坐於針。沿流引若綫。刺箭術少疎。觸罅禍立見。賴有忠信存。顧猶心膽顫。稽首閔城君。乞借東風使。

題任石民州丞春波浴硯圖

結茅在春波。敝居坊名守拙足文翰。橐筆走灌城。生涯餘破硯。與君托懿親。因之接文讌。君家名父子。能書仿羲獻。校錄各宣勤。先後就丞掾。久滯江右居。遠從粵西宦。剡藤持索繁。酬應無少間。墨汁魚飽吞。書幅鷺可換。磊落端溪林。一一羅几案。包裹涉關山。引用等英彥。昨君見星奔。扶櫬歸鄉閭。輕裝惟石存。痛定徐出玩。氣猶含烟雲。光若閃雷電。呼童梅溪上。一洗塵垢面。倩畫意故佳。自題書更擅。挾册索我詩。懷慙增感嘆。歲華久蹉跎。鬚髻漸衰變。吏情君本淡。遠遊我亦倦。何當載書舫。歸傍雙湖畔。安居守硯田。聯吟坐

石礪。

往觀砥柱山銘風阻不果

濁河天上來。截流聳峭嶒。常恐地軸翻。天險此鎖鑰。一柱眇孤撐。三門想舊鑿。險分人鬼神。要據伊渭洛。雷霆日喧豗。雹雨亂灑落。大哉神禹功。萬世賴疏淪。上鑄貞觀銘。書乃正字作。嗜古獨往觀。色沮風浪惡。縱然移我情。具舟不敢泊。宛似三神山。近輒風引卻。兩岸疑動搖。百怪畢騰躍。歸然峙中流。端凝神儼若。以之激頽波。孤高非僞托。問誰障狂瀾。對此色無怍。伊余探幽奇。緣慳阻芒屨。何當練平鋪。放艇款山脚。招攜同志朋。絕頂一歌嘍。開拓萬古胸。解衣共磅礴。險糜塗硬黃。剜剔試摹拓。裝池入篋衍。備載金石略。

九日同人登黃山

菊英初黃脫葉殷。城西咫尺浮邱山。浮邱仙人杳不見。空有白雲相往還。此地林壑多清迥。振衣長嘯登絕頂。東望羣峰晚翠攢。西俯萬里秋江靜。殘碑空記凌歊臺。當年歌舞安在哉。滿目蒼莽正躑躅。颯然疎雨天邊來。山人導我入香阜。疑是當年牧雞叟。天際哀鴻不可聞。籬根且醉茱萸酒。

水碓

先王制器民用公。耒耨之利歸畊農。杵臼以濟春人春。後世奇技逞私衷。機巧欲奪造化工。峻瀨百丈鳴懸淙。審曲面勢當其衝。打杵壘石亘若墉。安置水碓蒲葦叢。輪軸旋轉雨灑空。如鳥俯啄仍高狎。雲際呼

啞叫饑鴻。苦葢矮屋守一備。以水代足坐使慵。占據不許舟楫通。柁樓斜轉曲曲從。損人利己誰汝容。我行六月暑蘊隆。大江超漲勢正雄。盡遭潰決崩碕墜。剩有亂石堆橫縱。急溜如箭灣如弓。一失趨避無完脚。與衆方便心所同。上聞達宮幸勿壅。願爲禁令誠德濃。

聞澹川主講臺灣海東書院因寄以詩

吳郎好勇過季路。曩乘海舶遊閩間。載書又從廈門出。一針南指滄溟灣。鰲帆飄忽颺母惡。大洋五色波。漩滾橫槳高唱木華賦。立竿早見鳳卵山。凡歷幾更達鹿耳。廈門渡臺五百四十里外尙有十一更。赤嵌城郭疑仙寰。昨遭兇徒害官長。螳螂拒斧爭蝸蠻。虎豹奮威入狡窟。鯨鯢就戮除陰姦。方今承平慶海晏。脩文偃武民安閒。君坐皋比秉木鐸。琅琅大義開愚頑。風還淳古先禮讓。羣守矩矱無踰閑。誠知切要正心術。豈惟淹博矜辭嫻。想經鎔鑄出歐冶。早從繩墨歸輸般。我與鋤月聯講席。時余主講廣信種梅貴溪。來往未覺詩筒艱。況復山館近桑梓。鄉園歲暮行當還。問君何時遊亦倦。水村紅樹歸掩關。定多新詠紀靈怪。追談亦足開襟顏。

寄懷秋浦集杜

不見李生久。終朝獨爾思。窮愁應有作。來往亦無期。見酒須相憶。論文笑自知。蹉跎暮容色。吾道竟何之。別離驚節換。回首一茫茫。舊日重陽日。他鄉勝故鄉。王辰癸巳兩重陽與秋浦及故鄉諸子相聚南昌。故人亦流落。今我獨淒涼。歸路翻蕭颯。高歌淚數行。

艱難歸故里。秋色有餘悽。黃卷真如律。青雲不可梯。幾年遭鵬鳥。微分是醯雞。更欲投何處。飄飄愧老妻。  
世已疎儒素。生涯獨轉蓬。且持蠡測海。真作鳥窺籠。徑欲依劉表。逢人問孔融。尺書前日至。鵲噪舊愁空。  
重陽後一日。  
得利浦書。

示諸生

瑟瑟秋林澹夕曛。桂花如霰落紛紛。徘徊破甑原無益。嘆息炊桐竟不聞。市上璧人誇衛玠。山中風漢笑  
劉蕡。雞蟲得失尋常事。珍重他年玉笈文。  
往事蹉跎悔莫償。天涯萍梗惜流光。袁京高隱山猶在。盧肇能文墓已荒。入世翻同蟲食蓼。著書笑比鼠  
銜薑。偶存吟卷疎蕪甚。枉費傳抄篋衍藏。

沈帶湖吏部乞養旋里正月八日招同人宴集

蘭陔日暖綵衣新。通籍金閨早乞身。韋況辭官歸故里。茅容款客見娛親。竹間近局猶燒笋。湖上春粳已  
召鱗。不厭梅花清共嚼。還從舫閣對吾真。

題魏仲先處士草堂

花藏菊繞陝東郊。洞口烟霞舊結茅。父子名同高士傳。公侯禮下布衣交。音流綠綺魚曾出。節抱幽篁籜  
尚苞。剩有虛堂風月在。英靈肯被北山嘲。

弋陽道中次澹思韻

一灣一灣復一灣。一灘一灘復一灘。灘高灣曲舟行緩。看盡春江多少山。

寄內

風摧庭樹隔江雲。腸斷烏啼夜不聞。老去更無兒在膝。惟君憐我我憐君。

張棟

字鴻勳。震澤人。貢生。有看雲吟稿。

蒲褐山房詩話。鴻勳情性和藹。工于山水。行勝所至。羣訂縞紵之交。浪跡江湖者三十餘年。惜無所就。詩卷甚多。不無疵累。今摘取十餘首。不啻細葛含風。輕羅疊雪。五言如客至驚啼鳥。人歸踏落花。山靜餘寒燒。潭空響夜漁。雨聲寒古屋。雲氣薄秋山。水流隨客遠。花落閉門深。花邊留客雨。柳外落帆風。七言如流水聲中停客舫。夕陽影裏挂漁罾。黃花香澹秋光老。落葉聲多夜氣清。落日澹含千嶂雨。斜風寒送一帆烟。香鳥喚人驚午枕。飛花隨夢繞春江。空山落木散秋影。孤館月生夜涼樵子歸。來花壓擔。漁扉開處竹連村。樹裏千燈銀錯落。花間雙管玉參差。魚穿花影驚初定。鳥亂松聲聽不分。所謂詩中有畫。然亦有畫不到處。

月下偶成呈茅大心友

心淡隨所適。移步臨清池。暝色花間來。露氣盈前墀。依依楊柳月。正上城闔時。涼生衣袂薄。吟侶還相期。

移居

真似羅含宅。當塔植幾枝。人歸花落後。夢斷月明時。別自開三逕。相將盡一卮。暫憑幽絕境。稍解故園思。



西齋小景爲蘭叔克軒作

共有詩情在。茅亭一逕幽。青山成小別。黃葉亂深秋。自得蕭閑趣。何來羈旅愁。月明同一醉。却勝對眠鷗。

夜吟寄繭庭諸人

日常柳外聽啼鶯。塵事茫茫靜不驚。花爲故人留一樹。夢隨春雨到三更。不知醉後蝦鬚捲。但覺吟殘豹髓明。彼美不來魂欲斷。隔溪猶聽讀書聲。

游宏濟寺用壁間韻

滿江波浪暫停船。曲磴盤紆此地偏。雲外峰巒千仞出。風前樓閣半空懸。老僧入定聽鐘起。閑客忘機枕石眠。惆悵昔人遺蹟在。淹留翻作勝游緣。

過磐石庵與陳上舍叔度話舊

不緣聽法過祇園。落落惟君傲骨存。盡引山光歸小閣。旋移花影入清樽。功名謝掾何曾早。聲譽張丞枉自喧。且喜時來豁襟抱。滄溟萬里任鵬騫。

揚州

十里春風郭外樓。更無狂客醉揚州。欲知小杜傷心處。明月紅橋夜夜愁。管絃清脆幾曾停。春向人間醉復醒。何用更尋歌板地。鶯聲啼老竹西亭。

莊寶書

字然乙。武進人。監生。由四庫全書館議敘。官聊城縣丞。

蒲褐山房詩話。然乙詩。取裁大歷。十子。淺而實深。薄而能厚。置之錢郎。問了無差。別少困名場。壯爲下吏。而清和閑雅。一唱三歎。絕異于詞壁。問天縛船送鬼者。

晚步環碧齋用太白廬山東林寺韻

幽賞日將暝。頽雲下城闕。遠引脩竹風。漸露松梢月。濕翠滿林塘。烟靄雨初歇。境淨可沁心。夕涼快散髮。忽聞隣笛吹。螢火草際沒。

湘江夜月

日落山翠橫。空江夜氣白。回首秋浦深。已上沙頭月。涼露裊衣襟。微風起天末。不聞人語聲。溲沈叫孤鶻。

泊江村

晚翠橫煙渚。溪流直到門。寺鐘疎欲斷。秋水淨無痕。宿鷺擎人起。歸鴉集樹喧。隔江漁火上。繫纜又黃昏。

飛來寺

一角飛來寺。滿山松樹陰。鐘沉秋壑靜。門對峽江深。晚翠隣僧笠。歸雲野鶴心。何當謝塵鞅。長就遠公吟。

舟次燕子磯遊永濟寺

峭閣依巖壁。迴廊繞竹林。大江浮樹杪。斜日透蘿陰。雲過知禪意。泉流見道心。默公遺跡在。邱壑至今深。

曉行

薄霧曉濛濛。危坡仄徑通。雞鳴深樹裏。人語亂山中。宿雨喧秋澗。晴霜淨曉空。長征何日已。搔首歎飛蓬。

自貴定至沙坪宿

積雨秋原足。低雲晚岫屯。編籬重護稻。依樹小成村。澗響通泉脈。橋欹動石根。沙坪行未到。霧暗欲黃昏。

秋暮友蘭齋懷滇南兄弟

渺渺雲山路。相思萬里餘。楓鴉殘照亂。竹月夜窗虛。獨坐秋將老。孤懷睡亦疎。徘徊紙閣裏。吟罷一愁予。

落日

落日寒雲色。涼颼古樹聲。歸鴉爭寺宿。疲蹇近村鳴。撫恤經旬憊。災傷積歲成。此心不我盡。何以慰輿情。

寺一作墓  
歸一作亂

過大關

天然畫幃繪秋殘。黃葉丹楓馬上看。一徑林深迴鳥道。千重嶺複入龍盤。澗經山雨飛流急。濤帶松風落照寒。詰曲不知蒼磴滑。蜿蜒已上白雲端。

山城卽景

黃昏風靜雨聲聲。雨歇崇朝風又生。客意不禁頻冷暖。春光無賴半陰晴。烟含野樹歸雲濕。路入山城落

照明立馬高岡一回首。燕南江北總離情。

寄硯鋤

鐘聲敲徹柝聲沉。窗外寒蟾積雪深。謝草夢殘前日淚。梅花愁入故園心。幾絲白髮添離緒。如豆青燈伴苦吟。安得嵇琴彈一曲。與君對飲弄清音。

咏燈花次逋庵韵

星釭舒眼似窺人。長照尊前不夜春。結處自垂雙蕊暗。挑來又見一番新。碁敲漏靜閒中落。卷掩窗寒老更親。莫道相看頻報喜。淚珠坐對獨傷神。

題鼻亭五兄萬回草卽用集中見懷元韵

楚騷昨歲賦香籬。此日題詞慰客思。秋老悲歌燕市酒。春生殘夢謝家池。卅年薄宦貧如水。兩地重逢鬢各絲。一卷萬回千遍讀。剪燈殘雨漏聲遲。

楞伽峽

如此靈峰見亦稀。四圍寒翠逼人衣。奔泉倒捲出山頂。散作半江烟雨飛。

逋庵惠藕豆詩以謝之

感君同氣快論詩。惠我雲眉香滿卮。忽憶荷塘新雨後。豆棚閒話納涼時。

卽事

歲闌鄉思獨徘徊。酒醒衾寒客夢回。夜半小齋燈火滅。月光映雪上窗來。

查岐昌

字藥師。海寧人。諸生。有吳趨江上諸集。

蒲褐山房詩話。藥師爲初白先生孫。初白卒久。之未葬。藥師至京師。欲期麥舟之助。而無有應者。蔣石與余作書致盧雅雨。運使所以資之者頗厚。會藥師歸家大病。盡斥其貲。喪不克舉。未幾藥師亦卒。余常見其手抄詩文。凡四冊。詩句新異。而散體文尤有法度。今求之僅存詩數十番。餘已散佚矣。曾著巢經閣讀古記。亦俱失去。藥師句如村居云。澤國稻梁肥。鼠雀海天雲。雨混龍蛇寄。懷云寓言。急草王符論。捷徑應輸卜。式家觀荷云。何須解語能傾國。自喜居卑不染泥。春柳云。可知態好惟春。月羸得風流。是少年。皆有方寸五岳隱。然難平之槩。楊編修繩武題其卷云。筆力盤硬。正如陸魯望所謂穿穴險固。囚鎖怪。異。破碎陣敵者。信然。

游滄浪亭次用歐陽公集中韵。亭係商邱宋綿津先生重建。三韓吳中承繼葺。住僧元普繪成圖卷。吳中諸先輩率多題詠。

湖州長史行樂地。廬陵居士題詩篇。年深蹟往近誰主。風流雲散亭依然。城南徑曲步微仄。長松豐草相連環。香飄桂木挺森秀。蔭密野竹分清妍。有山有水與世遠。不郭忘囂喧。回頭鱗屋隔萬戶。霧非霧兮烟非烟。我來吳市六百日。咫尺欲躋尋無緣。乍逢清景墮空杳。小憩寧必非遊仙。蘇君當日不稱意。笑收風月吟觴邊。結廬何妨在人境。負郭矧有下溼田。至今北碕漁可釣。潑眼唾淥清而漣。曾聞池館後豪奪。剝業始自吳越錢。婆留孫盡申公死。跡與身滅疇垂憐。闡幽繼嫩開府賢。好事僧繪丹青天。留題人續

六一句。字字珠出。驪龍淵。青衫綠髻。奈嚮客。移牀曲尺。思借眠。異才蹭蹬有餘想。芳名蜚遞流他年。濯纓濯足。取適興。姓氏詎望當時傳。

### 忠孝王祠

風捲背江怒未平。歸然遺廟重羅城。業能覆楚何妨死。天欲亡吳厭此生。從古英雄皆落魄。一身忠孝獨完名。曲終小海腸應斷。疇向蘇臺絮酒傾。吳中有小海。曲爲伍子胥作。見晉書。

### 韓蘄王墓

在靈巖山。西。宋高宗御書元勳碑尙存。

靈巖峰色鬱葱龍。一代孤忠百代雄。古墓江山遺澤遠。高名日月勒碑崇。臣勞自欲籌三鎮。廟算何心復兩宮。差幸全身殊鄂國。虎林祠畔莫銘功。

### 曉渡太湖望洞庭諸山

萬頃湖光一棹開。東西浮出小蓬萊。烟汀露渚蒼茫外。篴唱漁謳浩蕩來。掛樹銅鉦從下上。踏波沙鳥任飛迴。一灣舊入雞豚社。應許儂家置釣臺。

### 金陵咏史

田舍翁誇漢業成。八紘咫尺壯圖并。諸兒却笑凡材劣。養子終令帝室傾。北府孤軍誰效死。南朝名士尙貪生。寄奴艸滿青衣散。剪落洪枝費史評。

碧天痕破半邊明。逐燕高飛勢已成。黃瓦兆占沙漠遠。金川事去禁城清。覺開一姓銷殘劫。禍起諸王擁重兵。痛憶文皇南下詔。同時羅織盡忠貞。

戊午秋客秦淮雜詩有流盡舊家簾幙影之句爲時傳誦近稿佚去重游悵然補綴成八首

烏衣名巷里名珂。夾岸亭臺貯翠蛾。流盡舊家簾幙影。秦淮依舊水如羅。亞字低闌護板橋。大航燈影已蕭條。游人不管南遷事。一樣興亡話六朝。玉樹金釵句極妍。丁丁新調試吳絃。袖中紅本都官伎。宮戲新呈燕子箋。市隱園中樂事稠。白門柳曲記眉樓。彥回少日眞名士。老去從人唱石頭。鴨毛新漲白鷗潭。激灩波紋皺淺藍。殘月曉風楊柳岸。詞人低唱憶江南。

斷煙零雨莫愁湖。樂府流傳此地無。邀得閒人來汎艇。紅衣散處引雙鳧。前輩題味多指莫愁爲金陵人。非是。按古樂府莫愁樂云。石城

女子名莫愁。善歌謠。石城在竟陵。其曲云。聞歡下揚州。相送楚山頭。莫愁在楚無疑。今石頭城下有莫愁湖。蓋因石城轉訛耳。湖上多荷花。故云。

柳翠梅妍十六樓。任他蕭寂亦良遊。顛花殢酒生來嬾。身是當年許散愁。北齊書許散愁。自少不登。嬰童之牀不入季女之室。百花洲畔蹟全蕪。聞說天開似畫圖。桃粲一枝隨鏡轉。教人回首憶西湖。馬光祖青溪園舊有百花洲。天

廢。

古鏡聯句

訪古黃金臺。贈我青銅片。時維元年冬。客自寶雞縣。錢宵來紫珍夢。影落平江甸。寒芒朝發匳。諦視予甚

弁。昌規箴當金人。位置儕鐵硯。一錢局未遭。不老名難擅。載幽幽懸秋水。的的出雲翬。頗疑雷墨鸞。奚類

火齊現。昌背隱雙魚鱗。濤翠鼓涵涎。載周以百羅紋。蝕垢起微綫。昌徑量壁肉倍。輪轉砂斑徧。載端正塵

蒙心。殷鮮血摸面。昌橫貫一道虹。碎剪半江練。載兩三點積鮮。瀉漉痕染黠。昌葬殉誰代娥。耕出某原竊。

載拭非元錫粉。摩詎白旃碾。昌哉生桂礙魄。日消雪遲睨。載黓然鬼物庭。芴若雨飄變。昌雖虛晉曠題。定

入李唐院。載儻溪照骨淪。漢祖辟邪遶。昌陳倉土還漬。吳媠妝應眄。載獨怪金水清。不以蕩花炫。昌危微

炯千秋。慘澹經百鍊。神為形影釋。龍奈元黃戰。載時事儘糊塗。爾疾方瞑眩。空靈聽生明。衆止靜澈鑒。昌

要令羣有涵。庶亟本來繕。載名休惡圓卿。品可登白選。昌鐵兮荀諷家。方者仁壽殿。載逐熱史擲奇。知來

僧幻術。昌鐘形劍鼎鑄。六鼻雲烟纏。載冥搜軒轅制。博採乙陰傳。魚目防溷投。贗器肯同薦。昌臺慳石綠

寶囊斥繡文。絢但足寫臞顏。何如影盛髻。載蛾眉新倒暈。肝膽兩灼見。昌獲君筆洗薶。手換吾能先。載物

歸但有數。巧取得毋羨。昌明水寒試承。壽光久堪戀。載古貌驚菰蘆。冷風相騰旋。昌

### 徐堅

字孝先。號友竹。吳縣人。貢生。有《覲園詩鈔》。

蒲褐山房詩話友竹襟情高曠。所居光福里。是梅花最深處。工隸書。喜篆刻。尤長山水。幾人畫臺之。是以四方節鎮皆思羅而致之。然性不妄交。非所好者不屑就也。先至長安。在畢秋帆幕府。已而



游楚南。依陸朋夫者二年。時朋夫病且貧。恆有每食無魚之嘆。而友竹盤桓不忍去。至護其喪而歸。世因此益重焉。年至八十餘。乃卒。所刻親園詩八卷。多清雋之旨。句如山靜傳齋。馨林疎出茗烟。燕歸新雨。後人去落花前。門低深隱樹。徑仄偏生苔。鐘磬諸天近。松篁列嶂開。雷殷遠山將送雨。江深高閣欲成秋。孤城背嶺千家暝。萬派朝宗二水分。蕩漾舟行明鏡裏。往來人在畫屏中。鳥啼深樹初催麥。雨散低簷正熟梅。山澤之臞。往往吟諷不能置云。

登六浮閣

向晚巒氣清。浮陰散虛閣。忘言坐永日。冲襟入寥廓。竹深新粉香。林靜殘花落。隔塢踏歌來。歸逢人采藥。

題畫

湖上幽棲好。深林靜掩門。蒹葭秋水岸。楓柏夕陽邨。寂歷遠塵境。蕭條無世喧。一椽容小隱。吾欲傍東垣。

咏柳

輕陰漠漠釀輕寒。九十春光一晌闌。玉勒驕嘶人欲去。金衣巧囀夢初殘。枝抽半股憐連理。結綰同心記合歡。莫問灞橋芳草岸。人間隨處別離難。

有客攀條感舊遊。依然風景畫橋頭。青帘沾酒烟中市。銀甲調箏水上樓。不是別離常帶恨。縱非風雨也關愁。那堪玉露凋傷後。落葉哀蟬咽暮秋。

將赴廣陵喜晤桐江於虎邱舟次遂邀過山齋徧歷諸勝詩以紀之

白公隄上柳垂絲。乍喜逢君折一枝。細雨低篷今夕夢。浮雲流水廿年期。此生媿負師門重。往事愁聞世

路歧笑指西南山。色好不妨歸櫂且遲遲。

聞鴈有感

塞北天南渺我思。一行久已歎差池。何如飄泊江湖日。猶有羣飛共啄時。

黃之紀

字星巖江寧人。監生。有編綠堂詩。

蒲褐山房詩話。星巖喜爲詩文。讀書多別解。常論石奮。非其奏姊鼓琴論李廣。非其誘殺降羌。及斬霸陵尉。皆有特見。詩與宋范陸爲近。如塔聲始知山有寺。鳥喧方覺樹藏巢。竈馬方隨司命至。土牛先傍縣官回。斜竹拂檐風力勁。明流當檻月光重。好花每喜銜杯賞。明月還思滅燭看。身壯喜無經日病。家貧只備隔宵糧。皆佳句也。

白沙泉修禊

夜雲斂孤岑。曉鳥喧叢樹。問此是何時。童僕告春暮。勿羨車馬安。尋幽愛緩步。無入不自得。所賴行吾素。出郭謁蔡祠。松柏繞其墓。絲竹發松間。音隨風來去。沙泉清且漣。掬之濯杯具。旣醉相枕眠。陶然忘禮數。絳桃紅四山。草花迷歸路。生理不可遏。靜觀發天趣。

重過隨園

江南四月艸淒淒。重過倉山路欲迷。舊犬識人眠不吠。新鶯迎我坐頻啼。竹高未及藏茅屋。水長才能上柳堤。獨訝蓮花及蓮葉。春來長過板橋西。

薛龍光

字少文。上海人。諸生。有玉屏山房詩選。

馬遠畫松歌爲晴川趙丈賦

虛堂倏忽驅豐隆。驚看破壁飛虬龍。蕩雲瀟霧怪石裂。昂頭跋尾擎虛空。坐久始覺五鬣露。是誰筆墨追天工。南宋畫史數扶風。欽山能事尤稱雄。韋偃畢宏誰比數。撐空突兀驚洪濛。想其磅礴當經營。意匠慘淡精誠通。鬼神雷雨助筆鋒。霜皮鐵幹無春容。松根對弈坐二叟。服食松子方兩瞳。倥傯之屬無乃是。彷彿疑有雲車從。丈人七十顏猶童。雲烟供養盤心胸。南榮曝背計亦得。是人是畫將毋同。吾生學仙慕陶公。愛聽萬壑鳴松風。天都華頂行汗漫。仙山靈藥有時逢。會須一食毛羽豐。更千萬載無終窮。日夕來伴蒼髯翁。

題鍾鶴汀古錢譜

粵聖備物利民用。五幣三品遙相沿。赤珠禹玉不易致。人間所便惟刀泉。歷山莊山製已失。有周九府規始圓。其徑一寸銖十二。參用李奇顧烜說函方象地圓從天。自從景王更鑄後。後世變轉如雲烟。五銖八銖踵半兩。當十當百還當千。孝武銀幣出新意。橢龜矩馬規龍纏。契刀錯刀兼十布。新莽壓勝空尤愆。藕心螳鼻稱號異。鶴鳳鵬雀紛翩翩。鉛鐵連錫太糅雜。荇葉鷺眼愁難穿。其利如刀流如水。窮漠絕域皆騰騫。幕爲

王后或彌勒。彎似半月或環連。或狀草木或牛象。或無輪孔或三旋。奇形異製難殫說。誰與好事羅諸編。  
顧生炬已亡封郎演逝。鍾君一錄繼廣川。廣川董道有錢譜廿年收羅過千品。破產不惜寒無氈。蕭齋坐臥番百

遍。如餐蛾綠屏腥羶。心摹手畫登竹素。務考歲月窮旁偏。正僞分列資論世。篆隸細悉刊長箋。邀我題詞  
書紙尾。余爲卓筆心茫然。天生五金各適用。范冶輕重爰相權。水旱緩急所時有。救災起滯通郊廛。誰使  
孔方劫一世。奔走萬類旋幽元。側聞天帝借二萬。癡牛坐是遷秋躔。傾身障簾宜無怪。舉却阿堵寧非顛。  
伊余硯田久蕪穢。囊中羞澀室罄懸。妄思十倍來笑鬼。鑿地一昔空留船。事見宋書五行志君平賣卜誰見過。  
元叔滿腹無人憐。嗟君不知權子母。持籌握算居千緡。古綠斑駁空自好。畫餅難用充杯捲。不如摒去早變  
計。好營廣宅并良田。君言人生各有分。賦受但看蛇藥眩。黃金如山成底用。閱人百世無留筌。卽如此錢  
更歷幾人代。人今盡化錢空傳。漫畫之鳥亦聊爾。銜薑之鼠無譏焉。曉來榆莢飛細雨。苔文蒼潤侵花磚。  
焚香盟巾一拂拭。古色疑起黃虞前。鐘牟敦鼎力難得。一櫛亦足充饑涎。顏瓢幸免太公乞。心怡目玩且  
忘年。公能惠好一回顧。杖頭尙有百箇青銅錢。

### 江村晚步

曳杖江村外。蒼茫欲暮天。蟬聲流遠樹。漁唱入秋烟。地僻軒車少。時豐社鼓闐。前溪明月好。更上櫂頭船。

### 送吳冲之之江西

十年吳越擅詩名，乘興潯陽更遠征。  
五老迎船空翠落，九江斜日亂流明。  
白沙秀竹津頭驛，畫棟珠簾水上城。  
聞說滕王高閣在，千秋詞賦待君賡。

書吳漢槎秋筭集後

赴洛才名動至尊，漫因謠詠泣鉗髡。  
長流不分同金齒，垂老方憐入玉門。  
窮海風沙孤戍恨，巾朝雨露故人恩。  
牢愁一卷千秋事，哀怨應從楚客論。

葉抱崧

字方宣，一字書農，南匯人。諸生。有《壺領山人集》。

蒲褐山房詩話：方宣爲葉忠節公應榴曾孫，少以雋才著于峯柳。吳中如吳企晉、曹來殷、趙升之、張策時、外方宣與劉跂、三薛、少文、陸重、齊名，惜其早卒，未底大成。

東平道中懷恆齋先生

渡河風日佳，繫纜沙草碧。  
微雲川上來，邨原澹將夕。  
潛魚泛修鱗，歸鳥戢倦翼。  
農人刈麥歸，腰鎌意恬適。  
去去感旅情，遙遙問荒驛。  
言念林棲人，焚香臥瑤席。

遊細林山

窈窕碧芙蓉，巖巒深幾重。  
斷霞明極浦，殘雪映高松。  
鶴下寒烟樹，僧歸野寺鐘。  
仙人綠玉杖，前路尙相逢。

晚晴

花下流鶯語。園林雨乍晴。松迎初月澹。雲傍遠山明。結習疎人事。閑居識物情。偶逢隣叟至。荷杖話春耕。

渡黃河

倚劍驚濤涌。揚舲落日懸。蛟龍春浴浪。風雨遠浮天。濁水長淮合。新堤巨石堅。安瀾終有慶。深賴睿謀全。

江村

江村謝人事。習靜讀書堂。殘雪在高樹。淡烟明夕陽。松陰雙鷺宿。竹外數花香。點檢南華論。蕭然已坐忘。

小查山閣

寒雲滿晴牕。焚香悟禪悅。竹外翠禽鳴。風搖一枝雪。

劉潢

字跛三。號西濤。吳縣人。諸生。有月纓山房玉樵山房諸集。

松陵泛舟

湖雲碧於烟。因風蕩爲水。漁磯傍垂楊。蟹舍沿叢葦。秋色垂虹來。蒼然滿中沚。漾舟信歸潮。默契濠梁旨。行當乞釣綸。泛宅長已矣。

不得曹習庵消息

遊子不遑息。故人空復情。關門一夜雨。橫笛起秋聲。迢遞江南夢。崎嶇塞北行。相思不相見。楊柳暮愁生。

宿西山閣

客枕疑風雨。蕭騷夢不成。誰知幽閣夜。月裏聽泉聲。鶴影空潭靜。桐花曉露清。披襟一長嘯。無事濯塵纓。

晚步和王岡陵

暫此息塵鞅。言追清曠遊。商聲凋木葉。暝色上汀洲。缺月依橋斷。孤雲背郭流。十年湖海氣。牢落半沉浮。

感舊絕句

寶鈿銀箏客夢殘。流鶯無復語雕闌。東風不鎖棠梨怨。一枕瀟瀟暮雨寒。

吳門楊柳枝辭和王蘭泉

春到河橋翠欲流。麴塵初起颺芳洲。瀟瀟昨夜江潭雨。散作吳宮一片愁。漠漠輕陰小苑西。春風依約杜鵑啼。殘紅流水桃花塢。一帶湘簾捲未齊。采香欲動木蘭舟。淺白長紅付亂流。見說東風吹不斷。絲絲綰恨上高樓。

金獅

字振之。仁和人。監生。官山東鹽場大使。有香涇詩鈔。

水仙花分得機字

春雪壓簷水生骨。東園桃李花未發。水仙有意凌莫寒。素影朦朧漾殘月。我因花事增嘆嗟。烟浪微茫夢

飛越金支翠旗光有無。貝闕珠宮影明滅。水夷擊鼓急響停。湘妃奏曲繁聲歇。彼姝者子六銖衣。微步生塵見羅襪。花魂咫尺洵有靈。一點冰心慰寥闊。憶昔嘉種羅華堂。分箋共逞生花筆。名並三閩六瓣奇。哲兄得句真清絕。名與三閩並。香惟六瓣奇。先兄水仙花句也。同君解佩返瑤京。石上菖蒲空九節。欲吟楚些歌。大招新詩誰補。湘纍缺。先兄詩曾言及此。故云。杜蘅芳芷眼迷離。物是人非那忍說。仙漿未飲熱中腸。聊取寒泉薦清潔。梅兄攀弟。倘相攜。應到蓬萊水雲窟。

陸藻

字江坪。昆明人。諸生。有鏡碧山房稿。

七月宿近華浦

秋水樓上樓。四圍碧波掩。層雲上樓來。日薄太華崦。疎林杳靄間。風葉參差颭。餘霞散空明。偶見金鱗閃。暝色忽蒼涼。漁燈出蘆葦。遠鴉濃似墨。青蘚平於毯。天然圖畫中。永夕臥游覽。斗室如舟虛。寸心臨水澹。昔賢清妙語。每出自遷貶。茲乃游滄洲。怡悅吾何慊。遠山崔以巍。傑閣煥且儼。行持一指禪。何有萬緣感。鼻觀暗香生。瓶花放菡萏。

陸藝

字樹人。昆明人。諸生。有漱亭集。



蒲褐山房詩話樹人以武將世家。耽心細素。與其兄藻對牀。風雨翰墨共娛。江坪人工詩。樹人兼能畫。瀕人目為二難。陳大令文燦而外。莫能及也。余去演時。江坪以百韻詩見贈。而樹人又仿烏目山人作風雨送行圖。極工。其漱亭集中。如亂鴉翻夕照。一犬吠孤村。野水明殘照。村墟入暮烟。碧草前溪路。斜陽遠寺鐘。俱極清雅。

懷貽堂

三疊陽關動客愁。送君無計暫羈留。寒燈情話堪通夜。暮雨離懷又到秋。南國尊前裁別賦。西風江上憶行舟。相思何處難回首。一桁垂楊舊酒樓。

碧雞關別華貽堂

碧曉西望影離離。半拂斜陽賣酒旗。莫向春風三弄笛。官橋烟柳不成絲。

題畫

槿籬竹逕亦恬如。知是幽人此結廬。無數亂山青不斷。水光雲影捲簾初。

涂逢豫

字長卿。上元人。諸生。有林於閣詩鈔。

蒲褐山房詩話。長卿居莫愁桃葉間。少入秦淮文社。才情旖旎。為世所推。故吳中楊文叔編修謂清詞麗句。皆然。情深。溯源六朝。得其津筏。天台侯嘉繙。謂寫幽思于胎禽。寄遙情於孔雀。雖覓諧其賦。手雕龍隱作文心。蓋諸名士。傾賞如此。然中年早卒。所存無幾。

待友擬孟襄陽

山雲間秋樹。江波生石髮。抱琴不終彈。日莫幽思發。嫩人夕未來。無言對林樾。鹿門舊隱跡。風流今已歇。我友天機靜。撫景興飛越。清露桐陰疎。翹首見明月。

### 江春

字穎長。號鶴亭。歙縣人。揚州籍諸生。後以總理鹽務。賜內務府奉宸苑卿。加至布政使銜。有讀書樓詩集。

蒲褐山房詩話。江都自馬氏日瑄兄弟外。能讀書好客者。推江鶴亭。城東高阜名康山。相傳是對山遺積。葺之以奉宸游。又館人學子於家。及卒刻其學福齋詩集。其好事不多得也。

### 靈錫泉

東國神僧蹟。溪傳靈錫泉。緣塔蒼蘚滑。掃石翠雲鮮。香雨諸天洒。梅林一道穿。清風發幽籟。心賞自泠然。

### 新月

三五稱佳夕。清暉自昔聞。今看新月早。已覺夜光分。無力穿疎幔。如鉤隱暮雲。卻憐牆角上。花影欲紛紛。

### 毛大瀛

字又萇。號海客。寶山人。諸生。由四庫館議敘。官簡州知州。勦賊殉難。贈

### 楓橋夜泊

停橈古楓橋。夜涼氣超忽。蓬窗風露寒。孤坐自清絕。寒山來鐘鼓。遠火明水驛。秋空清籟虛。星漢澹將沒。

一聲烏鶯啼。月落懷天末。

歸舟夜渡楊子江同施冠三作

一片長江水。東流送六朝。烟低京口樹。月湧海門潮。倦客逢搖落。孤舟話寂寥。何當謝塵坱。分宅住金焦。

贈內

篝燈佐讀苦相依。太息黔婁百事非。豈有雄文傳狗監。空勞清淚滴牛衣。釵荆裙布家風冷。麥飯葱湯活計微。他日鹿門歸舊約。絲緡共理釣魚磯。

春草

嫩葉茸茸奈爾何。江南春暮亂鶯多。東風舊恨述青塚。南浦閑愁暗綠波。擁砌晴鋪苔徑沒。成茵輒送馬蹄過。芳馨縱被陽和澤。未許高松覆女蘿。

陸授詩

字蒼雅。嘉定人。諸生。

蒲褐山房詩話。蒼雅美丰姿。性聰穎。能詩。旁及音律。刺繡。飲膳。無不工巧。絕倫。尤長于畫。未及三十而歿。弟遵書。別見于後。

題畫

樹彫秋已深。山近風尤勁。夕照下亭西。照見飛鳧影。

山樵徑

無山城爲山環堞。饒景色。日暮採樵歸。擔影林中識。

登燕子磯歸舟爲雨所阻贈老僧

江風吹雲雲捲飛。江風吹雨避僧扉。一聲鐘動石欲落。半顛稽首禮白衣。

此  
页  
空  
白

# 湖海詩傳卷二十

盛百二

字秦川。號柚堂。秀水人。乾隆二十一年舉人。官淄川知縣。有皆山閣詩集。

蒲褐山房詩話：秦川世家科第。覃思詞章。兼耽經誼。所著尙書釋天。雖未精通。推步而星躔日軌。多所發明。晚主山東蕪城書院。所學益深。詩宗小長蘆。亦抒寫自如。異乎世之塗澤者。

題柚

先府君令龍川時。官舍東西齋。各有柚一樹。東樹瓢微紅。西樹瓢白而微碧。味更勝。爲邑中冠。予攜核以歸。種之堂北。十七年不花。丁丑春。余入長安。其歲始花。垂實六且大。味亦不減於粵。十月歸里。見餘果二。一投瓜田。徵君張丈。張丈繪圖題詩。并爲說以贈。又以其一。竝徵君說。呈於司寇香樹先生。先生亦題詩。又別爲圖。竝書詩與說。彙成卷。屬百二題詩於左。作吾鄉嘉話。俾後之志物產者有取焉。

淮海惟揚州。厥貢兼橘柚。柚實橘之魁。體壯壓橙棗。榮讓桃李先。凋與松柏後。殿春花始敷。入夏子乃逗。晚秋色懸金。流芬入清醜。擘之滑飢膺。剖處循理腠。液解步兵醒。殼已督郵嗽。名雖雲夢同。味則交廣厚。憶昨鯉庭趨。齒方陸績幼。臨窗對嘉樹。垂實滿涼囿。素中含碎玉。甘裏醞重酎。品第一城推。風聲鄰邑購。

自從歸五湖。此味不可復。初疑物性遷。或謂書傳謬。非無閩舶傳。中乾皮外皺。幸有懷核存。種之北當雷。葦甲油然而。扶疎忽爾茂。雪壓霜更欺。幹挺直不仆。彈指十七年。濃陰空自覆。竊慮化爲條。爾雅。柚條疏。云。柚一名條。案此則終南有條。亦私心默自祐。去年長安遊。歸及日在豸。開軒觀碩果。狂喜繞庭走。喧然動里閭。求者爭輻輳。應接若不遑。強索或遭詬。好事瓜田翁。揮圖寫償售。深情猶未已。著說白司寇。胡盧竊自嗤。彫飾竟忘陋。篇章敵華袞。珠玉耀圭竇。他平光志乘。紀歲在丁戊。遭逢柚亦榮。千古一時姤。不羨同瑤琨。包貢錫夏后。

畫魚歌贈江陵尋源子

尋源先生工畫馬。奔走龍媒來筆下。先生畫馬復畫魚。筆迹殆過徐子虛。無端滿室動寒碧。鼓鬣揚鬣紛絡繹。桃花潭水百丈深。掉尾跳波拋玉尺。一魚前導來堂堂。羣魚連貫如雁行。小魚戢戢自成隊。靜依萍藻含風涼。雙雙健鯽更堪愛。險喙响沫宛相對。不憂鉤餌近鮮鱗。信爾行遊總無礙。殊形盡態勢莫同。墨所到處天然工。世人刻劃太癡絕。真意乃在模餽中。炎天盤礴僧房裏。揮灑終朝數番紙。須知託興良有以。想見先生心若水。縱然別幅寫驂騑。寫爲千金售燕市。

題王述庵先生三泖漁莊四時圖卽用畱別

昔年曾作葺城客。三泖扁舟趁潮汐。九峯天際浮青嵐。一片波連海雲白。陰晴變態已熟嘗。寒暄景物隨

所適。東風三月。千花明。春水玻璃萬重碧。礮車發墨龍掉尾。雨腳騰空如曳帛。清宵放艇。櫓嘔啞。皎月冰壺。涵素壁。有時飛雪灑寒村。草閣茅檐。遮羃屨。佘山庫公堪指點。孤塔中懸水精域。述庵家在圓泖東。兼葭想象伊人宅。十載神交識姓名。悵望烟波。睽咫尺。榻來傾蓋人海中。氣誼交情等金石。借書喜近春明坊。問字相從數晨夕。蕭然時有出塵心。鳳閣螭坳聊寄迹。三泖披圖認舊莊。漁艇漁竿猶歷歷。自言準著遂初衣。家山暫作三年隔。吳儂本住五湖濱。一水相通情脈脈。連歲長安苦滯淫。今朝穩挂南歸席。何年相約共往還。借我漁莊船一隻。

魯城東南六七里有石人二。皆西向。一鑄缺二字。省志作棠縣志作藁冢。一樂安太守廡君缺二字。志作一鑄府門缺二字。志作之

卒。皆在紳下孔君蒞谷揚以寄贈賦詩答之

辭漢金人淚。暗滴何處摩挲歎銅狄。歸然不見魯靈光。一例西風吹瓦礫。石人乃得全天年。偶立千秋古道邊。樂安太守爾誰是。姓氏猶在名無傳。古道離離遍禾黍。但向斜陽日延佇。千呼萬喚不寫回。忍覩蓬萊變塵土。日暄雨洗換年光。碧蘚紅蘿作繡裳。紙錢飛散白蝴蝶。寒食何人澆酒漿。斲冰詞客好事者。獨往驅車弔原野。古隸龍文揚寄來。翠墨寒濤我心寫。宇文石鼓等兒孫。苦縣光和是弟昆。遙知月冷清霜夜。石人相對語精魂。

### 望君山



雲夢向會足芥胸。真令汗漫笑吳儂。不辭楚塞三千里。來看君山十二峯。馥郁微聞動蘭芷。徘徊空憶採芙蓉。長風忽引孤帆轉。興入蒼梧翠萬重。

三十六灣

嫋嫋江邊蘆荻風。蘭舟連夜發湘東。笛聲三十六灣月。誰念當時白石翁。夜深吹笛移船去。三十六灣秋月明。姜堯章寄湘陰蕭千巖句。

也。不知何時。訛為許丁卯。而長沙志亦仍其謬。

將之揚州夜過平望作

江豚吹浪夢還驚。來去三湘萬里程。却喜櫻桃湖外月。今宵猶作故鄉明。楊誠齋平望詩。櫻桃湖也。

一霎輕帆趁曉風。中流歌嘯自從容。江神有約勞相詩。要聽金焦兩寺鐘。

朱雲駿

字逸涓。金匱人。乾隆二十一年舉人。官隆昌知縣。有詩九種。統為畫莊類稿。

蒲褐山房詩話。予自黔至蜀。路過隆昌。夜宿官齋。逸涓篝燈置酒。出示其積畫。蘆芽諸集。其詩冲和嫺雅。不惟牧令中無此人。即梁溪諸君子亦無能京駕也。句如：薄醉易消鄉夢後。殘陽正擁亂峯間。蘆芽過雨添新綠。蔬甲迎秋綴嫩涼。白石清泉寫韻紅。花翠篠眼增明白飯青。蜀衝雨客烏絲紅袖落花天。皆清麗。羊眠或謂其如姚武功。梅都官。殆未然也。

春日游讀書山懷元遺山先生

春烟澹欲流。禽聲導客往。山行曲愈好。步窘勢轉上。徑斷溪橫橋。冰消水平掌。澗瀑懸山顛。塵襟快滌盪。

遊歷逮茲辰。聞名自疇曩。流風如可親。對境足欣賞。  
古人不可及。非徒尙詞翰。出處有本性。此際良獨難。高名震山斗。事定待闔棺。筮仕興定初。天興列史官。  
凋敝日益甚。簪筆涕沆瀾。國亡終布衣。家訓傳南冠。  
性正氣亦正。跌蕩雄幽并。聲名世耳食。知己惟一兄。四十五年間。毀譽何轟轟。習俗安汚流。所葆遂不貞。  
鏘銖較利害。俯仰隨重輕。所以貴壁立。君子豈好爭。  
職本任史官。記注敢貽誤。舟師忽東狩。國史請保護。時相日以迂。零落不復顧。艱危野史亭。貞節葆歲暮。  
身在國史在。豈難狗國祚。吁嗟絳雲樓。志但希遭遇。

題顧晴沙戶部試泉圖

山光清襲人。夜雨洗山月。清泉林杪飛。雲氣偪毛髮。落澗勢洄漩。稜稜露石骨。幽居敞巖扉。空翠環園宅。  
悠然太古前。夢迴茶乳白。世味一不嬰。飄洒漱蘭雪。憶昨耽游山。梯空上突兀。徑仄手扶筇。興酣腳不轍。  
佳境輒遇君。竹籬賞遺迹。相對神自怡。往往煩襟釋。十年出處分。君名滿京闕。在山泉水清。願言慎始卒。

觀音編

千里鬱嵒嶷。大造闕精奧。觀音編絕奇。蟠空駭排冪。岩芳插青冥。垠塢入深隩。巖巖氣象雄。稜稜丰骨傲。  
終古烈日熏。懷秋陰雨膏。裊水悍莫當。突立衆流倒。疇曩徑中斷。危地不敢蹈。中丞得賈公。侯辛苦事鐫

鑿壁窠書大字。陷壁錫嘉號。舊名閭王。碣買中丞。易今名。我知大士心。拯物同覆冒。在在見靈通。隱隱化凶暴。履險敬倍深。彷彿慈雲導。

五丁峽

客從沔陽來。川原愛平敞。西窮蟠冢山。漾始浮菰蔣。峽口水飛騰。漢江迺千丈。入峽氣陰沉。朔吹透簾幌。四望昏霧迷。欲行苦惘惘。葱鬱礙犀株。蒙茸徧篠簜。五丁昔開山。神力何英爽。渾淪元氣中。一嶺析爲兩。竅穴倍玲瓏。澗泉互洑澇。積絕猿鳥蹤。青冥仰逾上。山險孕育奇。龍蛇寔雄長。撥雲入窈奧。託命瘦筇杖。胡不鏟層峯。再煩巨靈掌。水木餘清華。令我發眞賞。

昭化縣

烟際帆初卸。孤城景物幽。人家濱桔柏。故國屬苴侯。飛鳥投岩月。清颺發棹謳。只愁明日路。捫葛上牛頭。

劍州

畫角巖城動。珣弓盛世拔。峯看青玉削。馬踏碧雲高。要害同三峽。規模陋百牢。浹旬行石棧。于役敢言勞。

叙州卽事

山谷舊曾游。浮生復此留。涼風吹木杪。秋氣滿戎州。蒼峴雲根峙。清江郭外流。百蠻遺俗改。安化服先疇。

宿遷懷古

雲鴈影南征。人過下相城。史才編本紀。天命屬炎精。嗚咽空流水。蒼茫感廢營。英靈知未泯。濁酒爲君傾。  
約過錫公雨阻不果

甚喜幽居近。論詩每過君。杏花何處放。春雨隔牕聞。風色悽殘照。禽聲在白雲。清吟成獨賞。招悵爲離羣。  
七夕晴沙寓齋作

一抹清光入畫簾。疎星耿耿動遙瞻。夜闌蟲語聽逾靜。月轉梧陰興未厭。小集溪亭烟氣澹。早涼衣袂露華霑。劇憐佳會人離別。料倩燈花子細占。

盤豆驛寄懷諸同學

挂帆暑月別東吳。猶記清罇泛綠蒲。詞客豔稱金鴈驛。秋晴纔過玉孃湖。流連徧覽中州勝。憑吊時嗟逸興孤。寄語九峯吟嘯侶。肯馳尺素慰長途。

潼關

隔岸遙青見首陽。雍州天險此分疆。蒼涼蜀棧秦關客。盤礴河聲嶽色旁。戰壘千年驚鼓角。風烟萬里接蠻荒。廢興舊蹟垂前史。取次摩挲寄慨慷。

紫柏山謁張留侯祠

圖報韓讐願已伸。翠屏仙隱石壁鐫四大字閱千春。素書未必眞傳世。黃石何從訪異人。直與商山同去就。肯從

鐘室話悲辛。遺祠薄采溪。毛薦蟬蛻塵。區迴軼塵。

聖水橋

楊花團雪趁吟鞭。恰好班春景物妍。橋颺青帘通亥市。溪流碧玉瀉瓌泉。新秧弄色含槐雨。飛鳥依人語竹烟。小吏亦知情不淺。先安筆硯豆棚前。

劉秉恬

字德引。號竹軒。洪洞人。乾隆二十一年舉人。官至倉場侍郎。

送述庵司寇予告南還

白雲亭畔得抽身。紅藥階前憶宿因。

公中乾隆甲戌進士。歸班候選知縣。丁丑年聖駕南巡。公進獻詩賦。考列一等。奉旨改內閣中書舍人。蓋公出仕之始也。七袞懸

車符古訓。三春鼓棹荷新綸。

予告恩旨令于春融後。啟程歸里以示優恤。

投簪此日歸田客。倚馬當年草檄人。公曾兩次從軍。掌摺奏。黃

鳥翩翩楊柳舞。臨風勸酌莫嫌頻。

凌應曾

字祖錫。號叔子。上海人。乾隆二十一年舉人。

蒲褐山房詩話。叔子為榆山少司馬。從子游黃山。時最工。如天竺寺云。法鼓時一聲。千山送空響。早發白沙步。日出兩三竿。雲中見山頂。富春云。江綠山逾青。舟行畫圖裏。香爐峯云。雲中露微月。

忽照香爐峯。何減襄陽摩詰。

鐵索港新安江之浦口亂石怒生牙錯環連數里而透奔流若激矢長年刺舟一篙半篙悉中家法不敢越粒黍許盤旋屈曲於千萬劍戟中可云絕險石色沈黑似鐵土人呼爲鐵港

阿誰鑄鐵作峒屨。犖确千尋斷行旅。女媧煉石補漏天。天星中夜隕如雨。水拍拍。峭且激。行路難。歌偈仄。乍疑雲峯奇。還似浪頭黑。或如棋盤錯。或如機杼織。或如兔脫犬。或如鴉種麥。或如鬱律蛟龍蟠。或如飛鳥驚蛇跡。或如牛羊下山麾。或如鷓鴣銜魚振水翼。森森十萬橫磨劍。肅肅塗山秉圭璧。沙場陣幕擊刁斗。獵圍禽獸爛磧礫。矻奇怪變真險絕。輕刀敗絮攢荆棘。獨漉獨漉苦泥濁。迷陽迷陽傷我足。王道由來號蕩平。何爲世路有屈曲。魂夢飛騰叫帝關。我舌猶在疇能捫。精誠貫日虎豹遁。稽首地上蟻蝨臣。願勅六丁雷電下。取將鞭之見血驅羣羊。投畀裨海擲天外。毋使當道如豺狼。帝有睟焉顧我笑。渾沌不勞鑿九竅。陳詞敷衽就重華。九疑山高雲霧濛。覺來漁舟有狂客。勸我酣歌啜糟粕。車輪一日九迴腸。袒跣何如呼五白。伶五斗。髡一石。崑崙歷落可笑人。胸中硯礪誰消得。吁嗟乎。胸中硯礪誰消得。仰眎元天幽且默。

南華山人畫松歌爲齊雲道人賦

黃山臥龍名松二千尺。移根突見雲根側。怪底山房春晝寒。謾謾松風生兩腋。畢宏不作董羽淪。南華散仙來逼真。下筆如松松色古。千花萬木羅兒孫。長嘯還題幼婦詞。詩中有畫畫中詩。鬼神欲入渾沌死。妙手

無心偶得之。道人不種老龍鱗。半幅蒼虬什襲珍。他年破壁定飛去。三十六峯眠白雲。

游翠峯寺

隔溪聞犬吠。黃葉閉僧寮。清境偶然到。塵心此盡銷。夕陽明樹杪。湖水澹山椒。歸路雲峯外。遙遙見老樵。

懷王德甫

秦淮花月漾。潑潑夜長記。王郎斫地歌。歸去吳淞倍相憶。髣髴禪榻奈愁何。

蕭霖

字雨垓。號曙堂。江都人。乾隆二十一年舉人。官寧洱知縣。有爨餘昆海等集。

舟次宜昌

灘聲不到耳。江面忽平曠。回首眺三峽。遙天插千嶂。縹緲十二峯。峯峯異形狀。湍急景不延。岩高路難上。滾滾蜀江波。於此漸奔放。燒餘白起灰。怒湧黃牛浪。檢點同舟人。相視慶無恙。前途尙茫茫。何時脫塵障。

青谿洞

武陵桃花源。洞門閉已久。南來見飛雲。勝境獨稱首。茲山亦奇絕。窅然深且黝。碧流環其前。瀕洞涵清瀏。中通太古泉。潛出土囊口。未知誰疏鑿。疑是鼈靈手。虛札鬱谿窞。怪石紛蚴虺。玲瓏剔萬竅。閨寂消衆有。百神不敢栖。我佛爲之守。誰與叩禪關。塵纓苦纏糾。

太平哨

昨從雲中下。及茲峯漸低。舉首忽驚眩。猶與青冥齊。下臨萬仞淵。不測龜鼉棲。噴吼勢如削。窅然窮端倪。孤城倚在南。大江來自西。時平一夫守。日落羣鳥啼。雖無崆峒劍。意氣凌虹蜺。

沙箕凹

翳余初作西南游。石坡犖确生煩憂。八年宦跡遍睽詔。登陟岡嶺同平疇。普安州路更險絕。千峰萬壑森戈矛。逶迤鳥道入荒寨。雁厂凹凸深勦鏖。出門義御朗垂照。倏忽雲氣蒸山頭。上山入雲雲不見。纖纖細雨飛松楸。普陌營邊溪滯汨。雞場坪畔風颼颼。澗窮坡斷徑茅塞。陡從人面開巖幽。上緣無梯之峭壁。下臨無底之靈湫。竹輿繫繩縋而上。空中倒挂如猿猴。倉卒一擲輒千仞。衆力猛奮爭喧啾。矧逢連陰窄磴滑。僕從策馬蹄難留。一峯纔盡一峯矗。羣山匍匐兒孫儔。造巔肌骨覺輕舉。大千世界真蜉蝣。晶瑩寶氣看洩露。會貢三品隨琳瑯。山出銅礦歸來心魂尙沖惕。此身夢墮崑崙邱。

貢象行

滲液神漿滿銀甕。雕題繡面爭來貢。已見黃麟出九真。時看白鹿游深洞。南掌國處南溟濱。自昔羈縻歸鎮控。方物特降瑤光精。輪年一作天家供。聞說岷山稱獸雄。亦有蒼梧代人種。執燧曾奔組練師。脫牙或備簪纓用。不然蠢然塊然物。只與神獅作搏弄。如何伊水別珍奇。更羨荊陽看解縱。朝廷郊廟盛儀典。立



仗端門陪侍從。浴處常翻百頃波。篆時每例千官俸。九夷八蠻驚壯觀。兜離齊獻昇平頌。矧今新自遐荒來。不事周澄索兵衆。野性初嘗白國禾。肥軀底繫青絲鞵。短袖奚奴一一隨。高冠貢使雙雙送。此日欣留華嶺蹤。他時那戀龍江夢。清秋空發昆明池。漸由黔楚過商宋。長鼻欲捲太行雲。剛蹄好踏滹沱凍。順承門外象房深。百年老物羣相共。食料寧須論後先。朝儀實自關輕重。遠人來格喜天顏。異獸爭輸光聖統。上方錫宴歌九功。舞向金階競喧闐。我皇德盛尤冲虛。旅葵一册殷勤誦。

五嶽真形圖

金壁瑞降陶堯廷。王版圖畫天地形。重華協帝銀甕出。河渚五老呈其精。靈威丈人觀文命。素書昭灼傳洞庭。從來元德契真宰。奇蹤幻蹟超千齡。異哉五方峙五岳。終古屹立常青青。豈於象外別傳象。奧窔更孕乾坤靈。維岳布澤宣萬物。崔巍上應五緯星。尊視三公俯四瀆。天關靜鎮坤軸寧。右跨蓮峯據掌跡。左登日觀聽雞鳴。前聳祝融後陽曲。中間申甫含菁英。峯巒可數磴可陟。詎比杳渺游蓬瀛。奈何方上逞譎詭。欲開爐冶模新型。嶙峋石骨只皮相。別有精氣相和凝。如人魂魄納軀殼。爲物爲變堪依憑。青龍掉尾元武伏。白虎朱雀交縱橫。嵩高巖巖儼中立。端然具體方且平。上下反正各有象。一一縷載神祇名。四維囊括尺幅內。盪胸鬱鬱何崢嶸。舉首不用六鼇戴。錘鑿又豈煩五丁。服之永辟魍與魅。山魘水魃供使令。此圖此語誰意造。怪誕不登岳瀆經。似真非真易惶惑。愚公智叟均難明。吾聞海外有五岳。其名罔麗於

八紘蒙溟亦自擅封號。彈丸促縮徒誇矜。中原五載一巡狩。樹以八表周四溟。未聞山神異胎息。內景外象勞經營。茲圖迢遞出漢世。抱朴所見寧足徵。武皇本自乏仙骨。始迷五利終文成。王母遠居極西國。幾曾萬里鸞車停。錦囊祕本誰目視。紫臺瓊笈空熒熒。如果作佩禦邪崇。巫蠱之案何由興。宮闈尙自逢不若。山林川澤何由清。堪笑罔兩徒責影。孰解橐籥通靈局。丈夫方寸具五岳。勸君學道安其貞。

抵京贈二三知己

時運銅由四  
川水道進京

三年仙侶隔蓬萊。地北天南幾溯洄。政績未留莊躋邑。車聲還傍郭隗臺。魂驚月峽千重過。力負銅山萬里來。堪笑征衣緇已盡。不關京洛有塵埃。

晚上安南關

沐滂鋪畔草萋萋。極目雄關萬丈梯。兩郡咽喉歸控制。關爲大理楚  
雄交界處一天星斗按攀躋。晚風浙瀝羊裘薄。

初月昏黃鳥道迷。陟盡坡坳尋夜宿。僕夫沈倦馬頻嘶。

楊林道中

溪橫略約路通車。傍海縈紆取徑斜。萬里碧天初度雁。千山黃葉亂啼鴉。場空棘戶犁新土。水落漁舟貼淺沙。恰憶江南風景似。幾回回首白雲涯。

袁文典

字儀雅。保山人。乾隆二十一年舉人。官廣西州學正。有陶村詩鈔。

甲午人日。薛三南招飲白鶴觀。同人雅集。予以事不得與。補和原韻。並呈二首。

老此離家客。花前髮已絲。開春逢七日。滿座酒盈卮。迭以賓爲主。因從友得師。草堂何用寄。先誦道衡詩。閒情輸野鶴。世網亂如絲。有酒思金谷。無緣醉玉卮。題春渠奪錦。殿陣我旋師。媿續羣公賦。頻催雨後詩。將出都門。留別諸同人二首。

殘夢千山亂。浮雲萬里愁。客中還送客。病裏又驚秋。書劍空蕭瑟。鴻魚久滯留。京華豈不戀。輸與故人游。客中秋思。

遙夜家山闊。高秋客夢賒。重幃燈一點。深巷月千家。砧杵寒孤兔。書聲續斷鴉。瀟瀟長不寐。回首望京華。蔣業晉。

字紹初。號立崖。長洲人。乾隆二十一年舉人。官漢陽府同知。有秦中吳廡楚游出塞歸田諸集。臯蘭城中書所見。

金城尙武地。何由集大賈。暮宿酒家樓。朝趨達官府。府中開豪筵。徵歌選妙舞。篋藏珠玉來。腰纏十萬去。遂令邊關間。而爲貨賄處。縱非竭民膏。毋乃盜天庾。大小習成風。使財如糞土。樂戶爭纏頭。戎行弛部伍。憑誰問主名。多言恐觸怒。

自平涼赴臯蘭憶戎馬所經地

我本役荷戈。從軍志所尙。朝辭崆峒來。暮出六盤上。兼程趨間道。烽烟心震蕩。孤城有烏啼。廢竈猶井狀。殺氣作悲風。陣雲壓遠障。羸卒學挽強。蹇驢驅轉餉。但見嬰孩拋。那有雞犬放。是時日當午。炎威變愴愴。少憩更宵征。月高意稍曠。燐火隱郊墳。車輪滯沙漲。天明經戰場。形勢審背向。此地領孤軍。失援蹶上將。養癰非朝夕。小醜敢肆掠。赫赫禁旅集。皇威孰敢抗。沙蟲爾何物。邊庭藉懲創。我欲作饒歌。要使健兒唱。何處雨傾盆。天河洗玉帳。

除夕和東坡除夜雜州韻

窮荒憂患中。忽忽年華送。坡公謫儋耳。富貴如春夢。托志惟歌詩。風月恣吟弄。緬惟古賢人。瓣香意有共。繫予出關來。邊事少闕空。寄跡在龍沙。抗懷比鸞鳳。赳赳揚皇威。諤諤仰國棟。謂近日接福制府條奏邊屯疾苦奉旨查辦籌邊裕至計。反覆陳疾痛。庶幾沙漠屯。兵農各安種。除夕動微吟。且酌蒲萄甕。

新灘書事

上灘之難如登天。千夫力挽一綆懸。下灘之險疾於箭。奔波直下逐流電。行人到此心膽驚。性命真比鴻毛輕。灘邊最能最能水手名少慣入水。不利人生利人死。昨客不戒沈厥舟。誰歟援手心煩憂。有人翻身卻下手。攬得錢刀撇波走。走歸召黨酒相駕。日夕駕浪伺船過。

讀陳龍川集

宋家南渡日不振。中原恢復方需人。龍川起修王霸略。天人今古胸吐吞。攬時度勢志開濟。萬言書就排宸闈。建都首貴識王氣。錢塘衰耗難圖存。強兵富國自有本。言言切要多開陳。九重得書赫然震。盈廷交沮不得伸。渡江歸來嗟落魄。危機密網遭何頻。天鑒奇才脫奇禍。一朝知遇膺殊恩。惜哉遽死不竟用。空有遺集垂經綸。後人展讀想節概。欲泣神鬼驅風雲。智勇一世盡推倒。開拓萬古何嶙峋。憤時不雪君父恥。高談性命殊非真。酌古數篇昭特識。不徒筆力回千鈞。堂堂正正論兵法。公得此意雄其文。或云于時涉躁進。或云罹禍疎持身。惟公才略足用世。細行不謹非無因。積累爲功涵養正。有愧諸儒嘗自云。古人立言不欺己。陋儒訾議徒紛紛。人中之龍文中虎。獨悲其遇多蹇屯。空堂風雨夜披卷。作歌直欲招忠魂。

石馬槽歌

有序

荊州郡廡有石槽。傳是漢壽亭侯飲馬器也。咫尺深廣。雕鏤精緻。歲久剝蝕中斷。雨過積水其中。牽馬就飲。輒驚躍不前。王少林異其事。賦詩見示。卽用其韻。

九天星精化作槽。離虛震仰文週遭。鯨僵雨過怒鬱肆。蘇漬日炙浮腥臊。金戈鐵馬久刼化。誰拔劍斷生蠶蛟。當時侯稱萬人敵。有馬神駿追風颺。臨陣斬將策盪決。一鳴萬騎暗不驕。歸來洗刀更飲馬。大江浩浩波滔滔。荊州勢據上遊地。華夏震動威名高。春秋大義志伸討。躍馬直欲吞孫曹。曹方避銳孫躡後。翊

漢有恨何時消。白衣陰謀赤兔蹶。麥城驢磨長哀號。紫燄紅輝躡雲去。憑依天廐驚凡毛。牽之不前就不飲。譬若叱咤千人逃。視魏如鬼吳似犬。凜凜聲氣猶蕭騷。髯推絕倫馬無匹。槽亦附驥傳不祧。君不見夔府八陣風雲護。江流怒激石不搖。又不見神兵殺賊驅石馬。戰罷流汗威靈昭。惟侯精誠塞天地。風馳電掣靈旗飄。神遊故土應呼吸。騏驥精爽如堪招。我歌傳信非誌怪。此槽永古枕臥荆江阜。

北庭都護行

有序

承恩公奎將軍林。資兼文武。忠勇絕倫。出爲北庭都護。蕃回畏懷。期年而詔移烏里雅蘇臺將軍。余抵戍時。已啓行數日。敬慕之而未見也。先於途次構成七律四首。至此知其政思其人。復續七古五十餘韻。庶幾萬里外非慕勢。百世下有聞風耳。

南山有竹直不扶。括羽鏃礪懷以須。渥注之馬龍爲徒。星精下降天閑儲。人物絕類稟自殊。濟時英傑生非虛。惟公大將行則儒。忠心甲冑體用如。火不能薰水不濡。出險入險同坦途。往者溟海申天誅。急槍怒馬千人呼。譬若獨鷲推羣鳥。詩歌召虎平淮徐。一人知己無雙譽。遠移節鉞天山隅。輪臺四野黃雲徂。長風捲沙雪片粗。蕃羌射生飲酪酥。每惜游牧窺邊虞。秋獮冬狩軍政符。六鈞弓注金僕姑。壯士一一勇賈餘。圍場霹靂聲連珠。飛者走者殲且屠。羣番驚竄如鼷鼯。烽臺絕燄鼓不桴。經營荒漠垂久圖。耕屯悉力勞征輸。南接高昌北伊吾。糗糧車乘隨時需。遠近徵調難牽拘。斟酌多寡善因除。公之叱咤風雲驅。直入

虎穴無趨起。公之平易陽和舒。水清或恐無大魚。一規定遠籌邊謨。得虎子無大魚。俱定遠籌邊語。期年化洽軍民蘇。玉門關外春來初。纖纖柳色雲中鋪。龍城清霽伴皇都。我來遠戍同集枯。瞻望弗及空歎歎。長城之倚廣廈居。先聲已浹人肌膚。結綠青萍抱區區。有懷欲吐難陳書。星雲垂象昭天衢。回鶻利見占豈誣。文武爲憲詞非諛。北庭都護如公無。吁嗟乎北庭都護如公無。

嵩山古柏圖歌 有序

箕邨張墨岑名宗蒼。未遇時遊嵩山太室。見漢武所封大將軍古柏。高不逾三丈圍過之。愛其鐵幹霜枝。老而彌茂。作獨樹於巨幅。攜歸出示吾祖先大夫繡谷公。恰值花甲初度。卽以此稱祝。事隔七十餘年。畫久失去。余于戊午正月始捐金得之。又值祖生之辰。懸之堂中。悵然有觸。因歌其畫述其事焉。

有山崑嶺不露影。有樹輪囷莫與並。枝頭蟲起通風雲。堂上高懸重夔鼎。紀年應溯商周前。問產乃在嵩陽嶺。漢武雄風百靈召。柏亦特受將軍號。根盤地軸結蚪形。威懾山靈作虎嘯。虬蟬欲撼任挪揄。雨露難滋容兀臬。喞彼景山遠可遷。豈如太室長共眺。張公健筆性好奇。山中擬狀凌烟姿。瀛海神仙不可遇。茂陵封禪猶存詞。五岳胷中起方寸。煙雲腕底蟠蛟螭。募成巨幅攜吳市。吾祖歸田締交始。洪厓拍肩花甲周。出此稱觴祝蕃祉。君不見武侯廟柏棲鸞鳳。寇萊植柏比甘棠。我遊雨地欲摹寫。婆娑樹下空徬徨。眼

前突見太古質。靈氣披拂天蒼涼。此本久落他人手。不借捐金爲我有。含飴尙憶孩提年。展軸已當衰齒後。祖祝追思涕自流。儀容畫壁存豈偶。青蒼渲染不改色。恍詔孫枝勿替守。東風入戶庭梅開。春酒介壽辛盤堆。欲誦清芬感今昔。不覺悲喜圖中來。張公名早登天府。翰墨流傳照今古。參天枝幹歲寒交。贈與歸年兩逢午。畫贈丙午。歸值戊午。嗚呼見樹彷彿仰嵩高。對畫常教念吾祖。

歸至邠州值春盡日見水流花放因憶亡弟升枚桃花溪水圖多名流贈作悵然補題

春光淡洩巒翠濃。邠州西士田家風。茅屋依依幽澗裏。落英片片明霞中。鳴禽格磔雞犬放。此間疑與桃源通。連朝風雨情脉脉。驛路飛花感今昔。我家桃塢依綠水。每對芳辰集佳客。餞春已卯歲重逢。繡谷好風鶯嘒嘒。用查初白先生講集交翠堂贈先祖句。吹簾仲氏氣若蘭。欲繼觴詠開騷壇。詩翁當日執牛耳。鉅公名士欣盤桓。歸愚宗伯首座芝庭少馬居次阮蓋邠太史李勉伯吳企晉隨升之陸耳山張策時沈文聲金二雅汪大升沙斗初張崑南兄同庵俱與會有詩。雖無韻事簪花續。尙有清音古調彈。是日鼓琴。風吹落花漾清沼。酒酣客起皆憑欄。共言此會洵非偶。前有西堂翁繼後。一時槃敦勝南皮。再舉人文仰北斗。摧殘棣萼秋風到。病骨驚看玉樓召。桃源空望五雲邊。宗伯有桃源又在五雲邊贈句。之子吟魂應獨吊。我征冉冉未離秦。豈有仙蹤可問津。忽憶斯圖重有感。恍如流水隔千春。對床舊約虛歸思。觸景新詞追夙因。水流花謝年年事。每到傷春憶此人。

七月七日出嘉峪關



白晝嚴關閉。黃雲大漠屯。風光中外異。征戍古今繁。客去得無淚。生還望此門。雙星天上合。憶別幾消魂。

送奎都護移節伊江

惻惻羈臣別。遙遙威令行。漫言離廣廈。猶得倚長城。屈宋風騷侶。甘陳竹帛名。相逢原不偶。沙漠證三生。

新柳

一見一回綠。依依似故人。烟光凝驛路。別緒動江津。我憶武昌種。遙憐玉塞春。今希高士傳。根觸歲華新。

入函谷關

中州鎖鑰倚崔嵬。獨客今朝去復迴。九國師延憑此險。一丸泥閉仗誰才。谷深天設金湯固。關隘秋防畫角催。何必聽雞更懷古。夕陽駐馬幾徘徊。

秋風亭謁寇萊公祠

巴峽濤聲挾怒雷。一官曾遣寇公來。讖傳野渡橫舟句。名震邊陲掌鑰才。私祭千年凝臘淚。孤亭百尺當樓臺。秋風古跡留殘照。不聽猿啼已可哀。

途次西安和吳舍人竹嶼山長用阮亭喜吳漢槎入關韻送余出塞別後依韻卻寄

風塵早嘆鬢成斑。況復倉皇賦出關。異地遠投身似雁。中天長望月如環。三春行見千屯雪。一曲休歌萬仞山。多謝素交珍重意。臨歧爲我祝生還。

除夕抵家口號

入門鬢鬢共爭看。得遂生還膽尙寒。萬里歸期當歲盡。五年愁話到更闌。在家叔季欣無恙。垂老兒孫已覺單。安命豈教尤怨集。屠蘇傾盡且言歡。

懷杜閣

吳宮花草接荒邱。東下姑蘇霸氣收。共仰平生懷一飯。突看此屋報千秋。側身天地蒼茫詠。入座林嵐縹緲樓。綠水名園思樂否。後先賢哲繼來遊。

仰蘇樓

磨蝎居宮厄運宜。枉留作相九重知。家來岷水源頭遠。筆現華嚴法界奇。玉帶山門僧作鎮。劒池巖壁帝廣詩。謂御製和韻。獨憐壯歲遨游者。茂苑蒼涼彼一時。

思白堂

臺榭高支五架新。風流刺史主兼賓。翠娥影裏修堤日。弦管聲中播化人。三逕香煙千載社。雙橋花柳一家春。卻看醉白堂前記。魏國勳勞羨替身。

袁授階邀陪王述菴錢竹汀暨諸君賞牡丹得和字

江村倚棹入煙蘿。人物依稀晉永和。春夢喚醒輕富貴。玉堂養望重巖阿。當牕映日花能笑。列幄凝香醉

可歌。深色一叢來不易。洛陽聞道尙干戈。時洛陽有楚寇之警。

隆中謁武侯祠二十二韻

三顧君臣契。千秋綱目編。風雲一以會。魚水共爭傳。帝胄流離日。奸雄割據年。志存炎漢業。力闢半隅天。大計躬耕定。三分國步遭。扶危王佐託。受命老臣專。敢惜南征苦。寧辭北伐連。攻心擒獲策。揮涕出師篇。牛馬千山運。龍蛇八陣懸。夙興親校簿。久駐雜屯田。蹇蹇孤忠瘁。堂堂正統延。草廬留遯跡。畫像儼神仙。洒落眞希有。風流尙宛然。英雄含涕淚。詩老致纏綿。星隕天難問。龍歸德自全。伊周堪並駕。管樂宥隨肩。宇宙垂名重。蠻荒遺愛堅。我來拜祠下。草長映階前。抱膝高岡上。彈琴落照邊。清風生古柏。新雨響流泉。月旦餘題咏。溪毛供几筵。空山興仰止。歸路滿蒼烟。

徐作梅

字用和。號鱸鄉。吳江人。乾隆二十一年舉人。官盩厔知縣。

南寺

縛筏沿流渡。穩於巖上橋。愛看山色好。如遇故人招。白塔閣塵劫。疎鐘散沓寥。黃楊雙樹古。未易許摩霄。

東坡詩松桂得千霄。今松桂絕無。佛座前黃楊二株甚古。

題三泖漁莊圖

騷客何年置釣磯。蕭蕭黃葉半江飛。春風騎馬長安去。閑卻笞箠掛夕暉。  
上苑看春憶故鄉。頭銜那羨校書郎。煙簑雨笠生涯好。三泖重尋舊日莊。  
一帶柳陰水閣寒。漁樵近局酒杯寬。雕菰飯滑蕁絲熟。四十鱸魚齊上竿。  
遠山點點翠如螺。秋水依然鴨綠波。何日南湖同泛棹。拍殘銅斗和高歌。

### 陸惇宗

字望之。號莆塘。青浦人。乾隆二十一年舉人。官閩縣知縣。有秀林草堂存稿。

#### 次和古檀遊細林山韻

積雨荒遊屐。春光負十分。趫然來短杖。暫爾撥重雲。暮靄如留客。他山已待君。君解維往橫雲何時能促席。唾咳得頻聞。

#### 綠蒲萄

種出西域。移植避暑山莊。形同馬乳。蒲萄而無核。色正綠。鮮嫩可愛。西域名奇石。密食。

萬顆圓勻出大濛。堆盤綠玉訝疑空。未容槎客能攜種。應與桐君補錄功。馬乳正嫌多孕子。龍鬚失笑舊稱翁。釀成查滓先融盡。味勝醍醐未易窮。

### 曹錫寶

字鴻書。號檢亭。上海人。乾隆二十二年進士。官監察御史。贈左副都御史。

蒲褐山房詩話。檢亭胸襟瀟灑。早入內廷。隨巡侍直。時有篇章。流傳日下。及登進士。改庶常。復由部曹擢為侍御。因見朝貴家人貪縱不法。劾之。詢無實據。吏議請革職。詔特原之。仍令留任。及至嘉慶己未正月。上追念其慷慨敢言。不愧諍臣之職。且其事亦非失實。追贈副都御史。并蔭其子為中書。蓋異數也。君中歲後頗好小學。爾雅注疏。校勘再三。詩亦不多作。

出古北口

霜淨宿莽平。風高邊馬壯。我行出嚴關。心目恣駭浪。巖嶺爭超突。泉瀑互奔放。仄逕容數騎。萬雉森巨防。巍然衆峰頂。鑿削出天匠。是時夜將半。落月排疊障。屈曲窮攀躋。直上凌空曠。出險復入險。頃刻條萬狀。回首眺神京。煙樹鬱相望。歸途更登陟。壯觀答微尚。

早寒

策蹇凌霜坂。風高木葉乾。空山秋易老。絕塞氣先寒。肅肅車徒靜。迢迢鼓角殘。幸依仙仗近。行路敢云難。

塞上

高嶺倚層穹。寒生萬壑中。驚沙常暗日。衰草自生風。霜落征衣薄。秋高塞馬雄。揮鞭一長望。煙樹正空濛。

秋日塞上雜詠

雄關高並大清連。終古風雲壯北燕。山自朔庭環九域。城聯遼海控三邊。牧羝沙暖空榛莽。飲馬泉清絕瘴煙。盛代即今虛斥堠。秋光滿目覆平田。

烏桓城下陣雲黃。白馬關前月似霜。百戰雄圖餘玉壘。累朝形勢固金湯。天晴鐵騎排空見。日落龍沙四

望長。惟有灤江。嗚咽水。年年常自繞邊牆。

### 李漱芳

字藝圃。渠縣人。乾隆二十二年進士。官監察御史。左遷禮部主事。

#### 書趙恭毅升喬公世德冊後

重熙累洽。景運隆。星辰河嶽精氣充。篤生偉人。亮天功。猗歟尙湖。恭毅公。昆陵遙胄。閎閱崇。世濟其美。樹德豐。大賢紹緒。道積躬。文章勳業。孚宸衷。旬宣兩浙。旋奏功。屏藩晉秩。開府雄。體國經野。昭公忠。以此翊治。邀酬庸。仁心淪浹。茅簷通。士林額手。銜恩同。組織千字。光熊熊。蒼生霖雨。尺幅中。孫枝五世。朝陽桐。摛華。揆操奎壁宮。摩挲古樹。懷祖翁。公卿墨寫。烏絲融。千秋清獻。標家風。世德世寶。垂無窮。

### 周嘉猷

字辰告。號兩塍。錢唐人。乾隆二十二年進士。官益都知縣。有兩塍詩草。

#### 由信州至江口

曉行發信州。迤邐路逾百。匝岸無青林。連岡盡頑石。解作阜亦童。昭蘇草難植。混沌眉不書。屨屨掌誰劈。茲邦富人文。自昔饒英碩。地產既靈奇。山容亦蘊籍。如何之清潤。所見皆獷礫。菌蠢過客嘲。蓄縮山靈怒。伊余值屯蹇。累載事行役。往返頻湖洄。形模細測識。賦象揣各殊。肖物視須逼。雖未工雕搜。亦自巧搏埴。

或圓如米困。或方如射的。或累如碁槩。或駢如早樞。或如松皮皴。或如龜兆坼。或如馬振鬣。或如鹿解解。或子子如檣。或泛泛如舳。或積疊如堆。或細碎如磔。或如科頭翁。魁梧岸巾幘。或如袒胛僧。秃鬢振鈴錫。飛梁橫山腰。有徑不可陟。鼙鼓棄水滌。有恆六可擊。怒猊渴飲河。跛鼈倦伏磧。藤絡山果懸。瀑挂秋瓜瀉。波窄白可春。巖研窟堪宅。窪突肖陰陽。單複類撲扞。邱背復有邱。突兀露尻脊。大山與小山。吞吐互齟齬。累累斷復連。縷縷明且析。卓立畫地錐。競舉去天尺。向背詭狀分。遠近瑰姿易。斲削豈鬼工。搏掄費神力。幻視巧呈形。疏觀細俸色。潤滑凝流脂。枯焦噬乾腊。日炙蒼顏頰。浪瀆獷寶黑。映樹微含青。宿露半縈白。剝落雜黛赭。煽爛間黝赤。翡翠毛留斑。鸚鵡眼舒碧。披莎虎竊毛。俯水魚喫墨。千形既瑰異。五色復輝絕。瞥見詫童頑。久玩欣嫖嫖。大巧類若愚。至美轉無飾。媧氏煉所遺。秦皇驅不得。自古常嶙峋。于今頗戕賊。開鑄勁骨蘇。迸落大聲騶。利刀劖蹲鴟。巨斧斫怒特。披刷去鱗皴。推敲絕領額。豈唯損石容。亦恐傷地脈。匠石資或饒。靈斯怒恐赫。寄語此邦人。應爲山川惜。

彭元瑞

字掌仍。號雲楣。南昌人。乾隆二十二年進士。官至工部尙書。贈太子太保。協辦大學士。諡文勤。

蒲褐山房詩話。文勤少年敏慧。早直西清。應奉文字。婉麗清新。往往出人意表。所進無不被蒙獎賞。者而恭跋。銜製全韻詩。乃集千字文爲之。又撰乾清宮前燈詞。駢體尤佳。上賜以貂裘。端硯。中多榮之。故恩眷終不替。嘗輯宋入四六卷。更爲藝林傳誦。

雪

上元節後三日雪。千山萬山人影絕。抱春出門門已封。直突無煙甑空設。去年歲事失豐穰。一顆一粒無蓋藏。富家困窖多紅朽。相持遏糴祈天荒。飢兒張口向爺哭。人家炊米勝糜肉。爺泣語兒兒莫啼。縣官方發常平粟。

題橋亭卜卦硯

其修九寸博半尺。厚不及寸土花蝕。云是朝天橋上亭。賣卜簾前淚和墨。一聲白雁江南飛。三日潮頭招不得。更無趙家半塊土。惟有先王一片石。崖山風雨已十年。臣心不轉如石堅。從容就義誠非易。疊山後死文山先。百年橋崩硯始出。四百年來傳勿失。太平太守好事者。對客摩挲恒永日。畱將玉帶生並垂。石不能言觀者悲。當年病餓憫忠寺。壁間太息曹娥碑。

杏花十二韻

簷外廉纖達曉零。如傳芳意編郊垌。明朝隱約春堪賣。深巷依稀唱未停。宿潤飽霑將坼罅。霽光微烘乍含馨。料量已是繁花候。想像初逢昨夢醒。燕子飛時春漠漠。牧童指處溼冥冥。繞迴曲徑簾猶押。響徹層樓戶半扃。陌上泥沾高下屐。擔頭香過短長亭。出牆欲遣關難住。隔堰來看思未寧。搓絮垂楊同爛熳。抽芽新草共葱青。曾從范蠡湖中見。憶向慈恩塔畔經。送酪風光知近節。催耕消息到遙町。誰憐騎馬臨安



湖海詩傳 卷二十

客暮雨瀟瀟不忍聽。

五二二

# 湖海詩傳卷二十一

## 蔣士銓

字心餘號若生鉛山人乾隆二十二年進士官編修有忠雅堂集

蒲褐山房詩話若生諸體皆工然古詩勝於近體七古又勝於五古蒼蒼莽莽不主故常正如昆陽夜戰雷雨交作又如洞庭君吹笛海立雲垂信足以開拓萬古之心胸推倒一時之豪傑也君長身玉立眉目朗然嶽崎磊落肺腑槎枒遇忠孝節烈事輒長歌以紀之淒鏘激楚使人雪涕夙知音律意所未盡放而為院本有芝龕香祖劇世尤稱之錢香樹尚書金檜門總憲先後督學西江皆待以國士故生平誦法不哀萎文達公曰修嘗以君與彭司空元瑞並薦上前故御製詩有江西兩名士之目然司空久直西清游登鼎軸而君卒以編修終非所謂數着者耶乾隆戊申余以布政使南昌而君已下世矣既展其墓復過所居葦園攬小鷗波草堂秋竹山房釀春花榭青珊胡館邀魚步茶煙與月簷晚晴牖芳潤齋綠隱樓緒勝為之撫然

## 望江上諸山

嵐開萬象出。徑豁兩峰對。一磴穿青雲。曲折異晴晦。境幽寡人迹。疎象出鳥背。僧樓如點螺。古佛觀自在。遙知深塢中。有客對飛瀨。誰聞廣長舌。泉聲發虛籟。名山念所歷。佳游與心會。發興可忘言。思尋陶謝輩。

## 龍洞山

拔地立城郭。壁面四圍俯。地底開龍祠。山根蓄風雨。傾灑有餘潤。卓犖無寸土。石裂草木出。風過丹黃舞。橫巘簇細竇。亂雅奪門戶。龍居對開豁。東洞側破釜。避秦竈火絕。陽和至今貯。西洞受朝曦。貫壁徑可取。

天眼一斜穿。暗漏每奔注。誰留面壁相。灌頂生潑乳。半規透旁隙。僧引前列炬。打頭識磽确。漬衣驗沮洳。入穴遁蛟蜃。脫身全鳥鼠。兩崖兩扉抱。一峰一屏豎。裴回壽聖院。摩崖念初祖。樵歸客始炊。烟起鷓微佈。深杯吸靈怪。倒影怯蛇虎。茲山未云深。昔至人已古。馬蹄遠莫寒。出谷日猶午。

師竹居待雪用禁體分得竹字

無衣愛冬日。不雪意常足。擁裘把深杯。祈之恐不速。是物關豐歉。老農有同欲。寧忍三冬寒。竊喜二麥熟。禁體學歐九。失職罪滕六。三光會元枵。片晷沈北陸。當午窮陰凝。萬象爲斂肅。敢發天地房。百蟄方退伏。先聲奪壯色。雞狗皆蜩縮。資清質已成。欲泄故含蓄。輕發虞易盡。遲見難遽趣。抱潔懼湮溜。積虛恥炫鬻。落地怯手援。全形怕熱觸。既墮那得收。一散未可束。不嫌出納吝。深恐消融酷。暫免螟螣死。終令土膏沃。枯林出勁氣。勢欲敵挫戮。可憐松柏心。持此報顛頊。吾儕手脚僵。延佇豁雙目。熱中賴祓除。缺陷需掩覆。豈惟庭宇淨。且解塵囂俗。那知龍公手。別自具杼杵。謂爾劉伶飲。愧彼孫康讀。貪天爲歡娛。玩物共徵逐。不知窮檐侶。較塚死相續。夜寢飽霜霰。朝餐乏饘粥。稊稻走吳越。兒女易斗粟。上厓君相髮。官吏相躡躅。宜麥殺其蝗。仰望勢誠蹙。以茲三尺雪。救彼萬家哭。汝有鄒枚才。無異凶年玉。焉得浪拋撒。佐爾饔酒肉。我聞龍公言。意態頓拳局。相視薄風騷。使欲假旗纛。願傾杯與炙。入地變黍稷。更取筆共紙。隨風化衾褥。覆彼溝中瘠。一果道旁腹。人心有專禩。天意無偏屬。火急布六花。以遂甌窶祝。

竹活

移竹養正齋。舊葉盡黃脫。皆云非其時。栽植同翦割。我過無術補。對之惟惻怛。淹忽閱兩旬。一一傍檐活。笋芽抽嫩鞭。筠粉長新籜。生機未遽戕。死氣不敢奪。土力本未潤。根脈遂如渴。疎雨夜滴瀝。滋漑乃旁達。僵者漸昭蘇。鬱者漸開豁。如魚困圉圉。少定去潑刺。天地所不凋。華美孰能遏。掃雲與干霄。百尺起豪末。明年陰叢叢。勿懼風假拔。斷梢而待醉。俗論從可抹。貪天以爲功。榮悴我其幹。

乞羅兩峰畫屏

書學書家書。畫學畫家畫。束縛規矩中。所守亦已隘。兩峰嶽崎人。資稟軼流輩。展足裂地維。放手破天械。碧眼然溫犀。萬鬼失狡獪。神光掣瞳人。下透轉輪界。豈但胡中丞。坐照入幽昧。遊戲弄不律。奇趣生象外。細審乃逼真。驟覽疑涉怪。威攝天神裝。媚曳水仙佩。龍受金剛降。鴿下老佛拜。誰爲羅漢參。各凜菩薩戒。花殊含玉葩。樹古發新態。或貌地獄相。面目來瑣碎。陰風聚豪端。死氣出紙背。人理彼旣絕。厲魄君弗貸。不知布算勞。但覺運斤快。藝苑徹畦町。墨林除障碍。昔師冬心叟。弟子存法派。老蓮寫人物。奇古爲俊邁。草法寫衣裳。楷法寫眉黛。而君所嗜殊。高逸頗相類。我每見君作。有見無不愛。如玩索靖碑。寢食俱可廢。乞君繪屏風。求益同買菜。欲寶君子貽。長與古人對。君勿嫌幅多。真手僵不壞。

愍忠寺觀傅雲畫觀世音三十二應像

虛堂湧現人天身。三十二相何紛紜。聲聞辟支毘沙門。梵王帝釋天將軍。宰官居士長者倫。比邱優婆男。女羣天龍夜叉人。非人修羅摩睺金剛神。珠眉火目莊嚴尊。魁肩鬪鼻醜怪均。芙蓉頰輔丹砂脣。黃金臂指藤蘿筋。或大歡喜或怒瞋。冠珮絨冕纓旒紳。笏杖劔塵戈鉞鎗。一一妝束離六塵。明霞綵霧相鮮新。喜氣熟視衆欲親。兇威乍矚皆退奔。誰其畫者爲傳雲。十指爲筆掌擦皴。爪甲畫剔蠶螺紋。雲也倔彊性莫馴。窮老不作王侯賓。使酒嫚罵直氣伸。忽然醉弄松煙盆。狂叫拍抹獅王蹲。思議遍攝諸天魂。大笑捨之祇陀園。噴灑墨雨飛慈雲。妙香四壁浮氤氳。名觀世音何緣因。耳根第一文殊云。云何解脫萬劫輪。稱名普救如其仁。寶珠瓔珞奚足珍。衆生卽佛無合分。青蓮九品花葉根。三十二相孰假真。現身說法空勤勩。離慾者誰苦薩鞏。雲汝多事慈容噴。

三峽澗

參天萬木排前灣。勦蟪怒攫山風寒。是松非松走相覓。腳底霹靂生奇觀。亂石夾水水勢破。觸罅迸出雲千團。積鐵輪困寒陰壑。醜怪萬變窮劊劊。立者堅壁疊者壘。以凹作穴凸作關。本是神鬼所施設。反如人力成雕鏤。鈎連盤踞不可狀。各出猛力迴奔瀾。猛旋隨勢作緩急。泝然斗落空潭間。其餘縣溜樹根下。樹緣溜浸渾難乾。飛梁坐久駭畧定。毛髮凜冽胸懷寬。雷聲入聽視轉失。決眦飛鳥無停翰。耳聾目眩細搜剔。玉淵大字蒼苔斑。瞿塘灑灑苦未識。對此不覺雙眉攢。我聞廬山之水盡奇絕。半倚削壁成驚湍。何當

走地獨狡獪。不與挂練爭騰翻。忽思後夜踏明月。石髓滿吸松花餐。解衣坐石弄長笛。夢魂浸入玻璃盤。前山有約客欲去。風雨一霎飛林端。

### 開先瀑布

瀑布之水源何來。劃然下裂長峰開。下士目駭自天落。絕頂乃有千盤迴。青山斷缺聳雙劍。元氣直瀉巖頭摧。飛流已出不肯下。一綫中折分澗澗。隱現數折蓄精銳。失勢一落如奔雷。跳波亂擊潭水立。怪物潛伏寧馨顛。音聲頃刻逐千變。萬馬赴敵金鼓催。天光半壁照空谷。此地萬古無陰霾。銛銛積雪挂千仞。山中猿鶴猶驚猜。銀花下散布水臺。混沌鑿破山根隈。四壁皆刻大劈窠大字洗不盡。鐵畫滿地鑄青苔。太白已往老坡死。我輩且乏徐凝才。惡詩走筆不敢寫。山亭煮汲燒松斂。來朝竹杖青芒屨。凌風踏碎烟雲堆。飛泉三疊絕倚傍。坐觀一洗塵氛懷。

### 題天全楊藏用遺集

嗚呼楊公將門子。外藩千載宣世世。裂土何堪及身止。昔者公年五十二。手扶老父辭鄉里。全家來飲西江水。市人不識宣慰使。謂公西蜀蠻夷耳。我聞天全古荒服。外控魚通三十六。子子孫孫飛食肉。朝廷倚彼爲爪牙。楊氏高氏分符竹。高司始陽楊碭門。婚媾累世相仇恩。怪哉楊氏生公如虎賁。高司性螫鯨鯢吞。心欲楊氏無兒孫。當年木坪蠻司死邊堡。公翁定襲成都道。公守碭門年正少。何來沃日瓦寺軍。高司

虎視將爲暴。邏卒告公公劇飲。燔羊饗吏銀鏡繞。三日敵來公已去。竈下惟留白頭媪。鼓聲一發伏兵壩。蠻兒肉血飛秋草。男兒如是亦快意。頭白南遷傷閉置。低頭但詠卷中詩。絕口不談邊外事。聞公善射立馬背。左右開弓不挽轡。兵書老去厭三復。袖箭生平只一試。自言昔與木坪兒。半夜微酣尙能記。空堂燭滅電一掣。箭出中光光已逝。舉燭索箭不可得。箭著東牖血點地。少卻幾爲高氏刺。嗟乎公生丁巳卒丁巳。我歸猶及交公弟。公側室子<sub>屋</sub>垂涕道。公往督挽西藏糧。蠻山醜樹森刀鎗。毒霧著人人立僵。得公調護人命長。無人不愛碣門楊。篋中遺詩尙萬紙。公之功名文字裏。六十年來奇男子。南昌古籍公其始。

乞酒戲呈監試明惺菴紀心齋兩侍御

斗柄插屋百慮收。酒星退舍空尊愁。遣秋愛覓犀首飲。泛月或喚秦青謳。鑿闌靜夜對官燭。良友促坐思觥籌。豈無法酒醞百斛。但恐濁鏡昏雙眸。當官禁令一夫守。愚公併力移糟邱。龍門似下萬鈞閘。涓滴不作迴瀾流。平生文字抵麴蘖。豈必沈湎爲拍浮。枯腸芒角藉少潤。消渴未欲尋茶甌。買菜猶希圃師益。貸米許向監河求。豸冠繡服兩儒者。閩內司命職有由。米鹽瓊細仗家督。江海灌漑資陽侯。麴生可否召白墮。從事何必拘青州。調羹例得取梁醴。多則益善淮陰謀。諸君垂涎有同嗜。發顏三爵看油油。荷插寧如伶便瘁。滅燭或者髡還留。兩公監酒亦所願。童叟請罰號呶儔。不然破觚毀酒具。白簡彈劾公其休。

題表忠觀碑後

不肯閉門作天子。願作開門節度使。西湖之水豈可填。有國百年吾足矣。妖賊紛紛盜赤符。公言赫赫傳青史。三世四王七十年。功名五代相終始。嗚呼仙芝漢宏一亂民。黃巢嗜殺終滅身。可憐不識忠孝字。高駢董昌皆重臣。八州父老免塗炭。九死包容殖鐵券。由來信誓出殊恩。敢使兒孫罹國憲。雍熙納地倖免誅。南渡陰還十一隅。仁人再世且享國。佳兵好殺何其惡。勸忠異代推清獻。墳廟無虞還立觀。特筆誰如蘇子瞻。雄文壓倒羅昭諫。

歐雷山副將畫像歌

須眉颯爽風雲起。身是仙人歐冶子。霸陵不失故將軍。夾際爭呼老居士。將軍十九身從戎。雙手齊開兩石弓。雄心夜拓沈沙戟。猛氣朝馳汗血驄。昆舍那洋開赤嵌。橫海樓船飛羽箭。香炷三傳鹿耳更。礁沙七轉鯤身綫。將軍拜爵左先鋒。殺賊曾推第一功。龍嶺無聲鳴母死。姓名勒石臺灣東。專城列戟牙旗展。闔越營門自移轉。獅鎧榮披上將衣。油幢遠挂東甌篆。烽火全消息戰塵。投壺日醉太平春。老兵忽作探丸盜。諸將皆爲賜玦人。角巾一旦歸田里。沽酒騎驢經二紀。山中每件赤松遊。橋上誰尋黃石履。髀肉潛生氣不衰。陰符親授兩男兒。孟公久註翹關籍。仲氏頻褰繡縷帷。七十老翁誇矍鑠。形容未寫麒麟閣。一丈霜縑九尺身。封侯骨相輸褒鄂。五十年前壯士顏。丹青老向畫圖間。百回把酒行軍令。幾度挑燈看箭瘢。滇南此日貔貅往。不知誰縛降王長。王師豈必待廉頗。名將由來多李廣。仙翁壽骨健兒身。仍是當年介



胄臣紅衣不把青溪釣。世上英雄信有真。

童二樹鉉畫梅詩

童君畫梅千萬樹。自寫槎枒老蒼句。花開古雪未消時。香入空山不知處。梅花開落天地中。出土那識春與冬。羲和制歷造歲月。始覺萬卉難爲同。著花結實偶然爾。頌之惜之皆可鄙。孤芳或受雨露生。羣豔空隨雪霜死。童君能詩方九齡。寺壁一掃太守驚。腕中天授隸草法。用以寫梅奇骨撐。我不識君見君畫。每對梅花身下拜。行根竊懼地輪斜。放榦真愁天宇隘。想君畫梅身作梅。十指屈鐵梅苞胎。驅魂附筆萼怒發。使氣入墨枝駢開。圈花破蕊等飛白。人與梅花鬪標格。神慳鬼吝一青衿。去作諸侯老賓客。

天台萬年藤杖歌謝陳象臣夢說觀察

仙官來往天台裏。父老趨迎男婦喜。居民捧輿度崖嶸。絳節桃花相迤邐。老藤蟠屈寒蛟僵。萬古甲子不可量。始爲繞指柔。漸成百鍊剛。脫身未肯附松柏。定性久已忘冰霜。斂肉入皮筋入骨。混沌花葉皆收藏。山鬼驚看避神物。飛仙偶踏行石梁。不知歲月冉冉過。但覺年命迢迢長。仙官遊金庭。碧林瑤草香。不覓胡麻飯。不攜采藥筐。長揖天姥云。吾友有母壽且康。願乞此藤作鳩杖。庶幾筋力如藤強。天姥顧之笑。美哉公意厚益臧。神人斤斧乃一舉。截藤九尺直以方。仙官拜賜去。洞天閭寂山蒼茫。攜藤歸遺小人母。堂北老親開笑口。仙人之貽我則有。敢不拜嘉同稽首。童孫代杖可釋肩。看雲數鴈藤周旋。鄉空莫化老龍。

去倚壁不擾慈烏眠。老安少懷見公志。忠信作杖扶危顛。公身挺勁比藤健。野狐敢近天龍禪。此藤托根本福地。由公歸我數則然。摩挲後世見手澤。母壽願與藤齊年。

### 題文信國遺像

遺世獨立公之容。大節不奪公之忠。天已厭宋猶生公。一代正氣持其終。小人紛紛作丞輔。公不見用且歌舞。朝廷相公國已忘。六尺之孤是何主。出入萬死身提戈。天意不屬當奈何。十載幽囚就柴市。毅魄且欲收山河。節義文章皆可考。狀元宰相如公少。山中誰救六陵移。地下真慚一身了。亂亡無補心可憐。天以臣節煩公肩。不然狗彘草間活。借口順運謀身全。俎豆忠貞遂公志。嶺上梅花公再世。鄉人誰復繼前賢。一拜須眉一流涕。

### 江孝子詩

右臂之肉不可療母。左臂之肉不可療父。兒身親身親已亡。血肉之軀亦何補。朝視母墳。夕憑父棺。茅堂淒淒。臘日苦寒。嘻嘻出出妖鳥語。風卷檐茅棺莫舉。孝子拜火火弗許。飛廉揚揚祝融怒。抽刀斷指驚祝融。神急止火神反風。父棺不動孝子死。老翁叫孫孝子起。翁欲告人兒止止。翁拾斷指裹以紙。丹徒舍人啓衾視。右手垂垂缺小指。兩臂創痕况若此。把筆傳之淚如水。江家五世居丹徒。兒名延祚未讀書。生年二十但知父與母。不知肢體爲我有。呼爲孝子兒不受。倘以爲言兒卻走。父曰懷德祖曰珩。閩史書之存

姓名事在壬辰十二月。孝子不願朝廷旌。

吳節母

三十五未亡人。五十五完節身。世德之家夫竟死。十一齡兒作孤子。兒讀書。母忍飢。飢腸文字五千卷。薺甘荼苦皆不知。猶記蘭閨筭總時。左圖右史娘所樂。祿命五行貌五官。不似娘身得天薄。兒不能娶母榮。榮。神官夜半來夢中。我爾曾祖中書公。帝嘉爾節爾可終。母覺語兒含笑逝。成佛生天皆有自。母節當旌格于例。兩氏姓名麤可誌。生張嫁吳居丹陽。夫死子俊登縣庠。乾隆戊寅年。未亡人乃亡。

趙忠毅公鐵如意歌

臣掌選司陳四害。臣掌都堂論四凶。澄清廊廟是已志。豈肯低頭魏進忠。呼臣元凶具十罪。皇天后土知臣衷。坐賊遣戍心無悶。不見逆案死且恨。平生烈性百鍊剛。隻手焉能挽天運。烏金如意翦黑雲。誰與鑄者張鼇春。七星五嶽拱八卦。圖書暎帶雲雷文。其銘二十有六字。堅重眞爲君子器。廉而不劌鉤無鐵。舞歌勿折臣之志。身圓頸方尺半長。上有葵花向太陽。鴈門相伴死宜殉。幸未附棺埋北邙。裏中恨少司農笏。虛說三君同兀兀。莫向宣州弔老兵。此卽錚錚忠毅骨。

輓楊鐸仲二首

從軍奪稍老親知。小范當年是虎兒。聚米熟諳蠻地險。談兵遙念漏天師。莫年烈士心原壯。失意騷人字

本奇勳業功名俱寂寞。弓衣留得可憐詩。  
腹痛腸真似轉輪。荒園十笏賸斜曛。頻驚老友都爲鬼。重過良辰不見君。倚壁杖猶支破牖。藏詩瓢已挂孤墳。河梁一別成千古。石馬風寒未忍聞。

一經齋小集送王德甫之山左同金檜門錢孺石二先生汪康古孝廉限經字齋字二首

感遇傷離雜醉醒。摩空猶是未梳翎。已成鸞鳳仍飄泊。自古風雲有晦冥。旅食深知貧與病。才名虛指客爲星。離華山畔尋君路。夢裏還應一再經。

明湖秋柳至今佳。打疊蜻蛉泛水涯。歷下山川名士地。江南烟月旅人懷。文章事大期千古。主客詩成憶小齋。賦到登樓堪隕涕。壯心容易付沈埋。

除日喜吳蓀圃至歲朝送其赴永康州任二首

開到梅花又見君。三時消息感離羣。話如春逗迎年鼓。官似風迴過嶺雲。臘鑿對嘗分歲飲。香衾同憶蚤朝熏。此身更比桃符舊。羞翦寒燈一論文。

冰銜領到第三州。風雪依然一敝裘。重見邊人迎父母。數勞蠻長盼君侯。天涯舊雨誰推轂。身外浮雲合倚樓。何日宦成歸井里。兩家茅屋傍花洲。

夢中訪竇文貽都督有作篇成而醒

十丈旌旗八面營。屯田都與戍人耕。陣雲風偃全軍肅。沙磧天圍一掌平。萬馬不嘶春縱牧。九邊無警夜論兵。兜鍪挂壁銜卮酒。猶是當時魯兩生。

送王德甫給假歸葬二首

幾年八座捧安輿。馨膳南陔奉起居。請息許歸于定國。臨歧同祖路溫舒。春暉正永仍將母。官舫無多半載書。笑指漁莊烟水闊。九峯青又到吾廬。

河山遮護漆燈明。封樹焚黃禮竝成。天以佳城藏長者。人誇孝子是名卿。圖書雞犬偕安吉。父老桑麻說太平。暇日花前展棋局。定知談笑一論兵。

童墨林秀才攜畫梅相訪不值書以奉酬

偶乘藍筍探春光。底事歸來鼻觀香。尋到龍山花不見。那知疎影壓書堂。

平生愛畫更憐才。未見幽人卻見梅。料想黃樓吹笛夜。羽衣曾伴鶴飛來。君歸自彭城故云。

彭紹升

字允初。號尺木。長洲人。乾隆二十二年進士。有觀河集。

蒲褐山房詩話。允初爲芝亭先生第四子。家世清華。簪纓相望。而自雋南宮。卽辭臚仕。歸而專心白業。香燈禪板。幾似黃面頭陀。所著居士等集。使讀者咸有樂邦安養之羨。支那撰述無以逾之。然文章流別。亦能識其源委。古文宗法震川。而詩亦克承其家學。晚年坦化。石君司農稱其已登灌頂位。皆陳思營主。述須臾。白傳亦歸兜率。以今證古。或不誣也。

揮手

揮手謝人世。蕭然此閉關。有懷長傍佛。無夢不依山。竹送牆頭翠。苔侵戶齒斑。閒雲如有約。朝往莫來還。

謁二姜先生詞

飄零鴈羽共殘生。諫草空傳千載名。九死流離君父痛。一生患難弟兄情。萊陽歸去餘荒戍。吳國淹留賸老兵。虎阜山頭薦蘋藻。流風應共首陽清。

酬曹履開見贈次韻

物外論心契獨真。相依桂館絕喧塵。攜琴入海他年約。蠟屐盟山未了因。雲淨寒潭才見月。雪消梅萼早生春。南園此夕勞相憶。太息年華一度新。

過法雲菴贈杲堂上人

閒行郭外路彎彎。寂歷菴居破藓斑。古殿有鏡陪佛影。團蒲無夢落人間。茶烟斷處還留客。梵冊開時自掩關。可愛新吟才脫口。深林幽澗寫潺湲。

吳寬

字非匏。號猷芍。歙縣人。乾隆二十二年召試。賜舉人。官內閣中書。

嚴江舟中

碧幃重重合。清江曲曲通。幾家紅樹雨。一棹綠蘋風。客路驚凋鬢。鄉心感斷蓬。薄衾愁永夜。莫遣酒瓶空。

孫永清

字宏圖。號春臺。無錫人。乾隆二十四年舉人。官至廣西巡撫。有寶嚴堂詩鈔。

度風篁嶺至龍井

隔嶺聞風篁。淒韻雜飛溜。綠巖將百轉。仄徑迴疎秀。遙睇白雲封。近見紅日漏。登頓蒙翳深。夾林華鬢覆。細泉繞其根。澄泓媚石甃。巖花共鮮新。古翠紛縟繡。空色妙不延。神景愜無舊。想像東坡翁。高人此締構。去住本無家。風流不可復。莫辨虎溪蹤。誰識歸隱竇。我亦蓮社徒。欲去戀孤岫。

自芙蓉邨度舟芳嶺至能仁寺宿

鴈山出天構。乍到絕思慮。藍輿信幽討。蓉川渺東注。邨烟抱虛谷。石瀨媚芳渡。嶺紆細路通。峽轉鳴淙互。扶攜藉僮僕。偃僂接跟胯。問途陟百盤。直土不數步。峻嶒到絕頂。木杪怯還顧。蒼蒼谷內峰。林立消雲露。浩蕩凌滄洲。莽蒼截雲路。氣象生萬千。目眴已非故。假覺嵐氣濃。晝晦浩傾能。一徑入琳宮。松杉夾衢樹。險絕坦夷得。至理順互素。明發瞻前軌。畢此平生慕。

欲再登孤嶼潮急不得到遂至館頭和韻

江土變氣候。金風被蘭渚。歸棕偶迴沿。中川眷琳宇。仙舟幸同攜。曉吹韻笳鼓。瀾瀾沉石華。離離出竹祖。

是時迴怒潮。榜人暗無語。聲喧千石鐘。勢挽萬鈞弩。超越匪尺尋。端倪辨銖黍。方蓬失罡廳。何必弱水阻。翻憶前度來。目成渺何所。心逐虛舟游。蹟謝短筇拄。脩塗果安窮。噫氣空爾怒。稍忻卽次安。已慰登陟苦。寄謝海士鷗。忘機久予取。

晚泊葉青洲

殘雨忽已霽。初月升林薄。淼淼水風生。濛濛霧花落。不見葉青洲。但向烟中泊。何處下漁燈。空江起孤鶴。早發中邱驛。至臨洛關。

宿雨生夜涼。客夢失朝爽。振策出郊坰。趁途意先往。遐矚徑多岐。近陟渚無枉。潦收鼃黽喧。沙淨鵝鴨長。八月正逢穫。村村快豐穰。登場多黍徐。滌圃富栗橡。樂業徵民風。熙皞有真象。嗟予遠行邁。郵節勞鞅掌。遊目得所欣。愜心在幽賞。卽次稍延迴。隔水月初上。

沙哨道中遇雨

山程忽陰霾。疾行出雲背。卻立看脚底。雷雨正霽霈。蛟龍揚其鬣。不避魍與魅。雲海互翻盪。王山忽破碎。火滅無定形。萬象爭顯晦。我生性豪豁。觸景窮變態。覩此心神開。彌覺胸宇大。須臾昏霧收。豁然見蒼靄。斜陽在松頂。隱隱明新翠。循途下危坡。適館趁芳瀨。回首望雲巖。真來白雲外。

晚渡鄱陽湖放歌呈黃孫谷



九江之水來峨眉。奔流直欲無東瀛。鄱陽千里迺一束。勢吸雲夢吞揚荆。竭來八月駕高浪。蒲帆十幅輕鷗輕。柁樓一笑旗腳轉。如箭脫手弓離彀。是日薄雨開晚晴。湖風乍息湖水平。纖雲羅羅月額細。斷霞片片虹腰橫。鞞紋萬頃皺滑笏。玉筍千疊環圍屏。大孤小孤隔水見。儼臨玉鏡窺尹邢。蝟鬢霧鬢各嫵媚。欲乘蟾魄相目成。中流恍聽女媧曲。仙樂一奏鏘流鈴。江斐招邀耀翠羽。湘娥婀娜揚華旌。陰潭大澤足神怪。長鯨鼓鬣龍睽精。黃神越章佩左右。前驅所導孰敢撓。飄然身已渡弱海。如超鶴背風泠泠。我時歌嘯倚宿醒。蘧蘧蝶夢如乍醒。平生浪蹟墮人海。十年漂泊真浮萍。眼前好景且莫負。尊中美酒宜同傾。明朝弭節西江上。又看圓彩生滄溟。時十四日

峽山寺和翁學使

方綱

粵山山石多峻嶒。綠江一一嘉名徵。綿延千里到三峽。勢如萬馬奔岡陵。峽中勝處啟孤刹。飛來遺蹟古所稱。入門乍聞鐘杳杳。到門已覺風泠泠。書臺經石徒耳食。祇餘往蹟跼蹙騰。欲尋石磴訪石碕。遠望絕頂寒烟凝。我奮雙足躡屐登。亭午雲氣如釜蒸。誰與脇息誰撫膺。百磴一氣我獨能。絕叫衆侶衆不謦。細逕爭與猿猱升。天風縹緲不可憑。但見屐底盤蒼鷹。我生箕濮有微尚。十年遊蹟差可矜。東登日觀擘初旭。西陟玉女扳枯籐。雁湖濯足雲幕屋。石梁弄瀑冰凌競。豈知南行訪廬岳。蹟所未到興已增。竟欲從茲探靈籙。採得仙藥誇儕朋。六根塵界恨未拔。短髮搔首徒鬢鬢。草亭延佇月已昇。歸路荦确憑誰僧。與餘

還和壁間韻。欲寫細字煩禪燈。

過德水宿西方菴

德水西郊路。宵行生暗涼。城依綠楊岸。風遞白蓮香。稍覺開平野。還欣接上方。勞勞倦于役。信宿借禪牀。

新湖

積雨綠巖岫。空林明翠微。人家湖口遠。魚鬲晚來稀。獨向烟中立。翛然風滿衣。仙源不可問。雲徑是耶非。

峽山飛來寺

名山絕頂啓禪扉。眞俊當年此息機。到地松風飄梵唄。有時花雨落人衣。青瑤澹沲流銀漢。紫竹陰森眇翠微。帝子綠雲何處所。讀書臺畔草芳菲。

和若洲秋日遣懷見寄之作

風雨頻宵令節過。山城落葉漸辭柯。秋聲暗挾江濤壯。雲氣遙連海色多。隔嶺軍書勞聘望。故人問訊悵蹉跎。竚聽露布傳閩嶠。萬里金鐃奏雅歌。

送張牧堂

珠江春漲遠連天。送客津亭雨似烟。向晚西風吹更緊。離心先上九江船。

江半坡寒食

棠梨花發野鷺啼。寒食年年苦憶歸。今日蠻江聽錫鼓。落紅如雨上征衣。

### 張遠覽

字偉瞻。西華人。乾隆二十四年舉人。官鎮遠知縣。

蒲褐山房詩話。偉瞻沈靜誠懇。望而知爲恭人。端士鄉試出朱石君先生門下。垂三十餘年。始爲縣令。得黔之鎮遠。地處衝繁。且值軍興之際。遂乞老。以歸。所居在西華城南。有水田一頃。善本書二三千卷。僭門人王耕畚講習以終老。不喜爲詩。學古文。得震川一體。予已采入湖海文傳中。

### 讀漢書

儒者談先生。時變貴能通。要在不失道。安得苟取容。叔孫遇漢祖。千載此一逢。野外爲綿叢。遂稱禮樂宗。嗟嗟魯兩生。老死不相從。

鄭莊吾郡人。雅懷真好事。推轂天下才。不啻自口出。松柏陰芷蕪。威施惜娉婷。大人苟愛士。善氣自相迎。周公不吐握。後世何傳稱。

鳥鳴求友聲。人生重朋寮。嫵婉一以展。榮瘁寧易操。纒布哭彭越。田叔明張敖。豈不愛腰領。夙惜懷久要。兔絲本易附。隨風何能牢。推刃匪異人。哀哉刎頸交。

### 登令武山絕頂

确犖通微徑。高崖勢欲騫。晴雲開二室。秋色滿中原。烟暝千林接。風迴萬壑奔。便思跨鸞鶴。變化看鵬鯤。

吾自

門寂羅從設。庭閑客到稀。催兒樹鷄柵。看婦補牛衣。頗著人前嬾。渾忘世上機。蕭然吾自慣。不是惡輕肥。

彭光斗

字賁園。溧陽人。乾隆二十四年舉人。官福建永定知縣。有越遊草。

夜泊吳江聞笛

今夜寒山寺。鐘聲定有無。何人吹玉笛。祇益客心孤。露泣水楊柳。月明山鷓鴣。倚舷聽未徹。流響散平湖。

禹陵按誌禹穴有數處或以陽明洞爲是

山繞無諸國。天營大禹陵。百靈朝玉筥。千仞闕金繩。敷土何時到。元圭久上昇。寂寥仙洞在。稽古信難徵。

蘭亭蘭亭爲後人移建別所真蹟不可訪矣

見說流觴處。蘭亭蹟久湮。更無修稷客。猶記永和春。翰墨關塵劫。林泉索解人。早知題序意。俯仰已成陳。

獨客

獨客易生感。清宵孰與同。睡遲依警鶴。詩苦答吟蟲。竹逕無全月。蕉叢有敗風。寂寥燈一點。故傍小窗紅。

雨坐

隱几孤懷澹。開簾暮色幽。濕雲千里夢。紅葉滿塔愁。雁度看無影。蛩寒語不休。欲眠還翦燭。拊枕聽更籌。

### 陸遵書

字扶遠。嘉定人。乾隆二十四年舉人。官會同知縣。

#### 壬午進呈山水册恭題

雨潤松間石。烟開竹裏扉。日長看畫筆。山靜見天機。  
松色連青嶂。層樓挹曉霞。九天瀉飛瀑。流得到山家。  
疎花穿細柳。古屋傍青山。可似萍香汎。好風曲水灣。

#### 恭題進呈松梅竹石册

十竿五竿修竹。一株兩株古松。近水似無還有。遠山欲淡仍濃。  
蘆葉洲前夜月。梅花村裏曉風。船泛溪南溪北。人在詩中畫中。

### 張銘

字新盤。號警堂。南城人。乾隆二十四年舉人。官至松太兵備道。

#### 讀史偶然作

丈夫重節概。文藝乃其餘。咄哉莽大夫。寂寞草元居。執拗半山老。誤國在誤書。情乖性以移。荒謬喪厥初。文章空垂世。名實總難誣。千載憶其人。未嘗不歎歔。

荒菊

不殖還同我。金錢訝許圓。壘容侵暮雨。冷味澹荒烟。未肯逢人笑。寧能受世憐。關情彭澤令。猶憶舊斜川。

### 張時風

字虞琴。仁和人。乾隆二十四年舉人。官刑部主事。

### 聽秋圖

碧虛來商飈。孤情倚秋樹。妙以不聽聽。生滅參無住。底事宋玉悲。不問廬陵賦。君子六欲清。聲塵脫神悟。桐高素月陰。石瘦蒼苔附。兀坐真憺忘。輕衫濕宵露。

### 暮春湖上

草色綠無涯。垂楊夾道遮。湖雲低覆塔。林雨半吹花。白舫垂綸客。青旗賣酒家。余情獨紆軫。轉徙路三叉。

此  
页  
空  
白

# 湖海詩傳卷二十二

## 畢沅

字細蘅。號秋帆。鎮洋人。乾隆二十五年殿試第一人及第。官至湖廣總督。贈太子太保。有靈巖山人

詩集。

蒲褐山房詩話。秋帆制府。少得詩法。於其舅張郎中少儀。登大魁。入詞垣。愛才下士。海內文人咸歸幕府。凡有吟咏。信筆直書。天骨開張。無繪句繡章之習。又好刻書。憲定字徵君所著經說。悉爲劖闕。生平有幹濟材。在陝重建省城。又修華陰太白祠。及涇渠。在豫開賈魯河。修桐柏淮源廟。金川用兵。凡軍裝驟匹。陸續協濟。故深受主知。取其所撰關中勝蹟圖志三十二卷。鈔入四庫館書中。又取所進李廷珪墨。北宋刻絲山水。題詩嘉賞。所示優眷。至每逢入覲。必令在南書房。矢音寶和。出領封疆。入參侍從。亦節使中所罕見也。

## 空谷

溪迴峯勢折。白雲扃石戶。穿雲得異境。幽人此築塢。鳥啼春寂寂。花落不知數。勝地昔疏剔。裙屐萃三五。佛贊盟手鈔。琴歌橫膝譜。溪山旖旎習。洗滌到眉嫵。凡夫久仙去。松竹誰爲主。壁間鐫草篆。筆力挾強弩。手種雙梅花。香影帶峭古。餐霞眠月人。任爾自攜取。松子滿石牀。無人坐揮麈。山風吹午夢。林端響樵斧。千尺雪。

寒山出寒泉。雲骨窮雕鐫。截蓄乍渟演。沿洄旋潺湲。縱之使一落。銀漢秋空懸。石剛水性柔。怒激不受憐。



闕闕肆歎飲。恐擾幽人眠。幾費巧匠斲。久之得天然。小閣題聽雪。蕩漾清冷天。探源得咫尺。豈能計以千。  
聽泉卽聽雪。妙悟泯眞詮。

華山

羣松夾雲路。雙屐濕翠影。危磴裊裊垂。鳥道界遙嶺。撫奇意漸賒。銳進氣益猛。牽藤捫絕壁。擲足亂雲頂。  
湖山奇絕處。一覽收萬景。止宿叩禪關。戒規靜且整。竹深僧貌寒。月暗佛燈耿。山空木葉下。秋與鐘魚永。  
仙掌障金天。同名各異境。逝將登太華。絕險試鐵綆。手攀十丈蓮。塵顏浣玉井。

學山園歌

燕泥零落重門閉。看花偶到清河第。龍漢潛移換劫灰。文章元運同淪替。勝朝末季溯東林。黨禍株連痛  
陸沉。餘焰未銷復社起。並尊壇坫在東南。敦盤結納知名士。天如先生執牛耳。七錄齋頭擁百城。高文價  
貴長安紙。雁幣填門走四方。畫船十里接吳塘。良朋風雅追長慶。勝地林園壓洛陽。新篇月旦前茅定。珊  
網才名互爭競。蕊榜元魁左券操。朱衣不敢司其柄。宜興復召預要盟。祕計神通線索靈。相臣進退由清  
議。朝局艱危亦可驚。道山仙去眞全福。轉瞬烽烟明社屋。著述猶傳太史書。姓名免入遺民錄。客愁黯黯  
正傷春。父老傳聞記不眞。石梁碧落垂虹影。猶認先民履齒痕。牡丹未放茶蘼老。落英滿地無人掃。粉壁  
歌頌淡墨斜。名公題詠留殘稿。圖書散佚化雲烟。文采風流尙宛然。三篆雕鐫埋鐵筆。六朝麗藻剩遺編。

清流聲氣聯。吳君子道消。大廈覆重扣。雲莊記午橋。空翻黨籍思。元祐蛛網縱。橫霄曲廊夕。陽人影立蒼茫。莫話平泉興廢事。芳菲曾閱小滄桑。

李元妃妝臺

昭明觀後百花開。柳驪鸞嬌舞蝶來。此是元妃歌舞地。人傳蕭后曉妝臺。大定末年臺始造。臺高只在瓊花島。臺前月傍九霄明。妃與章宗露坐上曰二人土臺上香飄五雲杪。元妃當日最承恩。紅袖烏絲奉至尊。獨對中天談皓魄。全通小史辨金根。內家嘖嘖爭誇羨。粉黛胭脂一朝賤。多緣冰雪淨聰明。遂使春風滿宮殿。同時張建教宮嬪。此日昭容第一人。不信玉音嬌似鳳。試看紗幃薄于雲。一朝恩寵誰能數。世上紛紛願生女。微聞笑語卽師兒。翻使良家盡監戶。此時風景正清幽。金屋妝成孔雀樓。樓上樓前盡珠翠。曉光齊控珊瑚鉤。度日成妝鸚鵡嘯。妝臺斜立深屏淺。霧髮雲鬢寶鏡偏。雕欄繡幙春山遠。驚心回首玉惺鬆。引手花枝落幾叢。花落烏啼成已事。殘妝滿面夕陽紅。閒翻舊史閒憑弔。芙蓉泣露香蘭笑。古觀棲鴉不住啼。妝樓夜月還相照。單登乙律事荒唐。銀海方壺更渺茫。西元集舊傳遼太后梳妝臺前。有瀛洲方壺玉虹金露四亭。莫唱回心春院曲。朦朧樹色隱昭陽。

吳企晉泰來邀李丈客山

果

王鳳喈

鳴盛

錢曉徵

大昕

趙損之

文哲

王蘭泉

昶

曹來殷

仁虎

集聽雨篷小飲卽

席有作

寂寂園林夜。開尊石閣西。風池搖月碎。露竹帶禽低。獨罰輸棋酒。重分詠史題。豪情殊未已。無奈五更雞。

春仲東行安會道中感時述事寄蘭州當事諸公

解渴爭泥水。充飢齧草根。四年三遇旱。十室九關門。流徙兒孫絕。蕭條壟墓存。更誰攜麥飯。燒紙酹孤魂。天低妖霧合。日瘦暮山寒。暴骨烏爭肉。敲門鬼索餐。哀歌喧薤露。藁葬缺桐棺。一掬鮮民淚。憂來豈有端。賣兒償一飯。鬻婦索千錢。長別寧堪此。生存亦偶然。吞聲知淚盡。分手尙衣牽。決絕真無計。斯須立道邊。奇荒今至此。草草議難支。鄭監圖誰繪。春陵句可思。盡心臣下責。惜命上天慈。牢補羊亡後。經營莫更遲。石田愁餓鼠。荒澤遍哀鳴。災象夏秋併。甘省辦賑分別夏秋災勘題報倉儲借糶空。時各屬官倉已空方議撥運焦勞煩聖主。補救仗羣公。急切陳民瘼。飛竟達紫穹。

咸陽懷古二首

杜郵落日接孤城。古礎方花積蘚生。原廟精靈呼夜雨。一作吹碧火河山灰燼愴神京。斷碑不辨何王號。破瓦猶鐫古殿名。多少興亡鉛水淚。月明清渭咽無聲。

陵閣荒涼古道邊。五原豐草碧芊芊。窮泉鏡隱秦時月。採藥風迷海上船。夜市有人沽玉盃。秋風無淚泣銅仙。霸圖王業消磨盡。禾黍高低落日圓。

寄趙二損之舍人昔嶺軍營三首

蕭然吳下一書生。絕徼三年聽鼓鉦。虎帳拂雲朝草奏。龍泉壓雪夜譚兵。平淮功定資裴相。檄蜀文還仗馬卿。此日賜環人未老。好憑筆陣掃樓檣。

月落威弧曉出芒。傳聞幕府運籌長。烽青劫外雙名士。謂君與謝泉頭白兵間一錦囊。人血蘸題詩句健。鬼磷入帳夢魂涼。丈夫若遂封侯願。老死沙場儘不妨。

插羽飛馳尺一書。開緘鄭重抵雙魚。古懽同結千秋上。病骨孤支百戰餘。兵革殘生詩卷在。江山狂興友朋疎。斑蘭嶺外今宵月。肯照吳淞舊草廬。

### 荊州述事

涼飈日暮暗淒其。棺翼縱橫滿路歧。飢鼠伏倉餐腐粟。亂魚吹浪逐浮屍。神鏡示見天開網。聞水患前數日江上時有來往。息壤難堙地絕維。那料存亡關片刻。萬家骨肉痛流離。

浪頭高壓望江樓。眷屬都羈水府囚。人鬼黃泉爭路出。蛟龍白日上城游。悲哉極目秋爲氣。逝者傷心淚迸流。不是乘桴便升屋。此生始信卽浮漚。

雲夢蒼茫八九吞。半皆餓口半游魂。鮫綃有淚珠應滴。鰲足無功極恐翻。救急城填成死劫。劈空刀落得生門。若非帝力宏慈福。十萬蒼靈幾個存。

手勅親封遣上公。勤民堂陞一心通。金錢內府催加賑。版築冬官記考工。直欲犀然窮象罔。肯教鶉結哭

鴻濛宵衣五夜批章奏。飢渴真如一己同。

大工重議築方城。免使蚩氓祝癸庚。涼月千家罄婦淚。清霜萬杵役夫聲。蟻生漸整新槐穴。虎旅重開舊

柳營。我有孝侯三尺劍。誓將踏浪斬長鯨。

江水茫茫烟靄深。紙錢吹滿挂楓林。冤埋魚腹彈湘怨。哀譜鴻鳴寫楚吟。南國鄭圖膏雨逮。西風潘髻鏡

霜侵。莫嗟病骨支離甚。康濟儒生本素心。

華嶽聯句一百韻

灑靈執神矩。鎮洋畢形成四方削。三峯三霄通。長洲吳泰一嶽一石作。土囊旋風輪。江寧嚴長洪鑪鼓炎

橐。忽荒招拒營。嘉定錢胚胎混沌鑿。鐫鏤山鬼泣。陽湖洪亮烹鍊真宰鑠。谷神元門存。陽湖孫星金精大

冶躍。鶉分驗星野。秋帆虎位聳雲壘。背控秦隴蜀。嶼竹面瞰河渭洛。陽侯萬派騰。甫道巨靈一掌拓。峭嶸鏖天根。

之神秀包地絡。少皞專威柄。碑存太極司祕鑰。媧鍊驚補餘。季共觸怒走卻。芙蓉森翠葩。秋帆菌萐挺碧莢。法

吏鐵柱冠。嶼竹真官寶珠珞。孤撐紫虛隘。甫道橫塞碧落廓。靈奠兌澤宏。獻重壓坤軸弱。沆瀣洗霞骨。碑存肅爽

刮氣膜。瀕洞雲雷交。季昏曉陰陽錯。鞭軋肩最僵。秋帆寧吼蛟鱓惡。頻迴孝子頭。嶼竹擬假飛仙腳。銳進屏籃

輿。甫道矯舉易麻屨。沈沈睨智井。獻之惴惴寄朽索。逼仄石脇裂。碑存峭刻巖面剜。磴窮螺紋旋。季徑裊蛛絲曙。

行具藤葛纏。秋帆腰支組練縛。健僕承厥趾。嶼竹道士挽以髀。攫空訝步窘。甫道投暗憑手摸。蹒跚石摩腹。獻悚

息汗流路旁行艱著筇存側上恐礙箸神瞽怯蛇退季氣作矜狼躩存蝨緣粘壁蝸秋迅賊挂枝攫存微茫出

嶒嶼窳嶼飛騰向巖崖存就奇忘迴還道見道雜歌粵洞古聞鳴琴上方山西獻有溝深咤遺鏹老君峽上五

里存翩羽采鳳翥鳳凰山在青柯蹙額鐵猿愕胡孫愁在犁溝毅猛師象蹲季醜劣魍魎搏存談賜逼象緯秋

銛鉉淬干鏐存縹緲雲為臺嶼灑激瓊作蓼存鑄銅支短杙道橫木駕遙杓存魂澀仍九逝獻之意愜恣一嘯存遂異

不退羊存屈學求伸螻存出奇矜創獲季入峭費私愎存搖搖撼心旌秋杳杳窮目籥存丹梯垂虛無嶼青壁倚

寥霏夔魑潛匿影道鷹隼阻奮翫存淵淵泉淵深獻步步雲步迳存正直頻捫衷存左右怕流飆存搦嶺勢恍騎

蒼龍嶺一名存鎖關力弛曠通天門一存山河兩戒會秋觴豆百靈醺存廿八潭星羅嶼五十仞斧斲存晞髮濯蒲

池道搔首吟檜嶸存極天天蒼蒼獻積氣氣噩噩存一變羣嶽形存直令衆山怍存回崖嵌堂密季飛椒截巖齶存

但覺太虛邇秋那容餘地綽存顧免窮桑迴嶼織烏虞淵薄存設施不肯倦道鍛造毋太虐存肌骨輕片雲獻身

命危一籀紫翠無定光存生死少成格存仙人紛于麻季塵網羈似鞞存騎龍慕子先秋捫蝨鄙景略存懶師羊

公臥嶼恐輸叔卿籜存如船碧藕甘道似掌肉芝詐存安期金液成獻之神女玉漿酌存盆貯太古泉存鼎轉長生

藥消息期青鸞季遨翔跨黃鶴存嶽色匪斯今秋遊惊宛如昨存兵符馳烽烟嶼村社喧鼓鐸存犁翻麥未種道

場築稻早穫存山澤氣弗通獻之溝涂潦將涸存飛屨顛元閭存齋心叩穹幕存蒼龍噓成霖季肥蠶遁愁割存懿哉

神垂休秋皇矣帝求瘼存奎章鐫翠珉嶼廟貌塗赭堊存窺綠字赤文道照金鋪綺構存虞巡隆燔柴獻之漢禪陋

封爵作鎮三秦雄存生華萬物樂守吏揚洪輝季上儀頌景煥記緣祈澤著乙未歲金川大凱將旋先期

屆九月上旬久無雨澤二麥尙未播種因致齋簡從躡屨登山至落雁峯次千金天宮內虔申祈禱立降

甘霖連三晝夜闔省均霑爰恭摺具奏皇上御書嶽蓮靈樹匾額并敕發帑金鼎新廟貌庚子歲大工告

成復御製扁聯碑文恭懸正殿敬勒貞珉麗燭三霄輝圖寫高秋步中丞有高迴驟悼前猛竹追想剩餘

增羣岳沅曾撰華嶽祈澤記一卷恭紀其事秋帆選遐思入非非甫道異境現各各鋸痕鴻荒留之履影鳥背掠來如夢曾經存妙匪願夙度能療康樂癖季

定辟景丹瘡嚇破妖魅膽帆重落岫強魄信宿明星館嶼延佇閨風閣颺車轟霜稜甫道石劍攢雷鏢千峯

千層雲獻之萬松萬丈壑峯峯饒金英存松松靡土著玉繩低碧漢季珠斗帖銀箔風隨星石簸秋月並神

燈燦蕩蕩天無名嶼肅肅事有恪修宵兮冥兮甫道旋儼若惕若化機幹神明之元氣生芴冥層城神所遊

存稗雙丸掌堪擢珠旒拱北辰季瑤柱蟠西壑配極其體峻帆成物厥功博八鼇戴難勝嶼竹九鴻勢欲攫荒

荒此安窮甫道翔翔焉之泊蠹空青蓮花之今古長不落存昭陵石馬聯句

應龍遶西荒帆秋夜隨渥洼澤陟影歛重雲嶼飛精響驚霹文呈開瑞圖甫道武服佐戎辟駿骨珍自今嘉興

岩虬鬚憶猶昔六鈞弓髯張存稗三尺劒手搦河洛既東盡季汧隴復西躡盪決狂濤翻帆擊搏震雷虢虎

旅胥神資嶼龍友亦天謫太乙既登歌甫道用六占象易狀五花九花岩高七尺八尺汗著虹靱般存骨並

雪山瘠絲從一尾飄季玉向四蹄畫駮出長風前帆秋迅入飛電隙九霄空四圍嶼竹萬里惟一適得駕遑惜

障道甫陷陣若批卻。想當負權奇。岩秋鼓勇蹈艱劇。萬象寂無譁。存稗百靈下有赫。慘慘雲鱗飛。李宕宕月輪圻。

歎來波濤傾。帆秋擲去劒戟擲。出死入之生。嶼竹效順取其逆。功成了不矜。甫道錫逮羨有爽。顧盼何雍容。岩秋蹄

噉盡持擇。玉節排天街。存稗金鏡沸官驛。賜浴同瑤池。李升芻異沙磧。俄焉藏軒弓。岩秋倏爾告秦壁。蒼野方

晦冥。竹嶼天閑亦蕭索。有客登九巘。甫道經春禮重帟。麥秀層巒顛。岩秋柏擁深殿脊。下宮走羣神。存稗正寢肅宗

祐。陪葬諸臣皆。李立仗降王亦。其外分重屏。帆秋厥象張六翮。摩挲當瞑途。嶼竹憑弔記往籍。一馬時勒驪。在東

第一平宋金剛時乘。一馬什伐赤。在東第三平王世充。一馬霜蹄輕。手戈避單刺。白蹄鳥在西第三平薛仁果所乘。秋岩。一馬風毛拳。

腰箭帶九隻。李毛駒在西第二平一馬從虎牢。擒王信揮斥。了無碧絡羅。縱步驚脫軛。青騮在東第二平

迷一馬御東都。因壘乘阻隄。賴有絳幘隨。拔矢憐洞腋。颯露藻在西第一緊誰施刳劓。帆秋狀此凌岬略。用

代鍼虎殉。竹嶼聊佐輜龍役。閱歲經幾千。甫道作氣猶倍百。風雨聞喑鳴。岩秋星辰見睽陽。端相驚礮。碑生騎

畏跳躑。粵惟古周原。迷李考牧始秦伯。龍孫青海留。帆秋驥子赤岸獲。入坊使雲屯。嶼竹四郡閑日闕。田事洵孔

昭。道甫軍容率有繹。何期蕃馬獻。岩秋坐致胡騎迫。動地鞞鼓來。存稗千霄箭烽射。黃旗卓遙空。李紫電飛竟夕。

踏鐵鏗有聲。帆秋攬金浩無迹。郊死敵狼獾。嶼竹羞降代巾幘。遺蹟久混茫。甫道荒陵莽稍撼。金臺不復黃。岩秋羽

埒爲誰碧。牛羊隨寢叱。存稗樵牧任鞭策。吞聲西日斜。李迴立秋漢窄。將軍傷白頭。帆秋弟子失旁魄。粉墨日

蕭條。竹嶼精茫尙流奕。請看房四星。甫道暫暫亘天白。岩秋



壽王述菴臬使六十聯句

河岳騰精氣，奎光協斗躔。泰符呈景運，輔世仰名賢。玩畢豐玉推鴻寶，靈椿紀大年。鳳麟華胄遠，峯泖隱居

偏。吳泰來夙學天人貫，含章德藝全。幽思吞卦畫，妙解證蹄筌。嚴長明璀璨紋成錦，崢嶸筆似椽。董帷耽寂寂，

邊笥號使便。玩早折郗詵桂，先驅祖逖鞭。豹文終炳蔚，鳳藻必騰騫。泰來鑾輅臨江介，仁膏被海壖。四巡亭

伯頌，三禮杜陵篇。長明班馬才堪埒，楊盧譽敢先。詩題紅藥署，職奉紫薇天。玩簪筆揮珠玉，持衡掇杞櫬。丰

神欽仲寶，幹局重僧虔。泰來公望真隆矣，卿才信美旃。由來梁棟具，不慮雪霜纏。長明駱馬纔驚越，蠻烽欲照

滇，弄兵連响町。負固集穰穰，玩慷慨從軍志。艱難出塞篇，金沙波浩瀚。鐵壁路回遄，泰來伐叛舒長策。招攜

握勝權，傳書嗤陸賈。鑿空陋張騫，長明微外鴟音革。天邊虎旅旋，白狼充職貢。朱鷺奏喧闐，玩武庫將韜甲。

威弧未戢弦，連營趨玉壘。振旆指金川，泰來箐密千林暗。礪危萬仞懸，飛槿尋木杪。度索掛峯巔，長明風鶴殊

多警。沙蟲劇可憐，援桴勞上相。贊畫賴中堅，玩吹律和風應。攻車吉日涓，賈生工餌敵。衛國善籌邊，泰來帷

幄謀千里。機鈴必九淵，繩橋馳露布。雪嶺耀霜鋌，長明偃鼓驚三覆。鳴鉦駭兩甄，纔看驅虎兇。倏已靖氛祲，

玩欵寒輸寶馬，歌風徧芋田。燕然銘可勒，郁閣頌宜鐫。泰來絳闕頒新詔，彤墀繞瑞烟。承恩龍節迓，拜命鶴

冠鮮。長明棘寺平反數，槐堂歲月延。樞庭辭僂直，方岳寄旬宣。玩禮意隆三接，光榮沐九遷。雲山豫章郡，琴

鶴使君船。泰來滕閣延清賞，匡廬對瀑泉。聲華馳赤棒，況味守青氈。長明暫許松筠返，俄聞綸綍傳。河潼開旭

日。泝渭駐雲駟。元豸節霜威肅烏臺。月彩圓。香山仍學道。摩詰愛逃禪。秦籬菊寒逾秀。巖松翠更妍。長憶  
從龍榜後。相契鳳池前。人海嗟寥闊。官曹喜接聯。元江湖來素侶。車笠訂前緣。秦共理懷人篋。欣逢初度  
筵。岸容花爛漫。庭影鶴翩跹。長八水青霞映。三峯紫氣連。紅包商嶺橘。碧綻嶽池蓮。元織女初迴馭。洪崖  
正拍肩。謝庭春樹曉。荀幄午香煎。秦卽事真蓬閣。他年友偃佺。琅璈聽競響。介社頌綿綿。長

開成石經聯句

孔壁羣經在。秋斯書八體更。請觀唐太學。道直紹漢東京。伊昔乾綱振。江寧張復。初因泰道清。殷憂開福  
祚。獻之仁讓戢戈兵。發迹同陽武。存除姦過子嬰。冗員裁伎術。季隻日見公卿。馭世方多暇。秋司天亦有禎。  
李充陪釋奠。道翟黼奏開鬻。秘閣東西列。原遺編甲乙呈。其時冬十月。獻二載號開成。鳳漏傳深禁。存天  
香雜佩珩。軒堯臨斧辰。季稷契掌機衡。先鄭原遙冑。秋臣覃敬署名。備官兼祭酒。道乞上法熹平。拜表稱  
干胃。止鋪墀久屏營。五三經屨屣。獻之百六卷從橫。帝曰嘉斯績。存疇咨展乃誠。宿儒須日拔。季天語自風  
行。識藉揚雄洽。秋讐資子政精。校量秦博士。道趨走魯諸生。法變陳留蔡。止形摹下杜程。殊文刪囹圄。日  
造。唐武后。新字戒靈靈。音彎。吳。樣自由元度。存音仍用德明。選毫知兔泣。季驅石有神驚。一一蒲車載。  
堂堂露闕盛。琅玕交動影。道絲竹暗藏聲。元白真箝口。止韓裴欲眩睛。扇天當北戶。獻切地倚南榮。峭  
似崩雲駐。碑駢疑駭浪撐。蛟龍時攫畫。季奎壁夜晶瑩。煥矣依天府。秋巋然鎮斗城。卜年傳萬萬。道碩畫

自庚庚豈意壇山石原止難藏汲縣塋斯文愁一墜之獻大夏竟同傾節角蕤苔蘚存碑棲題竄黽黽流傳多賈

版速季剝落半沈阮一片從樵牧帆秋何方避鼓鉦代移應鬼守甫道時去懼雷轟有客來開府原止多年此駐營

好君終好武獻幕吏竟非僮便訝播爲礮存碑翻成愛似瓊聖經危更續速季物理否還貞浮世眞過隙帆秋嘉

賓等食萍竭來同訪古甫道暢好值新晴壁水深浮藻原止林鴉細學鶯偶因尋屐履之獻復此觀崢嶸鈞勒曾

緘篋存碑摩挲獨倚帳升堂欽禮器速季忘味等韶箴與士爲模楷帆秋伊誰覆棟臺時清修廢事甫道公德及斯

氓謂中丞手自披趺額原止心憐共瓦鐙護加丹楯麗之獻之出帶土花頰石鼓初遷地存碑蘭亭頗覆罍是碑猶磊

磊速季試擊尙硜硜賴子窮三禮帆秋因公更一鳴許書時不用甫道周籀俗何輕响史譏非妄原止參功詎合旌

爲求文歷歷之獻直使意怛怛有口初嫌士對字从口漢文帝三田竟易品疊字从晶王莽改从三田罔非秦忌改秦忌

之用非字爲景葛書并影本作景葛洪字苑始加彡似此諸經易帆秋能無下士爭書循安國僞甫道傳亂左邱盲九易

惟從費原止三詩直取亨雅詞加虫鳥虫音虺禮本失濯鬋古文祧作濯玉筍非無伎存碑珉材若待評時如追

史佚速季隸豈守秦嬴當代開蓬館帆秋呈書及晏楹雅流肯蒼萃甫道藝術有根莖藜火虬檐澈原止仙才虎觀

盈百家刪稗莠之獻萬卷別瑤瑛論列須公等存碑招要盡國英陽冰曾獻東速季江式有餘情玉燭調方久帆秋

鴻都事合廣蜀經成露電甫道宋刻久榛荆作聖誠超古原止如川一到瀛卑唐徒爾爾之獻佚漢月醴醴揖讓

黃虞夏存碑存翺翔頡誦彭魯魚迷早辨速季科斗寫誰令舊刻爭留詠帆秋新材待發礪大書重作貢甫道文治翊

恢宏止原

上巳前五日同人觀桃杜曲聯句

韋杜春光麗。良辰好共探。帆秋地鄰天尺五。節近月重三。嶼竹澹沲煙痕斂。霏微霽景含。之獻遙瞻林灼灼。恰傍  
 柳毵毵。存釋紫霧藏深塢。紅雲護曉嵐。帆秋幾株浮遠岸。一樹照澄潭。嶼竹密蔭依叢竹。繁陰拂古柟。之獻枝頭鶯  
 語滑。蕊底蝶情憨。存釋笑靨迎風艷。嬌姿倚日酣。帆秋斜侵溪女髻。輕壓野夫擔。嶼竹螺髻堆濃碧。魚鱗漾蔚藍。  
 之望中迷匝。眺處極參覃。存釋渺渺通長薄。盈盈駐短驂。帆秋穿林驚睨院。掠水聽呢喃。嶼竹綴錦疑施幄。凝  
 香別有龕。之獻冶游窮水北。舊事憶江南。存釋礪繞幽人宅。凡桃花凋為趙溪環處士菴。唐六如號桃花橫塘波  
 似鏡。空谷石長谿。嶼竹草嫩宜調馬。桑穠待浴蠶。之獻晴絲空外卷。花氣晚來醺。存釋打槳多蘭艇。連杠動筍籃。  
帆秋狂思傾百榼。興每擘雙柑。嶼竹歲序驚飄梗。朋遊少盍簪。之獻驅車經灞滻。迴首隔崑函。存釋東閣賓還集。西  
 郊樂且耽。帆秋沖懷陪謝傅。雅尚得劉惔。嶼竹小隊臨青綺。行廚挈素盦。之獻炊鱸香噴碗。浮蟻綠盈甌。存釋飯煮  
 青精滑。茶翻白乳甘。帆秋珠喉憐薛訪。蠟板愛何戡。嶼竹鸞舞何妨達。魚噉未覺貪。之獻悠然齊物我。曠矣視彭  
存釋聃。競識題襟趣。終懷投轄慙。帆秋新篇凌鮑謝。深契託僑鄰。嶼竹促席元言得。揮毫妙義參。之獻永和蘭渚會  
 正始洛濱談。存釋坐久昏鴉集。言歸暮鼓籥。帆秋水嬉差可擬。泥飲尙能堪。嶼竹崔護門長掩。樊川路自諳。之獻他  
 年追勝賞。聯騎更趨躔。存釋

### 諸重光

字申之。號桐嶼。餘姚人。乾隆二十五年殿試第二人。及第。官至辰州知府。有二研齋遺稿。

#### 題施耦堂靈壁石筆山用仇池韻

君家靈鷲山。烟巒臥寒綠。自作此山主。看雲意頗足。泗濱產磬材。歷落藏崖腹。洞達滴溜穿。偃蹇迴波蹙。高價比球琳。方物輸貢牧。何年廟堂珍。玩作几案瀆。好事始米顛。一品壓羣玉。山南宮有淮泗流傳研山圖。峯勢互起伏。君今手一拳。鬻比握粟卜。便作海山對。渺與煙雲逐。清響時一聞。泠泠聲振谷。五岳游未能。

耦堂自號五岳臥游人 三竺見所欲。出人懷袖間。恍置吳山曲。持歸示鈍丁。短蓑舞獨速。丁處士鈍丁蓄靈壁石一岳臥游人 記長歌之

#### 七夕吳興道中

一天涼露洗銀鷗。碧浪湖頭始放眸。小艇爭分菱葉路。人烟多在荻花洲。仙家迢遞期今夕。行客漂零畏早秋。不用水嬉徵故事。茗南端合付清游。

#### 上元前夕寶幢鑑南過飲

萬人如海冷官閒。風月經時上笑顏。客爲踏燈成不速。門非覓句亦常關。詩傳餞臘迎春裏。予與耦堂賦 各八首席花賞梅兄。蔡弟問。齋中時供呼。取比鄰來共醉。墻頭免破濁醪慳。謂蘭泉同年 中傳看水仙一盆。時呼取比鄰來共醉。墻頭免破濁醪慳。

趙雲崧同年移寓裘家街卽海昌陳文勤公邸第也三年前予曾寓此賦贈

閒坊老屋記平泉。占斷城南尺五天。卜宅難於田二頃。徙家竟似歲三遷。雲崧年來屢易寓舍何妨渴示相如病。莫

笑貧無趙壹錢。載酒門生來問字。可容絲竹列彭宣。時雲崧分校順天鄉試

### 王文治

字禹卿。號夢樓。丹徒人。乾隆二十五年殿試第三人及第。官至臨安知府。有夢樓詩集。

蒲褐山房詩話。禹卿賦才英俊。尤工書楷法。河南行書效蘭亭聖教。入京師。士大夫多寶重之。時全侍講魁周編修煌奉使琉球。挾以俱往。故其詩一變。頗以雄偉見稱。及歸。以第三人及第。益風流自喜。不四五年。出守臨安。又二年。被劾。東還。遂無意于仕進矣。其時錢塘袁子才壯年引退。以詩鳴江浙間。禹卿繼其後。聲華相上下。年未五十。卽歛禪學。精於楞伽。唯識二書。晚年刻其詩。卷中多秀句。如將離更唱紅蘭曲。相憶應看青草心。情淹妓館梅花時。節上僧樓皆堪吟。詠。

### 將往琉球留別諸同學

平生滄海心。十載困羈紲。京華縑素穿。策蹇行蹀躞。迫隘思遠游。煩渴成內熱。何當懷抱寬。暫使樊籠脫。琉球東海東。世界隔潮汐。重譯求分符。亦足美皇業。浮查使者星。夙昔故相識。茲行偶然遂。聊用窮溟渤。洪濤割陰陽。中流雲漢沒。寒風吹天空。白日大魚出。驚險絕比倫。心胸庶開豁。丈夫不得志。湖海隨播越。野鷗萬里波。生事那可說。觚稜下殘暉。驅馬離魏闕。經過故閭里。重覲舊林樾。親朋欣我至。壺榼自提挈。飄挂浮玉風。屐穿黃鶴雪。十日累千觴。流連不知歇。歡會無常期。愴焉念離別。夜寒江月落。鷄鳴催曉發。

函谷關

兩山插雲霄。一峯當門戶。孤關扼其下。百尺鑄局固。鷹隼飛卻迴。驂騑愁失步。東來盡平行。至此訝無路。入關途更隘。方軌恐難度。強秦昔恃險。要害於茲據。一夫足噬嗑。九國盡猶豫。由來得地利。天意亦難迂。清時罷泥封。仙氣常紫霧。願受五千言。嵩華躡芒屨。

登萬壽閣望華山

華嶽天下奇。巒岫逞百變。三峯矗雲外。茲閣當其面。拱手羣帝朝。舒臂巨靈現。落日蒸爲雲。古雪積如練。咫尺青蒼飛。儵忽紅紫眩。其後枕大河。玉帶繞秦甸。混茫銀漢接。一氣誰能辨。平生海山游。絕域迹頻踐。河岳相磅礴。壯觀特未見。安得臨絕頂。南條尋討遍。餐霞忘歸來。冷然御風善。

題畢秋帆同年倚竹圖

人生豈合居無竹。袞袞紅埃使人俗。開圖忽覺寒翠生。滿紙琤琮敲碧玉。萬竿叢雜緣山阿。西轉坡陀臨水曲。赤日不到晝亦陰。清風欲來雲自綠。昔君得意逞馬蹄。共羨長安花看足。千紅萬紫競爭春。何似孤根傍茅屋。與君交契託歲寒。柯葉不改凌霜肅。看君玉貌宜公卿。結實會應巢鳳族。翰林官貧朝苦飢。未免佳人在空谷。安得千戶同封君。一飽無餘自捫腹。移書急爲問家園。三徑休荒舊松菊。

木芙蓉

蠻方八月猶苦熱。一雨始覺煩暑滿。晚晴推篷有喜色。幽花照水臨清泉。一朵兩朵正殊絕。半開半斂尤嫣然。雨枝脩脩淚猶濕。風葉冉冉鬢疑偏。秋葩雖艷異春卉。別有風韻難爲傳。穠桃俗李逞妖冶。金盤華屋施朱鉛。豈如貧女姱容態。天寒空谷真娟娟。我行萬里飽風露。只有山色爲人妍。辰州已南萬峯秀。浮峯削翠攙青天。未知造化定何意。故置尤物當窮邊。卽如此花乃國色。凌波顧影殊堪憐。仙城不遇丁石主。湘浦並無屈宋攀。山涯海角自榮謝。祇恐香色隨雲烟。黃州海棠亦寂寞。唯與坡老消殘年。

個舊廠

滇中山色半粗醜。草樹稀疏如禿叟。伊誰掃出萬螺青。莫是仙人鳳尾帚。由來此地五金聚。寶氣潤於膏沃首。天晴朱碧耀泥沙。夜靜虹霓貫星斗。遠人驚利紛沓至。連甍芟茅安井臼。頓令空谷成市廛。鈴馱駢闐車轂走。朝來萬指事椎鑿。地脈山筋十斷九。洪鑪鍊冶無休時。時見霏烟散榆柳。豪商大賈裘馬輕。銅戶砂丁衣面垢。眼前咫尺分榮枯。何必朱門與蓬牖。卻怪山靈不自愛。韞璞藏輝豈難守。故將財貨眩愚蒙。自取鑄劊求擊掇。至人不貪以爲寶。填渠溢岳吾何有。

城南晚步

最愛城南路。無人自往還。孤舟殘雪岸。獨樹夕陽山。黃竹圍池館。紅橋臥水關。戴公招隱處。幽絕未能攀。

八公洞納涼



白雲生古洞。赤日隔林邱。松籟千山雨。泉聲一壑秋。茗香閒自酌。花落坐還流。他日誅茆處。支公爲我留。

舟夜

旅客三更夜。空江萬里天。水涵星不動。帆正月同懸。遠樹攢春薺。平蕪入曉烟。近鄉無限意。倚棹未能眠。

潘曉樓人日招飲北固山下

北固孤峯聳碧天。閒居潘令愛周旋。雲銜晚日穿林外。雪擁晴山落檻前。人事飄零違舊雨。江春蕉萃入新年。酒酣倚劔重吟望。此地興衰倍可憐。

次日豐見城按司攜首里諸公子見訪更索新詩再賦

那霸清江接海門。每隨殘照望中原。東風未與歸舟便。北里空銷旅客魂。盡夜華燈舞鸚鵡。三秋荒島狎鯨鯢。他時若話悲歡事。衣上濤痕並酒痕。

閏九日同全周兩册使雨中登湧田崎欲游城岳不果歸憩憑氏園小飲周詩先成卽次其韻二首

一雨秋林萬壑幽。使星冠蓋共遨遊。未妨公讌頻吹帽。已分重溟不繫舟。五字河梁蘇屬國。經年書記阮陳留。生平不淺登臨興。霑濕還應到上頭。

殊方物候幾回新。猶白衣衫染庾塵。城岳忽迴金齒屐。藍田剛對玉山人。松筠密愛清陰遍。禮法疎緣懶

性真鴻跡醉餘從點點。他年誰爲拂紅巾。

揚州逢琉球國謝恩使者馬宣哲鄭秉哲留飲舟中述別話舊慨然有作二首

海天誰信此相逢。情話邗溝半夜鐘。萬里秘書歸日本。經年季子聘周宗。月高更酌麻姑酒。

麻姑山爲琉球屬島產酒

絕潮響還疑辨岳松。辨岳爲中山最高處多松柏別後相思何處寄。瀛波春靜臥魚龍。

流水年華重感歎。隨槎曾向十洲居。暎花變女春鳴瑟。秉燭仙童夜侍書。斷素零縑鴻爪在。紅塵碧海雁音疎。漁竿仍作滄江客。慙愧王門舊曳裾。

小集郭立齋舫樓劉雲峯以種竹後至

霽色流雲亂遠峯。三層樓迴倚高春。青山有約聽殘雨。滄海無端感舊蹤。憑檻亟宜持酒賞。耕煙未得荷鋤從。紅牙玉瑄填詞處。雲峯工小合明日應添翠幾重。

送曹素爲令新都素爲余癸未禮闈分校所得士也

馬首春深指綠蕪。江山今古識魚鳥。峯迷白雨千盤峻。棧入青天一線孤。簾肆有人還待訪。芋田無稅不須輸。微聞父老相傳語。只望文翁再剖符。

倉卒

倉卒征南下碧油。初聞祗席過貔貅。服牛未定輸糧策。縛虎先爲入穴謀。豈料空拳真遇敵。當時一飯勝

封侯星橋火樹張燈夜。羽檄飛馳正未休。

蘭池笠轂舊聲名。一省何嘗替孟明。軍政纔聞誅後至。將星忽報落前營。九龍移仗邊風急。雙鶴橫霄塞

草平。可惜希文窮塞主。長天落日閉孤城。

贈圖侯益亭時候以副都統鎮京口

貔貅百隊擁花驄。照耀轅門海日紅。玉牒銀潢九天上。高牙畫戟大江東。右軍龍虎揮毫健。思訓雲山設色工。頻枉旌麾下茅屋。賢侯真有古人風。

寄懷宋小巖兼柬曹竹虛祝芷塘

每向東華散玉珂。相於花下酌紅螺。歐梅自許賢豪聚。蘇李偏教闊別多。棋局居然更甲子。酒壚真是邈山河。何哉解話當年事。謂李也與尊前喚奈何。

吳璜

字芳甸。號鑑南。山陰人。乾隆二十五年進士。官戶部主事。發四川以知州用。殉難。贈巡道。入祀昭忠祠。有黃琢山房詩鈔。

蒲褐山房詩話芳甸爲予已卯鄉試所取士。承其尊人樸庭之學。專心吟咏。官戶部時。間一二日必造子談詩。雖冬夕嚴寒。雪花如掌。僕人凍涸。手足皆僵。而芳甸猶堅坐清譚。斷斷不已。後從總督劉君乘恬辦金川糧餉。兵潰。行至登春。戰歿。沈太守清任。蔣編修士銓。皆爲作傳。君詩春容莊雅。而才氣自不可遏。句如門掩梨花經雨瘦。庭深芳草逐愁長。孤燈蟋蟀催詩急。疎雨梧桐入夢寒。碧雲影

斷人何處。黃葉聲寒。雨忽來。忍寒偶隱。烏皮几。感奮頻挑。鳳脛燈漫。攜謝朓驚人句。要和張華勳志。詩華年。忍向閒中度。妙諦都從悟後。參夢迴。紙帳梅花白。笑檢綈袍。草色青。苦工麗。可傳。惜其集出。于烽火之餘。未爲全備。

### 送胡孝廉功甫之雲中

仲秋號盲風。朔氣來絕塞。仰視向南鴻。孤飛不成隊。與君鄉里交。異地始槃敦。談經萃紛綸。論史熟興廢。固宜重簞抽。奚止三舍退。同心肯離居。晨夕願相對。短衣袴褶裝。胡爲遽行邁。莽莽居庸關。屹立度何隘。千仞削谿飭。一線通茫昧。亂石橫亘之。怒落馬頭碎。霜凝夜裂笳。日出曉翻旆。揚鞭問前程。穹廬天四蓋。行逢射雕兒。指點平沙內。飛狐口霧烟。彈琴峽鳴瀨。率率入雲中。劃然開眼界。回瞻向來路。已覺高百倍。隕陰弔戰場。兵革擾前代。京觀築鯨鯢。亭障連烽燧。殺運久方除。赫聲遠能屈。我朝控皇輿。華夷大無外。遂令邊徼靖。撤禦忘要害。壯游託昇平。懷古發悲慨。嗟予滯京華。未得連征轡。望遠欲言愁。加餐須自愛。茱萸插重陽。念子登高會。

### 古劍歌

太倉王孝廉廷和。家藏古劍一。是其祖中丞梅冶公撫粵時所購。相傳爲故將某征蠻舊物。龍身虎氣。錚然有聲。上巳日同人會飲。孝廉寓齋。各賦一篇。

空庭白晝風怒號。三尺水捲聞驚濤。雌雄出匣光逼射。龜文縷理陰陽交。想當初造合時日。金生火尅無

差毫雲螭捧爐雷擊橐。太乙下視潛磨么。千鍾百鍊鑄始就。陸剗犀象水剝蛟。往者南粵偶梗化。土司雜沓連紅毛。蠻兒綵髻搖箭箛。累載剽掠民奔逃。箐烟霽嶺戢敵騎。盲風拍浪掀狂艘。將軍定計搗巢穴。腰領亂刈如蓬蒿。手提此劍闕哮虎。腥血透染蟠花袍。功成脫佩掛梁柱。猶聞戰鬼聲悲號。中丞茲土昔秉節。千金索購心力勞。摩挲盡日劇不厭。皎若鸚尾滋鵝膏。祖孫再傳遞愛護。入夢彷彿徵三刀。國家承平不廢武。合兵正向臯蘭慶。會縛谷蠡斬母寡。稽顙貢獻來葡萄。惜哉此劍棄不試。徒佐禊飲親風騷。王郎王郎勸君一斗之濁醪。爲君斫地歌且謠。升沈顯晦縱莫定。豈有神物終藏弢。豐城獄底尙掘取。擅名何況真豪曹。酒闌更靜客散座。起看煜煜星辰高。

洛陽

攬勝中原最。承平氣象閒。河流抱伊闕。嶽影護秦關。耕鑿銷金甲。鶯花怨玉顏。離離宮寢盡。惟見北邙山。

仲夏偶成

已齊得喪判秋毫。禪榻茶烟避俗囂。自有詩書爲麴蘖。不嫌門徑長蓬蒿。明珠未肯輕投鵲。古井何曾再起濤。使學盧郎殊不惡。興來痛飲讀離騷。

春日樓居

矚矚初日上簾鉤。無數春山翠入樓。多病懶裁鸚鵡賦。薄寒還御鷓鴣裘。江梅渺渺懷人遠。芳草淒淒動

別愁更有心情難解釋。潘年未到雪盈頭。余年未二十而雙鬢已斑

寄懷商丈聯三

蒼舊應推第一流。蕭蕭華髮已盈頭。歸田早賦張平子。下澤羣稱馬少游。蟬噪古槐愁夕照。雁橫銀漢寫新秋。枌榆社會知將近。好與鄰翁互獻酬。

和商寶意舅氏移居詩

帝城歲晚忍分攜。擇處蘧廬近市西。伏櫪還存千里志。安巢偶借一枝棲。芳華未必閒中澹。得失都從悟後齊。猶憶校書清切地。柯亭劉井未全迷。數門臥雪苦無徒。深巷平填草不蕪。魯酒消寒原易醒。唐花得氣卽難枯。長吟鎮日頻搖膝。問字何人競挽鬚。抱得胸中生意滿。虛窻任掛北風圖。

立秋前三日步至陶然亭

偶著芒屨策策行。到來心蹟喜雙清。短蘆一帶低如屋。空翠千層遠入城。野曠每留斜照久。地高已覺早涼生。老僧解得登臨意。勸聽殘蟬曳樹聲。

與嚴東有舍人夜話疊前韻

眞成雙俊巷中居。密坐圍爐約肯虛。乍接清談頓忘倦。頻來苛禮要全除。春風桃葉隨波長。夜月瑤花照

影疎細數平生吟眺地。柝聲已報轉更餘。

檢點青衫淚已乾。論文不改舊酸寒。賞音自昔同心少。對局真慚下手難。舊業可堪荒蠹簡。生涯只合把

漁竿。煩君轉語天隨子。翦取吳淞一幅寬。雲間陸蘭坡善畫時同寓

題江南杏花春雨圖

吳波如練熨難平。雨後朱霞夾岸生。誰倩邊鸞寫鄉景。十年歸夢又清明。

程之章

字柯坪。仁和人。乾隆二十五年進士。官雲南通判。有爽籟山房集。

蒲褐山房詩話。柯坪年少工詩。力求排募。杭編修董浦謂其思既深。湛才復警拔。天工人巧。交擅爲用。傳侍講閣亭。謂其警幽律扣虛牝。不風而體自輕。非秋而氣已冽。蓋互相矜賞如此。服官未幾。旋以銅額多虧。幾千頌繫家。既破而身隨之。文人九命。可爲喟息者也。

銷夏分詠投壺

哨壺本禮經。制肇箛篔作。鳥氏易以金。鑄等六州錯。虛中蟠腹枵。直外彊項削。其上盎口銜。其下臙足斫。鵠儼熊虎張。矢備柘棘拓。簫材榦尤美。尖銳霜淬鏢。錫名仍僕鐸。參製謝礫鏃。賓筵揖陟升。司射奉中度。堂堂庭異宜。旦晚盱殊託。締視拾投始。進止必以恪。審固心手調。省括盈縮酌。一控一縱然。再接再厲各。或撥觸虵驚。或奮迅龍躍。或既往復還。或欲前轉卻。或挺若植竿。或橫如秉籥。或巧並穿楊。或易過委藿。

洞胸詫積雄。貫耳懼餘虐。銳前楚札堅。怯後魯縞弱。嗤踟躕輕儇。勝丸劍揮霍。鏗鉉投石籛。颺搗戰風鐸。頃之狸奏終。執算謹錯愕。頓釋兩軍嚴。還束三章約。驍者慶馬從。劣者引觴釀。偶中詞何謙。幾敗語非謔。古人重游藝。能事擅祭郭。賦推元淑工。銘詡九齡博。上官昔著經。司馬曾更格。不惟攝威儀。且以祛炎熇。奈何末俗愉。鮮解雅歌樂。閒呼師本盧。慣效烏曹簿。牧奴有前言。哂爾徒業惡。

秋日陪鄭晴湖先生泛湖憩蕉石山房同作

秋禽警臯露。幽意喚遊客。一櫂弭湖滸。寥天劃層碧。閒穿葭菼叢。冷逼鳥鷺宅。因緣步崇崗。脫葉喧笳屐。闌迴磴道牢。礪澀蘚痕積。絕頂豁吟眸。齋舫六柱闕。彎環鑠長隄。巔巒挺奇石。葉葉皺螺濃。稜稜帶竹瘡。松風激澄潭。瑤席湛盈尺。寂坐俗耳砭。萬籟矧蕭槭。子春山海情。中散烟霞迹。并入斜陽鈴。塔影壓峯脊。

吳山忠清祠

第一峯頂摩煙霄。蟻行詰屈蟠林梢。何年金碧闢靈宇。榜顏英衛雲日昭。惟公忠烈難覩指。不獨吳市佯吹簫。爭桑釁已釀蠶妾。劈爻禍更延王僚。屠潛伐六父讐雪。鞭尸未許紛譏嘲。夫差未造啓越寇。石田安得抽嘉苗。蛇門竟忘雙指痛。鼠壁復厭苦口嘍。彼哉么麼白氏子。鷹視虎步讒中刀。夸光妖女蠱君側。綺羅綠黛春風嬌。屬鏤鋒淬碧血鏞。鳴尼哀怨同楚騷。遠追龍比披赤膽。近挾宰種揚靈濤。素車白馬日再至。陽侯擺舞風蕭蕭。羅刹之水凡三折。赭龕夾峙翻鼉蛟。有鹹有腥有滑膩。居民往往愁漂搖。公靈在天



力捍障。沙隄詎數鐵幢牢。漢唐以來重神惠。流傳俎豆非一朝。大中祥符禮更盛。蘇王撰祝揮霜毫。卽今安瀾慶環堵。祠官蠲潔升醑椒。我來雨過萬峯翠。松楸蔭日森堂坳。扶目東門事如昨。懷古翻令中心恹。詩成醉酒緬餘烈。胥江浩浩胥山高。

季弟之式以法製鮮荔枝見餉走筆荅之

江鄉六月蒸炎熇。悶思酌水翻天瓢。浮沉瓜果苦無味。忽見離支百顆筠籃拋。我聞閩粵之地產最饒。丹砂作袂瓊作膏。君謨舊譜三十二。陳紫江綠嘉名標。泉州藍紅第其次。重之不啻綏山桃。虎皮蚶殼及龍爪。餘者一一甘投醪。子午谷口紀唐貢。馬馱車載同包茅。一日二日色香變。按圖令我心中恹。安得越溪度嶺綠榕陰底住。興酣啖徧丹山椒。伊誰分餉及老饕。惠連吾季人中豪。風前笑解絳羅袖。珠顆滴滴新辭條。非以鹹製非蜜漬。方法豈類人間操。我饒對此叫奇絕。得毋紅塵一騎爭騰超。亟呼我醜潔我庖。侑以松花之釀。杞皮肴。一嚼宿醒醒。再嚼殘暑銷。芳甘沁齒冰雪冷。恍若金莖曉露零。三霄枯腸那用醒。翻澆楊梅盧橘詎爾曹。吾欲爲爾賦。惜無曲江巨手揮宣毫。吾欲爲爾畫。又無元瑜妙墨霏生綃。投贈例有瓊玖報。長物何在虞噉嘲。哦詩荅君君勿哂。請當漢錦十幅裁蒲陶。

寄懷橫塘胡二朗汀

東郭幽人宅。桑陰畫掩門。停雲低列嶂。落日淡孤村。野闊移帆影。橋平壓漲痕。定知吟興劇。叉手對籬根。

避世牆東客。耽吟洛下生。芸房抄朮序。水艇狎鷗盟。風定釣絲直。雨餘竹箬清。臯亭山色好。涼翠撲簾旌。

齋居漫興

分無蠻觸擾閒蹤。跌宕圖書興尙濃。行葯偶穿深巷屐。尋僧時趁隔湖鐘。石排甲乙苔斑瘦。魚戲庚辛水影重。養就天慵聊自遣。何因薄技試屠龍。

登吳山尋青衣洞同丁太健

春山幾摺葛蘿捫。洞口青衣迹尙存。石扇迎風醒鶴夢。砂牀過雨爭苔痕。探書定有靈威守。採藥誰從抱朴論。鐵篴一聲仙籟杳。隔江巖壑夕煙屯。

南湖卽事

參覃夏木逕斜通。玉照堂空剩釣筒。小試竹爐烹雪乳。水亭消受白荷風。

題方三塘探梅圖

消息枝頭一線春。鴨頭新漲碧粼粼。酒寒夢醒江南路。知有月明林下人。

吳楷

字景儒。江陰人。乾隆二十五年進士。官騰越知州。有退圃集。

蒲禍山房詩話。乾隆戊子己丑間。緬甸因蠻暮木邦土司內附。侵犯邊境。屢討未克。乃命忠勇富察公爲經略。率兩副將軍討之。惟時滿漢官兵徵調數萬。又有吉林福建水師造舟下南大金江軍實。

所資動須百萬君。以一知州播柱其間。供億浩繁。無不咄嗟立辦。督撫倚藉。如左右手。軍帥皆器其才。師既罷。將薦於朝。而君以積勞成疾。乞歸。不數年而卒。時論惜之。詩非專長。然匆遽中援毫立就。亦多清雅可觀。

楊林驛

古驛楊林路。重來十六年。斷雲村口寺。殘雨海中船。滇中水之大。昔稱爲海。歸計憐雙鬢。秋懷共一天。匆匆冠蓋集。使節又臨邊。

珠湖望月

清冷月色到湖邊。瞥見他鄉分外妍。是處青山連郡郭。幾聲柔櫓出江船。風和不覺波光動。酒醒應慚客思牽。此夜此懷誰可訴。臥聽流水響潺湲。

乘風過岳陽樓不及一登感賦

岳陽城郭枕寒流。天下江山第一樓。雙鬢遠攜蒼洱雪。三年老傍洞庭秋。雲烟每向忙中錯。筋力都於懶處休。後樂先憂懷往昔。臨風笑我逐浮鷗。

侯朝宗有媚香書畫之章中鐫俠骨稜稜四字呂素園爲詩以誌卽用其秋字韻

壯悔堂開傍畫樓。印章零落有人收。柔情小住秦淮月。俠骨爭高梁苑秋。北里桃花歸樂府。南都金粉剩風流。如今又得佳公子。大阮詩篇與唱酬。

# 謝啓昆

字蘊山。號蘇潭。南康人。乾隆二十五年進士。官至廣西巡撫。有樹經堂詩集。

蒲褐山房詩話。蘊山爲覃溪少卿入室弟子。篤信師說。故宦轍所至。留心著撰。在京口邗江。遇古蹟題詠。而表章之。又得秋帆制軍史籍。考未全之本。補綴成書。凡若干卷。至桂林。作粵西金石志。與覃溪粵東金石志並行。又招縣丞王尙珏。孝廉方正胡慶等。修廣西通志。徵顯闡幽。搜羅博洽。爲詩不名一家。而詳于詠史。足資後來考證。

## 台州勘災紀事

嘉慶二載秋七月。耿耿銀河出復沒。牛女之次台階旁。有風鼓自土囊穴。初從大塊發噫氣。旋翻圓嶠巒。蓬勃舸艦如山浸黑洋。魚龍奮鬣驕白日。飛廉布陳鳴喧。天瓢覆雨灑倉猝。排山萬馬驅潮來。嘉禾盡偃木斯拔。保抱攜持遺老稚。鬼哭啾啾及枯骨。豈惟茅茨捲三重。但見屋瓦飄百室。牢盆失利空白波。竈戶無炊剩黔突。日臨日黃太與寧。沿海居民遭蕩析。怒聲幸逢孤嶼止。猛勢不向溫溪折。是日大汛而溫州潮不到。因上游泛溢。勢阻也。太守飛牒告大吏。敷奏于帝語皆實。我職旬宣亟命駕。星言不辭道路躓。周巡回浦歷章安。甌國村墟一覽畢。其人樸儉安耕漁。其俗峭厲尙剛烈。爰頒帑藏載後車。分遣掾屬勤撫恤。萬間未暇庇廣廈。一椽可補當慈筏。載以舟楫資糗餌。要使軀命得生活。烏葬火瘞非常經。掩骼埋胔用仁術。耕不餘三民。乃咨徵緩其一政有秩。去秋此地亦風災。秔稻尙未被漂泊。今歲西成已失望。未可拘牽泥一律。方今聖人大澤施。勿使方隅一夫失。租賦屢荷蠲萬億。粟帛況又頒毫蓋。太倉有積因陳陳。升斗何會計屑屑。海

墮地瘠鮮蓋藏。民生苦窳謀竭蹶。上則下則有等差。民田蕩田豈區別。我慚膏雨歌黍苗。忍令斥鹵納穗。枯祇宣上德布仁風。匪博羣黎誦生佛。澤中鴻雁集無哀。海上荏苒殲可必。

水碓

累石截飛濤。機心學桔槔。米舂雲子白。水激月輪高。鴉軋聲相亂。循環柄自操。回思荆布室。相杵太劬勞。過姚江懷王文成兼題遺像二首

指揮文吏靖風煙。蓋世經綸達變權。南斗一星扶北極。西江隻手障東川。公有造于我邦甚鉅陽明洞室談經啟。廬嶽碑文紀績鐫。撼樹蚍蜉成底事。勾餘俎豆且綿綿。

都堂忠信感貂璫。蜚語無端搆豹房。講學生徒懷偉畧。銜枚號令定巖疆。龍場謫處居何陋。先生謫龍場驛丞築何陋鯨海功成讓未遑。宴坐九華無一事。雲中冠佩尙飛揚。先生生日有雲中之異

桐廬舟次口占是日爲余六十開一生辰兼柬沈磐谷

符灘過盡又洋灘。我似鮎魚上竹竿。舟小路紆行自得。飽看嵐色當朝餐。  
晚年哀緒不堪論。怕觸絲桐憶彩雲。時妾鄭氏已亡貽我延齡丹五色。定須訪道問桐君。桐廬以桐君山得名

一周花甲從頭數。此後光陰立腳難。晚節吟詩同沈約。西風人瘦菊叢寒。

到處題名翠壁間。家風賢守六朝山。年來無復西堂夢。池草經霜兩鬢斑。舍弟砥山上世已三年矣。

### 錢受穀

字黃子。秀水人。乾隆二十二年召試。賜內閣中書。二十五年成進士。官雲南迤東道。有燕貽堂詩稿。蒲褐山房詩話。黃子。尊人爲阿文。成公受業師。亡於京邸。黃子方弱冠。扶柩以歸。家極貧。從其姊夫沈編修昌字于湖北學幕。亦皆徒步往來。既由召試入中書。成進士授庶常。改戶部。悉心核算。人謂幹才。及觀察滇南軍需。旁午。凡有勞苦。必身任之。而操守清潔。不肯絲毫苟得。雖屋宇卑陋。飲食粗糲。不恤也。少時讀書。彩爲絕俗。在滇南時。每至五更。夢醒。輒取昔時所誦如治安書。天人策。徐孝穆與楊惜書。庾子山哀江南賦。劉蕡對策。杜牧論兵諸大篇。踴壁溫之盡一篇。乃已。奴隸驚起。余輩深愧不如。

### 秋日戲簡蘭泉璞函次韻

書生敢望弓車錫。潦倒長年空四壁。一朝落筆戰塔墻。紙窮聲響如霹靂。沙場歸後更從軍。僕射如兄應感激。自慚典午非長才。豈有奇謀獻深幕。九隆儻屋笑放衙。似水蘧廬正幽寂。無心服散瘴。自消有術醫民方。早覓蠻城時雨兆。歲豐蓄耳秋宵聽。邠笛可憐此樂吾最知。久與邊氓共休戚。呼童且脫豪豬靴。衣上征埃自滿滌。平生禪悅抵八珍。鹵饌南烹總堪喫。前身要是行腳僧。日日勞形轉安適。雲間好友今詩豪。並舍高吟不常覲。惟當一醉慰天涯。昨夜糟牀濃乳滴。潑醅轟飲張吾軍。毋戰猶能萬人敵。

### 蘭泉四疊前韻見贈作此奉荅

四疊新詩百朋錫。掉臂行空臨絕壁。知音況乃遇中郎。爨下琴材如霹靂。高張古調易慨慷。促柱危絃自

悲激。天南風景秋最佳。片段涼雲研輕霧。軍書暫輟幕府閒。一室跏趺坐禪寂。宰官衲子互輪回。合眼前  
身定堪覓。侵曉哦詩暮誦經。那有閒情到箏笛。與君不獨稱同年。過江婚宦皆世戚。君工磨盾我轉輸。共  
佩青萍雪霜滌。頻年戰伐緬田荒。飽飯何人充口喫。飄零四野走纏頭。不歎天朝更誰適。去歲夷奴君眼  
看。朝琛未獻爭私覲。檻獸應知勢厄窮。涸鮒終望濡涓滴。詩成寄君君合嗤。豈有書生能料敵。

四疊前韻荅璞函

角陣吟箋煩載錫。尺幅珠光射束壁。捲藏且自防六丁。掣取應愁騰霹靂。君詩本是廣長舌。萬疊豪波中  
蕩激。又如無形之丹青。妙轡高懸揭簾幕。我生失學緣簿書。廢井無瀾自枯寂。雲山樂志儻可期。談笑封  
侯幾時覓。低頭只拜趙倚樓。好句聯翩賦長笛。蠻鄉秋早生暮涼。何事無惊獨憂戚。與君屈指話洗兵。瞥  
眼西風場圃滌。土司城外萬黃雲。長腰香稻流匙喫。是時元戎奉詔還。君去蒲輪頗安適。下車一揖多故  
人。冠蓋京華盡來覲。兩年草檄氣尙豪。洒硯先催墨池滴。落筆中書四座驚。集賢學士無人敵。

桐城道中

桐鄉小邑清如畫。雨後諸峯綠漸齊。挑菜兒童山上下。採茶女伴崦東西。一叢柳浪催歸語。十里桑陰布  
穀啼。春晚江南好風物。悔教身世自栖栖。

憶三塘二首

蟻殼窻明射綠波。螭頭小舫滿官河。幾年藏酒三塘路。醉聽吳娘鴨子歌。  
薰草香薰一道清。春風簾額問三生。朱樓白塔相望處。別有傷心畫不成。

### 王曾翼

字敬之。號芍坡。吳江人。乾隆二十五年進士。官至甘涼道。有居易堂詩集。

蒲褐山房詩話芍坡不以詩名而諸體皆工無慚作者如苦雨云長埒何時堪躍馬深林昨晚又鳴  
鳩籃輿云浪喧危峽千堆雪香窈幽花一片紅謁楊忠愍公祠云謾國何人開馬市孤忠獨見觸龍  
麟初度云前程底用占靈筭歸  
計惟應理釣竿皆名家句也

### 曉行過河入峽

鷄鳴人乍起。草草理征轄。出門聞水聲。斷岸少津筏。馬嘶人語沸。燈火互明滅。百夫承肩輿。亂流儼飛越。  
昨度廣樓河。洶湧百丈闊。回頭有餘悸。到此增懷例。絕澗幸已過。連山復相接。微茫一線走。合沓千峯插。  
屨險多凌兢。繩幽愈縈折。披裘增曉寒。秋風吹颯颯。想見山中人。不知有六月。昔讀少陵詩。秦州詠寒峽。  
此間毋乃是。疑有太古雪。從來行路難。浩歎同一轍。

### 過洋縣

幼讀東坡詩。夢入篔簹谷。竭來古洋州。不見一竿綠。漢南風景好。此地更清淑。連畦秀稔稻。疊嶺森嘉木。  
累衲度迴溪。飛流戛鳴玉。孤村四五家。松下結茅屋。愛此劇瀟灑。欣然思卜築。不愁食無魚。但惜居無竹。



緬昔清貧守。燒笋佐肴簋。千畝在胸中。千尋掃尺幅。高風詎可攀。到今仰芳躅。邇日宦途人。怕瘦不嫌俗。欲尋噴飯處。佳話竟誰續。

游鳳翔東湖謁坡公祠

坡仙身自有仙骨。偶辭絳闕游塵凡。對策彤廷儲作相。剖符來試岐州監。扶風古郡富故蹟。飲鳳池頭開鏡函。蘭橈頻此泛鷗波。輕風拂拂吹春衫。八觀詩出人爭誦。山川景物供鑄鑱。名流所到洵不俗。耆好迴自殊酸醎。七百年來湮勝跡。尙留篇什貞珉劖。滄桑歷劫此湖在。玻瓈百頃澄波涵。後來太守亦好事。芙蕖徧植菱葑芰。四面軒窗看倒影。漁磯恰向波心嵌。曲岸疎花倚叢篠。長堤綠柳間青杉。東西早舫儼相對。臨流似欲張蒲帆。我來正值暮秋節。葭蒼露白霜飈嚴。宛在亭邊一凭眺。南山晴翠浮巉巖。肅拜祠堂識遺像。角巾鶴氅攜瑤絨。惟公大節炳千古。忠愛不避宵小讒。宦游到處輒選勝。蒼苔碧蘚留冰銜。東湖雖不比杭穎。藉公名字輝林巖。撫□□□□歎息。吟魂何處招□□。

歎陰舊縣

合沓荒山裏。孤城倚薜蘿。封疆秦地闊。井邑楚人多。興安一郡大。半湖廣人。短犢珉青隴。閒鷗泛碧波。息機吾已早。庶免丈人訶。

過紫栢山有廟云留侯辟穀處

夫子真人傑，蕭韓詎足儔。偶來挾漢帶，終竟報秦讎。借箸無遺策，藏弓有覆軻。寓言聊辟穀，誰見赤松游。  
甲辰紀事

築堡何年事，俄聞據石峯。穴深容聚蟻，山險接盤龍。底店稱同逆，芽溝起竄凶。一波方未靜，三孽更相從。深入孤軍陷，將軍竟死綏。出奇功自許，輕敵悔偏遲。警報中宵急，訛言衆志疑。大兵觀壁上，猶自執冰嬉。耦負聊延喘，重壕密暫迴。枯山無汲道，飛礮有轟雷。勢已如冰解，崩應厥角摧。游魂彌膽落，秉鉞相公來。十縣傷殘後，村煙斷曉炊。招徠仗循吏，蠲賑荷鴻慈。室毀田疇在，人歸刈穫遲。頻煩宵旰慮，西顧問瘡痍。  
雞頭關

山城高接棧雲秋，昨夜西風落葉稠。絕磴幾千縈鳥跡，雄關第一數雞頭。中原龍戰爭秦塞，蜀道驛綱走劍州。自此南至劍閣爲蜀棧，北至寶雞爲秦棧。一冒垂堂心膽怯，懸崖百尺瞰飛流。

### 曉過新豐

驪山迴望鬱蔥龍，古道陰盤復向東。此日枌榆非故社，當年雞犬識新豐。寒容慘淡凝微雪，先一日雪市語喧闐逐曉風。曾憶五年前過此，梨花幾樹雨濛濛。

### 出嘉峪關

酒泉西去陟崔嵬，嶺上雄關四扇開。萬里風雲通雁塞，九邊鎖鑰扼龍堆。沙飛漠漠分中外，磧度重重怯

往回正擬旋鑣俄發軔瓜州迤北近輪臺。本隨制府赴惠回堡勘災嗣有旨順往巴里坤查勘屯田事宜計過哈密尚有四程距烏魯木齊止數日程耳。  
 關門候吏劇殷勤記在西涼識使君。建節前塵徒爾爾棄繻壯志漫云云。征鴻豈認霑泥絮遊騎聊隨出塞雲。莫向長途說辛苦去年此日正從軍。

喀什噶爾

當年掃穴奏膚功。向化爭來譯幾重。城鞏徠寧歸禹服。山連拔達盡堯封。舊係兩和卓木之地乾隆二十  
達克山以內咸入版圖木棉遍野人能織。稗稻堆場馬解舂。掘地為坎布穀其誰識遐荒成樂土。萬年感戴聖恩醲。四年掃穴犁庭逆酋授首自拔中馬牛雜踰之  
 風聞一紙漫傳疑。入告倉皇事可嗤。誰向破巢尋卵翼。肯隨遺孽弄潢池。晏起伯爾克薩木薩爾三酋遠  
此事所必無也楚囚并自無三戶。漢將何煩遣貳師。今日訛言果冰釋。九重睿鑒早先知。竄多年誰與同惡乃忽傳烏合

自題辛丑蘭州紀事詩後

洮河南下接金城。赤子潢池竟弄兵。談虎今宵猶色變。燃犀前事極心驚。熟窺全局分功過。細讀新詩識姓名。豈但籌邊添白髮。磨崖從古仗書生。  
 時平當局事恬嬉。變起蒼黃蔓易滋。搏兔固須全力赴。亡羊深惜補牢遲。杜公諸將真詩史。裴相平淮有頌碑。山鬼國殤都人詠。那禁展卷淚交頤。

裴麟

字超然。新建人。乾隆二十五年進士。官編修。

遊盤山千相寺

路轉東峯近。紆迴磴道循。出山雲送客。入徑鳥驚人。地愜烟蘿性。身無泉石親。悠然三歎息。過此便紅塵。

此  
页  
空  
白

# 湖海詩傳卷二十三

## 吳泰來

字企晉。號竹嶼。長洲人。乾隆二十五年進士。二十七年召試。賜內閣中書。有淨名軒集。

蒲褐山房詩話。企晉。期清曠。意致蕭閒。成謂東晉許元度。劉真長之比。少中副車。選校官。俯仰仕途。非其好也。特以松滋山水之佳。勾留竟歲。旋以病歸。其大父吉安太守銓。歸築遂初園於木瀆。雲林杳靄。花葯參差。有柳堤鶯轉。竹溪烟雨。平橋夏漲。爽塉秋月。古堂晚香。莎邨觀刈。松門夕照。松閣聽濤。巖東霽雪。諸勝其尊。人用儀復。購書數萬卷於其中。多宋元善本。遂與江浙諸名士流。連膺詠座。無俗客。惟李布衣果。惠徵君棟。王光祿鳴盛。錢詹事大昕。曹學士仁虎。趙少卿文哲。張舍人熙純。朱明經方霽。上舍昂。凌孝廉應增。汪員外棟。張崗。沙維杓。兩布衣。及名僧逸雲。念亭。畫師則王存素。琴師則周紫芝。皆一時之選也。如是十餘年後。雖成進士。以召試。賜中書。而少無宦情。壯而彌甚。東南人士望之如仙。既而兄弟爭析產。出藏書而貨之。并售其園。於是同年畢公沅。招主關中書院。攜家而往。後又道至開封。年六十餘而卒。企晉才情明秀。尤嗜徵君所注精華錄。訓纂。故作詩大指一本。漁洋吳中數十年來。自歸愚宗伯外。無能分手抗行者。中年自定其詩十卷。為硯山堂集。徵君序之餘稿。皆藏於家。予與訂交。將及四紀。向所同遊者。零落殆盡。金谷玉山之雅集。不可復得。今取其詩而吟諷之。不啻山陽之笛矣。

## 十八盤

蒼崖破天根。壁立生萬象。丹梯垂鐵鎖。猿鳥不敢傍。天闕鬱嵯峨。風雲日摩盪。仰穿但壁削。俯視驚滂漾。孤松倒千尋。天矯忽奔放。飛泉劈陰崖。石角皆怒向。凌虛步彌跼。造極神乃王。冥思眞宰理。雕鏤窮異狀。遐哉七十君。靈蹟空想像。云亭尚崔嵬。簡冊應淪喪。吾將採瓊蕤。高臥觀疊嶂。

虎山夜泊

月白江氣寒。秋波澹容與。征帆投遠村。哀雁尋荒渚。惟見打魚人。隱隱烟中語。

月夜遲過湘雲不至

皓月映池水。竹柏生清寒。幽人何時至。悵望孤雲端。蘭蕙亦已歇。羅幕驚秋殘。舞瑟感幽獨。永夕起長歎。

西齋夜宿有懷朱孔林

木末歛餘照。宿鳥投深烟。寒山上微月。流影西齋前。竹柏稍掩映。池塘人悄然。脩寥感晨風。淅瀝聞幽泉。良宵復何爲。寤歎懷前賢。遙知掩關者。高詠南華篇。

天井灘

五里聞灘聲。驚雷聒晴晝。行人戒戩楫。欲往不敢驟。夤緣涉葭葦。倏忽抵巖竇。洪濤傾山來。萬竅各奔湊。仰窺若建瓴。直上比縣溜。石如癡龍蟠。水作外蛇鬪。中流入盤渦。震蕩幾致覆。馮夸憫其勞。靈風幸相佑。千搖遂出谷。迴波帶清瀉。長年顏始開。鄰榜曲已奏。迴思踏奇險。失足那可救。停橈一長思。久客悲老瘦。

皮篷

千山路盤紆。一徑行屈曲。疎鐘杳然至。隔水見茅屋。扣關聞經聲。入院但喬木。廣除沐新雨。春草芳更綠。道人頗忘機。深山伴麋鹿。手持貝葉書。招我松下讀。會心在雲林。眞賞愜幽獨。長林暝色來。人語雜樵牧。

歸路沿溪聲。泠泠出空谷。

四宜堂翫月

夜靜羣籟息。松門起疎煙。寒鐘響崖谷。月出山蒼然。清暉映庭際。水石皆澄鮮。遠火照深樹。流雲澹遙天。平生素心侶。塵網欣齊捐。逍遙永今夕。試鼓風中弦。

游隘口諸山作

羣山爭嵒呀。路入土囊口。雲影移東西。峰勢轉前後。兩崖逼天光。中斷若杵臼。奔騰春湍豪。突兀青壁陡。野人愛巢居。鑿翠開戶牖。山田錯基枰。溪石碎星斗。長松架短壑。下有飢蛟守。林昏怪鳥啼。日落驚麝走。暗谷明雜花。清渠帶疎柳。錯疑仇池穴。此地通小酉。平生山水興。絕景遇非偶。哀猿喚離心。欲去更搔首。願言隱活溪。蹤蹟同漫叟。

早春山居張崑南沙斗初朱適庭黃永夫王德甫錢曉徵曹來殷枉過草堂留宿

屏跡還舊山。柴門謝賓客。空林恣偃蹇。樂意在泉石。春至草木繁。微雨杏花坼。東臯農事起。荷鋤行阡陌。一笑逢故人。握手破岑寂。啼鳥思舊侶。停雲感陳跡。相遇敦古歡。剪燈話疇昔。池月松際來。竹露衣上滴。偶揮嵇生琴。復蠟阮公屐。明當追良辰。嘯傲倚青壁。

湖樓曉起



白雲不歸山。化作湖中雨。曉景極空濛。離離辨洲渚。鳴榔稍欲散。水禽相與語。高樓忍春寒。坐對西冷浦。幽興不可窮。烟中羨漁父。

對雪獨坐有懷

同袍各雨散。苔徑無行迹。微雪被堦除。空齋坐岑寂。希聲靜始領。寒色陰逾積。凍鳥不聞喧。風竹稍浙瀝。餘香散幽幌。遠漏沈遙夕。悠悠千里心。誰是山陰客。

斑竹嶺

連山如奔濤。高下入蒼靄。潛行因谷底。直上俯鼇背。鑄鋒翠屏列。崩岑青壁對。路盡峰始迴。潭空水交會。萬竹蒙崇岡。錯磨天影碎。陰厓臨大壑。神物想狡獪。噴沫驚蛟涎。藏形駭龍蛻。虬枝走長根。童童掩車蓋。何人架巖屋。簷楹割蒼黛。羈心厭津梁。投蹟遠湫隘。穴知仇池近。洞喜桃源大。山月忽照人。悲風戛羣籟。幽探厲前蹤。獨往符勝概。明當攬芙蓉。聳身凌鬢鬣。

晚坐法螺徑待月夜歸作

涼風歇鳴蜩。烟靄山欲暮。暝色隨孤筇。沿溪信微步。不知西峯陰。竹月已流素。青林深幾重。暗泉自奔赴。經聲隔翠微。僧房杳何處。歸來坐盤石。葛衣灑清露。夜深蘿徑寒。時見流螢度。

沙孤堆舟行閣淺感賦十八韻

潞水多廢閘。淤泥積深窪。橫亘類洲渚。波面迷三叉。扁舟之字行。往往膠於沙。篙師競邪許。揮汗到日斜。搖兀不自由。推挽爭諠譁。有如仄行蟹。俄作倒退蛇。開頭若旋磨。苻帶相牽拏。來船乘長風。時送回颿颯。咫尺判遲速。物理何參差。我今溯歸程。捷徑非所誇。終朝對葭葦。隨意撈魚蝦。長征豈不快。小住亦復佳。世兒矜疾走。倏忽騰天涯。豈知呂梁險。積石如莫耶。不有忠信軀。失足空驚嗟。水行雖淹滯。早暮吟雲霞。跛鼈自云樂。不羨追風騶。誰能脫繯鎖。共此不繫查。

送過湘雲之松陵

春風楊柳堤。細雨蘼蕪路。扁舟五湖口。遙指松陵樹。烟波下長川。孤帆渺何處。不知葦鱸鄉。漁師幾家住。三高祠前春水深。垂虹橋外夕陽沈。君今短棹唱歌去。予亦迢迢烟水心。

林屋洞歌

左神古洞幽且虛。金庭玉柱惟神居。丙門陽谷連屋閭。洞口仰窺如覆盂。蛇行百步猶崎嶇。陰氣晦昧慘不愉。石乳巧詭誰所鏤。林立玉笏翹犀株。神漢噴礮成沮洳。雪色蝙蝠蒼鱷鮑。飛鳴跳擲猿猱狙。我來欲進仍趨起。腰懸辟邪金虎符。火鈴照耀前後驅。走避罔兩潛夔魃。豁然中開八奧區。銀房一曲竊而迂。隔凡之字青模糊。天章雲篆不可摹。石壇上接天帝都。帝觴百神於此俱。撞鐘擊鼓吹笙竽。綠毛仙人來徐徐。青童倏忽馳飈車。乖龍日暮銜明珠。神光迴合羣靈趨。吁嗟此地洵可娛。僊源地肺交縈紆。東通海岱

西荆巫雲氣直達巴陵湖。洪濤隱隱翻軸轆。僊人几席羅方壺。平生蕭然山澤臞。崑崙弱水應可踰。置身塵垢徒區區。石牀苔蘚且掃除。願留此中讀禹書。

吳越王廟

異人初起天目峯。金戈百戰揮羣龍。羅平妖鳥一朝盡。峨峨王業錢塘宮。紇千山頭涼雀死。礪山小民作天子。丹書鐵券渡江來。尙父空名真足恥。惜哉不用羅江東。交臂事賊非英雄。子孫相承六十載。落人掌握何匆匆。當年萬弩射濤處。鐵幢高聳樟亭路。英姿颯爽已千年。至今吳越蒙安堵。吳越江山總寂寥。錢塘宮闕草蕭蕭。荒碑猶立表忠觀。古祠空對浙江潮。潮生潮落悲今古。運去時來何足數。一聲白雁下江南。臨安又作降王土。

將遊黃山前一日宗人湛若攜黃海圖見示漫題長句

先生昔隱天都峯。彩鸞黃鶴紛相從。醉上丹臺弄星漢。一聲長嘯驚洪濤。竭來人間玩朝市。桑田滄海觀匆匆。芒屨萬里探靈笈。金箱五嶽圖真容。五丁斧斤巨靈掌。驅來筆底真神工。化人樓臺倚空碧。晴天照耀金芙蓉。蓮花石筍勢雄峙。中有雲氣噴長虹。銀河倒流萬仞峽。海門日射玻璃紅。松根老人妙點綴。丰格似是浮邱翁。緣知坐臥三百日。羅此萬態蟠心胸。我來獨宿碧溪口。對之夢落軒轅宮。紫袍仙人九節筇。朱幡前導雙玉童。貽我劍佩蒼精龍。丹泉石髓尋可逢。覺時已是換凡骨。徑思鶴背超天風。平生當著

幾兩屐。忍令絕景淪虛空。捲圖大笑出門去。明朝高臥蒲團松。蒲團松在平天。其上可容坐臥。

### 臥龍松歌

長松捲地如臥龍。鱗而爪鬣蟠虛空。虬枝偃蹇二千尺。古幹倔僂無春容。根纏古藤走奇壁。苔作霜皮石爲骨。忽然昂頭出碧霄。下瞰蒼崖萬重裂。清風謾謾當晝來。交柯接葉高崔嵬。山猿野鶴助長嘯。怒濤晴捲青天雷。或云其下藏魍魎。大壑陰霾氣淒愴。或云此下流金精。千年琥珀龜蛇形。仙人夜過餐五粒。月明彷彿吹鸞笙。我思此山奇秀甲海內。浮邱容成昔高會。得無軒皇遺手種。長令空山閱人代。雨露潛滋元氣長。鬼神呵護靈根在。客來婆婆三歎息。此樹人間應難得。他年汗漫訪天都。只恐神龍去無蹟。

### 登閣觀水漲和沙斗初

闌風伏雨昏復朝。鶉鳩喚婦沙雞號。小樓獨宿烟霧裏。臥聞百谷生波濤。輶雷濺雪不可禦。但訝衆水喧璈嘈。河魚大上水入市。天意亦助龍鬣驕。烟沈萬瓦晝寂寂。雲壓獨樹風蕭蕭。何人山根架水檻。有客野岸尋漁舫。滄溟咫尺入圖畫。水光雲影紛周遭。忽思吾廬在何處。靈崖山畔香溪坳。菱湖晴漲三萬頃。芙蓉七十波中搖。答簪隨意掛烟雨。水村沙戶相招邀。採蓴剝芡四時足。棹歌一曲青天高。江山如此不歸去。自甘形役徒心勞。髯翁髯翁詩酒豪。不須相對吟牢騷。水雲千里江南夢。黃帽同攜青竹篙。

### 題王德甫三泖漁莊圖

幽居圓柳烟水橫。九峯一髮遙天青。高人移家入圖畫。菰蘆深隱門常扃。平生讀書破萬卷。興酣落筆摧壁城。湘江雨暗鼓瑤瑟。緜嶺月白吹鸞笙。清詞琳瑯叶風雅。會須揚藻摩天庭。何爲抑鬱作窮士。樵兄漁弟尋閒盟。君言草堂有佳趣。吳淞百里波紋平。小橋遙隔蝦菜市。迴溪近接鳧鷖涇。枳籬宛轉護門巷。蘆簾紙閣風泠泠。松聲滿院鶴唳起。竹影倒地茶鐺鳴。據梧隱几人事絕。時有沙戶相逢迎。鉤簾遙瞰澗山麓。釣篷移處斜陽明。風荷千柄響秋雨。沙鷺一足翹涼汀。此中嘯傲足永日。夜窗燈火聲啾啾。人間萬事不掛眼。驂騑跛鼈誰虧成。吾家亦住香水曲。門前欵乃漁榔停。三年流浪走塵土。歸來負杖親巖耕。崦東崦西春水生。柳芽蘆葉波冥冥。釣徒招手烟際語。兩舷脚叩搖答答。雲山如此共來往。不妨唱和隨松陵。題詩一笑息壤在。他年載酒窺柴荆。

灘行偶述短歌六首

漸江潺潺勢屈曲。名灘逆溯三百六。錦峯繡嶺誰削成。石黛參差浸蒼玉。翠屏中開間茅屋。帶以清泉映修竹。來船去舸不暫停。安得拏舟弄飛瀑。月明歸來濯我足。兩山如門巨石衝。驚波駭浪迴長空。懸流轟轟瀉百里。失勢欲撞蛟人宮。篙師瞑目忽大叫。一夫前推九夫譟。迴船入峽神始愉。夕陽沈沈野猿嘯。渡頭漁燈忽相照。一峯前開一峯合。清溪萬轉深不測。深林處處啼鷓鴣。水遠山長行不得。冷風暗雨飄白日。林昏無人虎

欲出舟師搖手情慘慄。此時欹枕魂欲消。灘聲入夜方嘈嘈。  
淳安郭邊清可憐。山樓粉堞臨深淵。浮橋不鎖待斜日。時有來往江山船。  
茅舍高低連阡陌。雞犬歸途暮相識。武陵豈必皆寓言。流水桃花迥非隔。他日攜家就魚麥。  
羅山打鼓船始開。孤篷細雨風吹來。人家三五住篁竹。幽禽相喚聲悲哀。  
酒帘搖颺青半幅。榜人繫纜沾村醅。小桃花紅李花白。推篷見之三歎息。故園明朝作寒食。  
新安江水清見底。百尺游鱗數魴鯉。扁舟彷彿落鏡中。玉沙磷磷石齒齒。  
平生愛山兼愛水。此中垂釣真已矣。剪茅三間縛樹底。射鴨撈蝦捕烏鬼。倦插綸竿臥沙觜。

由上方廣寺至華頂歷覽茅篷有作

天台茅篷百四十。高踞華頂蒼崖顛。銀峯金地勢環拱。俯視塵海兜羅綿。  
倚巖架壑少結構。枳籬宛轉香茅編。六時法侶行道處。落花堆徑喧岩泉。我從石梁探方廣。徑思絕頂攀青蓮。  
披除榛莽走磔确。足繭不惜雙行纏。青泥盤盤蹋虎蹟。白水激激窺龍涎。振衣萬仞下危石。  
忽訝皎鏡開淪漣。花龕三五綴深樹。鐘魚出屋聲泠然。杪擢萬本蔭礪戶。小橋獨木當門前。連居小築更幽寂。  
縱橫十笏宜安禪。山僧煮茶拾松子。靈山雲液消塵臆。華頂茶雲霧結成者爲山中精品空階法雨忽霑灑。迴瞻歸路橫蒼烟。飄然四大無住着。此境無乃超人天。祇洎精舍夢不到。適逢佳處差安便。五邱十岳徒浪語。須彌芥子誰真詮。  
願依蒲團坐小劫。乞分

李火消殘年。

讀少華餽酒歌戲贈

新詩百篇酒一斗。羨君雄才世希有。我生不飲三蕉葉。自笑玉山頹已久。一醒一醉各陶然。流俗紛紛誇好醜。大千巨細本相形。謾以云亭羞培塿。至人熟視將無同。蓮社竹林均不朽。讀君新詩論酒趣。似遇麴車涎挂口。我非酒人得酒意。愛詠君詩當擊缶。清秋涼雨洗孤桐。遙夜疎星挂高柳。綠蛆浮甕香噴唇。紅玉花鬢長在手。百觚痛飲是我師。千載渴羌宜尙友。相着臭味詎差池。夢到華胥真樂藪。拍浮晨夕潤枯腸。未許崢嶸起堆阜。醉鄉日月自蕭閒。坐覺浮雲變蒼狗。破除萬事得此君。小築糟邱鎮相守。兀兀俱成無漏僊。不須更乞聲聞酒。

蔣蓀湄招同諸子集繡谷出桃花溪水圖索題漫成

闔閭城頭暑雨微。古堤楊柳烟霏霏。幽人招我出繡谷。方塘一曲搖紅衣。青溪宛轉深不測。千樹鴨頭遮舍北。仙源不遣誤漁郎。溪上沙鷗總相識。

畫師好手不可遇。咫尺忽覩滄洲趣。桃花流水望杳然。想見伊人結茅住。紅雲夾徑翠影重。柳絲風急喧鼻翁。隔溪欵乃一聲靜。遙夜月明收釣筒。

壓簷竹翠連梧葉。小院幽香蕩籬蘿。當年風雨宿秋聲。一鏡開勘官奴帖。披圖忽訝春光好。照眼繁紅明

翠沼花前想見苦吟人。夢繞池塘生碧草。

細林山人出世姿。

少華

王郎斫地歌淋漓。

鳳喈 德甫

曹侯宛委探仙籍。

因來

四賢迭奏瓊瑤詞。溪水如雲香不斷。柳

陰藏屋。春星亂。何當洗筆試新圖。重向蘇齋呼舊伴。

君家三徑我舊諳。閒庭竹石交參覃。松關晝掩少剝啄。午風吹蝶春酣酣。圖成自擬輞川宅。茗椀鑪香好留客。落紅如雨點清樽。醉掃花陰臥苔石。

### 題山夫兄所撰金石存卷尾

虛簷午霽風鳴鐸。古色熊熊暎簾箔。蟠螭奇士開素械。黃白下覆雲垂幕。羽陵蠹簡何處來。良常新銘伊誰作。銀樞木直盡補綴。缺月嘉禾半斑剝。歐陽不作廣川亡。郭髯趙峒俱寂寞。後生未識娜嬛編。遺蹟誰探金石略。高人酷似楊南仲。遠紹旁搜精且博。拈撫星宿到羲娥。考論山川辨垠堦。頡書史篆形偏奇。禹鼎湯盤制淳樸。規模蟲蹟蝌蚪垂。扁列螺書鸞鳳泊。乙尊癸鬲紀歲年。蚩敦虎彝稽尺度。岐陽獵鼓太聲牙。岫嶽神書苦躋駁。嶧碑出火光陸離。泗鼎敲雲氣騰躍。奇文屈曲識雲雷。古鑑模糊驗龍雀。塵封壞壁強名磚。苔蝕碎泉微露廓。分書流轉蔡與韓。隸變根原斯逮邈。輕摩蟬翼耀銀鈎。半裂蠹文雜金錯。漢唐以降蹟更夥。碑洞如林恣尋拓。浮圖像記高巖窞。樓觀經幢精鑿鑿。開成巨刻照千春。繼蹟鴻都尤卓犖。俗書墳碎嗤換鵝。舊榻荒唐傳瘞鶴。山經海誌有缺遺。一一駢收古錦囊。看君嗜好與俗殊。頭白汗青殊



矍鑠自言壯歲客燕雲。匹馬短衣經朔漠。荒岡斷隴走狐兔。關塞蒼涼山窄崿。風號月黑不見人。往往深  
林逢不若。無終亭障古荒陲。短碣叢殘自捫摸。推尋點畫考跟肘。剗剔泥沙安節角。嵩陽石闕華陰碑。下  
視歐虞較孱弱。歸來杖策尋岱宗。日觀天門氣磅礴。云亭金冊虛無間。劫火留餘更搜索。杏壇片石比瓊  
琳。讀史真堪佐商榷。江湖飄蕩復幾載。單舸不畏鯨波惡。南尋禹穴窺窆石。宛委藏書盡羅絡。輕囊自詫  
千金裝。坐擁何如百城樂。飄然更作逍遙遊。傲吏漆園同寄託。雲烟過眼總須臾。人世茫茫風捲擗。乞兒  
一物語太癡。至竟風流照幽壑。定知此癖亦復佳。障籠錢奴真握齕。伊予好古生已晚。日注蟲魚非磊落。  
六書八體強纂排。略識漏痕并斂脚。常嗟行草競姿媚。倒雍懸鍼夫矩矱。忽披此本還舊觀。快若霜篔刮  
眼膜。寶函疑有鬼神護。祕笈莫遭雷電攫。金庭玉笥未遑窺。緣字赤章誰共學。得君一語當津逮。辨覈井  
然豈影掠。連朝載酒問元亭。似向雲林登闕閣。摩挲古器發高論。妙解神明棄糟粕。老顛拜石世誰知。市  
上庸兒空駭愕。最愁別思苦相催。樽酒離亭還罷酌。後約殷勤君記取。檢點金箱圖五嶽。好從林屋探遺  
書。應有龍威啓靈鑰。

蔣紹初自蘭州歸將返吳中賦贈

結交廿載骨肉親。相去萬里猶比鄰。屋梁落月夢顏色。茫茫遠道馳神魂。今朝晴鵲忽大噪。見子披豁開  
天真。行空天馬脫羈勒。西征浩蕩忘艱辛。潼關四扇射朝旭。華岳萬仞摩秋旻。皋蘭策馬攬形勢。塞垣無

際河流渾。唐營漢壘莽蕭瑟。終古戰骨埋荆榛。聖人御宇擅雄略。盡化金甲開邊屯。移軍絕漠不知遠。但有耕鑿無煙塵。或虞積久易生釁。豈知勝算垂千春。羌渾雜處稟漢法。款塞部衆皆良民。君行周覽發深慨。傳諸歌詠彰皇仁。歸囊爲我一啓讀。壯志直欲排天門。方今海寓正無事。航浮索引皆來賓。班生投筆竟何補。底用汗漫窮三秦。勸君息機謝塵鞅。閉門高枕桃溪濱。五湖烟月無恙在。好待西風理釣緡。

蘇文忠壽讌詩爲畢秋帆中丞作

歲惟元。默月在丑。弁山公爲蘇公壽。黃柑丹荔羅中庭。酌以寒泉薦清酒。先生逝後七百年。身翳白鳳翔雲烟。文章風節不磨滅。凜凜浩氣騰星躔。早年解讀范滂傳。垂老盡和淵明篇。平生自詡萬事足。玉堂茅舍皆隨緣。熙豐擾擾更朝局。天遣斯人頻放逐。歸計終虛陽羨田。傷心不獨烏臺獄。瓊厓萬里依窮髮。瘴雨蠻烟經歲月。當代誰憐宰相才。此身自抱神仙骨。縑素曾傳笠屐圖。老蓮妙筆添毫活。秦關雲氣接岷峨。再拜靈旗猶恍惚。君不見騷人揆攬徵初度。磨蝎命宮多觸忤。至今俎豆配潮州。章蔡紛紜何足數。又不見東湖祠宇埋榛莽。公來丹刻陳椒馨。千古瓣香酬夙願。風流肯讓宋中丞。商邱宋公撫吳曾邀東南名士于誕辰設祀並刻施

元之注東坡詩集行世

對琴丈招同閱蓮峯處士蔣春農舍人程魚門上舍筠榭司馬泛舟紅橋漫成短歌卽以言別

飛篷隨風不自由。平地瀉水東西流。浮雲聚散本無定。何意共作紅橋游。紅橋三月春可憐。綠楊旖旎浮

春烟千紅萬紫太撩亂。隔林處處聞啼鵲。鵲聲喚客欲歸去。鴻爪春泥還小住。樵兄漁弟齊拍肩。日向花前集簪履。木蘭艇子移沙岸。匝地東風搖酒幔。吟興還尋皂莢橋。閒情欲問瓊花館。君不見楊花吹雪覆白蘋。隋家古堤愁煞人。又不見歐公昔醉平山麓。苔蝕荒碑臥陵谷。盛衰哀樂總須臾。世事茫茫同轉燭。人生只合長相覓。錦瑟年華莫輕擲。但憑綠酒發朱顏。忍聽黃雞催白日。興酣日落風滿湖。樓臺倒影凌虛無。水晶宮闕忽湧現。竟思濯髮窺冰壺。高歌今夕樂莫樂。醉拂花茵坐盤礴。相逢苦少別苦多。奈此月落烏啼何。

鄂城喜晤王大令少林屬題東園圖卷

我生好作汗漫游。挂帆西登黃鶴樓。故人一別歲月逾。意外握手心綢繆。塵簪乍解百不憂。相與嘯傲凌滄洲。新圖示我巒翠浮。元氣噴礴蒼巖幽。靈區咫尺藏阻修。榛莽虧蔽颺颺愁。多君選勝窮冥搜。斧鑿似欲開金牛。苔痕淨洗石骨嶠。犀株象笏排琳瑯。陰崖下瞰百尺湫。墜葉一片驚潛虬。茅亭虛敞竹木稠。羅列圖史供研求。放衙吏散羣動休。一燈午夜聲伊嚶。文章緣飾政事優。枳棘豈久栖鸞儔。脫然捨去不自由。圖畫已足傳千秋。君不見堂堂坡老來黃州。當年卜築親鋤耰。雪堂繪壁烟靄流。迄今文采垂山陬。至人寓物無滯留。迴視好景俱浮漚。向平婚宦願可酬。他年與子期丹邱。

秦中寒食臥病獻之秋騰淵如同過敵齋看花小飲各賦七言古詩一首次昌黎寒食日出游韻

百五風光嗟旅病。花驄懶逐遊人盛。籬捷六枳少經行。一樹瓏璫梨雪映。冷雲結夢依修篁。豔紫天紅羞與競。幽人未厭貧家春。並軫聯翩發高詠。飲醇氣味和不流。琢玉詞章雅能正。醉敲銅斗記前晨。囊屐重邀時已更。奔湍飛電苦難追。作達何妨委時命。座間幸免元規塵。一任雄談揮塵柄。白髮渾忘異地愁。青袍恰有同升慶。謂獻之秋隱深慙折節拜龐公。竊比登堂呼子敬。英英幕府羅羣賢。照坐瓊枝高且夤。天球光氣耀岩壑。餘事詩豪兼草聖。中朝名德萃此邦。謂秋帆述荈兩先生唱于唱喁樂事併。籥雲快覩驂騑姿。食野自甘麋鹿性。故山雖好未思歸。臥聽林鳩呼雨橫。遙憶青門連綺陌。楊稊蘸水芹芽迸。黃犢犁翻三尺泥。白鷗波拂千層鏡。相逢田父多好懷。泥飲猶能頌仁政。他時授簡擬梁園。掉鞅前茅與後勁。勝游更指曲江頭。石泉槐火催新令。

秋隱淵如辱和拙詩。斐然競美。翌日攜酒見邀。同過廉讓堂奉陪。述庵前輩讌談。竟日因三疊前韻。

新篇快愈頭風病。鄴下才名應比盛。清門文采各翩翩。秋月琅玕忽輝映。令嚴細柳旌旗翻。氣攝景宗笏鼓競。偶從谷口訪烟霞。還向山陰繼觴詠。素箏濁酒倚門閭。問字元亭欣就正。山桃吹雪辛夷殘。燕賞違時恐難更。儒林丈人大雅宗。繡斧西來承簡命。雙清心蹟擬冰壺。坐閱春風移斗柄。名流爭識題襟樂。舊雨頻占盍簪慶。苔岑結契偶然同。車笠論交久而敬。柏臺晝靜吏人稀。寶篆縈香度幽奩。冠裳脫略敦古

權三爵陶然時中聖。欣看酥雨潤芳田。樂事賞心真可併。斜陽返照射簾櫳。林外晴光悅鳥性。忽憶家鄉春正濃。藤蔓成陰竹鞭橫。寒山小築傍芙蓉。清泉漱玉雲根迸。寒山雲根泉出芙蓉峯下流注漱玉山房爲述庵讀書處閒雲出岫本無心。彈指霜華點清鏡。天教勝地暫迴翔。未覺栽花妨美政。更向前除展數弓。留取簪笈節竿勁。時庭前木并移竹數十根相看幸有此君同。妙語至今思大令。

中丞祈雨得雪再疊前韻

荒園春槁草木病。青野空占麻麥盛。宵分望澤驗江星。依舊楓林月華映。曉窗欹枕聞好語。林外晴鳩聲不競。淒淒有淪起南岑。雲漢詩篇當罷詠。陰霾繞樹昏連晨。急溜排簷斜復正。山僮縛帚詫奇事。銀霰繽紛晚來更。聞道郊壇禮數虔。岳牧齋心通帝命。垂山太乙闕靈湫。滋液羣生握其柄。扶犁已解老農憂。買甕爲增寒士慶。定知物力荷神庥。展幣用牲宜致敬。中丞檠戟劇清嚴。簾閣微香度幽奩。神功收斂寂如無。僉頌臣賢由主聖。況聞屈宋列銜官。蘭茝同心欣合併。道山延閣筵鵷鴻。愧我閑鷗莖心性。雅材百五競扶輪。不許狂瀾恣豪橫。園林過雨樂事濃。滑澆春泥竹胎迸。海棠洲畔胭脂紅。烏弄屏風拂明鏡。願公高會執牛耳。檢點詩盟理觴政。仁心及物蔀屋歡。餘事加人詩筆勁。風流尙紹聚星堂。白戰還來聽號令。

晚過白雲寺

松谿行不盡。石窟叩禪扉。空谷聞清響。孤雲在翠微。樵歸山逕寂。鳥下竹林稀。向夕跣趺處。涼生蘿薜衣。

晚過中峯古禪院

松門空翠滴。竹塢夕陽遲。偶愛東林路。言尋慧遠師。風泉發清響。山月照華池。回首重來逕。蒼蒼白露滋。

谷口送念亭上人歸中峯

虎溪分手罷。隱隱望中峯。石路留殘照。楓林度遠鐘。遙憐清夜月。獨倚碧溪松。靜境誰同賞。空懷物外蹤。

懷璞函

故人滄海別。寥落掩孤村。一夜吳淞雨。春波直到門。抽帆應未得。把卷共誰論。落月屋梁滿。知君勞夢魂。

過朱孔林新居追悼惠松厓過湘雲二處士

閒雲無定蹟。寂寞閉柴門。已息塵中駕。還居谷口村。青山君輩在。白社幾人存。愁絕黃壚畔。難招千古魂。彈指驚前夢。淒涼廿載餘。鄭公還薄宦。杜老未寧居。沙社堪投蹟。蘇門好結廬。他年尋息壤。把臂狎樵漁。

蒙陰

亂石敖陽道。人行紫翠中。嶽雲晴繞郭。沂水遠連空。暝色催征騎。長天落斷鴻。那能佩含景。結屋向東蒙。

清口

地扼東南險。黃淮走一門。接天桃浪暖。到海箭流渾。木石功非細。魚龍氣自尊。茫茫九河道。禹蹟共誰論。

讀史有感

朱轡鐵甲擁旌幢。揚僕樓船下楚江。萬里懸師衝瘴癘。千夫輓粟廢耕耨。珠崖未能還催戰。銀印初頒更受降。爭似璽書問南粵。文禽象齒貢蠻邦。

首宿蒲桃繞漢宮。玉關葱嶺使長通。貳師驅馬初論賞。校尉屯田已奏功。自古邊庭須魏尚。至今父老怨唐蒙。輪臺詔罷烽烟息。王會依然萬里同。

華陽黑水古梁州。絕域蒼茫萬里秋。戰壘新增巴子戍。降王舊拜夜郎侯。籌邊樓上傳烽急。大渡河西落日愁。多少材官兼技擊。幾人飛矢射旄頭。

九日期王德甫不至

楚天寥闊惜分襟。木落亭皋秋正深。遠道關河頻悵望。重陽風雨罷登臨。板橋花月愁中賦。笠澤蓴鱸夢裏尋。珍重前期莫相負。草堂猿鶴伴秋吟。

舟中讀適庭鳳階德甫璞庵來殷送行之作卻寄

烏鉢峯頭曳杖遲。故山香雪繫人思。春來忍負探花約。酒罷空吟折柳辭。寒雨離亭聞笛夜。早潮江岸挂帆時。銷魂幾度中年別。一榻茶烟颺鬢絲。

露

月華如練夜靄靄。梧竹庭幽捲幔看。響滴清荷人未寢。涼生白苧漏初殘。飄零舊苑銅仙淚。冷落秋江楚

客蘭最是懷人增遠思。兼葭無際雁聲寒。

萍

迴塘千點綠周遮。密映苔磯拂釣查。盡日參差依荇菜。經年飄泊怨楊花。鴨頭漲合柔藍繞。燕尾叉分翠帶斜。愁入汀洲春又晚。亂紅流水各天涯。

舟中寒食同趙升之陸璞堂作

孤篷小泊練湖南。百五風光客裏諳。欹枕乍聞鶯細細。開簾無那柳鬢鬢。歸心空羨尋巢燕。倦態真同上簇蠶。花外鞦韆牆外路。可堪回首隔江潭。

雅雨使君招飲官署訂平山看花之約以事牽率弗獲如願賦此誌謝

載酒江湖興未窮。片颿斜掛柳絲風。倚門自笑同元叔。投轄何期有孟公。檀板金樽花影外。湘簾銀燭雨聲中。南樓賓從推羣雅。深愧憐才到阿蒙。

和張漁川法雲寺次溫飛卿韻

扶筇蕭寺喜同羣。懷古空吟月二分。漫以園林思太傅。欲將詞賦擬參軍。六時狴座飄香雨。百尺虬枝冷暮雲。何限中年哀樂感。願依初地證聲聞。

王林屋輓詩存素



廿載論交識素風。逃名白社兩心同。閑身已自全三樂。薄命終難送五窮。北郭詩篇清興在。南皮樽酒舊遊空。披帷何限人琴感。都付零縑醉墨中。

和習庵前輩歸家述懷之作次韻

潞水輕颿破暝烟。家山指點練祁前。好尋摩詰還山詠。未過羲之誓墓年。清夢定應常戀闕。素心終不負歸田。相看暫脫金門籍。浪蹟江湖號樂全。

青山歸夢隔楓宸。到及田園正饒春。鳥語花香消永日。詩瓢酒盞度兼旬。壯遊差了平生願。靜退還成自在身。茶塢山頭好風景。他年真作兩閑人。

王禮堂同年移居郊墅與敝廬相近賦此以寄

廿年龍腹忝齊名。結宇相望倍有情。兩岸人烟分市色。一溪燈火共書聲。卜鄰乍喜來王翰。遊岳終須約向平。許我元亭頻問字。好攜濁酒叩柴荆。

武昌覽古

浩浩江流繞鄂州。晴川烟靄望中收。山連夔蜀誇雄服。地扼襄樊列上游。極浦雨昏陶侃壘。高城月冷庾公樓。漢南柳色依然好。搖落西風感白頭。

趙璞庵枉過吳門惠留寒舍撫今感舊相對黯然因成長律六十韻奉贈

正始何寥落。元音漸散亡。異才能間起。大雅鬱相望。誼合龍雲切。情聯縞紵長。懷新情繼緒。感舊意徬徨。憶昔逢君日。初過選佛場。聞鐘蘭若近。入院貝多香。圖史原同好。詩篇迴不忘。論文摘星漢。談薈溯河梁。傾倒詞源瀉。低徊古義詳。忍寒攜襖被。聽雨並匡牀。正作蕭齋客。還登謝傅堂。園林歸獨樂。山水足相徉。羣從交方盛。名流氣益張。共吟青玉案。不佩紫羅囊。筆擅珊瑚格。杯盛琥珀光。餞春尋柳岸。弔古拂莓牆。滴粉工新詠。裁雲有報章。擘箋朝染翰。促席夜傳觴。作客眞忘倦。爲歡亦未央。風流成古昔。歲月去堂皇。鴻爪無留迹。蓬根忽遠揚。江湖成落拓。苜宿總淒涼。岸幘窺牛渚。張帆泝馬當。琵琶商女曲。蘆荻楚人鄉。捧檄仍無奈。投簪苦未遑。頭巾空繫戀。手版太匆忙。碌碌難安枕。棲棲作急裝。歸心懸馬角。世路怯羊腸。暫示維摩疾。羣訶阮籍狂。一官聊自免。三徑未全荒。舊侶漁樵在。閑園松桂芳。勞人初偃仰。短夢已滄桑。元老騎箕去。仙翁馭鶴翔。紫筠迷舊徑。綠野剩空廊。夙雨零朱邸。悲風起白楊。羊曇徒涕淚。衛玠益悽惶。莫問停雲館。還尋履道坊。扣門增黯黯。判袂各佺佺。會合仍難定。漂流且一方。豈期辭海曲。忽欲問吳閫。一笑歡如昨。三秋願已償。剪燈具雞黍。永夜話參商。世已嗤元叔。君偏賞漫郎。菰蘆容嘯傲。騷雅共扶將。擊鉢多儔侶。吹簫盡慨慷。衆流爭浩瀚。天馬獨騰驤。百斛扛秦鼎。千尋拔豫樟。新篇推鮑謝。樂府轢張王。短佩紉蘭蕙。輕裘典鷓鴣。醉醒人世外。歌哭酒壚旁。白眼誰相問。青袍愈可傷。悠悠付蓬藿。泛泛逐滄浪。水淥吳王苑。花飛白傅塘。靈泉懸石室。芝草秀銀房。勝地殊蕭爽。佳期詎渺茫。烟波宜放棹。蝦菜正堆筐。

晞髮穹崖上。垂綸笠澤陽。論懷同向秀。把臂有嵇康。哀樂原多故。升沈祇自量。歲寒期莫負。珍重鬢毛蒼。

再遊靈谷題句

僧房窈窕白雲封。秋寺無人度午鐘。曾記誌公臺畔路。短筇閒倚六朝松。

紅橋錄別

相逢古寺閱昏朝。禪榻春風伴寂寥。記得無眠聽粥鼓。打窗松竹雨蕭蕭。蒼茫垂柳接長堤。春草王孫去欲迷。後夜楓香亭館裏。亂山殘月聽荒雞。

秦淮水榭偶成

幾度青溪浪蹟游。板橋花月自春秋。銅駝一瞬悲殘劫。冷落人間十四樓。一樹垂楊綠萬條。興亡閱盡是南朝。都將舊苑繁華夢。付與佳人碧玉簫。朱雀航南月未斜。江船迴泊鼓三挝。寒烟漠漠籠沙際。何處秦淮問酒家。午鳩啼破雨廉纖。三尺春潮兩岸添。何處攜香試溫鼎。柳陰庭院棗花簾。

寄江于九湖南

楊子江頭暮雨涼。送君南下楚雲長。孤舟遙夜楓林泊。聽盡猿聲過岳陽。天際君山一帶青。片帆何處弔湘靈。愁心莫聽巴陵笛。楊柳春風滿洞庭。

東平道中

蓮葉東風路幾灣。踢波眠起白鷗閒。魚鱗雲散洞庭闊。一抹青遮蠶尾山。

重修灞橋紀事聯句

秦關浩蕩依天險。嶼渭水蒼茫到海遙。道鼇極深蟠分地絡。秋巖梁高峙建霞標。季銀濤隱撼驚鱗屋。嶼

玉竦斜飛想鵲橋。甫憑眺宏規嗟漢代。秋摩挲鉅製紀神堯。季朝宗玉帛輸千品。嶼祖道衣冠集百僚。道

三疊陽關朝雨歇。秋一聲河滿別魂銷。季芙蓉佳氣通僊仗。嶼楊柳東風拂苑條。甫紅映長林鋪綵纈。秋

綠齊芳草雜蘅藪。季晴沙徑僻容鷗占。嶼碕岸莎平任鶴翹。甫廣陌微聞歌緩緩。秋迴隄極目水迢迢。季

何人簾幕修花譜。嶼幾輩旗亭問酒瓢。甫茸帽衝寒驢背骨。秋絲鞭趁曉馬蹄驕。季時移物換徵前史。嶼

戟折沙沈閱幾朝。甫鐵馬嘶風悲斷壘。秋銅人辭月泣深宵。季池荒興慶寒蕪碧。嶼燒入昆明劫火焦。甫

望裏一杭行泛泛。秋吟邊獨木步搖搖。季觀濠詎有蒙莊興。嶼涉洧空傳鄭國謠。甫勝地遺墟留宿莽。秋

清時惠政紀重霄。季旬宣屢駐中丞節。嶼諷度頻煩使者輶。時奉諭旨以橋為漢唐故事贖命中丞原隰周

防無壅水。秋川涂經畫見乘橈。季千夫應節趨囊鼓。嶼萬袂連雲競冶銚。甫誰遣神人鞭巨石。秋卻驚巧

匠結焚椽。季江干歷碌聯鑣騎。嶼烟際呶啞出浦橈。甫鬢鬢危闌排雁齒。秋澄澄倒影臥虹腰。季馮夷擊

鼓喧清夜。嶼織女迴車拂絳綃。甫路近隄州思載舫。秋春回上苑聽遷喬。季縈紆素練伴雲漢。嶼映帶嚴

城傍斗杓道甫瑰麗詞宜銘析里秋帆嶢嶢氣已敵凌歊季遠登臨共美黃圖壯竹嶼文筆爭誇陸海饒道甫礪石千

秋誰比績秋帆洛陽碑版至今昭季遠

### 王宸

字子凝號蓬心太倉人乾隆二十五年舉人官至永州府知府有蓬心詩鈔

蒲褐山房詩話蓬心麓臺侍郎曾孫所繪山水頗能入室美須髯工飲酒為人疎節闊目胸無城府官中書舍人日所居與予對門先為予畫蒲褐山房圖又為予畫蕙山竹爐茶卷蓋仿明王孟端舊本而作久之陞為湖南永州太守州山水幽峭又往來於瀟相間繪事益精乾隆庚戌余奉命按事長沙會歲暮蓬心踏雪來訪後為余畫雲棲教觀圖蕭疎蒼翠可謂名家其生平所著有繪林伐材十卷上自黃帝時史皇下逮國朝乾隆時人亦畫史之總龜也

### 蒲褐山房圖題句

山房本先生松南故居今寓京城宣武坊南以額移署其中頗為幽勝蓋其地即趙天羽給練寄園故址張南華宮詹沈歸愚宗伯先後居此丙戌秋中小坐山房愛其林木晻蕭蕭槭點摹圖之並次坡公韻

苦吟咽秋蛩旅夢冷秋雨隘巷白板扉常掩西山霧先生對門居談言起幽慕老屋擁蒲褐妙解坡仙語花時設芳樽招列戶外屨冰梅入座清恍然釋塵慮烹茶起瓶笙細響疎林度蕭然寄此身隨地得閒處滌硯繪斯圖下筆生遠悟願從杖履遊時領安禪趣

題畫呈湛庵廉訪

湘水明如鏡。嵐光接翠微。緞蘭思楚珮。看竹款柴扉。烟市人家少。山園菜甲肥。不知身是客。到處欲相依。

畫穀日盍簪圖贈方三刺史介亭

正月晴和風景新。白香山句更當穀日媿靈辰。良朋夜訪添佳興。好會朝期在宿因。簪插髻絲飛絮落。酒拈竹葉斷霞勻。定須爲客成圖畫。莫向塵途去問津。

重過許州示茗柯妹婿

黃蘆衰草起風埃。兩馬單車去復來。頭到今朝難再白。眼經此際嬾頻開。一身珍重惟需藥。千里相尋待舉杯。至戚情深休惜別。魚箋層疊好勤裁。

庚戌除夕示影山姪詩

莫嫌舟次逢除夕。小集賓朋興亦嘉。一盞同添今夜酒。雙燈已報隔年花。岸邊送臘聞傳鼓。江上迎春望使車。惟憶永陽官閣裏。相將絃管笑言譁。

祝 詰

字明甫嘉興人。乾隆二十五年舉人。有西澗堂詩稿。

蒲褐山房詩話西澗爲豫堂先生子。工畫梅。橫斜偏反。各極自然。直與陳楞山金壽門輩異曲同工。詩學山谷。老人疎瘦苦澀。不肯墮尋常。迎衛錢嗣伯編修評云。風度閒雅。氣韻高秀。往往尋味於人。

所不味而風致彌佳。超然塵盞之表。

九月八日小集竹隱山房食蟹得八字廿六韻

葦花白湖潯。秋冷光汎汎。時物霜信催。朋尊眼翳刮。笞箸倚灘舟。郭索照夜窺。撥排疎作雨。人伺靜於瀨。盈筐近市堆。紉草幾輩紮。大者雄戈矛。怒觸手癢痕。小者困拘攣。响沫腹填軋。兒童戲縱擒。釜鷺試漑刷。性躁竈烹煮。氣腥雜椒糗。俄看紅輪困。快嚼聲齧齏。嗜或尖團分。健爭螯跪扒。顛預殼負穹。肥膩脂凝臍。整牙錯交加。鞞指霜空空。外骨碎且投。內黃實而硃。旁佐鄰醯酸。更可蜀薑苗。曲包厚味咀。搜剔秋毫察。作羹瑣屑餘。溜匙滌瀟滑。拍浮客相持。故疾吾不殺。近食喜稍稍。無腸怪乙乙。得雋一勝百。失意十常八。庖製糟醕香。凍絨餅疊鬱。斫雪誇螭蟬。爬沙陋蜚蝥。惠文增飾殊。馬甲萃美拔。衛身恃銳堅。登俎等刮削。例食菊英泛。醉聽桐絃憂。口腹累何窮。爾雅助癡黠。

送項象尊北行疊韻

龍驤刺天桅。鼉吼殷岸鼓。轉粟官司漕。稽程月建午。衿青館餐謀。履素徑竇社。載籍羅索邱。浮江豁門戶。喔咿枕慶浪。宿留野醺醕。水調發黃頭。靈旗牽少女。壑填雀鼠壯。氣勃衫襪煦。挈兒歡於家。見客遠得侶。天倉胃次覘。路堠柳間數。近日輿蓋騰。離鄉蛩駐苦。雪霜迫我衰。媒介憐子嫵。沐霧蔚爲文。軋絲絢成組。何憂壁立四。已覺湖吞五。刀鑽盼秋期。篋稿誌物土。

蘭蛾

風化室初離。娟飛力不支。前因成夢幻。相偶似情痴。栩栩形同寓。繩繩子亦宜。春愁更何限。鏡裏寫雙眉。

寄幼子德秀

我年踰五十。憐汝未成童。總角髻應短。經時面或豐。幼儀嫻拜跪。難字辨魚蟲。帙亂須頻理。音疎冀遠通。名駒常邁蹟。白玉在良工。幸自無災難。何堪守困蒙。分甘攜弱弟。對燭念衰翁。莫愛新襦煖。還愁旅橐空。田禾秋薄飯。庭菊雨荒叢。甚欲全生理。涼颺起斷蓬。

徐觀海

字匯川。號袖東。錢塘人。乾隆二十五年舉人。官寧州知州。

蒲褐山房詩話。袖東性情瀟灑。工小楷畫。蘭竹尤精。嘗從予方略館。為寫書。其後在江西為屬官。衙齋相對。譚詩讀畫。幾忘其為五斗折腰人也。自予入佐秋官。君亦旋歿。詩集不可復見。即所存數首。清遠閒放。宛見其人。

集查儉堂觀察凌波小築分韻得送字

春陰罷畫溪。小雨輕寒弄。草堂瞰衆山。蒼翠萬態貢。清讌陪羣公。瀟灑脫塵鞅。殷勤玉局仙。撥雲開新甕。潑刺釣浮條。不煩結魚纜。舉樽吸山綠。跌宕差伯仲。座中振清嘯。迥然響鸞鳳。遙憶載石遊。觀察自粵西歸著有載石杳冥窮幽洞。仇池穴玲瓏。觸我遊仙夢。兩年踏蠻荒。幾為弋所中。馳驅古戰場。鳴鏑每高控。悠悠塞上



鴻心事餘惚惘。雄譚夜轉深。不寐雜歌諷。何時逐歸航。蘭漿春波送。

題陳研齋別駕竹圃清吟圖

秋月白。秋風清。山中一夜雨。瀉作鳴琴聲。琴聲落落空萬慮。人在篔簹最深處。科頭一卷倚石吟。時有閒雲自來去。

題丁魯齋畫松歌

畫松好手不易得。誰其作者高士丁。畢宏韋偃去已遠。難將新意追先型。君家貌古心更古。古龍寫出之。而形鬚鬣亂蟲夜。叉髮颯沓斜撇鸞皇翎。驚螭卻走瘦蛟舞。怒雷般撼奔雲停。孤根曲節勁如石。其下應有千歲苓。初疑香影落晴晝。髣髴清嘯藏仙靈。奇情鬱致洵無匹。妙想結構通杳冥。我官於鄂百不有。但餘卷軸羅寒廳。日長藤榻擁書坐。好風謾謾搖疎櫺。夢回忽見蒼髯叟。軒然一笑眼倍青。此時安得有此友。歲寒聊當座右銘。何時攜爾稽山去。飽飯濤聲欹枕聽。

和查榕巢觀察中蓮池見訪原韻

屐齒如傳空谷音。閒情淡遠寄遙岑。卷簾一榻花陰下。坐看白雲初出林。

申兆定

字圖南。號鐵蟾。陽曲人。乾隆二十五年舉人。官定邊知縣。

蒲褐山房詩話。南少日清羸。多病弱不勝衣。歷官湖南衡陽。河南長葛。及陝西大荔朝邑。均以廉  
擊著聞。然非其好也。中年學道。留心參同悟真。聞涇陽有李半仙者。本大與人雲游。海嶽得養生術。  
年可一百四五十許。晚居陶復中。衣履賸賦。謝南屏車騎親謁之。從容扣擊。爲其許可。又工分書。遇  
有漢魏碑碣。必於鑿缺尋其點畫。凡偏旁波磔。反覆攷證。臨摹數十過。乃已。所撰涵真閣漢碑文字。  
如郡閣頌。張壽景君諸碑跋。皆精深詳審。以訂隸釋隸辨。及金石圖之異同。故當自  
成一書。獨有千古。作令十年。遽歸奄忽。其夢入西溪枕上偶賦云云。殆其詩識耶。

夢入西溪枕上偶賦

脉脉西溪路。南枝競報春。如何花底客。竟是夢中身。冷豔猶盈抱。茅檐尙可巡。惱人寒漏急。不得臥香塵。

和澄之醉後聞歌三絕復枉長律次其韻

妙緒頻抽八繭綿。移情終古說成連。不因身在曹劉後。要使神超李杜先。日月坐馳增黑業。篇章潤飾笑  
華顛。知君慧劍新磨淬。不許塵根一線牽。

玉筍山

峇峇上玉筍。直下窺汨羅。山風激潭水。鳴鳴聞九歌。

桃花紅

仙人種桃樹。花影散春江。浮邱住花裏。隔花聞仙尮。

張應均

字星巖。號東畬。元和人。貢生。官西陽州判。有入蜀草。

蒲褐山房詩話東畬工於山水居京師極爲今相國董公蔗林所賞自入蜀後筆墨尤勝未幾以病告歸家居數十年而歿詩不多作近體亦復閑雅東畬本宋魏國公之後家藏南軒官湖北路轉運副使勅書凡十四行一百二十二字上有御書之寶據勅書南軒曾官御史兼秘閣考之本傳未嘗爲御史亦未嘗爲轉運副使此可証宋史之闕也後有程南雲跋云南軒十一世孫居松江有鏡秋閣自號九峰其弟遷居吳門故勅書存於東畬家而九峰不見於松江郡誌附記於此並諗我松之好事者

馬邊草樓夜話

天涯萍梗總浮生。萬里蒼茫愴客情。夢斷江雲迷故國。人隨山雨入邊城。壯懷每向登臨闊。旅感從教閱歷平。珍重交遊今聚首。草樓蕭瑟賦秋聲。

皂角舖

水郭山村隱翠微。人家竹裏對晴暉。紅葩的的秋塘淨。白石粼粼晚渡稀。林際炊烟新稻飯。門前洄嶼舊漁磯。江南風景依然在。客路休嗟未是歸。

山水題賦顧晉莊明府

蜀川歸去漫勾留。自笑身如不繫舟。他日江南山色裏。爲君艤棹荻花洲。

題畫

巒容深淺水雲寒。一片空濛著筆難。卻憶吳山亭子上。翠鬢每向鏡中看。

# 湖海詩傳卷二十四

## 胡高望

字希呂，號崑圃，仁和人。乾隆二十六年殿試第二人及第，官至左都御史諡文恪。

### 春日就亭即景

碧蘿掩映小林垆，繞屋平岡迤邐經。一曲蕭江晴入畫，幾層閣岫暖浮青。登臨到處開襟抱，風雅當年見典型。好景無邊添勝賞，佳遊彷彿峴山亭。

### 校士寧都

春光駘宕過梅川，民物熙和境靜便。膏雨乍收青岫外，人家多住翠微邊。翠微峯距寧都城四十里，金精峯在寧都城西，魏永叔有翠微記。關心芳序塞蘭節，入畫輕陰釀麥天。最喜時平風俗美，星軺周覽記經年。按：試諸郡已一周矣。

## 趙翼

字雲松，號甌北，陽湖人。乾隆二十六年殿試第三人及第，官至貴西道，有甌北集。

蒲褐山房詩話：雲松性情倜儻，才調縱橫，而機警過人，所遇名公卿，無不折節下之。初受知於汪文端公，及入中書，直軍機處，傳文忠公尤愛其才，旋以及第，改翰林，數年簡放知府，出守廣西鎮遠時，緬甸用兵，詔選隣省幹才，助蒐軍實，君住永昌，半載會文忠將督兵深入，遣之還粵，又為李制府所賞，調廣州，并登薦剡，擢貴西道，尋以母老留養，遂不復出，迄今幾三十年，同時與袁子才、蔣心餘、友

善才名亦相等。故心餘序其詩。謂與酙落筆。百怪奔集。奇恣雄麗。不可逼視。子才謂其忽正。忽奇。忽莊。忽俳。稗史方言。皆可闢入。洵知言也。乾隆辛亥夏。余與慶樹齋尙書。奉使獻事高郵。君時主揚州書院。擊舟見訪。銜杯促膝。竟日而返。蓋其篤舊交嗜譚藝如此。

遊惠山

曉緣梁溪行。波滑一枝櫓。忽聞溪流聲。知是夜來雨。舍舟入林麓。霧色澹天宇。空翠霏濛濛。孤烟起縷縷。葉落風自掃。山缺雲或補。言尋漪瀾堂。寒碧見太古。却訝尺許深。汲綆萬人取。始信一眼泉。中涵滿腹乳。臨流澄水觀。眉髮朗可數。翻嫌塵網身。到此成僮楚。日斜歸路促。勝遊歎莽魯。回首蒼山巔。新月上高樹。

同顧北墅王漱田觀西洋樂器

郊園散直歸。訪奇番人宅。中有虬鬚叟。欽天監正劉松齡等皆西洋人出門敬迓客。來從大西洋。官授義和職。年深習漢

語。無煩舌人譯。引登天主堂。有象繪素壁。覩若姑射仙。科頭不冠幘。云是彼周孔。崇奉自古昔。再遊觀星臺。爽塏上勿羈。玻璃千重鏡。高指遙天碧。日中可見斗。象緯測晨夕。斯須請奏樂。虛室靜生白。初從樓下聽。繁響出空隙。噌吰無射鐘。嘹唳蕤賓鐵。淵淵鼓悲壯。坎坎缶清激。鐸于丁且寧。磬折拊復擊。瑟希有餘鏗。琴澹忽作霹。紫玉鳳唳簫。烟竹龍吟笛。連桐控榻底。頻櫟鉏鋸脊。鞞耳柄獨搖。笙舌炭先炙。吸噓竽調簧。節簇筳赴拍。篋疑老嫗吹。筑豈漸離擲。琵琶鐵撥彈。箏箏銀甲畫。空泉澁篋篔。薄雪飛筆筴。孤倡輒羣和。將喧轉稍寂。萬籟繁會中。縷縷仍貫脈。方疑宮懸備。定有樂工百。豈知登樓觀。一老坐擗擘。一音一鉛

管藏機捩關。一管一銅絲。引線通骨骼。其下韞風橐。呼吸類潮汐。絲從橐罅結。風向管孔迫。衆竅乃發響。力透腠理。若清濁列若眉。大小鳴以臆。韻仍判宮商。器弗假匏革。雖難繼韶護。亦頗諧皷繹。白翎調漫雄。朱鷺曲未敵。奇哉創物智。乃出自蠻貊。緬惟華夏初。神聖幾更易。鸞鷲肇律呂。秬黍度寸尺。嶰谷截綠筠。泗濱採浮石。元聲始審定。萬古仰荆獲。迢迢裨海外。何由來取則。伶倫與后夔。姓名且未識。音豈師曠傳。譜非制氏得。始知天地大。到處有開闢。人巧誠太紛。世眼休自窄。域中多墟拘。儒外有物格。流連日將暮。蓮漏報西刻。白鳴鐘歸將寫其聲。畫肚記枕席。

錢充齋觀察遠餉永昌麪作餅大嚼詩以誌惠

久客生計窘。晨起惟啖粥。山行想酒樹。野處訪麪木。嘉惠荷故人。玉屑餽滿籬。貧兒詫驟富。動色到僮僕。於焉商食單。享此非分福。冷淘勞擗旋。水引費撈漉。鱗鱗乏脂豨。腦臙少棧鹿。饌饌法不嫻。餽餽料未蓄。聞昔蠻荒中。祭必人首戮。武侯南征來。改薦饅頭熟。今行卽其地。厥例正可續。又無起酵具。籠篋杆削竹。繫惟作餅事。力省成易速。鴟夷剝澗泉。鴉嘴鋤野藪。先揉銀泥爛。次納金薤馥。按抄彌罅縫。按擗擴邊幅。周輪做鏡圓。空中肖壁複。火不武而文。功旣翻又覆。逼餽焦有癢。得氣飽如毳。斯須動頤朶。雪膚瑩滿盂。饑口欣過屠。亟趁出鑿燠。寧顧齒牙倦。本無書畫黷。一笑戎馬間。將軍不負腹。卻憶豪富家。茲事鬪鼎餽。束皙賦猶陋。吳均說未錄。佳名巨勝殊。雅製曼陀獨。撿蜜雕駝蹄。拌槐蒸兔目。肪求赤髓羊。腴選舐背犢。

膏環圓無端。餽條直不曲。仿古紅綾包。翻新綵花簇。百和工雜糅。千層互連屬。裂作十字勻。釘就五色郁。酥有見風消。薄可映字讀。脆或嚼爲粉。軟或卷成束。視我腐儒餐。奚啻飯脫粟。顧當飢渴中。所願良易足。中流遇一壺。直抵舟萬斛。殷勤謝珍貺。敬誌古誼篤。已增十日糧。況勞千里轂。從軍王仲宣。累人閔仲叔。飢驅彭澤詩。乞米平原牘。生平骯髒氣。不覺滋愧慙。所悲茹淡久。欲語羞再瀆。晉飢惟恃秦。隴得又望蜀。何當更拜嘉。庖人日繼肉。

照陽關歸順州與小鎮安分界處絕壁無路忽山半一洞如城門以通往來

危崖如削鐵。橫列截前路。間道無可尋。陡壁孰能赴。地絕天爲通。神局在雲霧。初時買買行。心疑僕夫悞。黑箐叢篁間。線道屢盤互。攀躋過木杪。始見洞穴露。其深三四丈。其廣十餘步。恰從蘄絕處。橫穿一罅度。圓若城關門。兩頭俯烟樹。地迴去天近。日出光早煦。關名日照陽。應補酈生註。外達交趾國。內連邕管戍。雖似入甕行。不比山竇汚。設無此厓豁。萬古瘴嵐鋼。時清消警備。不藉儲胥護。重閉念勇夫。詩成仍卻顧。

青山莊歌

毘陵城北皆平地。何許林巒疊層翠。路人說是青山莊。門帖新題官賣字。我來出郭偶經行。款戶曾無主。出迎繡闥雕臺空。尙在殘山剩水不勝情。頭白園丁老扶病。爲余縷述資談柄。園是前朝貴介爲。依稀記得延陵姓。後屬安昌相國孫。廿年行樂尤繁盛。相國勳名在廟廊。清貧未有午橋莊。令孫繼起爲方伯。分

陝曾栽召伯棠。罷官歸徙常州住。百畝林扃供散步。入門便陋舊規樞。大笑前人太寒素。已編錢埒買堂成。拚倒金籊將地步。不覺松杉也改觀。何曾臺榭還如故。繚垣甃異枳編籬。砥室築臨花夾路。十馬馳毬關作場。百牛拖石排依樹。粉本溪山似嶂懸。壁衣籬溷皆紗護。一重一掩景迴環。某水某邱途錯互。倚杖疑探栗里幽。汎舟訝入桃源誤。勝賞經年興不殘。四時花鳥暢遊觀。清音警露鳴仙鶴。浩態嬌春豔牡丹。西府海棠移釦砌。上林盧橘植雕闌。跳波魚婢能知樂。挂檻鸚哥解勸餐。園林成後教歌舞。子弟兩班工按譜。法曲猶傳麴部箏。新腔催打花奴鼓。反腰貼地骨玲瓏。擎掌迎風身媚嫵。阿誰棋墅伴壺觴。絳几羅幮樂未央。幸舍賓朋珠履貴。便房姬妾翠鈿香。傾城妓入籠鵝館。要路官登射鴨堂。熱客倚冰終日計。乞兒向火一羣忙。主人自顧矜豪放。揮霍不將錢篋障。博局籌償舊帑錢。纏頭錦出新花樣。茶經蟹眼淬棋槍。食品猩脣調醯醬。蠟淚成堆更熬膏。酒瓶臥壁仍傾釀。笙歌酣倚賞花亭。鐙火醉歸邀月舫。自製當筵上壽詞。青山與我長無恙。豈知卮漏比泉流。猗頓潛懷折閱憂。已失又思求塞馬。未蹊輒欲奪田牛。豪名本足招人妒。禍事真成與鬼謀。張樂正期投轄飲。叩門忽報檻車收。填尸園土悲黃犬。回首歡場付爽鳩。春夢一場那可再。祇今惟有青山在。青山也要屬他人。官價三千聽人貸。猶憶倉皇對簿趨。難憑複壁寄錙銖。委地圖籤爭剔玉。隨身衣履敢留珠。翻教百口求春賃。那有千金賄獄輸。籍到平泉花木簿。林霏亦似淚模糊。平生枉使錢如水。此日人情薄於紙。有誰廣柳路旁迎。并少綠珠樓下死。老僕如今也入官。仍



充園戶守荒寒。飢窮全仗遊園客。給一文錢一度看。往日監門梁肉厭。近時失路斗升難。我聞此語心根觸。信有興衰如轉轂。重向林巒曲折尋。繁華彷彿留人目。垂楊影裏釣堪垂。秋樹根邊書可讀。愛山我乏買山資。有山渠少看山福。空餘別廟祀花神。自塑泥身占巖谷。晝寢香消落燕泥。空堂氣冷飛蝙蝠。平津廐庫古曾悲。華屋山邱今莫哭。梓澤風流昔未經。踏春偶到訪池亭。無端一段園丁話。說到傷心不忍聽。日暮歸途回望處。夕陽猶照晚山青。

南珍

維粵宅南位離火。陽明所耀開菁英。凡百瑰瑋負奇質。咸不脛走來羊城。天寶旣徵孕毓厚。人巧亦見工力精。不惟其產惟其聚。奇彩耀市目欲瞠。南烹食貨且勿述。試數服玩僕屢更。氎紋吉貝貢入筐。繭絲胡蝶縑滿簾。盤金繡毬龍鳳舞。蹴花文錦荇藻縈。不知鮫人在何處。方空織出涼綃輕。禽羽爲毳獸毛屬。豔殺血染紅猩猩。雕鏤肖形推象齒。圓爲牟尼方觚稜。蕉葉剪裁掩紈扇。椰瓢裝相抵兕觥。奩具斑浮瑇瑁。曆屏風。眼活孔雀翎。蟬翼燈清罨霧縠。龍鬚席軟輕桃笙。檀欏斲器訝笏滑。玻璃懸鏡涵水明。復有絕技出海外。能連天咫規璣衡。機括測景針自指。橐籥按刻鐘輒鳴。其他珍異難殫述。硨磲瑪瑙猶嫌儉。蜜蜡淨無雀腦白。琥珀瑩有虬松頰。蒸栗膚腴黃蠟石。落茄花映紫水晶。就中更貴珊瑚樹。鐵網絞得逾球瑛。丹幹磊砢枝鬱律。光賤絳燭高朱櫻。珊瑚以蜡燭紅爲賤櫻桃紅爲貴瓊州沈香亦佳品。黎母東洞最擅名。伽楠生結鴨

頭綠。指爪微痕生。是皆貴重不易得。市牙尙有價可評。賞鑿家且置勿道。別購骨董追姬嬴。土花斑  
攷古彝鬲。水銀皴辨舊玉珩。晉唐名畫丹碧絹。柴汝祕盜翡翠巽。其晚出者寶益異。金剛鑽及狸貓睛。組  
母綠射綵華透。松見紋裂鐵線橫。青金石取烏斯藏。碧霞璽探猛密阮。更有珍珠似明月。月華人螻胚胎  
成。合浦六池產有幾。販自番舶來重瀛。重或數銖大徑寸。形體圓滿光晶熒。蘭櫝雅宜玫瑰飾。玉盤肯逐  
琵琶傾。一握便可百千索。賈胡居奇恣取盈。計直不數金三品。誇富何論貝百朋。地大物賈信繁盛。匹夫  
懷璧徒硜硜。噫嘻乎。連城照乘古所豔。要祇一得難兼營。豈若此邦備衆美。始信奧區用物宏。從來物聚  
於有力。惟購者衆始畢呈。爲問粵中各官吏。其家豈必皆鄭程。朝廷制祿有定額。何以官橐多奇贏。伊余  
一雙書生眼。乍睹不覺適驚腸。飢未踏羊蹄菜。指動忍染黿鼎羹。竭民脂膏飽嗜好。不有人禍將天刑。  
吳隱酌泉表素節。包老投硯垂徽聲。雲烟過眼付一笑。蕭然氣味含孤清。

題蘂菴僧遺像

曾住花山最上層。披圖猶見骨峻嶒。立朝章疏批鱗手。易世衣冠削髮僧。故國遺墟傷北望。空門法席演  
南能。孤標自是經奇士。莫但相推續佛燈。

哭門人董東亭庶常

十年一第返江關。也算人生衣錦還。到日家惟懸磬在。病來身死亂書間。方修昆陵邑志消埋奇氣虹千尺。零落

殘鳶豹一斑。贏得憐才情不少。京華朋舊淚同潛。  
孤露身真落葉如。曾憐少賤帶經鋤。生無薄產常依婦。才可名山未著書。家在一方鴻爪裏。名沈千古貉  
邱餘。從知墮地須論命。何物憑君覽揆初。

漫興

紙窗涼逼露華清。顧影蕭然感易生。漸老髣毛攙黑白。就衰筋骨驗陰晴。將車送鬼窮難去。食字求仙候  
未成。手剔寒燈清不寐。階前落葉報秋聲。

送童梧岡編修視學湖南兼寄諸桐嶼辰州

蕩函五色麗朝霞。遙指荆南驛路賒。道脈至今稱嶽麓。才人自古到長沙。雲開衡岫占文筆。帆轉湘流過  
使槎。大雅扶輪須努力。儒生此職最清華。

行部辰陽禮數寬。有人手版謁征鞍。桐嶼君同年也應劉才子原同調。屈宋衙官恐未安。燕寢香凝杯酒暖。轅門  
風靜鼓聲寒。相逢爲道邠鄉老。自少詩朋與漸闌。

聞桐嶼罷官卻寄

一麾出守到辰陽。忽被彈蕉孰中傷。儒術豈應疎撫字。仕途未可恃文章。空留東閣花如雪。可惜中年髣  
未霜。太息春明分手日。曾期治行漢循良。

竹君述菴叢園來殷耳山璞函小集寓齋卽事

老屋三間聚履綦。到來便擬夜歸遲。地非北郭聯吟處。人似西園雅集時。名飲豈須絲竹肉。清談無過畫書詩。只慚蔬韭誇高宴。未免人嗤措大爲。  
蕭寺看花僅幾旬。俄驚裘褐戒霜晨。年光眞覺如彈指。著述猶難到等身。五鼎食中無我輩。千秋亭外幾癡人。祇應轟醉過殘臘。此便消寒第一巡。

浮湘

碧天無際水茫茫。泛櫂遙臨楚塞長。不比逐臣須禱嶽。從來詞客例浮湘。路經九曲帆頻轉。地爲三閩草亦香。懷古高吟到分夜。一聲清瑟數峰蒼。

永州道上

烟雨瀟湘泛使槎。九疑一半暮雲遮。長途已過峰回雁。寬政今無俗捕蛇。袁渴尙傳遷客記。浯溪難訪漫郎家。篋中剩有春陵句。留伴孤燈一炷斜。

崑崙關咏古

醞酒軍門正滿壺。嚴關夜半已潛驅。千秋部曲皆番落。今各土司皆狄公從征將校之後也。一片山川尙陣圖。何必梁公爲遠祖。不妨季布是黥奴。經過想見英雄氣。古木靈風叫鷓鴣。

述庵璞函緣事罷官亦從軍來滇卻贈

幾載京華共酒樽。豈期炎徼再相親。翻愁日下無名士。卻喜天南有故人。株累驚心金齒戍。巢痕回首玉堂春。好將戎幕聯詩社。吟徧蠻鄉景物新。

哭果毅阿公病歿於軍

曾從絕域立功回。五百驍兵萬賊摧。回部之役。公以五百兵。敗賊萬衆。使相旌旗開幕府。上公劍履畫雲臺。攻心徼外勳垂就。距受降僅數日矣。曳足軍中志可哀。太息金沙江畔路。將星寒落浪花堆。

曾忝軍諮畫策長。血痕親見裹金瘡。可憐病到三遺矢。猶自身衝百戰場。門望高還傳帶礪。國恩深爲紀旂常。獨悲丹旆還都日。故吏無由奠一觴。

慈元殿宋楊太后同帝昺居此。

中土無家寄海隅。數椽椒寢莽榛蕪。遺蹤漫擬陽人聚。塊肉曾攜趙氏孤。臣妾僉名羞作表。公卿負屨儼成圖。最憐涕泣臨危語。何減唐宮麥飯呼。

壬辰冬仲以廣州讞獄舊事吏議左遷特蒙溫旨送部引見聖恩高厚蓋猶不忍廢棄而衰親年已七十有五書來望子甚殷諭令早歸以慰倚閭望因呈乞開府圖公給假旋里擬卽爲終養計途中無事感恩述懷作

一重公案律條訛。鑄秩非關吏議苛。迂拙自慚更事少。聖明猶慮棄才多。恰從順水乘歸櫂。擬乞閒身着釣簑。不是敢辜恩命重。高堂衰鬢已全皤。

多謝諸公苦挽行。

圖公堅欲奏留補山約軒笠民諸公亦多敦勸

實無才可濟蒼生。勤將政補猶形拙。清愛人知已近名。坎坎伐檀歸客思。依依折柳故人情。翻教不忍輕言別。窖酒更番爲治觥。

衍齋無事可消磨。一載閒情付咏歌。老去賀公吳語慣。病來莊舄越吟多。滄江秋晚衣裁荔。空谷天寒屋補蘿。不覺詩成眞作識。篇篇都是憶巖阿。

### 韓蘄王墓

麒麟高塚占雲墟。異姓眞王百戰餘。勳業未來先臥虎。英雄老去亦騎驢。葬應祕器蒙分賜。績尙豐碑表特書。宋待功臣原不薄。棲霞何事獨誅鋤。

述庵從軍滇蜀閱七八年。凱旋後超擢廷尉。茲乞假歸葬事畢。還朝道經毘陵。停舟話舊賦贈烏撒。匆匆握別遙。何期相晤在江郊。十年京國詩文契。萬里邊塵患難交。曳履喜公遷棘寺。息機笑我老書巢。停舟不盡離懷訴。坐到斜陽挂樹梢。

滇疆蜀徼佐軍籌。

奏凱歸來進秩優。

蟣蝨久知生介冑。

公蒙恩賜孔雀翎

赫黃詔特榮先壟。飛

白書應起賜樓。

新構第宅

卻憶吾家老元叔。與公會共赴星郵。

陸隨絳灌本殊科。誰似先生兩不磨。文苑才偏臨陣勇。戰場歸又著書多。放翁詩滿成都市。劉秩身當曳落河。如此儒冠纔不負。眼看青史入編摩。

南天門

峽束青冥上。嚴扃構次寥。天惟通一線。星可摘三霄。路鑿鉗椎苦。峰排劍戟驕。控臨戎索大。拱衛帝京遙。狹僅容單騎。驅難並兩鑣。地形愁倒馬。風力稱盤雕。險叶泥封谷。危如棧架橋。時清無戍壘。巖迥有僧寮。捲幔霏空翠。炊廚拾斷樵。鐘魚聞上界。沆瀣吸中宵。雲族漫為海。山支湧似潮。平生登覽興。我欲馭輪飈。

陸錫熊

字健男。號耳山。上海人。乾隆二十六年進士。二十七年召試。賜內閣中書。官至左副都御史。有篁邨詩集。

蒲褐山房詩話。耳山博聞彊記。資稟絕人。由中書入直軍機。初與予奉勅編通鑑輯覽。頃之命輯永樂大典。復求天下遺書。開四庫館。以蒼萃之。校對數百人。臚錄至千餘人。歷十年始成。而君與今大宗伯紀君曉嵐。司其總。每進一書。仿劉向曾鞏例。作提要。冠諸簡首。上閱而輒善之。特旨由刑部郎中授翰林。侍講文字。受知駸駸。嚮用。典試者三。督學政者一。後因奉天所儲四庫館書。中多脫落。舛誤。奏請自往覆校。比至。而病歿。時論無不痛惜。平日進御之作。工而不穠。婉而能切。同人推為莫及。至詩文。隨手散佚。歿後搜篋中。得數百首。皆應酬之作。非其稱意者。

橫塞灘

嗟哉橫塞灘。茲險何由奠。山青削兩岸。天白露一線。衆壑競奔流。斜曳萬丈練。劔土濯山根。亂石疊疊見。

水洲列四五。沙卵成高堰。上生芷與蘅。其色頗葱蒨。清流歧數支。觸石珠交濺。縈迴轉似輪。激駛直如箭。崩波恐一決。百丈從後牽。木篙拄兩肩。跳躍左右踐。迂久始過灘。回顧猶驚顫。坦率情所趨。行險理非便。因之悟至道。長嘯得所遣。

舟宿白蓮涇得吳大充之見懷作卽用韻卻寄

停橈向空江。暝烟散叢薄。三更下風露。天宇轉寥廓。故人枉書札。三復停雲作。歡娛罷琴酌。良會久寂寞。伏枕更攬衣。太息感今昨。緘意託修鱗。寒潮正東落。

青瑤池館夜集分賦得石字

涼月松際生。流光滿溪白。開軒引蘭酌。幽襟契泉石。禽翻竹風疎。人語桐露滴。不有池上吟。誰爲永今夕。

鉛山道中追悼蔣心餘前輩作

豫章有名材。千尋挺巖谷。森然到合抱。徑寸受氣足。咸韶發清奏。冠佩好奇服。鵷鸞滿中臺。豪逸天使獨。靈心苦雕鏤。健筆謝邊幅。淒涼桓伊箏。諧笑東方肉。微言參聖諦。餘子但碌碌。遠追正始音。盡洗皇菴曲。寧徒壓西江。詩派繼前躅。文端今歐陽。一見快刮目。承明須著作。藜火照天祿。司空東閣士。彭蔣粲雙玉。故人已龍驤。一老猶驥伏。空呼野才子。去伴古尊宿。晚憐爲貧出。又捧侏儒粟。方乘桓氏驄。竟集賈生鵬。我昔游諸公。杯盤互追逐。交游散風絮。歲月轉車轂。當時二三子。強半在鬼錄。都亭憶分攜。冷月挂疎木。



雖言苦風痺。尙喜按絲竹。心知見無幾。慰語痛在腹。終然厄龍蛇。聞耗淚盈掬。人間讀書種。黃壤葬籬麓。定知三尺墳。夜有紅光燭。偶來通德鄉。山川覽清淑。聊爲投文帛。未遂隻雞哭。鳳毛付超宗。食子宜在穀。他年訪斜川。遺編許重讀。

鄱陽湖

昔讀禹貢書。今泛彭蠡澤。連山盡東趨。大地忽中坼。岷流束襟喉。楚派會圭璧。微茫波濤青。破碎洲嶼黑。網紅縮諸州。津堠通十驛。魚龍閒自舞。天水了不隔。當年戰鄱陽。陣火照山赤。檣艦灰燼滅。銘碣丹青泐。雄圖久銷沉。遺廟空血食。惟餘浩渺觀。一洗芥蒂臆。我來水歸壑。又苦寒飈射。千尋蹴巨浪。七日滯行客。崩崖困掀簸。永夜愁偪側。遙瞻落星戍。悵望柴桑宅。出險會有時。扁舟竟安適。夢醒聞好語。旗尾西北擲。

彭澤縣

大江會九派。驚濤浩無邊。潯陽三舍餘。五日勞洄沿。層崖□危堞。孤城枕江壩。茫茫辨洲樹。稍稍開墟烟。卽景感徂歲。望古懷昔賢。水勢樞陽西。山光義熙前。我因一囊粟。乘此萬里船。所求亮錙銖。忍受旁人憐。造物養不材。飲啄良有緣。但當咏時運。便可歸園田。三復乞食詩。操瓢亦欣然。

桐城江上有懷姚姬傳禮部

江介滯寒景。扁舟汎夕陰。龍眠望巒翠。不覺暝烟沉。眷言同懷子。結廬臥高岑。焚香散貝帙。潔膳娛萱襟。

東華一爲別。種松已成林。昔游曠嘉觀。今塗阻遐尋。相思無日夜。浩與江流深。蘭省夙相要。歲寒亮此心。網繆十年舊。契闊二毛侵。

三笑堂

開門見南山。松花墮涼雪。言尋虎溪路。一逕趨透折。深堂寂無人。緩帶滌煩熱。幽襟契蓮社。吾愛陶靖節。意行無町畦。曠致縛禪悅。當年三客蹤。草長葦音絕。丹青尙遺姿。巾服儼孤潔。描摹亦駢拇。色障非大徹。法師具天眼。萬象不生滅。虛空本無槁。那事強分別。一笑撒手迴。妙諦不可說。請聽橋下水。猶似廣長舌。

分賦得有竹莊送紀心齋先生南歸

石田老布衣。名著高士錄。當年玩遯占。卻薦適初服。結廬相城里。人境關巖谷。募疏手寫成。乞種萬竿竹。生絹揚烟霞。賓屨填戶軸。至今想修髯。飄飄映餘綠。如何塵外蹤。乃受畫壁辱。無名挂官府。彌見獨行躅。先生早通籍。廿載寄朝祿。出處跡雖歧。風流趣堪續。昨宵西塞夢。飛落橫塘曲。上書乞身歸。投老此卜築。遙知琅玕林。中買數間屋。閉門聽秋風。蕭森憂寒玉。通泉遠分笕。劔笋晚當肉。逍遙定長年。先後纏清福。應嗤都南濠。但點讀書燭。

題馮星實夢蘇草堂圖

大峨仙人天與遊。夢蘇居士神相酬。鬚眉悅見七百載。鳴止正待三千秋。平生尙友香一瓣。竹屋青燈歲

方晏。鄭箋。矻矻。手自抄。莊蝶。遽遽。目非幻。下峽。以還。渡海前。嬉笑。怒罵。皆詩篇。搜來。稗野。添公案。揀盡。塵沙。得定證。心精。感通。如面告。笠屐。翻然。風肅肅。尋春。豈訪。符秀才。聽雨。還偕。老同叔。披帷。一笑。顏色。親。掉頭。不住。機鋒。真文章。幸脫。元祐禁。襟袖。應貯。眉山春。蓬萊。遊戲。歸何處。壽骨。長身。起餘慕。隨風。咳唾。落尙新。湧地。源泉。默成悟。巧意。丹青。想入微。月梧。烟篠。晚依稀。豪情。湖海。呼能出。真面。廬山。認儻非。開府。生辰。詩滿。紙。學士。高齋。署蘇米。君家。證夢。復草堂。去酌。寒泉。薦芳芷。

蔣丈奕蘭招陪沈歸愚宗伯彭芝庭司馬及諸同學集繡谷送春

荼蘼。風起。晴鳩。啼。曲巷。過。雨。生。春。泥。紅橋。四。百。芳。草。暮。落。絮。飛。遍。昌。亭。西。樓。頭。花。枝。樓。下。雪。流。光。匆。匆。坐。成。別。名。園。上。日。羅。衆。賓。共。惜。江。南。好。時。節。江。南。春。漲。青。接。天。十。日。正。泛。沙。棠。船。白。蕉。之。衫。高。齒。屐。乘。興。來。醉。櫻。桃。筵。竹。梧。交。蔭。敞。瑤。席。黃。金。叵。羅。持。勸。客。良。辰。勝。事。本。難。期。復。見。風。流。照。泉。石。簾。光。泛。綠。池。水。平。碧。蘿。裊。裊。含。烟。清。石。牀。洗。盞。更。盤。礴。欲。落。不。落。斜。陽。明。東。風。無。情。鬢。成。素。多。謝。流。鶯。喚。人。住。倒。載。狂。歌。歸。去。來。來。朝。酒。醒。春。何。處。

遂初園歌呈拙菴吳丈

先生家本天都峯。丹梯鐵鎖攀芙蓉。白雲如海蕩胸臆。手弄明月矚茅龍。十年夢落滄江曲。卻向巖東縛茅屋。自有前期侶向禽。何妨混迹同樵牧。桃花滿溪溪水香。柴門晝掩山蒼蒼。園林結構足佳趣。枳籬百

曲沿滄浪。葛巾方袍自來往。芳逕無人碧苔長。急雨微生竹院涼。暗泉細落松根響。紅橋窈窕碧玉流。興酣散髮乘扁舟。仙源路轉豁明鏡。倒影忽浸花間樓。先生平生此休息。林下清風滿泉石。短鍤常攜劇藥童。方牀頻約圍碁客。西園昨日花亂開。置酒邀我臨高臺。華林魚鳥趣方永。下若尊疊晚更催。相看綠鬢顏如昨。不用巾箱圖五岳。結習難忘蠟屐情。息機真羨披裘樂。別有江湖憔悴人。年年席帽苦風塵。攜家橫欲就塘曲。射鴨撈蝦作比鄰。

題晉陽申五兆定山樓聽雪圖卽送其省覲杭州

冥冥寒色低壓檐。千巖萬壑開銀匳。天公昨夜勞玉戲。樵徑絕跡山埋尖。孤茅天外誰所縛。玉虛樓閣清光添。幽人高枕聽蕭瑟。明窗透影疑冰蟾。橫空曉起發奇賞。四面盡拓蘆花簾。朔風亂吹柳絮落。冬序瞥見繁花粘。乍如春蠶臥竹箔。食葉上下飢難厭。又如鐵騎驟風雨。銜枚將令森兵鈐。危簷溜折栖鳥起。凍澗飄入遊魚險。長松振鬣遠撐突。揜孳亂戛驪龍髯。空山無人萬籟寂。聞根不斷神彌恬。卻思踏雪控金勒。霹靂應手弓初拈。豪情爭如逸致好。登眺不畏寒威嚴。段橋殘雪景尤絕。山水勝事君能兼。驪歌唱罷送征棹。短衣空愧塵容黔。

桐廬

信美桐廬縣。初冬似暮秋。人家烏柏樹。客子木綿裘。樂歲高低廩。通川上下舟。宵來試山雪。白映老夫頭。

夜雨簡奕蘭

讀罷離騷意惘然。更堪暝色下江天。小牀怯雨留鐙坐。薄絮欺寒壓夢眠。浮世因緣雙屐外。少年心事一杯前。張郎亦是秋風客。擬向鱸莊問釣船。

瑞洪聞雁

番陽急雪夜淒淒。幾隊哀音落枕齊。夢老慣依邊月迴。羣孤猶怕嶺雲迷。江湖浩蕩驚新侶。秔稻艱難憶故棲。欲寄封君轉惆悵。流黃機畔翠顰低。

陪瑤華主人遊盤山千相寺分韻得亭字二十韻

疊磴趨中谷。連山拱翠屏。客來扶棧度。騎轉隔橋停。石壓蹲蛟勢。松盤舞鶴形。繁花遲潑雨。絕澗想奔霆。蟻道方緣垤。獅林忽建瓴。雙竿承寶刹。兩扇豁金釘。雲氣晴浮瓦。泉音晝入鈴。香臺禽欲下。講座虎曾聽。海色連平楚。天光動落星。契真名洞開窳窳。洗鉢貯清泠。田俯僧衣碧。峰交佛髻青。何人崇象設。多事鑿岩扃。相好關俱足。名言理亦冥。唐燈懸古厂。遼碣剔殘銘。興發還紆策。幽尋更得亭。拈毫逢邂逅。隱几接芳馨。遊許陪飛蓋。才真謝叩莛。流連傳茗椀。指點拓窗櫺。歸路頻迴顧。長吟到薄暝。題詩崔顥在。勝地魏初經。

雨中作

春烟漠漠水初生。隔院遙傳百舌聲。最是客愁消未得。杏花寒雨過清明。

蓉江道中懷人絕句

光祿文章壓輩流。瑯琊宗派鳳麟洲。朝回日日餐蛾綠。鬢影書聲共一樓。王光祿鳴盛

錢郎瘦比東陽沈。地近蓬萊會列仙。曾到和林訪遺事。斷碑零落兔兒年。錢侍讀大昕

定香居士老詩禪。卜宅仍隣古寺前。常說夜遊同謝監。柏陰如藻石幢邊。王舍人昶時昶寓在寄園而謝編修塘所居聽鐘山房皆在闕

忠寺之北兩君月夜常偕勝侶往坐松下至二三更而歸

鄭郎昨上蓮華頂。濯髮親經玉女盆。手摘明星望鄉國。黃河如線走中原。鄭禮部鴻模

韓莊閘口望微山湖

眉痕淡掃夕陽邊。獨倚危橋望楚天。引起江湖十年夢。亂帆如葉水如烟。

此页空白

湖海詩傳卷二十五

曹仁虎

字來殷號習庵嘉定人乾隆二十二年召試賜內閣中書二十六年成進士官至侍講學士有詠典  
秦中刻燭炙硯諸集

蒲褐山房詩語來殷以聲華名望為都下所推然端靜自守恂恂粥粥不至朝貴薰灼之門其詩  
宗四傑七言長篇風華纏麗壯而浸淫于杜韓蘇陸下逮元好問高啟何景明陳子龍及本朝王士  
禎朱彝尊諸公橫空排募才力富有七律尤高華工整獨出冠時雄渾之語則有雙映天低連雪嶺  
五丁地險接維州校尉盡看紅帙首材官齊號黑雲都奸細幾會誅趙信征人空見老班超紫霧千  
盤開漢碣碧霞四氣拱秦封西京專闔推橫海東漢登壇數伏波初添蜀郡三城戍更遣秦川四道  
兵執法烏臺秦御史談經絳帳漢儒林情韻之語則有梨花小院重重樹燕子高樓面面風叱犢聲  
聞黃稻隴歸鴉影點綠楊村東風樹樹生紅豆南浦迢迢送綠波明聽曲几彈棋地小雪歸雁後鄉心  
天初聽成雷喧白鳥閒看避雨徒元駒澗道水聲疎雨歇江天帆影夕陽多客路正當歸雁後鄉心  
多在落花初白蘋千點鷺初散紅雨一簾驚亂啼時詩道雜而多端或傲白居易或傲黃庭堅楊萬  
里或至做袁宏道信手塗抹率以流易佛巧為能如郭舍人之俳諧鄭五之歇後黃茅白葦彌望皆  
是及來殷詩出乃奏金石以破蟋蟀之鳴然其集未行世人之者尙少定例各宮殿門對聯撰自  
翰林次由工部每至封印後工部堂官率屬敬謹懸掛新春開印後收而謹藏之歲以爲常其鈔舊  
者隨時更換乾隆癸未甲申間多係來殷恭撰今其集中所存如皇極左門九重數斂範陳箕曼  
羨蕃釐共錫萬國會歸光戴斗蕩平軌路同遵右門洛壽福紀慶洪廷象協居中建五乾筴祥符  
徵順敘功侔則大函三斂禱門恒景運祥開久照八表山川徵樂壽昌期福集新韶右門珍鳥奕流  
崑嶽風從治比春葦夏育祥迓熾昌昭德致符呈乾絡坤維錫慶門云億萬齡錫美延洪保定自天  
孔固三千界重熙浚洽祥和輿物同春左門云三壺景象駐恆春卸砌環迎載福六幕光華徵復旦



形宸茂集繁祺右門云珠囊晷緯召麻徵福界垣臨太乙玉燭年華彰瑞應昌辰化溥由庚影壁門  
 云川岳獻珍符烟煴闌瑞日星昭景祝紉綬呈華玉琯奏誠和氣調九寓瑤樞微廣運衡正三階茶  
 膳房云得氣先莫長應月呈祥翠蕙並迎風五色雲英滋秀草千秋露實熟蟠桃湛露凝甘盈缶瓊  
 光風布照應瑤箏液酌衢尊同介景音調嫩管徧覃禮例此數百言置之盛唐詩內皆絕妙好詞也  
 昇平故事自古罕傳足為  
 詞林程式故摘錄於此

晚過尙湖

濛濛濕雲昏冉冉涼月吐扁舟向湖波前涂渺何處疎鐘來遠山野火出深樹賓鴻下蒹葭颯沓秋氣暮  
 沙寒不見人柔櫓烟中去

熱河懷人詩五首

王公直禁廬歲歲侍獮獮自參滇蜀軍九載歷蠻徼豈惟策勳奇詩文助雄稟昨赴豫章城派振西江調

甫德

鴛湖有一老文苑擅三絕早歲客平津關塞陪車轍閒中談往事酒酣並耳熱余亦慟西州流光感電警

先生客蔣文恪公所每以隨輩同至塞外余於己卯歲官  
 中書亦陪文恪公至木蘭嗣後文恪即不復扈蹕矣 瘳石

河間著作才與志資編纂初登詞苑班即備屬車選庶常扈從熱河始於先生暨踵事逮末儒依類訂成

卷餘義在引伸匪曰誇證辨余承先生後曾訂熱河志體例一遵原書惟濟老河之非即白狼水潢河之

錢君桑梓人研席共齟歲踵武向承明依舊魚同隊當君遊塞時惜未聯征轡想像訪遺碑手剔枯苔鑿

汀竹

學士隨蹕來。覺宮值新建。煌煌舍菜儀。几筵侍親盥。文聲翔塞垣。典故具詞館。合有雅頌音。矢詩逾樂泮。

華白

馬伏波銅鼓歌和夢文子夫子

我聞軒轅始作桐鼓曲。靈夔驚鳥張軍容。夏足殷楹遞更變。用供祭祀兼兵戎。周禮鼓人掌六鼓。和以鐸。錫。錙。鏡。鐘。路。鼗。提。晉。辨。等。級。要。貴。立。動。昭。豐。功。漢。初。樓。車。製。更。異。軍。門。鼓。吹。傳。雄。風。離。牛。坎。馬。各。有。用。茲。獨。奚。取。銅。山。銅。相。傳。得。自。漢。馬。援。駱。越。遺。器。來。南。中。想。當。交。阯。初。叛。日。蜂。屯。蟻。聚。揚。軍。鋒。朱。鳶。駱。將。特。雄。勇。寇。略。嶺。外。窺。城。墉。璽。書。朝。下。伏。波。印。副。用。段。志。兼。劉。隆。平。生。慷。慨。負。大。志。據。鞍。顧。盼。鳴。雕。弓。徑。從。滄。海。趨。浪。泊。樓。船。百。道。麾。艤。幢。斷。崖。誓。巽。控。萬。疊。幽。箐。杳。靄。迷。千。重。飛。鳶。作。隊。下。墮。水。黑。雲。四。塞。天。濛。濛。金。溪。穴。深。深。不。測。親。率。戰。士。當。其。衝。九。真。遺。賊。悉。蕩。滌。日。南。合。浦。風。烟。通。申。明。漢。律。示。約。束。紛。紛。向。化。輸。蠻。寶。分。茅。嶺。外。定。疆。界。插。天。銅。柱。標。龍。從。轅。門。晝。啓。獻。方。物。負。戴。絡。繹。來。獐。獐。大。圍。兩。肘。高。四。尺。非。刁。非。斗。非。金。鏞。昔。時。廣。州。始。鑄。此。良。金。上。齊。歸。陶。鎔。千。鈞。重。器。一。朝。就。尅。晨。置。酒。陳。餼。饗。中。庭。高。懸。貫。四。耳。曉。瞰。下。射。光。瞳。矓。溪。獠。峒。虜。各。奔。赴。項。髻。斜。插。形。鬚。鬆。金。銀。釵。股。競。扣。擊。半。醉。徐。起。歌。嘯。响。花。腔。盧。沙。相。間。作。用。以。報。賽。祀。祝。融。一。從。遠。輸。入。漢。室。捆。載。萬。里。馳。花。驄。歸。來。擊。牛。勞。將。卒。鑄。爲。馬。式。煩。良。工。儀。帛。諸。家。備。骨。

相黃驩亦驥高纏駿。工成獻自宣德殿。封侯裂土相始終。何爲此鼓獨未毀。鬼神呵護留炎封。蠻烟朝迷色閃閃。瘴雨夜洗陰雲。驚灘亂石露光怪。白日倒貫普江虹。神物沉埋閱千載。何時却出荆榛叢。氍毹包席裏。致吳下。縵文隱隱苔花濃。面平腰束下無底。碎乳四散排玲瓏。蝸涎剝蝕備諸狀。瓜皮沉綠丹砂紅。惜無龍螺刻籀篆。豈假饕餮圖姦兇。蟾蜍大小拱左右。識凹款凸中虛虛。雲雷有象間絡索。班班古色盈簾櫳。羊鼎虎彝失貴重。珠盤玉敦羞尊崇。硯山堂中遠塵俗。插架文史羅三冬。巍然此鼓列座右。摩挲拭光熊革。匱十重巾十襲。聲價不數珪璋琮。我來入門望寶氣。遙見突兀虛廊東。桐魚作桴一奮袖。噌吰鞞鞞驚羣聾。疾雷殷天走霹靂。陰霧覆地趨靈籙。連鞦輿互較轢。快劍短戟爭撞搗。鼓聲震堂堂欲動。似有萬騎奔峒峽。三擗忽停衆響寂。元天仰視高穹窿。狂歌擊節自起舞。令我懷古心忡忡。蠻夷叛服本無定。控御有道歸君公。自從漢家事遠略。喪師失邑無終窮。先零種落居內地。遂使邊境交矛鏑。匈奴二庭及西域。出沒晝夜頻相攻。懸兵迢遞出徼外。飛芻輓粟勞輸供。賴有名將如援輩。相與戮力垂勳庸。惜哉五溪復猖獗。壺頭病困何匆匆。牀前豎子起蜚語。朝宁誰復知孤忠。文犀薏苡事莫辨。矯首耿耿悲填胸。男兒要當志邊野。裹尸馬革真英雄。卽今西陲諸部勁。秋深牧馬遙傳烽。登壇授鉞遣將帥。旌旗千萬摩蒼穹。陣圖堂堂控蛇鳥。營竈纍纍連蠙蠃。金笳鐵角數聲動。士如猛虎駒如龍。遙聞疆場新戰捷。露布已達明光宮。便當捲甲趨絕漠。一鼓直掃龍庭空。區殫域滅始返旆。勒銘夜削青芙蓉。叩關款塞集君

長黃支烏弋咸來同軍中。鞀鼓靜不震。五金銷盡歸春農。辟雍簾業振文教。靈鼉奏處聲逢逢。千秋青史紀偉績。夫豈不如嬰鑠翁。

天台山歌送沈歸愚夫子

天台山高峙吳越。層峯隱現開靈闕。鳥道斜連谷口雲。龍湫映徹巖前月。赤城拔起何龍從。紫霞明滅金芙蓉。靈氣蟠結雄南東。上帝賜與神僊宮。陰厓遠通一線日。絕壑橫臥千年松。盤盤鐵鎖不到頂。但見飛梁峭壁縹緲懸空中。先生本是烟霞客。解組歸來樂泉石。選勝還升陶令輿。探奇更蠟謝公屐。金箱常貯眞形圖。輿酣奮袂尋僊都。螺溪幽溪路窈窕。葛嶺察嶺峯模糊。身倚千尋梯。手持九節杖。捫蘿直躡層霄上。白鳳青鸞條有無。朱幡絳節時來往。微茫滄海水一杯。南瞻雁宕青崔嵬。石梁中斷雙崖開。白虹倒掛奔晴雷。珠簾千層匯玉鏡。石筍萬仞懸瓊臺。松門之西敞靈境。居慶切兩袖天風浮絕磴。斷猿哀鳥左右啼。瑤草淒淒滿幽徑。白雲自散春巖青。氣躡隱隱乘風行。仙源一別三千齡。碧桃花落寒泉清。層樓十二開瑤京。洞中玉女相逢迎。金漿石髓遞相勸。浩歌一曲凌蓬瀛。烟巒如此堪棲託。笑我天涯空寂寞。採藥僊源路不迷。十年忍負山中約。翠壁丹梯西望遙。何由相伴陟峇嶺。惟餘華頂三更夢。遠逐錢塘一夜潮。

消寒第三集遇雪用東坡聚星堂雪詩韻

吾生量怯三蕉葉。不飲還愁負新雪。酒人絡繹隔巷來。把臂狂歌正歡絕。凍輝緣隙紙牕明。幽響墮階冰

柱折。那知漏鼓寒易沉。但覺鑪灰澹將滅。此時與酣一起舞。宰地重簾手自掣。空庭風捲白皚皚。銀海光搖亂醉纈。枯腸熱後欲森芒。妙論參來快鋸屑。悵悵促坐戀今宵。清景明朝去如瞥。掃庭任招僮僕噴。占瑞宜有老農說。歸來支枕續斷吟。翠被生稜冷於鐵。

曉起雪未止復用前韻東同人

孤鐺吹火煨濕葉。老屋沉沉閉深雪。同雲侵曉未放晴。佳客不來車轍絕。階前瘦石封漸平。壁上虛絃凍將折。長天一日鏡光遙。幾點浮烟自起滅。喜無野馬近簾飛。時有飢禽爭樹掣。玉妃姿態本天成。不逐濃妝鬪紅纈。迴颺忽作打牕聲。寂坐閒齋聽騷屑。只愁皓潔難久留。優鉢空花付一瞥。冰甌淪茗太酸寒。風味莫與麤人說。聳肩忍凍發長吟。隔戶丁冬響檐鐵。

雪霽後同人各以聚星堂韻詩見示疊原韻奉酬

遙天斑駁開雲葉。屋角初陽爛晴雪。長鬚剝啄遞詩筒。雒誦臨風各工絕。巷南巷北盈尺泥。欲往還愁屐齒折。喜將妙句當深談。一段清緣難泯滅。柔情不學眠蠶僵。健筆偏驚老鳳掣。忍寒高詠亦足豪。那羨舞茵圍繡纈。京華暮節臘鼓喧。餽歲往來事瑣屑。吾儕作達須及時。激電年華一轉瞥。拍肩命盞歡可尋。叉手圍爐話重說。吟成火急遞飛箋。要乞靈丹與點鐵。

再用前韻催同人和作

軟塵海裏萍聚葉。各有雅懷鬪冰雪。崢嶸歲晏課新詩。矮紙書成倍清絕。按節狂歌銅鉢敲。當場醉舞綸巾折。消寒排日泥傳盃。題壁淋漓迹未滅。扶輪巨手推數公。座上驪珠讓先掣。伊余雕刻慚小才。譬若爲花剪碎纈。陽春高唱發聲遲。下和巴音知不屑。由來清景難重摹。樂事賞心總成瞥。閉門定想苦吟勞。開徑還期情話說。偶然摩壘輕致師。莫笑空拳無尺鐵。

同人各以疊韻詩至仍用原韻賦答

新詩工似雕楮葉。合有幽蘭儷白雪。連朝絡繹送蠻牋。硬語盤空何警絕。共知僵臥吟倍豪。那怕苦寒骨欲折。髯公賓從誇汝南。文酒風流未漸滅。友朋勝集古今同。依舊詩壇旆旆掣。傾來寶篋皆琳瑯。織就雲機盡綺纈。撚髭擁鼻足清歡。錦帳羊羔真猥屑。苔岑臭味托心知。石火光陰隨眼瞥。松爐灰煖栢盞香。餞臘咬春有成說。相期倡和過殘年。聲應真同方響鐵。

讀同人聚星堂韻詩各有聚散之感仍疊原韻

冷吟相和蟬抱葉。冷宦相尋鴻印雪。長安聚首多素交。文字招邀真勝絕。胸中塊壘澆易消。腕底鋒芒運難折。新篇落紙盡珠璣。貯向奚囊未磨滅。深爐急盞送殘年。赴壑驚蛇不可掣。歲寒共矢青松心。羞與凡花鬪春纈。卽今幾輩各分攜。三徑人空更酸屑。舊游裙屐漸飄零。游水東流日西瞥。題襟集在期互編。剪燭緣慳忍重說。中年哀樂慣傷情。狂歌擊碎如意鐵。

消寒第四集復遇雪仍用前韻

空中翦水成花葉。送臘連番飛快雪。天公有意助清娛。玉戲縱橫最奇絕。廣庭縛帚掃復盈。老樹連巢壓將折。吾儕文酒有夙緣。肯學灰心斷生滅。衝寒踏凍疲馬嘶。薄暮打門亂雅掣。相逢似跨白霓來。要借芳醪生面纈。閒翻松炭添篆烟。自揀茗芽煮冰屑。夜深不厭捲簾看。作態迴風尙飄瞥。詩情詎待驢背尋。賦筆須從兔園說。漏沉燈炧客告歸。冷逼茸裘如擗鐵。

對雪復用前韻柬同人

空林一夜飄瓊葉。門巷蕭然封凍雪。滿牕虛白映殘書。獨撚冰髭伴幽絕。日光穿瓦相澄鮮。風勢壓籬半倒折。焚香捲幔望轉清。著屐下階痕不滅。眼前萬族各有營。鸞鳩低搶鷹高掣。浮盃越酒綠生鱗。出窖唐花紅吐纈。擁爐兀坐是孤懽。那遣閒愁感羈屑。食前五鼎車八騶。富貴徒供眼斜瞥。玉壺世界隔塵喧。惜少吟朋揮麈說。枯腸搜句耽寂寥。寒硯頻呵堅似鐵。

雪後得王惺園閣學書即用前韻却寄

去年煖寒傾竹葉。夜閣招邀賞初雪。當筵八詠創新題。去歲與惺園同賦雪中八景刻燭爭傳句超絕。苔牋半幅手自書。腕力生稜斂股折。越燕兩地忽分襟。妙蹟弄藏未漫滅。蕭齋清景故依然。獨惜流光如電掣。君今擁傳握文衡。老眼寧愁花眩纈。情懷映月湛冰壺。咳唾隨風霏玉屑。吳山雲樹浙江潮。天末空勞遠望瞥。冷吟

閒醉定誰同。離緒茫茫不可說。梅花想像賦新成。漫道廣平心似鐵。

章江渡頭船一葉。秋水涵天浪如雪。與君分手向江邊。今秋僻惺園典江西鄉試惺園即視學祖帳驪歌

浙中以九月二十一日別於南昌城外

最淒絕。燕臺南望路超遙。惜別經時心欲折。朝來貽我雙魚函。懷袖摩挲字不滅。十年仙籍舊同登。瀛海靈鼈讓先掣。宵歸院燭照金蓮。曉起宮袍擁紫纈。西牕暇日互招尋。四座從容聽談屑。竹林把臂憶風流。良會匆匆眼空瞥。相思命駕定何因。昔款還從書素說。莫嫌蹤跡易睽離。結契終應比磁鐵。

泊觀音門寄王德甫錢曉徵

風雨青溪渡。曾同抱被眠。寒江今夜月。獨上白門船。樹色三山遠。潮聲九派連。酒闌一長嘯。哀雁落雲邊。

秋夜

涼月照高柳。草堂夜氣分。斷鴻空際度。清磬靜中聞。葉落全疑雨。池荒半是雲。彈琴不能寐。蕭瑟感離羣。

寒山

孤磬出林際。空山獨到時。鳥聲新雨霽。松影夕陽遲。落葉留青嶂。寒泉響碧池。何當繼高躅。棲隱向茅茨。

楓橋舟次

楓落東塘路。星河澹碧天。殘鐘烟際寺。遠火月中船。古驛啼烏後。寒山斷雁邊。忽聞歌水調。蕭瑟不成眠。

卞忠貞墓



內史徵兵急。陶公赴救遲。江山多難日。甲冑致身時。碧血魂猶怒。青溪事可悲。冶城松柏路。風雨捲靈旗。大義推溫嶠。清言笑阮孚。重泉猶握爪。八口共捐軀。斷碣荒苔蝕。靈祠落日孤。石城忠孝並。千載有司徒。

懷王德甫錢曉徵

青溪歸櫂悵離羣。禪榻茶烟夜漏分。白露爲霜人乍去。碧天如水雁初聞。三秋客思憐王粲。十字詩名數仲文。準擬蘇臺重話雨。支筇踏遍洞庭雲。

渡江

澄江如練客舟輕。遙指金陵一日程。楚水亂帆時近遠。吳山殘雪半陰晴。濛濛浦樹烟中出。點點沙禽望裏明。無限南朝興廢感。寒潮空到石頭城。

妙嚴公主拜輓

早謝椒塗習唄音。琉璃地上足趺深。生塵不學凌波步。入石偏符面壁心。合向花龕供拂拭。未隨蘇砌付消沉。九蓮明孝定太后曾取入大內復送還寺異代同禪契。長護芳蹤到梵林。

澄江使院答陸青來卽次原韻

小邑猶傳楚相居。空江半壁控南徐。論交喜稅塵中駕。譚藝閒緝篋裏書。冰泮曲池芳草長。雪晴官閣早梅疎。最憐三十三峯好。日日開簾對碧虛。

梁溪道中

芙蓉湖上送行舟。短柳依依滿渡頭。綠水長隄遊客路。青旗小市酒家樓。雨中樹影參差出。烟際山光淺淡浮。回首故園寒食近。天涯日暮引離愁。

題王岡齡新居次韻

一徑初開仲蔚居。雲林清興更誰如。風潭好聽滄浪曲。月几時披笠澤書。戶繞綠蘿添穉竹。坪滋青甲摘新蔬。詩禪畫偈風流在。攜屐頻過野外廬。

韓莊

碧沙萬頃遠烟微。洲渚蕭條釣戶稀。日出神鴉迎櫂舞。風高孤雁掠帆飛。水流王氣連豐沛。山擁晴光入海沂。搖落不堪逢暮節。高隄官柳漫依依。

西苑春望用王德甫吳沖之韻

鴉背宮雲澹不流。蓬山佳氣曉來游。沙邊暗渚通魚簾。樹裏明霞隱鳳樓。尺五天低分勝地。重三節過趁芳遊。依稀憶得江南景。幾陣香綿撲渡頭。千條柳色亞紅闌。步履探春未殘。曲沼水平三尺漲。芳隄花殿一分寒。風前競載青絲榼。葉底徐調碧玉鞍。不厭閒來頻拄頰。西山濃翠在林端。

韋曲修禊之會以風雨不果賦詩二首志悵并邀諸公同和

上除風景待招尋。聯轡宜過曉郭陰。聽雨聲從殘夢覺。惜花情比憶家深。浮盃枉渚虛高會。穩几閒窗付冷吟。漲遍華嚴川畔水。握蘭何處濯芳襟。

油雲隔斷曙霞紅。尺五天邊話未通。芳草自遮游屐路。落花空惹鬢絲風。仙源幾曲虛無裏。春信連番曉晚中。贏得履綦多勝侶。嘉辰一樣擘牋同。

恭紀皇上肇建辟雍釋奠講學禮成一百二十韻

軒陛垂衣日。虞廷緇瑟時。道原符一揆。治正洽重熙。保合洪鈞化。從容上聖姿。百王兼損益。一統集君師。巍煥超前代。漸摩訖遠陲。龍圖應出水。鳳瑞夙聞岐。載考鬯宮制。言崇國學儀。名先徵米廩。典特備蒼姬。育德歸宣教。明倫溯秉彝。士風膠序起。王迹鎬豐追。共識敷文廣。寧容舍業嬉。夏弦遊藝圃。春誦下書帷。械樸齊翹秀。菁莪並展猗。奏公於樂詠。翼子厥謀詒。俊造升由此。明和義在斯。昔曾傳雅化。今幸值昌期。府事歌惟敘。工虞慶允釐。握符參昊緯。布德偏黔黥。景緒恢前烈。康功救百司。綏猷臻秩秩。建極倍孜孜。閭渥埃紘浹。威稜徼寒馳。巡方臨澤國。問俗到農菑。軌順宗河曲。瀾恬巨澗湄。拓疆通版索。藏富裕荊茨。祕閣全書弄。奎章御集摛。天文昭倬彼。聖德懋祇台。妙協從心矩。深籌復古規。成均洵首善。起化有深裨。四學稽周舊。三廳陋漢遺。明堂稱莫辨。太室號非宜。左右分形異。方圓聚議滋。鴻都書漫集。虎觀典空緯。

縱有浮文飾。何關大道仔。循名期化導。責實愧平治。自立燕都監。猶虛璧水池。崇儒逢聖化。典學企文思。所貴功能創。寧虞制久虧。溧泉盈自足。修綆汲非遲。道統光虞夏。心源接昊羲。誠惟歸獨斷。工不待疇咨。爰詔司空建。仍頒內府貲。庀材羅白石。鳩役給朱提。巧引璇源派。寬涵學海漪。旋邱流四繞。象島水中坻。崇殿巋然立。平臺屹不欹。虹梁排蠖竦。鴛瓦復琉璃。金碧輝瓊牖。丹青麗繡栴。繽紛凝秀藻。鞞鞞映芳芝。四面齊開闔。千尋自亘槐。清嚴森黼辰。洞逞敞罍恩。映碧燭埃塏。迴環抱渺瀾。文瀾來有本。聖澤匯無涯。似砥分塔城。連雲接棟榱。經營占定室。揆度集般僮。教胄嗤梁武。從公隘魯僖。落成昭御記。雒誦仰宸詞。制度甯沿襲。淵源泯合離。折中歸正大。取象協崇卑。赫赫鑄豐碣。煌煌煥巨碑。勤倦垂至訓。締造溯不基。典本殊羞者。儀休混養耆。父兄難比事。更老足傳疑。未許鋪張甚。終餘傳會嗤。說祛千載謬。天縱一人知。歲應旛蒙籥。祥開大衍著。億齡增帝秩。五世茂天支。恰值曾元會。彌欣福嘏綏。綿綿榮翠颺。翼翼衍金枝。鳳詔元辰沛。鴻恩薄海彌。官僚頒誥綽。岳瀆薦香匱。啓讌還繩武。臚觀廣錫禧。彤宮羅綺席。鈞庀列龐眉。豐鑠同扶杖。聯翩各捧卮。華筵情衍衍。壽宇樂怡怡。淑景陽春滿。韶光仲月推。瀛洲萌細草。太液渙輕澌。報社先翔鳳。遷喬乍嘯鸚。濃脂桃暈萼。淺黛柳抽絲。翠律重迎節。青旛漸暖颺。上丁行秩祀。先甲致齋祇。掌故修宗伯。章程飭奉祠。習容何肅肅。觀禮到祁祁。鵠立聯簪綬。鳧趨接履綦。告充陳俎榘。蠲潔列盂盃。省視周卿尹。供張屏隸斯。玉鸞星鳳駕。銀箭夜何其。曉漏速留點。朝陽未展曦。鈞陳嚴鹵簿。禁鑰啓葳蕤。

屆候洪鐘動。凌晨綵仗移。明燈方引隊。曙色欲開熹。子佩還馳道。儒冠跂廣逵。祥烟籠瑤蓋。瑞雪導華輿。  
陟降容皆中。明禋志自持。黃流盈玉瓚。白粲阜明粢。奏管音諧鳳。鳴球典命夔。精誠瞻秉鬯。博碩助陳犧。  
禮樂看隆備。神人共宴饗。馨香升普淖。儀物會芬麗。講席當陽敞。琅函乙覽披。緝熙彰聖極。行健闡乾維。  
穆穆倫常具。昭昭晷度垂。功惟存敬止。道自契誠之。徵鼓來踰濟。摠衣效肅愷。敷言宣御案。髦俊跽彤墀。  
盡聳愚蒙聽。難攄淺見窺。牖民真孔易。覺物本無私。翠蹕初旋軫。珠纓尙綴旗。喜看花六出。先卜麥雙歧。  
命以重申布。恩從百爾施。匪頒均示惠。式晏並宣慈。解額加增廣。官聯錄等差。尙方陳綵幣。儀部具珍醴。  
慶靄偕驤首。醴膏盡浹肌。雍容三代禮。保定九如詩。自顧材齊櫟。惟知慙矢葵。觀光陪近侍。拜獻媿先資。  
忝與分茶賜。榮叨珥筆隨。延洪誠樂只。盛典足昭茲。紀燾音徵雅。敷疇福備箕。府颺逢景會。抃手頌春祺。

恭頌皇上東巡盛京上陵禮成百韻

并序  
代作

乾隆四十三年歲在著雍閏茂秋七月。聖駕出山海關。邁瀋陽。恭謁三陵。紹聖祖之家法。追懷列祖。繼世垂統。萬年啓佑之成。蠲吉戒塗。經行內地。不行圍。不筵宴。却高麗扎薩克諸外藩之朝賀。鑾輿肅穆。共帳不移。忝徒無擾。于以省方觀民。廣補助之仁。舉懷柔百神之禮。太常歲事。大孝光昭。甚盛典也。小臣江鄉下士。恭逢皇上龍飛首祚。會應博學鴻詞科。乾隆十六年。復薦舉經學。自惟學術。龔陋。估畢無成。由直隸河工丞倅。薦陞府道。奉職閩滇。旋以軍需冊籍。罷誤。降調。遵例捐

復。茲當赴銓之時。恭遇法駕時巡。隆儀載舉。孝思維則。曠越三古。臣不勝揄揚大美。形容盛德之思。又憶五年前奉發雲南。蒙恩召見。溫語垂詢。臣尙能作詩文否。臣今年七十有三。雕蟲末技。結習未忘。瞻就光華。遙睇珥筆侍從之班。負乎天上。不揣荒疎鄙陋。輒賦五言百韻。叩獻行在。恭呈乙覽。山雞舞彩。儀鳳羽以何年。小草傾陽。効葵衷於此日。臣無任激切屏營之至。謹拜手稽首而獻詩曰。

宗國星畿左。興京遼海東。中天開王氣。奕世襲淳風。弓劍三陵思。山河百戰功。撫時紆永慕。追遠展純衷。孝治光天下。恩膏徧域中。睠茲根本重。稽古典章崇。月出衣冠舊。時巡律度同。燔柴喬嶽峙。奠璧翁河漲。俯念勞民吏。遵途指鎬豐。柳邊停宿帳。碣石記郵筒。水土涼汀便。炊烟蔀屋饒。子來爭汎掃。市集靜喧吁。先甲頒明詔。新秋啟玉驄。和鸞來迤邐。長白望崑龍。星宿環黃道。烟嵐夾翠籬。巍巍峙龍虎。肅肅守靈籙。玉瓊馨遙薦。珠邱氣自翁。綿瓜徵釋釋。黛栢列芄芄。展拜橋山下。深惟創業隆。十三戎甲奮。千億帝圖雄。應運開堂構。乘時蕩祲氛。義旗揮日耀。雷鼓震天籟。赫矣思謨烈。佳哉望鬱葱。薰蒿動悽愴。靈爽儼瞳矐。馬汗猶流石。龍髯不挽弓。風雲長共護。霜露罔時恫。締造丕基鞏。凝承寶命隆。餘威助神武。大業益昭融。遠定濛池部。旋除葑徼兇。髦頭掃星燄。亥步極天幃。競引梯山索。頻浮度海幢。龍荒恢版籍。雁塞闢耕墾。玉帛九垓會。車書萬里通。殊勳歸默佑。遺澤衍龐鴻。拱極峯形遶。朝宗水勢淙。祥輝晴縹緲。雲氣曉沖瀾。

鍾毓傳靈寓苞符翊聖躬。精神通沕漠。治化契鴻濛。紀運長開泰。占年屢告豐。八方徵輯睦。萬姓鮮榮癘。  
弭節遵周道。留都啓法宮。時方際熙皞。念益秉謙冲。綈服去雕組。茨檐謝璧珉。不煩賀鷟。奚取獻豨。從。  
寶賚辭藩服。笙簧罷瞽矇。暫教停晏饗。盡遣戢戈矛。旋蹕商辰肅。懸郊旭日彤。扶桑延曉曙。若木耀晴空。  
關勢雄巉巖。溟支抱潰泓。霏英凝浩露。爽籟拂高颺。巨浪恬澄練。明霞絢綵虹。碧霄鴻送唳。蓬島鶴開攬。  
向是神仙窟。今爲雨露叢。村村收棗柿。處處足葵菘。築圃登新稼。盈場記束稷。溝塍紛綺繡。磳壑響玲瓏。  
疊岫浮濃翠。輕塵簇軟紅。珠囊光奕奕。玉燭照熊熊。法祖真繩武。臨民每達聰。乾行周不息。兌澤沛無窮。  
喜洽謳衢子。歡生擊壤翁。農歌溢阡陌。帝謂接崆峒。微賤慙臣質。生成托化工。經纔貽祖父。志卽立孩童。  
砥行希原季。虛聲媿賈終。制科叨薦剡。賢榜隔飛翀。素抱常傾藿。生涯類轉蓬。防河爲小吏。負土竭愚悃。  
所幸邀綸綍。眞看脫勒籠。七閩紆印綬。六詔駐車輦。治仰東西漢。賢師大小馮。詩書化椎魯。牒訴息嘯訶。  
地產稱殷富。人情率愿侗。最宜宣德意。相慶靖邊戎。盈縮籌軍糈。辛勤問鞠窮。機絲嫺棘女。餽粟壓蠻僮。  
僮俛期無斃。馳驅急在公。涓埃虛報効。文籍坐迷營。鐫級原非枉。歸田詎有痾。未甘儕散櫟。猶是戀宸楓。  
自揣年非壯。兼愁智復憊。之無字粗識。亥豕誤能攻。欣遇文明代。宏搜典冊藁。薰分藜閣火。勝縮虎符銅。  
咫尺天顏近。汪洋聖度洪。矢音聊見志。發覆願披忠。祇自耽蟲篆。何曾識豹鮄。庶幾清問及。萬一下乘充。  
寒意回枯柳。清音出鬱桐。珠光借魚目。鴛鴦策霜鬢。荆璞憐三獻。羔皮飾五綬。遙瞻雲糾縵。欣迓轡瓏瓏。

至治昭巍煥。元音覺贖聾。敢言供著作。祈與牖顛蒙。重趺隨班馬。長吟等砌蟲。十年濡賦筆。百韻上詩筩。祝擬籌添海。呼宜響效嵩。迎鑾方濟濟。抱悃轉忡忡。葑菲如堪採。稊稂實待蠲。擊轅呈里曲。翹首望高穹。

覺生寺大鐘聯句

華鐘鎮祇園。曹仁虎廓然容萬斛。佞佛成祖營。青浦王祖述庵役徒少師督。激電移歲時。上海趙文哲璞函傳燈閱涼燠。探

勝據遠懷。南匯吳省鈞白華趁閒討遺躅。車遲會城阿。江寧嚴長明道甫寺聳大道曲。豐碑蛟螭蟠。平湖沈初雲椒巍座龍象蹴。

周遭庖廡。上海陸錫熊耳山錯立栝松榭。駸薛鋪城塔。仁虎倒茄麗樓袂。威神屏方良。初怪偉圖忽儵。流鈴戛郎

當。文哲法鼓震塗毒。繡繪內家旛。省鈞琳笈中禁軸。幽響飄迦陵。長明妙香散篤耨。眈眈廣院呀。初屹屹岑樓蝨

鼇柱擎坤維。錫熊雁堂仿乾竺。風櫺亞差參。仁虎露拱盤歷碌。上枕腰彎環。初緣壁脚彳亍。蟻穿窳以深。文哲

旋往而復。趙趙筍簾橫。省鈞帖帖蒲牢伏。其圍四尋餘。長明厥徑三仞足。重八千衡羸。初高十六尺縮。績石儲

廩困。錫熊量祛越方幅。頂同孟體圓。仁虎身作鏡光煜。辨名殊重脣。初取象類大腹。排鑿饕餐蹲。文哲介篆虹蜺

束昂俄夔首。撐。省鈞瑣碎虬紋簇。哆張陋釜鸞。長明雄峙咀鼎鬯。有銑兼有鉦。初非錔亦非錫。中懸廬肖穹。錫熊

下覆室成覆。熊熊景常歛。仁虎黝黝色轉沃。烟温湧帝青。初繚繞暈官綠。含霜九芒寒。文哲炫日五采昱。鋒棱

沙畫錐。省鈞縵理錦交縟。重爲遠匪行。長明共作迴環讀。華嚴繙寶函。初般若譯珠積。品經貝葉傳。錫熊眞偈蓮

花續。體變盧佉文。仁虎語想釋伽囑。蠡紐危自垂。初鯨桴怒相觸。雷音走隆隆。文哲廳韻汜謾謾。應大昭小鳴。



中左羽右喙。豈立號立橫。明長乃滿阡滿谷。日動氣必宣。初維空聲斯蓄。警宵分雞籌。錫報午間魚粥。旅

魂感恫惶。仁山鬼拜蹕跼。大地咸震醒。初諸天正清穆。聲聞豁塵襟。文喟息稽故牘。主鬯藐孱孫。省操戈

恣悍叔。時方息龍爭。明長事忽符燕啄。腹心寄齊黃。初羽翼剪代蜀。葛藟忘庇根。錫椒聊使盈匊。啓疆假以

權。仁睨器求所欲。連營諸將曉。初入幕一翁禿。識誇瓦墮空。文計詭壁藏複。飛颺鞬脫鷹。省跳突原走鹿。

歌風北方強。明長占繇南國盛。臨江勢已成。初割地議空瀆。郭門喧征輦。錫陵闕閃戰纛。宮中傳披緇。仁殿

上儼受錄。周公輔誰欺。初和尙誤難贖。紀年付革除。文鉤黨窮訊鞠。著緋衷刃趨。省要經投筆哭。嗚呼冤

哉烹。明長狼籍弱之肉。株連榜姓名。初羅織籍家族。兩仗修羅宮。錫列鋸波吒獄。孰雪重泉愆。仁莫逃一字

惡。魯弓假不歸。初周鼎遷重卜。鑄鐵悔六州。文貢金來九牧。象功愧和平。省懣禍懲殺戮。大慈見應噴。明

宏願持較篤。濁劫經刀兵。初道場會水陸。咨考工庀材。錫命將作救屬。銅調牝牡和。仁火扇文武熔。製器

倕工能。初揮毫學士獨。一磔復一波。文三薰更三沐。幅整資臨摹。省環圓試鏤鑿。搏泥外渾淪。明化蠟中

滲漉。封治長庚監。初開鑪太乙爨。瀉液凝碧烟。錫騰輝燦朱旭。咒鱗降蜿蜒。仁卦蚌塾殼舄。審音析毫釐。

中度辨黍粟。雄梁高引絙。文飛架圓轉輓。大衆謹讚揚。省羣靈駭馳逐。漫將毅魄招。明直使陰魔服。解

脫驅二災。初祈求迓百福。眞諦參每煩。錫善根種非宿。是爲有漏因。仁詎稱無重視。縱依淨土安。初終俾

吉金辱。疚心積孽多。文彈指流光促。沈埋痛瓜蔓。省倉卒報榆木。十朝舊物貽。明萬壽崇基築。明代是鐘

後移漢經廠萬歷五年建萬壽寺於西直門外移賜出從紫閣初移來近蒼麓聽周釋界千錫鐘於寺日俾六僧擊之見野獲編及帝京景物略

六喧寂任禪緣仁廢興易世局鴛舍藏至今租虎分禁自夙天啓中有言寺在帝里白虎分不宜地隨毫

社遷文世閱秦灰速啞棄堆泥沙省儼眠蔽樸檄剗苔過客摩長擲礫游童扑代已變滄桑初物仍寄輦

穀流傳四丁訛燕邱紀聞云是鐘鑄造及徙置萬壽寺年月日時皆四呵護六甲肅景運逢轉輪仁昌時

協調燭提唱通人天租秉持徹道俗闡法開化城文棲真榜靈囿挽以千馬車省貯之萬鱗屋奏殊辟雍

叢明長陳擬房序玉帝臨星罕移初聖作奎章燭正覺發顛蒙錫多生遂熙育仁水源功德滋租雲氣吉祥

郁文毋愴憑弔情且暢登臨目長新詩如叩莛初用補春明錄錫

顧震字葦田錢塘人乾隆二十二年召試賜內閣中書二十六年成進士官至刑部員外郎有一得齋詩

稿。

蒲褐山房詩話葦田能詩尤工書法極為梁文莊公所賞

丁酉科充江南副考官與今石菴相國同事號稱得人

湖灣種魚圖爲朱青湖賦

南湖水綠春雨初春波活活涵菰蒲潛鱗作隊自踴躍揚鬣鼓鬣相吹噓漸看和氣滿大澤水蟲懷子占多魚覆巢殺胎傳禮經意豈獨貸漁人漁漁人生計良獨殊浮家泛宅一葉如長竿大網意未足更有筌

罾罟罩罾與眾。攔截中流若環堵。鳴榔鼓枻窮朝晡。一寸二寸粥於市。腥風涎雨充庖廚。我嘗當食投箸起。可憐堆盤疊疊踰蟲蛆。暴殄天物古所戒。況復剝腸剖腹奚止千萬餘。魚生分合供刀俎。惜哉胡不寬斯須。古來畫工多好事。但繪溪山漁樂圖。漁家樂兮魚族泣。大小得失分錙銖。青湖居士寄興遠。不向烟波稱釣徒。買得魚苗種湖水。資其欲富師陶朱。祝渠永離網罟厄。子復生子或有蛟龍儲。我來披圖一軒渠。悠然想見魚樂乎。相看時作種魚想。生意滿懷魚滿湖。

看菊和申拂珊少京兆

移得東籬菊滿堂。招邀裙屐爲花忙。曲屏護處香彌冷。細竹扶將幹不傷。插鬢任看風落帽。捲簾尤愛月窺牆。休疑昨夜寒廳急。此卉由來是傲霜。

吳玉綸

初名琦。字廷韓。號香亭。固始人。乾隆二十六年進士。官至兵部侍郎。降編修。有香圃詩鈔。

過函谷

雄勝稱天險。乘春事遠遊。千山關函谷。一線入秦州。烟雨愁鞍馬。風沙滿驛樓。計程無幾日。萱草可忘憂。

華陰道上

嵯峨飛度碧雲環。百二雄封指顧間。白帝降精凝華嶽。黃河倒影射潼關。秦州車馬勞孤客。楚國風花改

舊顏。此去曲江亭上望。春波泛處浴鷗閒。

山下晚行

谷口無人野迳斜。秋風蕭瑟感年華。四山落葉亂飛鳥。萬樹遠松明夕霞。屢聽霜鐘尋古刹。擬沾春釀問誰家。歸來巖畔寒星掛。倚杖空林數暮鴉。

秋閨怨

龍沙今夜月如何。香霧雲鬢怨綺羅。一段別愁君記取。玲瓏畫閣夜涼多。刀頭有約事全非。斷續砧聲雁早飛。落日胡笳秋色冷。塞垣何處寄征衣。

李文藻

字素伯。號南礪。益都人。乾隆二十六年進士。官至□□知州。有恩平潮陽桂林諸集。

蒲褐山房詩話。素伯窮經志古。肆力於漢唐。註疏以粵東縣令。游陞州。牧引見來京。聞余有惠氏易漢學諸書。至余寓舍。借鈔大畧。中漫膚多汗沾漬衣襟。不以爲苦也。詩不多作。亦頗工隱。如觀音巖諸詩。尤爲雄健。惜年未中壽。歿于粵西。其餘著作無可表見者。嘗約其友人周編修書倉取經史著述之未甚傳于世者。刻爲貸園叢書。而素伯歿其後。遂不能續。今所傳者。止此十二種而已。

觀音巖三十韻

曉至觀音巖。橫舟試屣脚。洞門呀然闢。攝衣闖重鑰。白日忽昏夜。明燈僅微燭。拊楣山鼠飛。睡地谷神諾。屢折迷所向。踏石畏朽索。一竅開絕頂。俯瞰得寥廓。奔瀧圍佛几。來朝萬青嶠。形肖靡不有。獅象龍鳳鶴。

鍾乳當檐垂。旛蓋倒蓮萼。輪困寫毫光。珠玉飾簾幕。造物施供養。萬古無銷鑠。耄柄導我下。具茗半山閣。軒豁遊大廈。息定興磅礴。拂藓睇高壁。文字爭寄託。韓蘇所未到此。景遂寂寞。再下出洞口。乃見飴山作。南遊爲美莊。川巖入詩橐。磨勒得此三。南山連碧落。愴怳新城篇。片石誰爲鑿。回舟更仰首。萬仞一斧削。皴縐尺寸異。渲染朱綠錯。五丁猶夙聞。何人布丹腹。下有蛟螭蟠。上絕猿猱躩。松桂挂石棱。飛鳥偶附著。對此一長嘯。迢然滿崖壑。卻悔初來時。峭帆疾于鷁。夜夜蓬島夢。年年文書縛。山英留奇勝。及歸踐昔約。烟霞浮篷窗。兒女亦駭愕。行廚問薪米。將爲十日泊。

寄鄧謙持

見說炎方惡。此來殊不然。連山甘蔗地。細雨荔枝天。珠翠羊城市。笙歌艇戶船。紛紛恣清賞。天乞壯游緣。

嘉應州

風物隨方異。梅州二月天。沿溪鴉舅樹。近郭螳螂船。山色暮愁裏。雨聲寒食前。還須求老酒。爛醉寫蠻箋。

丁橋

翠鳥鳴沙背。紅泉轉樹腰。行人將午飯。驛舍及丁橋。笱橋蠻兒舉。衣箱撞婦挑。何人教引灌。辛苦見秧苗。

逼除有事澄海

昨宵身世落鴻濛。溪郭山墟扁舶通。涼到有聲榕葉雨。緣來無際麥苗風。蠻禽拍水春先滿。瘴果登盤歲

又終明日歸來須痛飲屠蘇酌後忽成翁。

惠定宇九經古義刻成寄示周書倉二十韻

紛紛數經義。吳下見顛門。紅豆無凡子。青箱有肖孫。心窮周易奧。化破夏書渾。僞傳成齋粉。多文挾本根。堯年誰與語。魯殿歸然存。亥豕因形識。蟲魚視掌論。障塵憑卻掃。疑獄仗平反。許慎勳同策。丁鴻義最繁。授徒開絳帳。仰屋謝朱軒。鐘鼓宣洪響。鍼砭到病源。直回秦室火。終食孔庭膻。世悟唐儒陋。人推漢學尊。前身應左史。接武或東原。翠軸勞郵寄。花廳快手翻。鬚緣聽訟白。眼到勘書昏。鈔版從蠻徼。傳家異兔園。諸生得津筏。絕業在乾坤。聖詔求遺籍。神州貢幾幡。千官品庖饌。四庫盡瑤琨。此帙寧磨滅。煩君獻九閭。

嵇承謙

字受之。無錫人。文恭公長子。乾隆二十六年進士。官至侍讀。有一枝直廬使軺蕉雨諸集。

舟行感興

我生嗜山水。一一記所見。昨歸望龍山。如識故人面。澄泉滴寒乳。霜嶺明晚茜。山靈知我思。風雨態屢變。攀躋未踰月。扁舟溯鄰甸。朝陽莅鳳岡。到處復留緬。

奉和弇山中丞前輩東湖翫月元韻

閉門校藝春如夢。微雨生涼夜似秋。綠徧東陽植畔柳。清歌落日快初遊。余以校士至鳳翔。市月竣事。太守田公邀遊湖上。爲竟日歡。

鎖院敲吟憶古仙。照牀明月鎮無眠。桃花潭水深情在。五馬春風小駐年。

### 蔣雍植

字秦樹。號漁村。懷寧人。乾隆十六年召試。賜舉人。二十六年成進士。官編修。

#### 春草次袁存齋韻

東風作意草芊綿。綠徧郊原又一年。遊興任尋澆酒地。客愁多在賣餚天。曾盤塞北千羣馬。尙憶湖南萬里船。何處銷魂最惆悵。蘼蕪山下夕陽邊。

### 吳興宗

字繼羣。江南華亭人。大興籍。乾隆二十六年進士。官安徽太平府通判。有記里編。

#### 苧城懷古

不泛天隨宅。誰尋范蠡湖。暮潮隨月滿。漁火隔江孤。蘆葦思窮士。烟波問釣徒。腐儒江漢客。一棹溯三吳。

### 馮應榴

字星實。桐鄉人。乾隆二十六年進士。官至鴻臚寺卿。

蒲褐山房詩話。星實英敏豁達。有幹濟才。既以江西布政使罷歸。益肆力於典籍。尊人養吾侍御注。李玉溪詩。最爲精贍。君師其意。以蘇文忠公詩注疏舛尙多。遂取王梅溪施輔之查初白諸本合抄之。以考其是非得失。所採正史而外。凡叢書脛說。可爲證據者。靡不蒐討。余撰金石萃編。載文忠石刻頗多。兼以後賢題跋。君亦獵取之。以爲助。亦可徵其精審已。

題陸璞堂臬使適園灌畦圖

灌園逃聘稱知幾。季世自合甘憂違。東坡種稻拾瓦礫。愍勤亦在投閑時。先生生逢堯舜代。釋未通籍依形闕。文章政事互彪炳。霖雨方佐深仁滋。忽然繪圖擬學圃。適園取義何淵微。承家七葉植德厚。培溉要使昌條枝。更俾子孫識至味。勿以梁肉忘耕菑。敵根始可百事做。澤物免令羣生飢。卷端自題屢致意。豈容淺見尋常窺。而我披圖轉悵觸。夙歡陳跡懷京畿。空宅東西初邂逅。平泉花木同因依。余始交先生於令昆耳山同年邱寓又並出于文襄師門下。自從賓館脫粟輟。重感池塘夢草希。我復歸田謀菽水。露芽霜甲貧難肥。仄聞雲間望彌重。清卿典膳增光輝。西江稂莠鋤削盡。旋來吾浙郇膏施。剪蔬雖虛故人召。拔薤已見頽風移。今年蠶花倍告稔。秋成飽飯良可祈。只餘隴蜀惡未刈。崆峒麥熟遑休師。宣房底績並緩報。哀鴻中夜猶鳴飛。願君滲漉普垓壤。無徒自適耽其私。

哭陸朗夫中丞前輩八十韻

白日驚雷震。騎箕信忽傳。悲深湘竹淚。淒絕楚琴絃。未答平生誼。終虛後會緣。才微漸述誅。德備漏言詮。盛壯馳英譽。孤寒奮大賢。機雲推八洛。鄒樂重游燕。孰進王孫飯。曾無子敬氈。高冠瞻獨立。峻骨恥人憐。韓愈書稀上。歐陽鑒最先。公爲家君門下士固知千里足。必遇九方甄。榴官中書公即薦入樞禁自後同直宿扈蹕者凡五年拜度支遷。汲引勤無倦。迂疎愛獨偏。爨焦勞拂拭。冶躍藉陶甄。後同直宿扈蹕者凡五年媿我竽吹濫。



從公武接聯。星廬常並帳。花苑每連羈。健筆凝如鐵。冲懷靜若淵。儉甘公膳飽。暖戀故裘便。下直耽吟誦。

羣書好貫穿。八分家學遂。尊翁虔實先生精。隸書公能繼其學。五色彩毫鮮。幾載相攜手。同方罕比肩。一麾樓現屋。三接斗

移躔。雨露從茲渥。冰霜自昔堅。公出守登州。次年東巡。屢蒙召對。由是駭駭嚮用矣。浦珠還郡吐。官燭能宵燃。所至能安堵。寧惟不

愛錢。護真同襁褓。辱但示蒲鞭。信諫言雖戇。平反獄必研。公守濟南。曾力爭一疑獄。為之昭雪。忠看王馭叱。威仰賈帷褰。公擢

西寧觀察。請奉太夫人南歸。即赴任。上為嘉許。改調運河。俾便迎養。歷晉藩。臬均不離山左。鈴略消羣盜。公於王倫作亂時率屬防守。城籬仍以時啓閉。源流訂百川。公著運

書。恩教依色笑。績更著旬宣。度量涵溟澥。丰標峙岱巔。途方異冰炭。行豈汗腥氈。局以知難退。操因自守

全。萱闈暉欲報。蓉闕悃仍懸。公以太夫人年高乞養。優詔允准。去有床留壁。歸惟石壓舷。鴛湖隣暫卜。鶴算景長延。謝客

餘羊仲。窮經儼服虔。貴猶親杖屨。契益協蘭荃。坐久春風竊。談深夜月圓。慰衰供藥物。候疾問餐眠。公篤

誼。久而不易。孝鳥鳴初急。哀鴻瘼未蠲。故官從特起。優詔為行權。公居太夫人憂時。以河防未竣。特詔奪情。仍任東藩。山左輿歌遍。衡陽

闈寄專。單車衡岳雨。襍被洞庭船。列戟門疑水。焚香事告天。自然翔鸞鷲。詎待效鷹鷄。稂莠芟畦隴。和甘

被市塵。謨猷垂可久。勳業溯無前。隔朔書曾達。兼旬疾未痊。公於六月朔日。手書寄榴述病狀。且云別有會心。不以為苦。去來原了徹。

往復轉纏綿。妖異徵棲鵬。愁非視跼鷲。民肥身已瘠。春厚報寧涓。回首鄉關遠。崇朝館舍捐。舉扶安第席。

占卜罷筮筮。軫惜層霄切。湘藩以公歿告。上批諡可惜。悲號四境連。慙遺無一老。盡瘁竟重泉。竹是銜恩植。碑緣墮淚

鑄。賻金貽舊掾。甘薯採遺編。公官山東臬司時。偏甘薯錄一書。為備荒之策。邇因豫東被旱。大吏以公書進呈。上閱之嘉嘆。特勅刊布勸民種蒔。而公歿已月餘矣。想像靈

輻發蕭條素旆旋。妻孥仍異縣。墓舍少良田。清白堪遺後。逍遙定證仙。全歸公已矣。隻影我漚然。樗櫟材成散。蝸鳩性賦顛。屏藩司重任。邱岳積前愆。苦蘖嘗如此。良箴勗慎旃。同期心匪勉。互戒俗輕儼。整帶還褫職。囊鞬促赴邊。自慚官守曠。敢怨命途邇。申命邀寬大。餘生予滌湔。汗漿哀病驥。飲露咽疎蟬。縲絏驂先解。櫛因事奪職。軍臺効力。公以俸廉助贖。雲羅網又牽。路岐增悵惘。雁遠託勤拳。銜結中懷矢。追維萬慮煎。託孤心肯負。撫抱痛應填。知己今誰偶。招魂路幾千。寢門迷渺渺。芻束乏芟芟。永輟床頭瑟。重披篋裏牋。黃壚過寂寞。白髮洒潺湲。有恨成終古。無朋伴老年。衡茅他日返。漬酒認荒阡。

### 崔龍見

字幔亭。永濟人。乾隆二十六年進士。官荆宜施道。

癸卯冬暮杭州無軒司訓屬和芝山甥題湘管齋圖元韻

廿年作吏無老屋。官退恰如鮎上竹。竭來從事古餘杭。雪霽湖山積寒玉。太邱把臂恨較晚。眉宇軒然照人綠。休嗟冷宿滯春盤。會見幽蘭出香谷。問君高齋何所有。萬个琅玕悅心目。好事能藏漢代碑。君藏漢碑多善本。集古蚤著歐陽錄。近刻有寓賞編。爲言愛畫通神解。吾甥弄翰差免俗。芝山三卷中顯識盡英賢。絕藝同工非異曲。庭有懸魚今哲匠。君爲太守鄭楓人先。生門下士。延賓館。肯令坐客食無肉。待尋湘管諸素心。朱笠亭大令爲作素心閣圖。勝覽他時傳祝穆。

春雨次趙味辛舍人韻

好雨及芳時。疎梅半着枝。雲低沾袂重。苔淺上階遲。烟柳張思曼。風花江總持。陽和霄漢意。留待舍人詩。

儲祕書

字玉函。宜興人。乾隆二十六年進士。官至黃州知府。有絨石齋詩稿。

蒲褐山房詩話。玉函好游汗漫。兩度嶺南。中年後始中。甲科數載。省郎一麾出守。尋以罷官歸卒。其詩淡而實。腴清而不激。正如素練。輕纖雅宜。時用五言。有鞭絲紅稻。雨帆影白蘋。秋竹陰清。石燈花。雪銀燭。小樓春。峽暗漁燈小。江空戍角高。月迎人滿山。花背客妍苔。階微霰白。竹屋亂烟青。玉侮殘夜。人在綠陰村。雨色盡歸山一角。春光恰到柳三眠。客辰先覺涼風至。鄉思空隨夜月盈。衣袖尚存慈母綫。盤殮重剪故園蔬。故園重見花如雪。舊雨相看鬢有絲。綠蔭邨邊孤寺掩。春陰牆角一花明。倚閨有母心空切。負郭無田計總非。燭殘客舍聽蛩語。葉滿長安送馬蹄。同人每傳誦之。又工倚聲。見予所採國朝詞綜。與其鄉任曾貽史承謙相埒。

枕石軒小集贈澤周

老屋倚城根。幽人此高寄。冷然琴聲罷。剝啄時一至。散帙坐涼軒。披襟受空翠。微月映花叢。林亭淡春意。清譚易淹留。薄酌不成醉。願言共晨夕。永謝塵中事。

瀨江道中

扁舟越寒溪。篷窗正愁絕。餘霞散復收。遠火明更滅。匪叫一天霜。漁歸半帆月。舟人指前灘。灘水空陳蹟。我行歎飄蓬。望望烟波闊。濁酒聊自斟。羈懷那可說。平生對清景。強半在行役。

過友人山居

招尋出城南。迤邐翠微路。峯陰豁清曉。花氣釀春暮。濃綠罨山村。鶯啼不知處。連塍宿麥秀。隔竹新泉注。雞犬何翛然。幽人此間住。摘蔬留客飯。就石安茶具。習習松下風。遲遲晷景度。晏坐竟忘言。羲皇靜中遇。

西城觀冰歌

層城兀峙西河灣。茫茫千頃浮波瀾。城頭三日北風吼。雪花如掌愁雪繁。朝來風定水亦結。大地凍台琉璃盤。蓬萊宮闕在人世。晶光照耀陵心顏。點染但見亂鴉黑。空明遠映霜楓丹。銅峯一帶忽無影。罨畫竟作生絹看。我昔客游歲云暮。層冰嵯峨塞燕關。行人利涉務巧製。冰牀絡繹紛河干。臨流不作老狐聽。宛然車轂交迴環。可惜南人不解此。膠舟歷歷蘆花灘。檣摧櫓折納手坐。瓶空粒盡愁眉攢。前村有酒沽不得。咫尺徒歌行路難。

臺莊雨次

松花明驛路。客子尙披裘。山鳥呼泥滑。人家過麥秋。遠遊忘節序。多雨憶田疇。照眼清淮近。飄然一葉舟。

丙子元日

楚岸光風轉。輕帆拂曉懸。江流開霽色。山郭入香烟。故國猶千里。征途又一年。梅花曾有約。計日盼歸船。

寄跡

竟日衡門掩，蕭然客館清。竹烟寒不起，松雪夜微明。煮茗消殘漏，攤書戀短檠。蹉跎歸未得，愁絕歲嶢嶢。

松陵舟中漫興

路入松陵百里餘，霜臯木葉未全疎。風帆零亂頽陽外，漁火荒寒小雪初。旅食苦無鱸作膾，吟情惟有雁斜書。經旬醉臥孤篷底，誰道清遊勝索居。

桐廬道中

山遠桐江碧四圍，輕舟日日弄清暉。人家一帶綠烏桕，帆影相連入翠微。到處灘聲經雨驟，等閒魚味及秋肥。高蹤輸與羊裘叟，一片吟情屬釣磯。

九日抵廣州

搔首南天對夕暉，越王臺畔卸征衣。岩巖樓觀臨滄海，縹緲人烟接翠微。鄉信更無鴻雁達，秋風祇有鷓鴣飛。今朝正是重陽節，何處東籬採菊歸。

春日懷故園

天涯節序近傳柑，嶺外梅花未許探。最憶故園風日好，霏霏香雪石亭南。

沈士駿

字文聲，長洲人。乾隆二十六年進士，官編修。

塞下曲

邊城木落雁南飛。颯颯金飈塞馬肥。  
今夜李陵臺上月。照人何處搗寒衣。

上海图书馆藏

上海图书馆藏书



A541 212 0006 1671B

